



8

1. d

60

6

K

10

Ex Bibliotheca
majori Coll. Rom.
Societ. Jesu

54
11
17

74


71

16

8.-1.2.60.








TEMPE HELVETICA,

Dissertationes atque Observationes
THEOLOGICAS, PHILOLOGICAS,
CRITICAS, HISTORICAS,
EXHIBENS.

Tomi Tertii

Sectio Prima.



TIGURI,

EX OFFICINA HEIDEGGERIANA.
M DCC XXXVIII.

V I R O

*Nobilissimo, Spectatissimo,
Celeberrimo*

LUDOVICO
BOURGUET.

PHILOSOPHIÆ

Ut et

MATHESEOS

Apud Neocomenses

PROFESSORI PUBLICO.

Plurimis

In Rempublicam Literariam

Meritis

CLARISSIMO.

Historiarum & Linguarum
plurimarum

Promo facillimo atque perpetuo.



· VIRO ·

Animi candore, Officiorum promptitudine, omnique elegantioris Doctrinæ laude famigeratissimo.

SECTIONEM NONAM
Collectionis Philologicæ

In
HELVETIA
susceptæ

Omni cultu & prompti animi testificatione
dicat atque inscribit,

Illumque simul ad hæc Miscellanea dehinc ex
abundantissimo *Ανecdωτων* thesauro
illustranda provocat

J. GEORGIUS ALTMANNUS.



LECTORI ERUDITO

S. D.

JOH. GEORGIUS

ALTMANNUS.



AD tertium jam accedimus Collectionis nostræ Theologico-Philologicæ tomum parandum, cum, Deo benigne annuente, duo præcedentes non tantum lucem viderint, sed & benigne hætenus a Viris doctis fuerint suscepti, atque præter multorum spem Tomus primus jam secunda vice prælo fuisset subiectus. Grates vero debemus Viris honoratissimis atque amicissimis, qui eruditissimis suis observationibus ita nostrum iuvarunt institutum, ut eorum favore & voluntate hæc Miscellanea aliquam doctorum gratiam atque favorem sibi conciliaverint. Illos ideo publice hoc loco oramus, ut & dehinc eruditas suas observationes in emolumentum rei literariæ nobiscum velint communicare. Verbo vero in hoc Tomi tertii præfamine monendus est lector, nos præter primum nostrum propositum, quod in procæmio Tomi primi

declaravimus, scriptum eristicum inseruisse, quod ne contra fidem datam factum videatur, aliqua hujus rei ratio reddenda videtur. Scripserat ante annum circiter Vir Juvenis ornatissimus, **LUDOVICUS COCHETUS**, S. S. Ministerii in Academia Lausannensi Candidatus, Dissertationem Theologicam, satis amplam, in qua Vir doctus diversa Systemata illorum, qui sibi nomen Christianorum vindicant, synthetice deducta se exhibiturum promittebat; sulcitavit subito illa dissertatio, ut in plurimis Helvetiæ nostræ Academiis, ita etiam apud nos molestum nobis atque ingratum rumorem. Plurimi enim suspicabantur, talia illam continere, quæ cum doctrina Ecclesiæ Reformatæ minus conveniunt, & ut verum fatear, indigne admodum ferebant plurimi Ecclesiæ nostræ Ministri, talem prodiisse dissertationem, ex qua nonnulli forsan colligere possent, doctrinæ Evangelicæ puritatem in Ecclesiis quibusdam Bernensibus detrimentum capere. Premebat nos etiam, culpari à quibusdam Cl. Ruchatum, dissertationis Præsidem, qui nil alieni de Ornatissimo Auctore suspicatus, nihius ejus ingenio & eruditione, nomen ad præsidium concesserat; dolebamus Virum Plurimum Venerandum, pietate, eruditione atque doctrinæ sanctis semel traditæ integritate ubique cognitum atque perspectum, ad hanc litem postulari. His rebus motus Vir Doctissimus atque Reverendus **SIMPLICIUS VERINUS**, animadversiones Criticas ad me misit, ut illis in Tempe Helvetica aliquis locus concederetur, & cur id fecisset rationem addebat, *ne forsan apud exteros quædam oriretur suspicio, tam laxos esse Theologiæ nostræ cancellos*

los, quales adversariis nostris magni nominis Theologi in Germania, Hollandia atque Helvetia, nunquam concedere voluerint. In communi hac apud nos & vicinas Ecclesias concitatione adversus dissertationem Præstantissimi *COCHETI*, meum non erat, locum in collectione mea *ANIMADVERSIONIBUS CRITICIS* quasi nomine publico scriptis & ad me transmissis denegare, hinc compa-
ruerunt Temp. Helvet. Tom. II. p. 311. & seqq. in quibus Rev. & Doctiss. Auctor amore veritatis abreptus, nimio forsan, ut plerumque in scriptis fieri solet cristicis, fervore rem suam egit, causamque nostram acerbiori stilo defendit; Ego equidem nunquam in illa fui sententia, Ornatiss. *COCHETUM* in sua Dissertatione id agere voluisse, ut sanctissimæ Religionis nostræ capita cum dissentientium opinionibus confunderet, vel Socinianorum Arminianorumque asserta Doctrinæ nostræ, quæ sola secundum pietatem est, adaptaret. Hoc autem Vir Juvenis & dotibus ingenii & eruditione ornatissimus, ea qua pollet humanitate & æquitate, facile haud dubie mihi dabit, quod illam Dissertationem scripserit in illa ætate, de qua teste Quintiliano *Et spes Et favor, Et audere non dedecet, Et si quid desit operi, ætas possit supplere.* ideo etiam Præstantissimum ac magnæ spei Virum ex hac causa dehinc non amplius exagitandum esse existimem, cum hac in re idem subierit fatum, quod plurimis Viris doctissimis atque celeberrimis evenisse notum est, qui in prima ætate animadversionibus censoriis notati, tam accurate scribere didicerunt, ut eruditissima ac utilissima opera posthac cum orbe literato, meliora edocti, ut pro-

prio exemplo prudentiores facti, communicaverint; Probavit id jam ex parte in responsione ad *Simplicii Verini Animadversiones*, quas, ut justæ defensionis detur locus, sectioni nonæ inseruimus; Placuit etiam Doctissimo *Verino*, responsionem Ornatiss. *COCHETI* ad aliquod examen revocare, in quo cum orthodoxorum sententias elegantissime, præsertim circa Systema Supralapsariorum doctè & mira perspicuitate exposuerit, quæ nobis in hanc rem transmissa fuere, adjecimus. Scribendi rationem in utroque scripto mitigare in plurimis locis potuissem, si id pace doctissimorum virorum fieri potuisset. Cum autem Theologorum æque ac Criticorum mos sit adversarium suum atroci stilo confodere, nolui scriptis & cogitationibus in chartam eo quo sibi modo proposuerant conjectis manum inferre violentam, ne quid præter mentem eorum vel scopum immutatum dici posset, vel ego inter duos litigantes aliquam vel rixæ vel indignationis alapam mihi consciscerem. Hæc pauca sunt quæ in hac præfatione monenda videbantur. Vale benevole lector, & laboribus nostris fave.



I.

LUDOVICI BURGETI, NEMAUSENSIS, DISSERTATIO

De

Vero atque genuino Juris Naturalis
studii usu. *

Argumentum.

- I. Restauratæ duobus his ultimis Seculis scientiæ. II. Speciatim Jurisprudentia. Dissertationis Summa. III. Jus Naturæ quid? IV. Disputatio de ejus Origine logomachiam involvit. V. An dentur Ideæ aut notiones innatæ? VI. Juris Naturæ Origo a Voluntate Dei repetenda est, sed non ab arbitraria.

A 5

VII.

* Transmisit eruditissimam hanc atque elegantissimis observationibus refertam Dissertationem Cl. Auctor jam ante aliquod tempus, prælo hætenus nunquam subiectam, & in qua Philologi æque ac Philosophi plurima quæ ad rem suam faciunt invenient. J. G. A.

VII. Pufendorffii & Leibnitzii sententiæ conciliantur. Ulpianus notatur. VIII. Juris Nat. præcepta respiciunt primo Deum, unde Religio Naturalis. Notantur Grotius, & alii, qui Jus naturæ a Religione naturali separant. IX. Idem continuatur. Veterum Gentilium sententia de Virtute cum Felicitate conjuncta adfertur. Theognides & Hesiodus vindicantur. X. Præcepta Legis Nat. etiam futuræ vitæ felicitati accommodantur. Summa Religionis Nat. additur. XI. Docetur, quali cognitione & cultu Dei absolvatur. XII. Sequuntur Officia Hominis erga se ipsum. Non sibi soli natus est, sed etiam Societati. XIII. Axioma generale proponitur, ex quo singula Juris Naturæ & Civilis officia promanant. XIV. Virtutes præcipuæ ex allato axiomate fluentes recensentur. Grotius & alii notantur. XV. Polygamiam, Incestum & Divortium, Juri Naturæ adversari, demonstratur. XVI. XVII. Eadem Demonstratio de Polygamia in specie continuatur. XVIII. Et objectionibus respondetur. XIX. XX. Patriarcharum exempla subjiciuntur examini. Diverſa S. Scripturæ loca vindicantur. XXI, XXII. Incestum contrariari Legi Nat. adstruitur. XXIII. Nec minus Divortium. XXIV. Non omnes homines in omnia indiscriminatim jus habent, nec status belli eorum status naturalis est.

§. I.



Ei optimi maximi beneficio factum est, ut his duobus ultimis Sæculis renovatæ fuerint omnes scientiæ & artes. Neque hîc perstitit summa Creatoris erga homines beneficentia. Duo enim hæc Sæcula (a) novas nobis peperere Scientias; Geometriam novam, novamque Analysin, Astronomiam novam, novam

vam Mechanicam, Physicam novam, novamque inde (b) Scientiam nec nomine tenus antiquis cognitam, quam Telluris theoriam dixere recentiores.

(a) Preface de l'Histoire du renouvellement de l'Academie des Sciences en 1699. Amst. 1709. Adi si lubet Baconii, Galilæi, Cartesii, Boylei, Newtonii, Leibnizii, Bernoulliorum, Hugenii, Hospitalis, Varignoni, Cassini, Hermannii, Malpighi, Redi, Vallisvieri, & sexcentorum aliorum scripta.

(b) Hanc scientiam illustrarunt, Gonzales de Salas, Ste-nonus, Grundi, Bocconus, Seila, Burnetus, Wood-vvardus, Whiston, Scheuchzerus et alii quam plurimi. Uno verbo eorum omnium Opera, quæ de Terræ motibus, de illuvionibus, & alluvionibus, de mineralibus, de situ atque montium dispositione, de fontium, fluviorum, ventorum, æstus maris, Insularumque origine, & id genus alia, tractant, multum ad ejus scientiæ perfectionem conferre, demonstrarunt Neoterici.

§. II.

Jurisprudentiæ etiam nec minus favit Providentia, suos etiam habuit restauratores *Holoandros, Budaeos, Hottomanos, Cujacios, Gothofredos*, aliosque quamplurimos; *Grotium* tandem *Puffendorfiūque*, qui nova facie hancce Scientiarum Reginam exornarunt, eoque nomine aliis extitere majores. Illi fontes Juris Universi, maximo humani generis & Reipublicæ Litterariæ bono recludere, nova annisi sunt Methodo. Hic utilissimo de *Jure Naturæ & Gentium* tractatu; Ille præclaro de *Jure Belli & Pacis* opere. Hos, qui sapiunt, secuti sunt omnes, inter quos eminet Cl. utriusque Interpres Gallicus D. Barbeyracus, amicus multis beneficiis mihi acceptissimus. Hi cum multis aliis ad hoc tenderunt maxime, ut reserato Jure Naturali, aditum ad Jus Civile enucleandum, illustrandumque præberent omnibus. Idem etiam brevi Methodo tentare

tare mihi proposui. Antequam vero rem aggrediar & utilitatem hujusce studii demonstrem, quid sit Jus Naturæ, unde ortum ducat, quæ præcipiat prohibeatve ac permittat, disquirendum puto, ut sua sponte emergere queant hujus scientiæ usus.

§. III.

Jus Naturæ, Lex æterna, immutabilis & constans actionum humanarum Regula est, ad cujus normam sese componere debent homines. Oportet enim eorum actiones, non Brutorum instar physico & sensibili impulsu, sed Rationis ac Sapientiæ dictamine, dirigi. Hæc Regula adeo alte hominum menti infixamane, adeo naturæ humanæ conveniens est, ut prorsus interire haud potuerit ejusdem cognitio, quamquam in plerisque a multis foedissime violetur. Nec dubitare quenquam puto, quin vel si ab omnium stupidissimo quærat, num sibi omnia indiscriminatum licere putet, id affirmare audeat; verum enim vero hancce veritatem exemplis monumentisque antiquorum me probaturum spero, cum de istius Legis æternæ præceptis agam.

§. IV.

Nunc disquirendum esset, quonam modo sciamus, aliquam esse Regulam invariabilem neque ab hominum arbitrio pendentem; an hujus notio nobiscum nata sit, ut volunt quidam, an vero illam facultate naturali acquiramus, ut statunt alii; sed ne nimis a via aberrare cogar, meminisse juvabit; Logomachiam, ni fallor, disputationem involvere, ut ex quorundam Recentiorum (c.) Philosophorum disceptationibus cuique adtendenti patet. Disquisitionem igitur integram in aliud tempus differens, operæ pretium arbitror, paucis exponere, quid de hac re sentiendum putem.

(c.) Extant Johan. Sperlingi & Joh. Zeifoldi, de notitiis nobis.

nobiscum natis, Tractatus integri, quibus primus affirmativam, secundus negativam conati sunt defendere. Celeberrimus Locke *Essay de l'Entendement humain*. Amst. 1707. negativam assumit, præsertim Lib. I. Cap. 1. & 2. At B. Scherlok de l'immortalité de l'ame & de la vie à venir, affirmativam. pag. 153. & seq. Amst. 1708.

§. V.

Cum Ideæ aut notiones animæ, rerum sive sensibilium sive intelligibilium, sint repræsentationes, nil mirum, si omnes omnino ab ortu nostro, vel in ipso matris utero nobis haud perceptibiles esse queant, actu enim tales minime dicunt, qui notitias nobiscum natas affirmant. Quod si hoc fieri posset, D j profecto essemus. Quid autem impediret, quominus mens nostra omnes possibiles repræsentationes actu præsentēs haberet; quæ tamen temporis progressu in animo sunt evolvendæ, ut in æternum nobis adsint arcta Creaturarum nota. (d.) Si quis diceret, Ideas animabus idem esse ac fructus arboribus, non a vero forsan abluderet, statimque tota componeretur Controversia, quandoquidem in idem reciderent utrorumque Sententiæ; primi quasdam nobiscum natas esse ideas, alias lumine naturali acquisitas pronuntiant, alii quascumque lumine naturali vel mentis facultate formatas putant. Sed si eadem de spirituum Ideis ac de arborum fructibus dicenda sunt, tunc lumen illud vel facultatem idem mentibus quod cultura arboribus esse appareret. Nec enim sol, neque sydera, neque tellus, neque pluvix, neque salia, neque manus agricolæ arborum fructus formant; quamquam aliquid vel ad vitium vel ad perfectionem eorum conferre queant. Fructus illos vero in ipso semine esse, ex quo tandem sese evolvunt, ratione & experientia compertum est. De mentium notitiis simile quid pronuntiandum mihi videtur, cum nec ob-

jecta

jecta sensibilia, neque anima, neque aliorum loquela, neque signa, neque aliud creatum quidquam eas efficiat. Quæ consideratio summo hujus sæculi (e.) Philosopho, occasionem præbuit ad Causas occasionales (ut illas vocat) confugiendi. Existimavit nempe, rerum omnium notiones vel sensibiles vel etiam intelligibiles, in ipsa æterna sapientia videri atque spectari. Hujus opinio equidem cum præcedenti conciliari posset; sed hæc alius sunt loci. Verum sint Ideæ nobiscum natæ, sint natæ lumine naturali, vel a mente nostra efformatæ, ut placuerat *Lockio*, nihilominus geminās metaphysicarum moraliumque veritatum habemus demonstrationes omni exceptione majores. Etenim rerum convenientia cum ipsis notionibus animæ in rerum essentia ita firmata est, ut nemo sana mente præditus de iis dubitare poterit unquam.

(d.) Platonis ita arrisit hæc de Ideis innatis opinio, ut ei præexistentiam, immortalitatemque animarum superstruxerit. Phedone pag. 57. & 58. idearumque in animo evolutiones reminiscantiam vocavit Ib. & Menone pag. 415. seq. Phædro pag. 1223. & 1224. Edit. Wechelii Francofurti 1602. Συμβολα πατρικὸς νοὺς ἐνεσπείρεταις ψυχαῖς, Symbola mens paterna animabus insevit. Oracula magica p. 22. Ed. Opsopæi Parisiis 1599. Videsis Olethonem in hunc locum pag. 45. & 46. Psellum pag. 93. Porphirius apud Nemesium ait, τὴν ψυχὴν συνέχειν πάντα τὰ ὄντα καὶ εἶναι τὰ πάντα ψυχὴν συνέχουσαν σώματα διαφόρα. Animam omnia entia continere, & omnia quæ continet anima corpora esse diversa, pag. 80. Ed. Plantin. 1565. Idem confirmat in sententiis. Sect. XVII. pag. 225. Ed. Cantabrigiensis 1655. Vide etiam quæ de notione Dei habet Jamblicus de mysteriis Ægypt. Sect. I. Cap. 3. pag. 4. Ed. Thom. Gale Oxoniæ 1678. Locum pulchrum ex Architæ fragmento addere visum est. Καὶ ἐνεχάραξε καὶ ἐπενεμήσατο τὸ θεῖον αὐτῷ

αὐτῷ (ἀνθρώπῳ) τὸ τῆ παντὸς λόγῳ σύστημα. "Εν ᾧ τα-
δε εἶδεα πάντα τῆ ἐνόντος ἐνδεδωσαι. Καὶ ταὶ σημασιαὶ
τε καὶ ῥημάτων. Et illi (homini) insculpsit & impres-
sit Numen & universæ rationis Systema, in quo omnes
existentium species disperguntur nec non significationes
rerum ac verborum. Ex Architzæ libro de Sapientia in-
ter Pythag. fragm. pag. 77. Edit. Thomæ Gale, Cantabrig.
1670. in 8. (e.) P. Malebranche.

§. VI.

Juris Naturæ origo a voluntate Dei, quæ Ideas
mentis Divinæ sapientiâ æterna duce in actum produ-
xit, repetenda est. Ejusdem nimirum æternitatis ne-
cessitatisque moralis seu Sapientiæ est ac rerum om-
nium existentia, cunctarum qualitates seu Physicis seu
moralibus superstructæ sint Regulis. Nimis ergo aber-
rant, qui Jus naturale a quadam arbitraria Dei volun-
tate ortum duxisse ajunt, quasi vero justī atque inju-
sti Idea, non in ipsius hominis rationis capacis natu-
ra existeret. Hoc fundamentum est illius Regulæ,
cujus beneficio impelluntur homines ad bene beate-
que vivendum in Oeconomia præsentī, quæ necessa-
riam relationem ad aliam vitam vel felicitate vel in-
felicitate plenam continet. Hæc sunt Principia, qui-
bus innititur de præmiis ac pœnis vitæ futuræ veritas.
Sunt enim transactæ vitæ consecutiones necessariae,
quæ in ipsa natura fundantur, ut exemplum suppedit-
ant in Physicis Bombices aliaque quam plurimā Inse-
ctorum genera. Sapientissimè hæc omnia a summo
rerum conditore ita fuere comparata, ut singulorum
societatisque universæ, præsentis cum futuri Sæculi
conjungeretur utilitas, & res omnes modo procede-
rent intelligibili & invariabili per causas & effectus
suos, salvâ hominum libertate, quorum culpa mala
quæcunque sunt in mundo orta; ut quam facile pro-
batum darem, nisi hæc alius essent loci.

§. VII.

§. VII.

His probè perspectis facile conciliari (*f.*) possunt Cl. *Puffendorffii* & *Leibnitzii* sententiæ. Primus jus naturale tanquam Divinam Institutionem agnoscit ; at non arbitrariam prorsus, sed naturæ humanæ convenientem. Secundus Originem Juris Naturalis ab Ideis mentis Divinæ repetit, quæ omnia possibilia complectitur & naturam ait justi atque injusti in ipsa Idearum convenientia fundari. Quamobrem Logomachiam in tantorum virorum disputatione inesse patet. Hæc autem Cl. Barbeyracus in eruditissimo scripto Gallico, quod typis mandavit, multa cum perspicuitate, ut solet, explicat. Ex prædictis etiam probatur (*g.*) Ulpianum Physicas regulas cum moralibus perperam confudisse, ipsi namque *Jus naturale non humani generis proprium, sed omnium animalium quæ in terra, quæ in mari nascuntur, avium quoque commune est. Hinc ait descendit maris atque fœminæ conjunctio, quam nos Matrimonium appellamus, hinc liberorum procuratio, hinc educatio, videmus etenim cætera quoque animalia feras etiam istius juris peritia censerit.* Male admodum, non enim maris atque fœminæ conjunctio, quæ solo Physico motu & sensibili fit impulsu, sed status moralis permanens, officia continens varia, moralibus rationibus firmata, matrimonium constituit, cujus haud capacia sunt animalia ; Prolis vero educatio, quæ apud quorundam animalium genera locum habet, non fit ratione aliquâ ipsis inritâ sed sensibili impulsu, sapientiâ Divinâ ita disponente. Eodem modo peragitur plethorumque coitus (*h.*) statis temporibus, quibus præteritis nec copulam inter se, nec prolem agnoscunt. (*i.*) Fabulosa sunt quæ narrantur de Camelo & equo, qui incestus notionem habuisse perhibentur. Ego quidem columbam & felem matres aggredientes vidi, & si cum eis non potuerint copulari, rationes Physicæ impedimento fuere, non incestus timor.

(*f.*) Puf.

(f.) Puffend. de Jure Nat. & Gent. Lib. I. Cap. I. § IV. pag. 4. Vid. Not. 4. Dom. Barbeyraci in hunc locum. Item §. VII. pag. 6. Lib. II. Cap. III. pag. 155. & Leg. Lib. III. Cap. IV. §. IV. pag. 322. ubi Hobbesium capit. Edit. I. Gallicæ Amst. 1706. Leibnizii Theodicea gall. edita part. II. § 182. pag. 348. & 349. & passim toto opere Amst 1712. 8.

(g.) Lib. I. DD. Titii I. de Justitia & Jure Lib. I. §. 3. & Just. Lib. I. Tit. II. de Jur. Nat. Gent. & Civili Lib. I.

(h.) Arist. Histor. Animal. Lib. IV.

(i.) Idem Lib. 9. Ed. Venet. in fol. per Joh. de Colonia sociumque ejus Joh. Matth. de Gheretzen 1476.

§. VIII.

Cum ex his, quæ hucusque dicta sunt, Jus naturale solis hominibus competere, appareat, restat, ut ejusdem præcepta enucleare tentemus. Quin actiones hominum ad finem moralem, hæc tria respicientem objecta, Deum ipsum, hominem, & alios sibi similes, referantur, nemo est qui dubitare possit, hinc necessitatem omnium officiorum oriri omnes vident. Prima igitur Deum respicientia Religionem Naturalem constituunt, quæ duobus articulis potissimum absolvitur. Primus, vera Entis supremi notio est, omnia ejusdem attributa lumine naturali cognita continens, & erga illum gratitudo, quæ cultum internum & externum ipsi debitum includit: secundus horum practica demonstratio est, quæ fit præceptis Legis æternæ obtemperando, officiaque quæ alteram hancce Religionis Naturalis partem efficiunt persolvendo. Quidquid dicant alii, Religio Naturalis hæc officia omnia mihi continere videtur, nec Grotium, Puffendorium, Weberum, aliosque approbare possum, qui Jus Naturæ a Religione naturali ita separant, quasi vero hæc, illud ut partem ejus practicam minime contineret. Tantâ enim evidentiâ nititur hæc

Tom. III.

B

opinio;

opinio, ut ei aliud cogitantes Viros illos celeberrimos ad stipulari videamus. (k.) Religio autem quanquam per se ad conciliandam Dei gratiam valet, habet tamen & suos in societate humana effectus maximos. Deoque obtemperandum est, ait Grotius. (l.) Et ut actiones nostras ad ejus voluntatem componamus, suadet Puffendorfius, qui etiam affirmat, eam (Rel. Nat.) revera esse ultimum & firmissimum societatis humanæ vinculum, atque, quæ Religione remotâ orirentur incommoda, enumerat.

(k.) Grotius de Jure belli ac pacis Lib. 2. Cap. 20. §. 44. Not. 3. & 45. Not. 3. Ed. Amst. 1702,

(l.) Puffend. de Officio hominis & civis Lib. 2. Cap. 4. §. 1. & 9 pag. 45. & 54. Ed. Francofurti Weberi 1705.

§. IX.

Qui fieri potest, ut ad conciliandam Dei gratiam valeat Religio sola notione Dei & cultu constans, nisi & præceptorum Legis æternæ accedat observatio? Parvi admodum vel nullius momenti essent ejusdem in Societate humana effectus, neque esset ultimum ac firmissimum humanæ Societatis vinculum, si carent homines poenarum & præmiorum vitæ futuræ notitiâ atque morali demonstratione. Hoc vidit sæpe laudatus Dom. Barbeyracus (m.) & fundamentum istud agnovisse etiam antiquos Gentiles, longa contra Baelium annotatione probavit; varia quoque ad hanc rem congeffit in eruditissima ad Puffendorfius (n.) præfatione; Ignoscat vero mihi (o.) si ab ejus & Cl. Clerici sententia stare haud possum. Theognidem taxant, quasi ex mente avarissimi hominis loqueretur, ex illius tamen carminibus, omnia ipsi vi (p.) abrepta fuisse & tunc patria (q.) exulantem Elegiam composuisse, patet. Unde nihil mirum si aliquando acrius de paupertate (r.) conqueratur. Virtutem tamen divitiis anteponendam (s.) Cyrni proposuit, parcimoniam commendat & eodem fere sensu Aguris (t.) medio-

mediocritatem optat. (u.) Hesiodi vero sententia de virtute cum divitiis atque felicitate conjuncta, quam improbant Viri eruditissimi, minimè inepta mihi videtur. Miror equidem, Veterum opinionem huicce simillimam, cujus extant vestigia in Genesi, Jobo, Lege Mosaica, atque Prophetis, ipsis in mentem haud venisse. Is erat tunc temporis rerum status, ut quam maximè omnibus probaretur hæc de virtute cum felicitate conjuncta sententia, quoniam Illustrum Virorum (x.) Abrahami, Isaci, Jacobi, Josephi, Jobi, aliorumque quam plurimorum exemplo confirmabatur. Multa ad hujus quæstionis illustrationem in medium afferre possem, quæ consultò prætereunda putavi.

(m.) Vid. Not. 4. ad §. 3. Lib. II. Cap. IV. de Jur. Nat. & Gent. Puffend. Gall. Ed. pag. 203. & seq.

(n.) P. XXXII. §. 11. & seq.

(o.) Ibid. præf. pag. 30. Clericus in v. 284. oper. & dier. Hesiod. pag. 236. & 238. Idem in Parrhaf. Tom. I. pag. 45. Vide Theognidis v. 920. & seq. & 697. &c. passim alibi de Divitiis.

(p.) Id. v. 346. & seq. (q.) Id. v. 1210.

(r.) Id. v. 351. 354. & 385. 391. Ib. de paupertate conqueritur. d. v. 173. & seq. ubi consilium de fugienda paupertate extrat. 621. 649. & 650.

(s.) v. 145. 150. & 197. 204 & 225. ad 229. v. 605. 606. 693. 708. & seq. ibid. de divitiarum virtute comparatione agit & 751. justè opes acquirendas Cyni proponit.

(t.) v. 1151. & 1112. Ed. Vignonis in fol. 1584.

(u.) Hesiod. oper. & dier 270. & seq. Ed. Clerici.

(x.) Vid. Gen. Cap 13: 2, 5, 6. Cap. 21: 22, 24, 35. 26: 12, 13, 14, 28. 27: 28, 29. 28: 20. 30. 23. 39: 2, 3, 5. Levit. 26: 2-14 Deut. 11: 13-15. 22-25. 28: 1-14. Job. 4: 7. 8. 5: 34. 8: 3. & seq. 15: 18.

ad finem usque. 20: 4. ad finem. Cap. 24. Job quidem exempla in contrarium adfert, attamen ex sociorum verbis, non magno numero tunc temporis ea fuisse, maximè colligendum est. Imò totam Oeconomiam Moisaicam ad Evangelium usque promissionibus temporalibus, divitiarum rerumque affluentiae &c. innixam, norunt omnes, ut nemini mirum esse debeat iisdem temporibus Gentiles ipsomet præjudicio laborasse. Vide etiam duos ultimos Callimachi versus, Hymno in Jovem, ubi Scholiastes Hesiodi locum de quo agitur citat.

§. X.

Pœnas & præmia vitæ futuræ, quæ constituit Deus, ut robur adderent Legibus suis, consecutione naturali ab observatione vel violatione earum manant eodem modo, ac si quis vini potu nesciente se fieret ebrius, rationeque carerét a Physico potationis effectû. Idem injustis accidit, quanquam Legem effectumque violationis nesciant. Hûc respiciunt verba Jesu Christi, cum dicit, eos qui voluntatem Domini ignorantes transgrediuntur, minori pœnâ afficiendos quam qui eam norunt & negligunt. Hanc naturalis pœnarum & præmiorum existentiam, etiam post mortem, ratione demonstrari posse puto, quidquid contra statuat *Puffendorff*. Neque pœnæ illæ a voluntate Dei merè arbitrariæ, sed a voluntate libera quidem at omnia cum summa sapientia rerumque convenientia ordinante pendent. Hinc nulla datur felicitas, ubi deest moralis cognitionis capacitas, & hæc ratio est præceptorum jurisque naturæ, quæ non tantum præsentis vitæ felicitati sed & futuræ accommodantur. Rationis autem abusum cum videret Deus optimus maximus, remedium dedit hominibus, Legem & Evangelium. Providentiâ & bonitate suâ commotus Legum latores & Juris peritos, qui plus minusve Juris Naturæ dictamina secuti sunt, veritatis ejus vindices apud Gentiles extare voluit, ne totum genus humanum

num prorsus interiret. Concludamus tandem, Religionem naturalem, potentiae, sapientiae & bonitatis Entis supremi genuina notione & Legis aeternae praeceptorum observatione absolvi.

§. XI.

Nunc cognitione remota, quam a Revelatione scripta acceperunt, disquirendum est, quae sit illa veri Dei notio, & qualis cultus ille, quorum harmonia Religio Naturalis componitur. Haec ex Characteribus divinae Potentiae, Sapientiae & Bonitatis, qui in mundo apparent colligitur. Impossibile enim est quin a quodam Principio aeterno ortum ducant omnia. *Epicurei* atomos ab aeterno in infinito inani sese moventes rerum omnium principia dixere. *Spinosista* unicam corporeamque substantiam, cujus res omnes sunt Phænomena, statuunt. Omnia autem secundum utrorumque sententiam absque fine aut sapientiâ, sed solo quodam cæco atque necessario motu existunt. Quâ opinione nihil absurdius vel cogitari potest. Horum verò insaniam attingere, funditusque profligare, nunc non vacat, alias forsam quadam dissertatione, quæ fermè absoluta penes me est, novâ methodô id præstari poterit. Communis eaque hominum omnium verissima opinio est, quod ex astrorum cursu, regulatae plantarum animaliumque oeconomiae & aliorum Universi Phænomenon horumque invicem harmoniae contemplatione, necessario Deum esse aeternum, omnipotentem, sapientissimum, optimum, & omnium conditorem moderatoremque, concludatur. Hancce notitiam excipit cultus, qui admiratione gratitudine & confidentia in Deum absolvitur. Ad cultum huncce internum nihil externi lumini naturali adjungendum videtur, præter laudes supremi numinis mutuis hominum sermonibus ubique dicendas. Hoc agnovisse veteres gentiles ex eorum scriptis patet, at quando Cæremoniarum, præsertim (y.) animalium

facri-

B 3



sacrificiorum rationem reddere voluerunt, mirum in modum eos se torquere & longe a veritate abire videmus. Harum rerum origines, nihil mirum, eos minimè assequi potuisse, quum à Jure positivo Dei non à Jure naturali pendeant. Supra dictis contraria Jure naturali prohibentur, iniquæ opiniones de Deo, Blasphemium, Perjurium, Superstitio & his similia, quæ cultum internum corrumpunt vel eum prorsus destruere videntur.

(y.) Vide Porphyrium de abstinentia Lib. 2 §. 9. & seq. pag. 57. Ed. Cantab. 1655. Jamblicus de Mysterijs Ægyptior. Sect. 5 præsertim Cap. 5 p. 121. & seq.

§. XII.

Sequuntur hominis officia erga seipsum, quæ hoc generali præcepto contineri queunt. *Homo dignitati destinationique suæ omnia agat consentanea.* Cum igitur ad hanc Regulam se componere debeat, & natura ejus ita comparata sit, ut bona corporis & animæ sint invicem copulata, ita ut nemo vix unius commoda quærat, quin etiam alterius aliquid intersit. Videndum est, ne dum corporis commoditatibus studet homo, anima, quæ potior ejus pars est, detrimentum accipiat. Quæ vero ad animam referuntur, quandoque cum aliquo corporis incommodo & in quibusdam casibus cum totius corporis interitu quæri possunt ac debent. Idcirco magna cum moderatione & æquitate bona corporis, vestimenta, victum, sanitatem, vitam quoque vel acquirere vel tueri discant homines, neve cum aliorum detrimento id fiat, nisi in extremæ necessitatis casu, prospiciendum est. Hinc sequitur, hominem non soli sibi natum cumque ipse suam quærit utilitatem etiam societatis utilitati consulendum esse sibi sentiat. Conjuncta enim sunt utriusque bona & utilitates. Nec inde existimandum est, utilitatis tantum gratiâ homines in societatem coa-

coaluisse, quanquam hæc cum illa naturaliter conjuncta sit. Ad societatem aptæ sunt omnes Creaturæ intelligentiâ præditæ, ad commercium mutuum natæ & formatæ, ut felicitate communi promiscuè fruuntur. Et hæc locum haberent, tametsi homines ejusmodi utilitatem minimè perciperent, cujus indigentia, inopia, debilitate rerumque necessitate laborent omnes. Ex hoc apparet, primam hominum societatem civilem ab ipsa natura ortum duxisse, nulla quorundam malitiæ ratione habita, ut quidam putarunt. Aliud enim est Civilis societas, aliud Regulæ variæ, quæ temporum progressu ad communem utilitatem fuere compositæ. Ut ergo sibi societatiq; consulat homo, artium scientiarumque utilium notitiam sibi comparet necesse est, & simul maximâ utatur cura, ne occupationes suscipiat quibus animæ ruina paretur,

§. XIII.

Haftenus hominem non solitarium animal sed societati aptissimum vidimus, hinc fit, ut de officiis ipsius commodè minimè tractare possimus, quin aliorum rationem habeamus, ita enim inter se connectuntur multorum obligationes, ut vix quæ singulorum sunt attingere queamus, quin de multis idem dixisse videamur. Hæc cogitans, Geometrarum more, necessarium putavi, Propositionem vel Axioma generale præmittere, quo mediante, corollariorum instar omnes omnino Juris Naturalis & Civilis quæstiones sponte suâ promanare quirent; sequentia tamen prænotanda sunt. Trifariam contemplari possunt hominum officia: Hominem considerando, quatenus solus cum conjuge à summo rerum productore conditus est, vel quatenus in mundum accedimus omnes, vel denique tanquam si omnes simul creati fuissent, hominum perfecta æquitate gaudentes. *Nam inquit Hierocles (2.) unusquisque nostrum undique multis*

veluti circulis circumscriptus est, quorum alii minores, alii majores sunt, alii continentur juxta diversos ac inæquales ad se invicem habitus. Primus etenim & proximus circulus est, quem unusquisque circa mentem suam veluti centrum descriptum constituit, in quo & corpus nostrum & ad usum ejus pertinentia insunt, & minimus ipsumque prope centrum attingens hic circulus est. Ab hoc secundus remotior centro & primum inter se concludens Parentes, Uxorem, & Liberos comprehendit. Tertius Avunculos, Materteras, Avos, Avias, Nepotes ex fratribus & consobrinos habet. Post illum est, qui reliquos cognatos continet, deinde popularium, mox tribulium, postea militum circuli sequuntur. Ab illis urbis vicinorum circulus & alius Gentilium ambiunt. Extremus autem est, maximus omnes ambitu suo eos concludens, totius hominum generis est. At quocumque demum, primò, mediò vel extremò circulorum exordium ducatur perinde est, cum tamen de officiis omnium dicendum sit, ad Puffendorffii Donati, aliorumque exemplum a communi hominum æqualitate utpote tractationi accomodatissima inchoandum esse arbitror. Hoc ergo axioma esto: quæcumque ad humanæ societatis, totiusque generis humani commodum & perfectionem conferunt, jure naturali præcipiuntur, omniaque quæ ad ejus interitum tendunt, eodem jure vetantur.

(2.) Pag. 238. edit. Pearsoni Lond. 1655.

§. XIV.

Ex hac generali propositione, cujus evidentiam nemo negabit, necessario sequitur, quomodocumque inspiciamus homines, sive in statu naturali, sive in statu civili, sub Monarchico & Aristocratico vel Democratico regimine viventes, sequentes eis jure naturali præcipi virtutes: Bonitas, Lenitas, Clementia, Liberalitas, Gratitude, ad humanitatis officia obeunda quam aptissimæ, Veracitas, Fidelitas, Moderatio, Temperantia, Justitia, Innocentia & Pudicitia, ad mutuum humanæ civilisque societatis commercium vitam-

tamque felicem agendam perquam necessariæ. His vero contraria vitia eodem jure vetita : Mendacium, Malitia, Dolus, Fraus, Perfidia, Avaritia, Invidia, Superbia, Contumelia, Ira, Crudelitas, Cædes, Rapina, Furtum, Ebrietas, Scortatio, Polygamia, Incestus, Adulterium, Divortium, Pædicatio, cum brutis concubitus, quæ si ab omnibus patrarentur, totius humani generis procul dubio oriretur interitus. De Polygamia, Incestu & Divortio dubitarunt Viri Doctissimi, cum primis autem Celeberrimus Grotius. (a.) *Illud inquit libens agnosco, nihil nobis in Evangelio præcipi, quod non babeat naturalem honestatem, sed non ulterius nos obligari legibus Christi, quam ad ea quæ Jus Naturæ per se obligat, cur concedam non video. Et qui aliter sentiunt, mirum quam sudent ut probent, quæ Evangelio vetantur ipso Jure Naturæ esse vetita, ut Concubinatum, Divortium, Matrimonium cum pluribus fæminis ; sunt quidem hæc ejusmodi ut iis abstinere honestius esse dicet ipsa ratio, at non talia ut absque Lege Divina in illis nefas appareat. (b.) Et alibi, de Conjugiis eorum qui sanguine aut affinitate junguntur. Satis gravis est quæstio & non raro magnis cum motibus agitata ; Nam causas certas ac naturales, cur talia conjugia ita ut legibus aut moribus vitentur illicita sint, assignare qui voluerit, experiendo discet quam sit difficile imò præstari non possit.*

(a.) Grotius de Jure belli ac pacis. Lib. 1. Cap. 2. §. 6. n. 2. pag. 27.

(b.) Id. Lib. 2. Cap. 5. §. 12. n. 1. pag. 244.

§. XV.

Præceptorum Evangelicorum naturam nunc quærere necessarium non judico. Vitia illa de quibus agitur, a generali propositione supra posita promanare aio. Grotiumque & qui cum eo sentiunt perperam existimare, ea lege positiva non jure naturæ vetita, ostendam. In promissionibus, malitia, fallacia ; in sermonibus mendacium ; in conventionibus, contra-

ctibus & passionibus fraudes ; inter pares superbia , iræ , verbera , cædes ; inque legitimo rerum dominio furtum , rapinæ & id genus alia , sua sponte jura naturæ societatisque humanæ vincula evertere , nemo non videt. Quid ergo in causa est , cur contrarium de Polygamia , Incestu , & Divortio plerique hominum credant ? Hujus sententiæ duæ sunt rationes. Singulare sophisma , cui adulatorii nomen imponere mihi liceat , ad exemplum ignavi (c.) Sophismatis veterum. Anne ad Logicæ perfectionem veritatisque indagationem conferret , apta nomina Sophismatibus excogitare , CC. DD. Clerico & de Crouxaz aliisque Philosophis examinandum relinquo. Adulatorium ergo Sophisma & Patriarcharum Exemplum , gentilibus , Judæis & plerisque Christianorum occasionem de hac quæstione dubitandi præbuere , sed si vitia ista hominis dignitati societatisque humanæ contraria demonstravero , tunc parum firma sophismatis illius corruent fundamenta. Etiam Patriarcharum imperium nullius ponderis esse & parum aptè adhiberi evincam , sicque viam ad incestus divortiique examen aperiā.

(c.) Vide Cic. de fato col. 417. & 11. & col. 418. A. Tom 4. Operum Cicer. Edit. Gothofredi apud Cho- vet. 1606.

§. XVI.

Miror equidem , viros Litteratissimos fugisse duorum generum vitia dari , quorum alia magis , alia minus directe in Jus Naturæ peccant. Prioris generis omnia ea sunt de quibus locutus sum , posterioris verò illa de quibus nunc dicendum est. Et primum de *Polygamia* , quæ Concubinatum involvit dicam. Hancce trifariam divido , in promiscuum foeminarum usum , in multorum virorum cum uxore unica conjunctionem & matrimonium cum pluribus foeminis.

De

De vago Concubitu & de Mulieris unicæ cum plurimis viris conjunctione plerique auctorum & ipse *Lyserus* (d.) quondam magnus Polygamix propugnator, non dubitant quin jure naturali sint illiciti. De tertia Polygamix specie adhuc ambigitur. Videamus num huicce disputationi lucem aliquam impertiri queamus.

(d.) Vide Baile Nouvell. de la Rep. des Lettr. An. 1685. pag. 342. ubi Compend. *Lyseri* scripti cui titulus: Polygamia Triumphatrix.

§. XVII.

Hominis dignitas & excellentia in eo consistit, quod objecta omnia quæ illum undique circumdant non Brutorum instar sensibili perceptione tantum, sed notione intelligibili cognoscit, cujus adminiculo rerum convenientiam & scopum finemque objectorum suarumque actionum invicem si lubet discernit. Nulla autem daretur humana societas, nisi in ea inessent variæ hominum relationes vel status morales, qui destinationi ipsorum conducerent. Illinc familiarum regularum origo atque aptissima constitutio, ex quibus generis humani conservationem promanare nemo quod sciam inficias ibit. Cæterum observandum est, in actionibus corporum quæ in solo Mechanico motu consistunt, nullam inesse turpitudinem. Tribus de causis Polygamia legi naturæ adversari mihi videtur. 1. Quia hominem ad libidinem excitat & ad ferinam vitam creaturæ intelligenti & rationabili minimè convenientem deprimit. 2. Liberiorum educationem plerisque hominum impossibilem reddit. 3. Familiarum verò unionem funditus diruit. Quæ omnia si cum animo præjudiciorum experte considerentur, elucescet quam maximè propositi Axiomatis veritas. Ad hoc faciunt omnium Polygamix propugnatorum exempla, cum eos libidinis solum, nullam

lam verò liberorum rationem unquam habuisse constet. Hujus rei Muhamed fanaticus Arabum Prophetæ lucentissimus testis est. Cum videret Agirta, Polygamiâ stare haud posse, nisi regulis quibusdam coarctaretur & divortii beneficio gauderet, uxores legitimas vel conditione liberas, vel servas, non ut vulgo creditur tantas quantas alere possent, (*e.*) sed quatuor ad summum suis concessit, sibi verò plurimum foeminarum usum (*f.*) a Deo permitti pronuntiavit. Quam difficile res familiæ ob foeminarum dissensiones procederent, cum subodorasset, auctoritatem eas verberandi, divortio dimittendi Arabibus permisit, at de libero tum statu, educationeque altum apud eum est silentium. Si uxorum numerus ad opum quantitatem mensuraretur, ubi reliquum aliquid superesset, quod ad liberorum educationem conferre quiret? Nemo enim est, nisi dives admodum, qui vel binas, vel quatuor simul uxores cum earum prole, si adsit, alere aliaque utrisque necessaria suppeditare possit. Quantas in familiis controversias, verbera, adulteria, cædes, infanticidia & id genus alia quæ horrorem incutiunt, multarum foeminarum usu, (*g.*) apud Turcas, Persas & Indos oriantur, ex historiis patet. Ponamus tandem, cunctis nationibus plures uxores ducere Legibus vel usu permitti, undenam quisque tantas accipiet quantas volet, nisi Spadonum ingens existat numerus, cum experientia compertum sit, pari numero mares ac foeminas ubique nasci. De servis foeminis pecunia adscitis quid dicam? nonne vel bellum continuum vel pauperum multitudinem vel liberos inopia dividendi coactionem vel denique latrones, ut sunt Arabes & Tartari, aut ea omnia simul necessario supponere videntur? Quis non ex hoc nihil Polygamix licentiâ atrocius in generis humani perniciem vel excogitari posse, putaret? Furtum jure naturæ ideo prohibitum, quod si
 omni-

omnibus liceret, totius societatis humanæ oriretur interitus : rationem verò, cur Polygamia, quæ idem aliâ viâ præstaret, eodem jure licita, non video.

(e.) Surata Mulierum IV. Alcorani Arab.

(f.) XXXIII. Surata Agminum. Id. Surata IV. Mulierum.

(g.) Vid. Chardin Voyage en Perse &c. Tom. VI. Cap. 12-14. H. Ricaut Etat de l'Empire Ottoman Lib. 2. Cap. 21. pag. 362. & seq. aliasque ejusmodi itinerum Relationes.

§. XVIII.

At regeret aliquis, hominem ita a natura comparatum esse, ut anni spatio plures generare possit liberos, quam facultatem cum unica uxore haud exercere queat, hincque multarum foeminarum ulum ipsi cum (h.) Lysero necessarium concludet. Verum bonus ille Lyserus veritatem minimè affectus est, nam etsi vera essent quæ putaverat, neque binæ, tres, quatuor, denæ, viginti, vel centum denique homini prouti alius alio robustior & ad venerem pronior existeret, sufficerent foeminæ. Hinc liquet, hominum vel foeminarum ad venerem proclivitatem naturæ rationabili minimè consentaneam esse. Cunctis ferè animalibus statuta tempora constituit Deus, ut supra innuimus, quibus ad propagationem copularentur, hominibus autem rationem, non Physicas regulas dedit, ut liberorum procreationi, prouti rei necessitas & ratio id posceret, operam darent. Quod si homo in statu innocentiae permansisset, omnia summa cum harmonia procederent; tempus enim absque labore & molestia expectare potuisset, donec unusquisque liberorum ad definitam ætatis partem crevisset. Hujusce regulæ Physicum præbent exemplum varia animalium præsertim avium genera, ut Columbæ, Ciconiæ, aliaque quamplurima. At prohi dolor! Rationis abusu factum est, ut excellentissimum generationis opus in pessimi affectus abiret tyrannidem, qua nul-

lani

lam majorem potentiolemque inter homines dari sciunt omnes. Pessime ergo eruditione & scientia abutuntur omnes ii qui de hocce hominis progignendi officio loquuntur, ut fecerat Lyserus, quasi de quodam bruto animali ageretur, neque ex intimis Physicæ penetralibus. Nunc omnia expendere operæ pretium non arbitror; observasse sufficiat, si partes illæ quæ generationi inserviunt, ad delectationem solum datæ fuissent, nullam ferè regulam aut variabilem admodum, ut de oculo observandum est, admisisset earum usus. Etsi præter generationem nihil vel parum de liberorum educatione foret cogitandum, atque genus humanum gallinarum vel pecorum instar se haberet, multis tunc foeminis uti cuique liceret. Aberrarunt igitur omnes omnino, & Hebræi quoque qui de hac re tractarunt, quasi verò ad generis humani propagationem conservationemque nihil aliud desideretur præter utriusque sexus copulationem, considerationem autem rerum omnium, quibus ad longum tempus indigent liberi, sicco transferunt pede.

(b.) Vid. locum citat. Bælii pag. 342.

§. XIX.

Expositis iis quæ in primum argumentum dicenda videbantur, nunc paucis aliud argumentum è Patriarcharum exemplo petatum tangam. Rem utique in sacris literis tractatam altius repetendam operæ pretium puto. Hominem cum foemina unica in rerum principio Deum condidisse testatur (i.) Historia sacra, cui Gentilium dicta sive scriptis contenta sive traditione conservata adstipulantur. Nec inepte Hebræorum magistri cum Brutis concubitus, Pæderastiæ, incestusque interdictionem ex verbis in matrimonium Adæ prolatis affirmarunt. Nihil vero aliud impedivit, quominus Polygamiæ, divortiumque iisdem verbis condemnari videretur, præter Patriarcharum exemplum,
Legis-

Legisque Mosaicæ indulgentiam : Verba enim ista, & *hærebit vir cum uxore sua*, non cum uxoribus, *eruntque in carnem unam*, multitudinem uxorum illicitam putant, primumque institutum illud ad Lamekum usque tam a Cainitis quam à Sethanis observatum, innuit scripturæ silentium. Primus itaque hominum qui digamus extitit is fuit Lamechus Enocho sancto Patriarchæ, ni fallor, coævus & è Caini prosapia oriundus. Ab ipso cœpit Polygamix usus apud omnes propagari, ita ut causa præcipua fuerit illius horrendæ orbis Catastrophes, cujus adhuc supersunt (k.) Historica (l.) naturaliaque monumenta omni exceptione majora. Quis autem post diluvium usum generi humano adeo infaustum renovaverit ignoramus. Ex historia (m.) Mosaica apud Mesopotamiæ incolas & Chananæos temporibus Abrahæ ac deinceps cum pluribus foeminis matrimonia viguisse percipimus. Et hoc in causa fuit, ut incaute & velut per accidens huicce usui se accomodaverit Abraham & Jacob. Ex eorum historia id cûique Lectori attentato patet ; Annum enim ætatis suæ octuagesimum quintum attigerat unica sterilique uxore contentus, neque de alia superinducenda vel ipse, vel Sara de ipsi alia tradenda cogitaverant, donec accidisset prolis promissio quam a Deo acceperant, nullosque post natum Ismaelem alios ab Agare serva suscepit liberos, plures verò post Saræ obitum à Cethura habuit, ne quis ejus frigiditatem objiciat. Jacobus parum dissimili ratione fit Polygamus. Cum is ad Labanum accessisset, Rachelis amore captus de hac sola fuerat sollicitus, & nisi a socero deceptus fuisset nunquam de aliis uxoribus ducendis nec per somnium cogitasset. Matrimonia ergo Abrahæ & Jacobi multum a Lamechi, Esaui aliorumque Polygamorum matrimoniis differunt invicem. David more regio ad circumvicinarum Gentium exemplum plures sibi adsciverat uxores

res quidem, at non ad Salomonis insaniam usque; majori tamen Patriarcharum culpa, quin id fecerit utique contra expressum (n.) legis præceptum, minime ambigendum est. Nugantur Hebræorum Magistri, dum ex verbis Nathanis Prophetæ matrimonium cum pluribus foeminis licitum demonstrari putant. Verba illa Dei non quasi Polygamiam approbantis sunt, cum eam in lege vetitam, præsertim Regibus pronuntiasset, sed more Hebraico quo omnia ad eum referuntur, ut ab omnibus Commentatoribus observatum est. (o.) Quod locum illum Legis attinet, in quo de Jure Primogenituræ inter duarum uxorum Liberos tractatur, cum de mulieribus successivè sumtis, vel quarum una fuisset repudiata, intelligi queat, nihil hinc ad Polygamiam propugnandam elici posset. Ponamus tamen, de Digami filiis agi hoc in loco, nonne eadem respondere possumus quæ (p.) Dominus Pharisæis de Divortii usu agebat: quamquam ex ejusdem Sacratissimi Salvatoris verbis illud primitivæ Matrimonii institutioni adversari appareat. Antequam huicce Articulo finem imponam, meminisse juvabit, sophisma illud adulatorium quod supra indicavi impedire, quominus homines polygamiam jure naturæ illicitam pariter atque furtum & homicidium minime agnoscere queat. Nemo autem est qui cum de furto vel homicidio loqui audiat, non illico hæc vitia contra naturam peccare aiat, quia uniuscujusque interest, ne occidatur, aut furto bonorum summâ curâ & sollicitudine partorum privetur. Quum autem de Polygamia, incestu & divortio flunt sermones, statim sponte sua sophismatis vim, passionem nostrum omnium adulando, prodire videmus, obstareque, ne idem de istius modi vitiis absque hæsitacione affirmemus. Hinc discamus quàm insulsè dicat (q.) Lyserus, Deum quidem unam tantum foeminam pro Adamo condidisse, attamen monoga-

nogamiam indè non probari, quandoquidem bina uniuscujusq; speciei animalia fuere creata, non tamen ut constante regula copularent se invicem unus cum una. Perperam hic bonus ille author homines rationis capaces cum brutis confudit, neque vidit summa sapientia factum esse; nimirum rationis expertes regulis moralibus adstringi haud potuisse, ne etiam deficerent animalium genera, cum plurima hominibus, animantibus quoque aliis, in alimentum cedere debuerunt.

(i.) Gen. cap. 1: 27. & cap. 2: 22. Græcor. fab. de Pandora prima fœminar. vid. apud Hesiod. Theogon v. 513. ubi Jovis fictam nominat, & v. 571. Vulcanum eam è terra formasse asserit. Operamque ad eandem adornandam locarunt alii Gentilium Dii v. seq. vid. eundem in oper. & dier. v. 60. &c. Apollodorus Lib. I. & 2. Hygin. fab. 142. Mendoza secundum Sinens. Tradit. primam fœminam Pausonam nominat. Relat. della China pag. 36. ed. Rom. 1586. At Sinarum Annales *Niu-Kua* Fohi sororem nominant eamque Reginam statuunt. Nostram vero Evam esse, me aliquando probaturum spero, si Deus vitam viresque porro conservare dignetur.

(k.) Ogygis Deucalionisque Diluviorum, plurimi Græc. & Roman. Auctores passim meminere. Chaldæi suum habent *Silutrum*, Chineses *Yao*. Suum etiam habent diluvium, quotquot Americam incolunt populi, suum habent Brachmanes. Vid. Epist. Marchal, Mem. de Tre-voux pag. 402. 1701.

(l.) Arbores, herbæ, insecta, Animalium denique tum marinorum tum terrestrium Ossa, Pisces, Conchilia, & id genus alia ubique terrarum reperiunda, reliquæ sunt illius Catastrophes auro contra pretiosiores, quæ in Principum, Rerumpubl. & Philosophorum quorundam Pynacothecis asservantur.

(m.) Gen. cap. 22: 20-24. 26: 34. & 29: 27, 28.

Tom. III.

C

(n.)

(*n.*) Deut. cap. 17: 17. 2. Sam. 12: 8.

(*o.*) Deut. cap. 21: 15.

(*p.*) Matth. cap. 19: 3. & seq. Marc. 10: 2. Luc. 16: 18.

(*q.*) Uti supra pag. 346.

§. XX.

Porro multos sciscitari mihi videre videor, num plures accipiendo uxores peccaverint Patriarchæ, quibus affirmando respondere non vereor; minus enim arrident, quæ (*r.*) auctores quosdam ad hanc rem dicentes comperi, ad stirpis sanctæ multiplicationem dispensatione vel inspiratione id factum aiunt; neutrum verum; infirmitate & ignorantia id evenisse (quanquam per accidens gentis electæ multiplicationi servierit) Deumque vitium illud aliaque ignota peccata eis condonasse, ex historia sacra colligendum est. Factum illud neque vituperando neque laudando narravit, inspirationem, vel dispensationem, ne verbulo quidem indicavit S. Historicus. Hinc palam fit, quantum possit exemplum, quo cum adulterio sophismate abutentes Rabbini fœcordiam propriam promere non verentur. Existimant nempe hæresim Sadducæorum opinionem eam esse, qua simul binas haberi jure uxores negabant ex lege illa: (*s.*) *Uxorem sorori suæ non accipies in ejus afflictionem*; ibi enim sorori suæ est loco alteri, ut verbum ipsum fert. Et Pésischtæ autor (*t.*) apud Seldenum huicce opinioni non rationes sed exempla opponit, quæ more quidem binas simul uxores ducere usitatum, at jure naturæ licitum, minime demonstrare queunt; de hocce Polygamix articulo Muhammede ineptius locuti sunt Rabbini, ut ex utrorumque operum collatione patet.

(*r.*) Fortalitium Fidei Lib. 4. de Bello Saraceno. fol. 283.

Lugduni 1525. Dionysius Carth. in Dialogo cum Saraceno. pag. 483. & 484. In opere cui titulus D. Carth.

contr.

contr. Alcoran & Sect. Machometic. Libri quinque. Coloniae 1533. Vives de Verit. Fidei Christ. pag. 624. & 625. Ed. Basil. 1544.

(s.) Levit. 18 : 18.

(t.) Seld. de Jure Nat. & Gent. juxta Hebræor. discip. Lib. 5. Cap. 6. pag. 585. Ed. Lips. 1695.

§. XXI.

Incestus viri connubium est cum foemina quibusdam consanguinitatis gradibus ipsi conjuncta. Quod jure naturæ vetita sint hæc connubia, exceptis forsan ascendentium descendentiumque gradibus, omnes dubitant, rationesque quibus id sit illicitum nemo quod sciam liquido attigit. Quas meditando ipse inveni, nunc proponam, ut non solum ascendentium descendentiumque sed ut transversalium graduum quosdam jure naturæ vetitos demonstrem. Hujus Legis naturæ præcepti fundamentum à dignitate hominis repetendum esse arbitror, quem, in quocumque demum statu supponatur, nunquam amittet. Moralis vero dignitas vel minui vel augeri potest, hæc ab actionibus hominum, illa à natura ipsa humana pendet. Quin rationes morales ab actionibus hominum oriantur, nemo unquam dubitavit, præter materialistarum catervam, quæ omnia mechanicis brutisque motibus fieri autumat. Ita tamen moralitas illa cum hominum natura connectitur, ut nec hominis idea absque ea vel concipi queat. Prima omnium actionum, quæ humanæ societati originem dedit, matrimonium fuit; quod statim inter conjugatos relationem statumque moralem produxit, ex quo tandem paternitatis filiationisque invicem & inter liberos fraternitatis ortæ sunt relationes. Et unius eorum matrimonio, alia inter ejusdem liberos & alium fratrem nova oritur relatio, quæ tandem ob collateralium graduum distantiam gradatim minuitur,

donec prorsus intercidat. Istius modi status nulli inter bruta dantur, præter alicujus paternitatis speciem, quam post statum alimentationis tempus interire videmus. Apud homines autem, ni brutorum instar vitam agere velle videantur, ad mortem usque, ut pote non soli Actioni Physicæ sed & morali dignitati innixi, permanere debent integri. Hinc fit ut homini excellentiori natura prædito jure naturæ incestuosos concubitus prohibeantur, animalibus minimè. Rationes nescio quas *certas ac naturales* hic desiderare videbatur (u.) H. Grotius, quæ istius modi obstarent connubiis; At non viderat Vir Celeberrimus, nulla (exceptis masculorum brutorumque Copulationibus) hujusce nec inter Parentum & liberorum concubitus naturalia impedimenta dari. Ipse etiam hæc subodorans, rationes morales proponit, scilicet liberorum erga parentes reverentiam, quæ matrimonia illa non irrita nec illicita reddere videtur. Causa in fallor unica est, ne confunderentur omnes familiarum relationes, vel connubiis vel facilitate atque licentia libidinis, ad quam omnes fermè propensiores existunt homines, illincque totius humanæ societatis oriretur interitus. Quantis familiæ perturbationibus essent obnoxia, & quam horrendum in modum se haberet earum status, imo ad longum tempus haud stabiles permanere quirent. Si Pater cum filia, filius cum matre, frater cum sorore invicem copularentur, præsertim si Polygamia divortiique adderetur licentia. Neque liberorum Adæ obijciantur matrimonia. Tunc temporis periculum nullum erat, quippe fratrum sororumque connubia post se nulla istius modi incommoda habebant. Nulla tunc præter fraternitatis erat relatio, quæ humani generis propagationi prævalere minimè debuerat. At incommoda, quæ minutatim recensere haud necessarium putavi, ita cum omni facilitate creantur, ut si (x.) Orientalibus credimus, nec iis carere potuerit Adami familia

milia, secundum enim eorum sententiam ob sororis gemellæ Caini amorem orta est Abeli cædes ; Fratrum vero sororumque connubia illo tempore posteriora, præter jus naturæ, nulla tunc necessitate id postulante extitere. Hujusce negativi juris naturæ præcepti apparebit veritas, si cum furto vel homicidio confectatur. Adamo cum solus esset non prohibebantur hæc vitia ; statim tamen post hominum multiplicationem vetita esse cœperunt.

(u.) De Jure Belli ac Pacis Lib. 2. cap. 5. Parag. 12. Not. 1.

(x.) Vide Said Ibn Batrick. Tom. 1. pag. 14 & 17. ubi Caini & Habelis Historiæ reperiuntur.

§. XXII.

Parentum cum liberis matrimonia absolutæ necessitati nunquam fuere adstricta. Errore tantum incestus filiarum Loth acciderat ; qui earum peccatum si non omnino tollit, saltem illud maxime minuere videtur. Existimaverunt nempe, omnes terræ incolas cum Sodoma aliisque urbibus periisse, hincque sibi à summo rerum conditore necessitatem impositam cum patre concumbere, ut generis humani impeditur interitus. Exempla si quæ sint, ut apud Persas, nihil ad rem faciunt ; rationibus non exemplis demonstrantur veritates morales. Rara tamen fuisse ejusmodi connubia mihi persuadere patior, ob varia naturalia impedimenta quæ in omnibus familiis sæpè erant obvia, ut longa parentum brevisque liberorum vita, ut de aliis incommodis taceam, quæ ab omnibus summa cum facilitate concipi queunt. Liberorum ratio etiam hic desideratur, nisi enim eorum haberetur consideratio, non ad humani generis propagationem, societatisque constitutionem conservationemque, sed libidinis explendæ gratia fierent istius modi connubia. Meditetur tandem unusquisque, quid de prole fieret, si hæc locum haberent in

variis casibus, quos inter homines quotidie nasci videmus. Personæ ergo cognatæ jure naturæ vetitæ meo quidem judicio sequentes sunt. Mater & Avia, filia & neptis, collateralesque à Patre, soror & sororis filia, ab-avo denique amita & matertera. Amittina vero & consobrina aliæque ab eis majori distantia distitæ sunt licitæ. Longam vetitarum foeminarum seriem enumerare haud necessarium existimavi, idem enim de proavia, pronepte, sororis nepte, amita & matertera magnis, & sic deinceps arbitrandum est. Eadem de affinitate conjunctis me dixisse putent æqui lectores, neque leviratus legem quæ Judæ temporibus in usu erat mihi objiciant. Lex hæc a Mose fuerat sancta, ne confunderentur Israelitarum tribus, & ut ad Messiam usque terræ Cananæ divisionis monumentum maneret intactum; Hæcque ratio tanti fuit ponderis, ut incestus culpam auferret, quod & in connubiis filiorum Adæ cum sororibus alia ratione primitus acciderat. Hinc apparet, ad incestum fugiendum jure naturæ omnes obligari qui non in iis circumstantiis existunt, quibus exceptionis privilegio gaudere queant. Exceptiones autem, quæ in hocce de incestu præcepto dantur, ad juris naturæ præceptorum rationes, quas supra innuebam demonstrandas, statimque omnes controversias a variis in hanc rem susceptas componendas, quam aptissimæ mihi videntur, ut huicce articulo aliquid ultra addendum supervacaneum judicem.

§. XXIII.

De *Divortio* varie à variis usitato paucis agam. Quin matrimonii naturæ adversetur nemo ambiget, qui familiarum liberorumque rationem habere voluerit, neque longa argumentorum serie indiget hujus rei probatio, cum in variis apud quosdam populos ad hanc licentiam limitationibus appareat, quod si eam omnino tollere non potuerunt, ad hoc tamen

tamen eorum leges collimasse, ut quantum fieri posset eam difficilem redderent, ne in vagos concubitus, degenerarent matrimonia, hincque totius societatis oriatur interitus. Unica de causa, *ob fornicationem* scilicet, divortium legitimum pronuntiavit Dominus, quod & juri naturali quam optimè quadrare nemo non videt. Cui sententiæ annuere videntur legis Mosaicæ verba, quibus eodem sensu Judaica adstipulabatur schola Sammajana, in hac re Hillelianâ sapientior. Quæ vero de exemplorum vi quoad incestum & Polygamiam superiori innucbam paragrafo, heic quoque locum habere velim. Si populorum mores & usus aliquid per se ad probandum conferrent, quot monstra (omnibus consentientibus) veritatis loco nobis quirent obtrudi, neque Christianorum plerorumque usum excipio; nam, ut ampla disquisitione, litteratissimus *Seldenus* (y.) vel a Judæorum Paganorumve licentia, vel ab ipsis Domini verbis perperam intellectis, obtinuisse apud eos divortia demonstravit. Quam inconcinne autoribus præsertim parum castigatis Judæorum gentiliumque moribus id obtigisse judicent æqui lectores. Nec enim veteres Græciæ Latique populi in hocce de divortio argumento, recentioribus utriusque Indiæ incolis fuere sapientiores; quod cum omni facilitate ex historica demonstrare possem collatione. Sint ergo uxores loquaces, rixosæ, contumaces, aliisque laborent vitiis, non idcirco sunt dimittendæ, æquo potius animo vitia hæc ferenda sunt, mansuetudineque lenienda, ne majora ob divortium oriantur incommoda. At si uxor mariti vitæ ferro aut veneno insidiatur, tunc demum cessat conjugis relatio, ipsamque vel ejicere vel ut hostem jure naturæ interimere sui que juris vindex existere potest; Et hæc observatio nos ad considerationem earum rerum invitat, quæ jure naturæ hominibus permittuntur.

(y) Uxor Hebraica Cap. 27. Lib. 1. ad finem usque totius operis.

C 4


§. XXIV.

§. XXIV.

Sunt qui putant, omnes homines in omnia indiscriminatim jus habere ; Itaque status belli sit eorum status naturalis. Si verò hæc hypothesis unquam inter morales locum habuisset, iis profecto idem accidisset, quod de Cadmæis e dentibus Draconis sponte natis militibus fabulantur antiqui. Demonstrare debuerant qui huicce opinioni adstipulantur, qua de ratione tandem quidam naturæ suæ obliti se conjungere potuerint ad componendam societatem quam vocant civilem, ne prorsus interirent omnes. Quomodo autem rerum experientia edocti rationis dictamine quiverint uti, cum hoc statu supposito nullum inveniatur tempus idoneum ut id aliquando fieret, maxime dum bellum belluarum instar invicem gererent, neque possibile appareat quosdam de jure suo aliquid aliis celsisse boni communis gratia, nisi statim rationis usum supponamus qui suum effectum ab ipso hominum exordio sortiretur. Hincque & belli simul atque pacis status sit hominibus naturalis, quod contradictionem involvit, impossibilitatemque hujus hypotheseos demonstrat. Si vero cum sapientioribus æqualitatis statum inter homines supponamus, quasi omnes simul vel nati vel creati fuissent, rationisque eos capaces fingamus, ut revera sunt, tunc absque labore, quid eis jure naturæ præcipiatur, prohibeaturque & permittatur, inveniemus. De Prioribus hætenus ; nunc de tertio pauca dicere visum est. *Æqualitas illa efficit ut nihil præter humanitatis officia sibi debeant invicem totius generis humani membra, dato tamen legitimo rerum dominio, quod primo occupanti illo in statu competit. Quod viderat Philosophus gentilis, cujus verba ad adulterum apponere operæ pretium putavi. (3.) Nonne sunt natura communes mulieres ? Assentior vel idem dico (inquit Philosophus) nam & porcellus communis est eorum qui sunt invitati ;*

ti, sed cum in partes dissectus & distributus fuerit, tu, si tibi videtur, ascende & partem ejus qui tibi assidet rape, furare clanculum aut immissa manu abligurito. Quod si de carne nihil poteris avellere, pinguedine imbue digitos & delinge. O egregium compotorem & convivam socraticum! Age theatrum nonne commune est civium? Cum igitur confederit ne adesto ubi visum fuerit & eorum aliquem ejicito; Sic etiam mulieres naturâ sunt communes. Ubi autem Legislator tanquam convivor eas diviserit, non & tu tuam partem quæres? An potius alienam rapies & abliguries? At homo literatus sum & Archedemum sector. Ergo tu Archedemi sectator & adulter esto & perfidus & loco hominis lupus aut simius. Quid enim interest. Quam bellè hæc cum illa primorum hominum bellum gerentium caterva conveniant omnes vident! Dato inquam legitimo rerum dominio eis ob mutuam aliorum officiorum indigentiam jure naturæ permittitur, ut tractatus, pacta, conventiones, societates & id genus alia instituant, ita tamen, ut non infringantur præcepta naturæ rationalis, neque quisquam sibi aliorum detrimento prospiciat, nisi circumstantiis necessitateque extrema cogentibus quarum varii prostant casus apud auctores, præsertim cum de vitæ conservatione agitur.

(2.) Arrianus in Epictetum Lib. 2. Cap. 4. p. 177. & 178.
Edit. Cantabrig. 1655.



Viro

II.

HISTORIA

*Vitæ, Operum & Obitus
Viri Clar.*

Jac. Christoph. ISELII,

SS. Theol. in Acad. Basil. Prof. Publ.

* * *

*Viro plurimum Reverendo atque
Celeberrimo*

JOH. GEORGIO ALTMANNO,

Linguae Græcæ & Ethices Prof. Ord. & h. t.

Academia Bernensis Rectori,

JACOBUS CHRISTOPHORUS BECKIUS S. M. C.
S. P. D.

PEtis a me, Vir Cel. mihiq. amicissime, ut brevem tibi de *Jac. Christophori ISELII* nostri, Theologi, & Polyhistoris incomparabilis, *τῆς αὐτοῦ ἐν αἰσίοις*, Vita atque scriptis narrationem conscribam, quam in lucem edere, atque eruditis legendam proponere possis. Existimas, Te non amicitiae, quæ tibi a compluribus annis mecum intercedit, jure tantum istud a me postulare; sed & eo, quod illustres atque eruditi viri, quibus nota fuit *Iselii* virtus atque doctrina, istius modi narrationem avide expectent. Sed quid si tibi dicam id, quod vere dicere possum; non esse a me expectandum quidquam, quod vel *Iselio* sit dignum, vel viris illis clarissimis placere queat? Sufficietne respondisse, officium istud & *Iselio* & amicis ejus deberi a me, quum bea-
to

to viro non propinqua modo necessitudine conjunctus fuerim, sed etiam inde ab annis XII. perpetuo fere ab ejus ore pependerim, indeque istud, quidquid est, progressum in Litterarum studio, quod exiguum tamen est, fecerim? Procul dubio existimabis, & istud esse commemorandum, cur me potius, quam quemvis alium, tibi hac de re appellandum censueris; tempus XX. mensium postremorum vitæ Iselianæ, quod in ejus ædibus exegi; quod quidem certe tempus haud exiguum fructum mihi cum in aliis omnibus, tum præcipue in cognoscenda ejus familiari consuetudine atque studiorum ratione attulisse videatur. Sed nemo sibi persuadebit, isthæc ita esse comparata, ut veniam mihi impetrare possint, si hoc scribendi genus nec tuæ, nec aliorum hominum doctorum satisfaciatur expectationi, quam sentio eo majorem esse, quomagis videor ex *Iselio* meo proficere debuisse.

Opportune tamen accidit, quod brevem tantum postulas narrationem. Nimirum longiorem conficiendam ei relinquis, qui Laudationis publicæ *Iselio* heic debitæ laborem in se suscipiet. Ea enim Laudatio, cum a Viro docto juxta & facundo, ut speramus, tempore consueto habita & typis commissa fuerit, nihil quod ulterius requiratur, relinquet. Qua propter faciam id, quod in hac temporis, mihi à te concessi, exiguitate possum; non quod istud Schediasma, effusum verius a me, quam studiose conscriptum, cuiquam placitum sperem; sed ut quantum apud me valeat & *Iselii* memoria, & tibi gratificandi studium, publico monumento testatum fiat.

Natus est ὁ παῖς pridie Eid. Jun. A. C. MDCLXXXI. Parente utroque honestissimo. Pater *Joh. Lucas Iselius*, ex familia erat, quæ jam ab annis CCCC. huic nostræ civitati complures viros dederat partim eruditione claros, partim ad præcipuas Reip. dignitates merito

to suo , nec sine insigni Patriæ commodo , prove-
ctos. Conjunxerat ille in prima juventute Mercatu-
ræ , cui deditus erat , studio Litteras , quarum in ip-
so amor perpetuus fuit , quamvis per vitæ genus , quod
ingressus erat , non liceret ipsi multum in iis operæ
ponere. Hanc ob causam filium istum , cum matu-
re admodum summam discendi cupiditatem , inge-
niumque non mediocre in se esse ostenderet , haud
invitus Musis consecravit. Sæpe audiivi Matrem *Ifelii* ,
fœminam virtute pariter atque annis venerabilem , ex
Birria familia , quæ ante paucos annos supremum
diem obiit , commemorantem , vix tertium excessis-
se annum , cum jam nec parentes nec præceptores
propemodum hanc discendi cupiditatem explere pos-
sent. Itaque cumprimum vires corpusculi ferrent ,
Gymnasium istius Civitatis adire passi sunt potius ,
quam jusserunt. In eo sub variis præceptoribus ita
paucis annis in elegantiorum Litterarum studio pro-
fecit , ut nemo non prævideret , insigne aliquod Orbis
eruditi lumen aliquando futurum. Auxit hanc spem ,
immo jam explere cœpit , cum anno M DC XCVI.
Carmen Heroicum IV. paginarum in 4. edidisset , in Gal-
los eâ tempestate Rhenum transeuntes , (a.) quod
admirationi fuit cunctis , qui Poëseos vim atque ele-
gantiam sentire poterant. Annum enim XV. *Ifelius*
nondum erat egressus. Iisdem temporibus alio etiam
modo felicissimos in Linguis progressus publice
ostendit , cum *Samuel Battierius* , Med. Doct. cum Cl.
Competitoribus de Cathedra Linguae Græcæ certaret ,
quam nunc cummaxime ornat , edito , pro more ,
Specimine Philologico. Is enim *Ifelium* nostrum *Responden-*
tis loco sibi adjunxit , neque ex ea re ullam poeniten-
tiæ causam habuit. Nam ita dextre se gessit *Ifelius* ,
ut non modo argumenta adversariorum , quæ latine
pro-

(a.) Accidit istud a. d. XIII. Cal. Jun. ejus , quem posui ,
anni.

proponerentur, ex tempore in Græcum sermonem conversa repetere, sed & brevi responsione eludere valeret, cum summa Exc. Præsidis sui voluptate.

Adpropinquabat illud tempus, quo Magisterii Philosophici gradus nostro conferendus erat. Itaque Examinibus consuetis cum applausu defunctus, diatriben edidit atque publice propugnavit (a.) *de Historicis Latinis melioris ævi*, quæ 32. paginas in 4. continet, atque non contemnendæ eruditionis specimen videtur. In istius diatribæ calce alteram promisit *de Politicis Latinis melioris ævi*, quam conscribere quidem cœpit, sed non perfecit, gravioribus scilicet studiis impeditus. Quo magis miror V. C. I. I. Scheuchzerum in Novis Litt. Helv. A. 1701. inter editas eam referre.

Ceterum Præceptoribus usus erat *Iselius*, in Legendis Græcis latinisque auctoribus, *Joh. Jac. Battierio*, tum Rhetorices, postea Juris Professore: in Philosophicis autem & Mathematicis *Jacobo Bernoullio V. C.* Post hæc, cum Linguam Gallicam plenius perdiscere vellet, quam ut Magistrorum præceptis, quæ domi didicerat, contentus esset, Genevam profectus, menses circiter VI. ibi exegit. A. 1698. eruditus omnibus gratissimus. Amicitiam ibi cum multis contraxit, quam postea ad extremum vitæ tempus conservavit. Habitavit in ædibus Rev. *Mauritii*, ad D. Gervasium Pastoris, qui eum, ut filium, dilexit. Cupiditate dein ductus, reliquias illas Antiquitatum Romæ, quas Gallia Meridionalis magno numero ostentat, inspicendi, mense Augusto Lugdunum abiit, indeque Massiliam, Nemausum, Montem Pessulanum, Aquas Sextias, Avenionem, Arausionem, aliaque loca

(a.) Moris enim tum erat aviti, ut nemo Philosophiæ sive Artium Lib. Magister prius salutaretur, quam Dissertationem edidisset atque publice defendisset; qui mos aliquandiu intermissus, non ita pridem postliminio reductus est.

loca ; quibus perlustratis, mense Novembri anni ejusdem, quo profectus fuerat, domum rediit.

Confecto ex animi sententia itinere totum sese sacrarum litterarum studio tradidit, non abjectis tamen iis disciplinis, quæ elegantiores appellari solent. Hæc enim *Iselii* semper deliciæ fuerunt, quibus etiam Theologica tractans, quidquid horarum subscevarum fuit, consecrabat. Sed Theologiæ tamen præcipuum ipsius hoc tempore studium fuit. Huic usque eo se dedit, ut A. 1701. Dissertationem publice proponeret, in sententiam *Jacobi Benigni Bossueti*, Meldensis Episcopi, de Babylone, Bestiisque & Meretrice Apocalyptica 4. pagg. 80. eoque facto, cum examina consueta jam præcessissent, inter V. D. Ministros referretur. Audiverat autem præcipue Theologiam docentem *Samuelem Werenfelsium* SS. Th. D. & Prof. cujus postea Collega factus est, & quem in summo semper honore habuit.

Ab hoc tempore magis magisque inclarescere cœpit. Cumque ad Linguarum Occidentalium cognitionem, ex quibus jam tum Italicam quoque atque Hispanicam tenebat, adjicere etiam Orientalium notitiam cuperet, maximam partem suæ diligentiae huc convertit. Usus erat jam antea in Hebraicis institutione Viri doctissimi, *Frid. Battierii*, qui tum ad D. Albanum Pastor erat. Et fructum quidem tulit istius laboris uberrimum. Nam præter Syriacas S. Codicum Versiones, etiam Chaldaicas V. T. Interpretationes, quas *Targumim* vocant, nec non plerorumque Rabbiorum Commentarios tam diligenter tractabat, ut si pergere vel potuisset vel voluisset, facile ad supremum aliquem hujus Litteraturæ gradum perventurus videretur. Arabica attigit tantum, non penitus pertractavit. Alius scilicet destinatus erat campus, in quo decurreret *Iselius*. Marburgensis Catto-
rum Academia, quæ nulli Germanicarum celebra-

te atque frequentia est inferior, non passa est, cum in studiis istis, quo cœperat pede, pergere. Cum enim Serenissimus Princeps, Landgravius Hassiæ, Virum doctum quæreret, qui *Eloquentiæ* atque *Historiarum* Cathedram ornaret, eamque ob rem *Joh. Laurentius Crollius* Basileam scriberet, oblatus est *Iselius*, qui ea tempestate hic, præ multis aliis, utrique isti provinciæ cum laude administrandæ idoneus erat. Itaque vix nominatus Principi erat noster, vixque ille missas ad se Dissertationes Iselianas inspexerat, cum mandaret suis, ut solennibus ad eum litteris publico nomine datis, juvenem arcefferent; quod & factum est. Litteræ *Vocationis* datæ sunt pridie Eid. Junias 1704. quo ipso die noster ante 23. annos natus erat, Non invitus sane conditionem tam honorificam accepit. Sed cum eodem anno Basiliensis ista Academia *Joh. Jacobum Buxtorffium* amississet, qui post avum atque patrem, Viros Celeberrimos, & de SS. Litterarum studio oprime meritos, *Linguam Sanctam* publice docuerat, omnesque haud obscure successorem destinarent (a.) *Johannem Buxtorffium*, qui tum V. D. Præconem in Agro Raurico agebat, ex *Joh. Jacobi* fratre genitus, voluit tamen *Iselius* patriam relicturus suæ in hoc genere eruditionis exstare monumentum. Multi sunt anni, ex quo apud nos constitutum est, ut Cathedrarum Candidati edita atque publice propugnata Dissertatione ostenderent, quantos in ea disciplina, cujus docendæ munus ambiunt, progressus fecerint. Egit istud cum Buxtorffio *Iselius*, non quod illi præferri aut cuperet aut speraret, sed ut intelligerent omnes, Linguas Orientales & a se doceri commodè posse, si opus esset. Elaboravit igitur, sive potius ex dudum parata copia delegit *Specimen observatio-*
num

(a.) Iste revera successor *Joh. Jac. Buxtorffii* exstitit, provinciamque suam ad A. 1732. non sine applausu administravit. Nam eo anno, d. 20. Junii mortuus est.

num atque Conjecturarum, ad Orientalem Philologiam & Criticam pertinentium, ac maximam partem ex vetustis V. T. Versionibus depromptarum. 4. pagg. 40. Nec diu moratus, Marburgum sese contulit.

Quæris, quomodo exceptus ibi sit? Verbo dicam; præsens primum apud Marburgenses, deinde etiam Principem salutandi occasionem nactus, talem sese demonstravit, qualem neque hic neque illi sperare ausi sunt. Itaque inde ab adventu suo usque ad Februarium A. 1707. in præcipuis ejus Academiæ ornamentis habitus est. Neque tamen, ut mos est pleborumque eruditorum in Germania, scriptis magnopere nomen parare studuit, legendi quam scribendi cupidior: Sed scholas tam publicas quam privatas summa cum studiosorum hominum, nobilium pariter ignobiliumque, frequentia diligenter habuit. Edidit tamen nonnulla, quæ heic commemoranda veniunt; Orationem scilicet *geminam Panegyricam*, alteram celebrando Ser. *Caroli Landgravii Natali quinquagesimo*, qui in Eid. Sextil. A. 1705. incidit; alteram *Laudandæ* post obitum Ser. Principi *Ludov. Dorotheæ*, ex Reg. & Elect. stirpe Marchionum Brandeb. Ser. Hassorum Principis Hæredit. Conjugi a. d. V. Cal. Febr. 1706. dictam. Utraque Oratio, posterior imprimis ab ipsomet *Iselio* pronuntiata, cum prior ab ipso quidem scripta, sed a generoso juvene *Malsburgio* habita esset, ita placuit Auditoribus primum, dein Lectoribus, ut omnes judicarent, facundiorum Eloquentiæ Professore nulli Academiæ sperandum esse. Sequenti anno Dissertationem publici juris fecit, de *Magorum in Persia*, post Cambysem, *dominatione*. Sed cum hanc ederet Diatriben, Basilea jam Marburgo tantum decus raptura, quod utique ipsi potissimum debebat, quodque sibi jam tum vindicaverat, cum *Iselio* discedenti Ampliis. Civitatis ordo peculiari S.C. confirmavit ultro, rationem absentis primo quoque tem-

tempore habitum iri ; eum *Historiarum Professore* constituerat. Factum id est a. d. 12. Cal. Octobris 1706. quo anno *Joh. Jac. Hoffmannus*, vir ob eruditionem & scripta clarus, obierat. Substitit tamen *Iselius* Marburgi ad Februarium usque insequentis anni. Nam tum demum in patriam rediit.

Cum in itinere esset, Patrem amisit, quem summa semper pietate coluerat, atque cum maxime post triennii absentiam amplecti atque colloqui gestiebat. Auspicatus dein Professionem Historiarum, ea, qua apud Catos usus erat, diligentia & docere & discere, id est, omne genus scriptorum Historicorum perolvere, studuit, eoque pervenit labore atque industria, ut pauca essent vel in veteri vel in recentiori rerum gestarum Historia, vel in ea etiam, quæ *Medij Aevi* appellatur, quæ non accuratissime teneret, & ex immenso memoriæ thesauro, quâ incredibilem in modum valebat, expromere quavis occasione data posset. Et mirum profecto est, tantum efficere potuisse per valetudinem, quam iis jam temporibus vigiliis atque labore haud mediocriter attriverat. Neque etiam credendum, nihil aliud egisse, quam ut otiosus Litterarum studiis incumberet. Non patiebantur hoc eruditi, quibus procul etiam agentibus *Iselianum* nomen innotuerat ; sed litteris frequenter datis, tacito ejus alloquio frui cupiebant. Non patiebantur Elegantiorum Litterarum, atque in his potissimum Historiæ cognoscendæ studiosi, qui ad audiendum Iselium confluebant. Scribit ipse Vir B. in litteris A. 1708. ad Amicum quendam datis, quotidie sex horis seu publice seu privatim se docere, complures deinde horas iis dare, qui se conveniant. Etiam scriptum non unum illis annis edidit ; multas Disputationes publice habitas præsidio suo moderatus est. Sed quæ Diatribæ Discipulorum Iselianorum industria maximam partem sunt conscriptæ, quarum

multæ sunt, eas non commemorabo, quamvis & in his *τὸ μακρότερον* labor aliquis & nonnunquam multus, necessario accesserit. Ipsemet concinnavit A. 1709. *Dissertationis, qua Aeternitas Mundi Argumentis Historicis confutatur*, partem I. *Artium novitatem demonstrare incipientem*, 4. pagg. 22. Vix hæc in lucem prodierat, cum moritur *Paulus Reboletius*, V. D. in Ecclesia hujus Urbis Gallica Administer, quo nullus unquam hominum carior *Iselio*, Parentibus exceptis, fuisse videtur. (a.) Quid hic ageret? aut quo modo dolorem levaret? Putabat omnino, recte se facturum, si *Laudationem* amici *funebrem* in frequentissima *Panegyri* latine & diceret, & typis exire pateretur. Secuta paulo post est *Declaratio antiqui Lapidis Tergestini*, cum non uno in *Antiquitatem Rom. excursu*. 4. pagg. 62. Respondentis officium, (nam istud hoc loco minime omitendum est) agebat *Joh. Daniel Schoepflinus*, Discipulus tum *Iselii*, nunc *Historiarum* atque *Eloquentiæ* in *Academia Argentoratensi* Professor *Celeberrimus*: adjeceratque de suo XIV. *Quæstiones Historicas*, quæ jam tum summam de eo spem præbebant. Fuit is deinde per omnem vitam *Iselio* carissimus.

Propemodum oblitus eram id, quod *Iselio* accidit perhonorificum, neque tamen in multorum notitiam pervenit. Fuit inde ab initio sæculi istius in *Helvetia* Legatus *Philippi Regis Hispaniarum*, *Berettius Landinus*, *Iselio* nostro ita familiaris, ut cum vel ad eum scriberet, vel ab eo litteras acciperet, quod frequentissime fiebat, quoad ille in *Helvetia* agebat, immo etiam A. 1719. quo ille Vir apud *Batavos* Legatus ejusdem Regis erat; non in fastigio dignitatis constitutus, sed ex æqualibus *Iselii* esse videretur. Is ab illo, qui *Venetorum* in *Helvetia* res curabat, rogatus fuit, ut sibi indicare vellet in his oris Virum do-

(a.) Natus hic erat à *Privas en Vivarais* a. d. 9. Cal. Mart. 1655. Obiit *Basilæ* idib. April. 1710.

doctum, quem crederet sine rubore a se commendari posse *Studii Patavini Curatoribus*, *Professione Linguae Latinae atque Graecae* praeficiendum. Quid censes Berettium fecisse? *Iselio* confestim scribit, ut vel ipse in se reciperet hanc provinciam Academicam, quod propositis multis rationibus suadere conatus est; vel alium ex *Basiliensibus* nominaret illi oneri parem. Sed non poterat *o μανασίτης* adduci, ut relicta Patria, relicta Matre carissima atque ceteris agnatis, commoda illa, quibus jam tum fruebatur, Academiae peregrinae post haberet. Fuerunt & alia, quae ei obstare videbantur. Modestia vero tanta fuit, ut sese illi spartae parem non esse suspicaretur, cui certe par erat, si quisquam alius. Neque enim poterat tum indicare alium, quem crederet hac Patavina Cathedra se aptiorem esse.

Eodem tempore summus istius Civitatis Magistratus, petente Academiae Senatu, novum Brabeuterium aedificari atque exornari jusserat. Istud quum perfectum esset, nemo videbatur aptior ei dedicando, quam *Iselius* noster, cujus facundia cum maxime celebrabatur. Qua propter primus in superiore hujus novi Brabeuterii cathedra constitutus, ita gratias egit Magistratui, ita extulit istam munificentiam Amplis. Patriae Patrum, qua novum Academicis Actibus splendorem addere voluerunt, ut & *Iselium* calicis inaurati praemio, & Orationem dignam judicarent, quae in publicam lucem exiret. Sed ad majora *Iselium* DEI O. M. providentia vocabat.

Scilicet a. d. XI. Cal. Mai. Anni 1711. vivere desiit *Joh. Rodolphus Wetstenius*, J. R. F. S. Theologiae D. & N. T. in hac Academia Professor longe celeberrimus. Et duo tum erant Viri, quorum uterque dignus credebatur fore J. R. Wetstenio successor, *Jac. Christ. Iselius*, atque *Joh. Lud. Frey*. Itaque & uterque pro more eo Academiae, quo nemo ad Cathedram

publicam admittitur. nisi Doctoris in sua quisque Facultate titulo ornatus, eum titulum sibi post edita insignia eruditionis Theologicæ documenta, conferri voluit; id quod frequenti Panegyri peractum est ab *Hieronymo Burcardo*, S. Theol. D. & Prof. atque Ecclesiarum Antistite. (a.) Præbuit ista res occasionem duabus Dissertationibus *de Canone N. T.* quarum altera *Iselius-Henr. Dodivelli* sententiam confutat, altera *Pontificios* refellit in iis, in quibus circa hoc argumentum à nobis dissentiunt. Cum ad suffragia ventum esset, nec Patres Academiæ facile decernere possent, utrum ex duobus Viris eruditione, pietate, gravitate conspicuis Professore legerent, factum est, ut *Iselio* quidem *Cathedra* Theologica ordinaria committeretur; pl. Ven. *Freigius* vero non successor tantum *Iselio* in *Historiarum Cathedra*, sed & Collega, Titulo *Professoris Theologi Extraordinarii* ornatus, daretur? cum quo ille deinde Collega per omnem vitam conjunctissime vixit.

In hoc igitur officio constitutus *Iselius*, quod ei sanctissimum semper est visum, nihil antiquius habuit, quam uti omnem Muneris sui partem, quoad posset, expleret. Itaque ad docendum publice privatimque conversus, cum nullum genus diligentiae in se desiderari pateretur, ea interim colligere studuit, ex quibus *J. R. Wetstenii* Laudatio funebris concinnaretur; quam & deinde anno ipso vertente publice recitavit, atque in lucem edidit, non mediocrem ipse laudem Antecessoris, immo etiam Præceptoris quondam sui, laudatione consecutus. Etiam compluribus Disputationibus publicis præfuit. Nonnullas ipse conscripsit, in his duas *de Canone N. T.* alteram

(a.) Obiit etiam hic Vir paucis post *Iselium* diebus, scilicet Nonis Maji. Successor in Pastoratu atque Antistitio demum hodie constitutus est *Job. Rodolphus Merianus*.

ram A. 1712. alteram anno insequuto, superioribus addidit, varias Canonis istius recensiones a priscis Ecclesiæ Doctoribus propositas excutiens. Neque tamen id argumentum penitus ad finem perduxit. Existimo impeditum esse in hoc labore iis negotiis, quæ iis Codicibus Manuscriptis maximæ molis ad Concilium Constantiense atque Basiliense imprimis pertinentibus, non excutiendis tantum, sed & conficiendis inde per amanuenses, atque conferendis exemplis pro *Jacobo Infantio*, Viro præclaræ eruditionis, qui Historiam Constantiensis Concilii, paullo ante editam, inde locupletare, Basiliensis vero noviter componere cupiebat, suscepit. Quis non videt, quantus iste fuerit labor? Et tamen libenter eum in se suscepit *Iselius*, cum a Cl. Infantio litteris Berolini a. d. IV. Eid. April. 1714. datis, ut hoc faceret, rogaretur. Sed & idem opus suscepit postea quoque, anno scilicet Sæculi XVII. cum Illustrissimus *Dagueffæus*, Cancellarius Regni Galliarum, atque Sigillorum Custos id peteret. Petebat autem ideo potissimum, quod ista Concilii Basiliensis Acta, ex Autographis descripta, usui esse poterant in controversiis illis, quæ tum magno animorum motu in Galliis agitabantur. Quapropter & hodieque Actorum Concilii Basiliensis exemplum, *Iselii* cura confectum, in Bibliotheca Regia Parisiis repositum existat.

Aggressus interim erat *Iselius* argumentum, quod non indignum sane erat ista ejus eruditione atque diligentia. Post tot doctorum virorum in Anglia pariter atque aliis Christiani Orbis regionibus studia, quorum alii *Episcopalem*, ut vocamus, *Hierarchiam* defensum, alii oppugnatum ibant; ipse quoque conatus est istas Controversias Ecclesiæ Anglicanæ illustrare. Itaque A. 1716. primam edidit de iis Dissertationem, eamque satis amplam. Continet enim paginas 112. in quarta, quam vocant, forma. Operam

heic dedit, ut omni genere argumentorum demonstraret, non recte *Episcopos* atque *Presbyteros* vulgo distingui, sed utroque nomine rem eandem primis Ecclesiæ Christianæ temporibus esse significatam. Verum & hoc argumentum ad finem perducere non potuit. Nam eodem anno, venia ab Academiæ Proceribus impetrata, iter suscepit in Galliam, Batavos deinde etiam atque Anglos aditurus, per Germaniamque domum rediturus. Volebat hoc modo id facere, quod juvenis fecisset procul dubio, nisi ita mature ad Catos atque inde in Patriam vocatus esset. Profectus igitur in Galliam, Parisiis primum substitit, ibique frequens fuit apud eruditos, quorum summa est in ea Urbe copia. Non ignotus fuerat his antea, quamvis eum non vidissent; sed fama jam ante complures annos omnibus fuit commendatus. Nec eruditi modo, sed Magnates etiam libenter eum ad alloquium admittebant, & ultro atque summa cum humanitate rogabant, ut sæpius sese conveniret. Quod sane fecit *Iselius* diligenter, neque unquam ab iis, nisi gravior atque honoratior discessit. Inter eos, qui præcipue *Iselium* amabant, fuit Idem, quem antea commemoravimus, Illustrissimus *Dagueffaus*, Vir non dignitate tantum magnificus, sed insigni humanitate pariter, atque in bonas Litteras & Litteratos amore, conspicuus. Quæ res, accedente alia quadam, quam hic exprimere non opus est causa, *Iselium* diutius, quam putaverat vel ipse, vel itineris socii. Viri Doctissimi, in quibus honoris causa nominare visum est *Samuelem Scheurerum*, qui nunc Sacrosanctam Theologiam in Lyceo Bernensi docet, Vir & scriptis & eruditione clarissimus, existimaverant. Itaque illi, & hic imprimis Celeberrimus *Schemerus*, pergentes ad ulteriora, Batavos, Anglos atque Germanos salutaverunt. Profectus etiam cum *Iselio* fuerat *Emanuel Ribinerus*, Vir Doctissimus, cujus exstat

Differ-

Dissertatio erudita de Tyro, Præside Iselio defensa. Is nunc Pastor est Ecclesiæ, quæ ad D. Albanum convenire solet. Iselius, qui sibi certo proposuerat, primo statim vere in eadem loca proficisci, vocatus ab Academia patria est ad Rectoris Munus suscipiendum. Molestè enim hæc ferebat, eum tamdiu apud Exteros commorari, quo ipsa tantopere opus habebat. Nec tamen voluit alio decreto revocare invitum, quam hoc, quod illi honorificentissimum videbatur. Itaque rediit tandem paullo ante Solstitium æstivum, quo tempore apud nos Magnificus Academiae Rector successorì lampada tradere solet.

Quid hoc in Magistratu gesserit, heic non commemorabo. Alia item plurima omittam, quæ & ante & post egregie suscepit, itaque feliciter peregit, Patriæ, Ecclesiæ, Academiae utilissima. Celebrabit ea is, qui suo semper Funebrem Laudationem *Iselii* conscribet, recitabit atque edet. Quod si senserim, desiderari a viris bonis atque eruditis, quibus ille vel coram, vel per litteras, vel fama denique innotuit, uberiorem de omnibus commentationem; operam dabo in posterum, ut quidquid ad Historiam Viræ *Iseliani* pertinet, summa fide atque diligentia, ex schedis ejus, quæ in Bibliotheca *tū mpana* asservantur, colligam. Sed hoc non est opus paucorum dierum, quos tu mihi, Vir Celeberrime, ad hoc schediasma, quod cum maxime legis, conscribendum concessisti; neque intra paucas pagellas finiri poterit.

Sed addamus breviter, quæ reliqua sunt. Quum *Iselius* Parisiis omnium animos sibi conciliasset, non morum tantum elegantia, sed & eruditione, factum est, ut *Academia Regia Inscriptionum atque Litterarum Elegantiorum* eum in numerum sociorum acciperet. Amiserat enim a. d. X. Cal. Decemb. 1716. Virum Celeberrimum, *Gisbertum Cuperum*, Consulem Daventriensem. Huic qui succederet dignissimus vi-

debatur *J. C. Iselius* ; idque eo magis, quod ab initio propemodum sæculi istius frequenter ad eum Virum litteras dederat, mutuasque acceperat. Quo loco istud haud quaquam est prætermittendum, quod cum per aliquod tempus inter se summa quidem argumentorum vi, sed amice tamen disputassent *Cuperus* atque *Iselius*, de speculis illis, quibus veterum nonnulli tradiderunt, Archimedem in obsidione Syracusarum naves Rom. incendiisse, illo veritatem rei defendente, hoc negante ; cumque *Iselius* & suas & *Cuperi* litteras Illustrissimo *Dagueffæo* misisset, quem sciebat istarum rerum & studiosum & iustissimum esse æstimatorem, per hunc deinde res ad Academicos pervenit. Isti cum in Conventu prælegi sibi eas litteras curassent, non dubitarunt *Iselium* pro *Cupero* Socium adsciscere. Factum igitur est hac de re decretum a. d. XIV. Cal. Febr. A. 1718. idque Illustriss. *Dagueffæus* ad *Iselium* mittendum ab Academia accepit, humanissimis suis Litteris ultro additis. Ita *Iselius* eundem adeptus est locum, quem tum duo tantum obtinebant Viri totò orbe celebratissimi, *Cardinalis Gualthierius*, & *Domnus Anselmus Bandurius* Benedictinus atque Magni Ducis Florentiæ Bibliothecarius. (a.) In hac ille dignitate constitutus nonnullas composuit Diatribas, quæ in Academia recitarentur, quarum etiam argumentum Commentariis illius insertum est. Sic invenies Tom. V. pag. 277. (b.) Dissertationem *Iselii* nostri, qua inquiritur, quo modo legendæ atque explicandæ sint Litteræ CER. PER. quæ in tribus Nummis *Sidoniorum* occurrunt.

Quum *Iselius* præter istos labores litterarios publice etiam sæpius concionaretur, idque nonnunquam Gallice, plerumque tamen Germanice ; rogatus a multis

(a.) Isti tres erant illi, quos Galli appellant *Associés Honoraires Etrangers*.

(b.) Editionis Parisinæ in 4to.

multis edidit A. 1719. fasciculum Orationum Sacrarum, quæ sive rem sive elocutionem spectes, insignem atque divino zelo inflammata eloquentiam demonstrant. Sequenti anno cum Collegis operam dedit, ut Gymnasium nostrum rectius, quam antea fuerat, constitueretur; & quoniam visum erat *Seb. Castellionis Dialogos Sacros*, Librum juventuti utilissimum, pro ea schola edere, *Ifelio* ista cura demandata est. Is igitur Præfationem atque notas ei Libro addidit, in quibus diversæ editiones ab ipso Castellione curatæ diligenter conferuntur. Paullo post rogatu Bibliopolæ susceptum est illud opus, quod omnibus Historiarum studiosis gratissimum accidit. Nimirum *Ifelius*, cum aliis Viris eruditis istius Academiæ, augere atque in plerisque partibus emendare constituit *Lexicon* illud *Historico-Geographicum*, quod jam antea vernacule apud Saxones prodierat. Quid in ea re præstiterit, illi sciunt, qui eo Libro frequenter utuntur, neque nesciunt, quantum eruditionis, quantum studii, quantum vigiliarum ad istius generis institutum requiratur. Quod si qui sunt, quibus multa prætermittenda videantur, quæ vel emendari vel addi poterant; illi cogitent, neque *Ifelium*, neque ejus in hoc labore socios, promississe *Lexicon* omnibus partibus absolutum. Quis enim tale quid effecturum se speret tam brevi tempore, inter tot alia, quæ agenda necessario erant, nisi ultro insanire velit? Qua propter legant Præfationes illi operi ab *Ifelio* præfixas, ut quid promissum sit, quidque præstitum intelligant.

Post hoc tempus nihil edidit *Ifelius*, præter *Depulsionem Calumniarum in Diario Gallico*, cui titulus: *Bibliothèque Raisonnée &c.* Vol. XI. Part. I. Artic. 8. sibi *impartiarum*. 4. pagg. 38. Istius libelli argumentum notum est, ideoque non enarrabo. Possem tamen addere eas quoque *Ifelii* lucubrationes, quas multis eruditissimis Viris misit, Diariis aut Dissertationum Fasciculis in-

ferendas. Sed earum Indicem alio tempore tecum communicabo. Etiam illa, quæ ad litterarum commercia pertinent, in aliud tempus differo. Facile interim credes, si affirmavero, non in vulgo tantum Litterarum, sed in iis etiam, qui præcipua Orbis lumina aut fuisse aut esse existimantur, vix unum reperiri, qui non ad Iselium Litteras dederit, vicissimque acceperit. Quin Magnates quoque non existimabant, suæ dignitati quidquam decedere, si Iselium literis alloquerentur, & modo ex historia aliquid, modo ex Antiquitate, quærent. Nec defuerunt, qui de Religione cum eo agerent. Inde natæ sunt tot Dissertationes Epistolicae, quæ in Schedis Iselianis latent. Inde excreverunt tot Volumina Epistolarum ab eo & ad eum exaratarum, quæ præcipuum Bibliothecæ, quam egregiam habuit, ornamentum constituunt. Poteram etiam illud commemorare, quod multum operæ posuerit in recensendo atque augendo *Urstisii Chronico Basiliensi*. Et profecto, nisi contentio duorum Typographorum, quorum uterque suum esse jus *Urstisium* recudendi dictitabat, intercessisset, haberemus nunc cum Librum, *Iselii* cura locupletatum. Neque enim quisquam huic rei aptior erat. Nunc jacet quidem ille labor; sed ita jacet, ut Beati Viri Schedæ ad Chronicon istud pertinentes ex voluntate Auctoris in Bibliotheca Academica serventur, donec aliquis exoriatur, qui quod *Iselius* cœpit, ad umbilicum perducere queat.

Venio igitur ad ultima Viri, in quibus tamen prolixus non ero. Neque enim dolor meus id finit, qui, quo magis de iis cogito, eo magis animum meum premit. Eheu! cur non possum ejus dici oblivisci, quo die *Iselius* meus ex Conventu Procerum Academicorum domum vesperi rediens, vehementissimum febris insultum questus est? Erat is dies a. d. IV. Cal. Aprilis. Febris illa, de qua conquerebatur, non erat
novus

novus ipsi vel incognitus morbus ; sed propemodum XXVIII. sunt anni, ex quo eum vexare cœpit. Magnopere imprimis aucta est pestifera mali vis post reditum *Ifelii* ex itinere Parisino, & deinde exantlatos immensos prope labores in conferendis Codicibus Manuscriptis Concilii Basiliensis, atque emendandis exemplis, quæ inde per complures studiosos juvenes conficiebantur. Sed, si verum fateri volumus, valetudinem suam ipse jam in prima ætate nimis studiis atque vigiliis debilitaverat. Et quamvis temperantiæ studiosissimus per omnem vitam fuerat, non utebatur tamen ea victus ratione, quæ corpusculi vires vel augere vel saltem conservare posset. Quid mirum, si procedente ætate imbecillitas aucta est, & ita quidem, ut inde ab A. 1718. vix semel sciamus duobus tribusve mensibus continuis morbo vacasse, atque penitus à lecto abfuisse ? Morbi genus, quo perpetuo fere conflabatur, & tandem quoque extinctus est, febris catarrhalis appellari solita Medicorum filiis. Ea variis symptomatibus plerunque distinguebatur, nec ultra diem octavum vel nonum durare solebat ; tali tamen relicta infirmitate corporis, quæ multorum dierum quiete vix tolleretur. Qua propter nostrum, a gravioribus studiis, imprimis vero ab omni scriptione, penitus abstrahabat. Legebat tamen semper in lecto decumbens ; dictabat nonnumquam ad amicos Litteras, ut ne ægrotus quidem erudita cum absentibus colloquia intermitteret. Sed & cum hora docendi appropinquaret, sive publicæ id exigent officii partes, sive privatæ, surgebat utcumque, atque ad eam reptabat ædium suarum partem, quam habendis Scholis destinaverat. (a.) Adeo diligens erat in iis, quæ Muneris ratio poscebat. Quod si paullum modo melius haberet, ad Conventus etiam sive Academicos

(a.) Cum enim domo exire non poterat, etiam publicas Prælectiones domi habere solebat.

cos sive Ecclesiasticos, qui apud nos satis frequentes habentur, abibat, posthabitis etiam suorum precibus, qui eum domi retinere conabantur. Mihi quidem certe sæpenumero roganti, ut sibi in his laboribus parceret, utque id quod necesse haberet, paullo plus quietis corpori animoque suo indulgere vellet: mori se malle affirmavit, quam ut ullas officii sui partes omitteret.

Et præstitit sane Ecclesiæ Academiæque officium ad extremum usque spiritum. Nam, ut dicere incepti, ex Conventu Academico rediens ea oppressus est febris, quæ eum ex vivis sustulit. Scilicet hæc cum vomitibus crebris, atque omnis appetitus cessatione, ira vires exhauserat, ut statim appareret, non diutius victurum. Nam & ille, qui in omnibus morbis semper adfuerat, animi vigor exciderat, & sermo difficulter procedebat. Quo factum est, ut pauca per eos dies loqueretur. Facile judicabunt omnes, nihil neglectum esse in hoc rerum statu, quod ad morbi vim depellendam pertineret. Præter Medicum ordinarium arcessitus etiam alter, qui absque controversia ex præstantissimis hujus Urbis est, ipsique *Iselio* imprimis carus atque amicus erat, nullum genus diligentæ prætermisit. Sed Deo O. M. ad se perducere visum est servum suum. Cum enim non cessaret febris, viresque corporis celeriter absumeret, factum est, ut XIV. dies morbi, qui in ipsas Eidas April. istius, quem nunc agimus, anni incidebat, ultimus esset *Iselio*. Ita illè quidem ad beatas sedes discessit; nos vero in hac miseriarum valle reliquit, mœrore atque luctu prope-modum confectos.

Habes Vir Cel. quæ in præsentiarum de *Iselii* nostri vita & scriptis impertire potui: quæ si non satis eleganter exposita videbuntur, vera tamen omnia deprehendes. Vale, & me, quod facis, amare persevera. Datum Basileæ, ipsis Edib. Sextil. M DCC XXXVII.

III.

JOH. CONRADI FUESLINI
COMMENTATIO

Philologico - Critica,

qua

Verba Epistolæ ad Romanos

Cap. V. vers. 13.

Qua par est, Modestia

Examinantur & Explicantur.

Argumentum totius Dissertationis.

§. I. Christianorum est, verbum Dei investigare. Res in S. Scriptura propositæ sunt vel claræ & perspicuæ, vel intellectu difficiles & multo labore retegendæ. §. II. Inde à temporibus beatæ reformationis viri docti in S. Scriptura explicanda magnam operam collocarunt, attamen multa inexplicata reliquerunt. §. III. Non S. Scripturæ sed nobis vitio tribuendum est, quod in ea multa non intelligamus. §. IV. Artes & scientiæ, imprimis historia, Philosophia & linguarum antiquitatumque cognitio S. Scripturæ interpretem multum adjuvant. §. V. Scopus totius dissertationis. §. VI. Ejusque occasio. §. VII. Difficultates, quæ in communi hujus loci explicatione occurrunt. §. VIII. Diversæ de mente Paullii sententiæ. Significatio vocis *ἀρετή*, quam hoc loco obtinet. §. IX. Ea variis & sacrorum & profanorum scriptorum exemplis confirmatur. §. X. Mea inter-

pretatio verborum Paulli, quæ ex scopo Apostoli, antecedentibus & consequentibus probatur. §. XI. Clarissimus Limborchius modeste notatur. §. XII. De qua lege Apostolo sermo sit, inquitur. Quod lex naturalis sit, tribus potissimum argumentis contra Hobbesium probatur. §. XIII. Apostolus non de lege naturali, sed de lege particulari Adamo à Deo data loquitur, quod ex ejus scopo probatur. §. XIV. Defectus legis naturalis & occasio, qua Lex Mosaica data sit. Explicatio verborum Epistolæ ad Rom. c. V. v. 20. Finis legum publicarum. §. XV. Exempla eorum, qui virtutem secundum legem naturalem coluerunt. Justinus Trogi Pompeji Epitomator explicatus. §. XVI. Natura quidem, quid bonum sit, revelat, at vires conferre non potest id præstandi. Rationes, cur eas conferre non possit. Has vires gratia divina adipiscimur. §. XVII. Lex Dei à quibusdam immerito severitatis accusatur. Nos in id incumbere debemus, ut naturam pravam ratione sublevemus.

§. I.

NObis Christianis necessitas imposita est investigandi verbum Dei, secundum præceptum Authoris & Principis nostri, *ἐπευῶντε τὰς γραφάς*. Hoc qui non facit, nomine Christiani indignus est, quandoquidem Christus non tales amat discipulos, qui inertia dediti doctrinam cœlestem pari levitate attingunt, qua Muhamedi aut alius horribilioris doctoris præcepta imbibissent, si in his terris nati atque educati fuissent, ubi talia monstra aluntur. Verum enim vero res, quæ nobis in S. Scriptura proponuntur, sunt duplicis generis, nam sunt vel veritates adeo claræ & perspicuæ, ut illas quivis intelligere possit, qui eas intuetur, modo ei sanum sit sinciput. Vel sunt veritates paullulum absconditæ & reclusæ, ut non cui-
vis

vis appareant, sed multo labore & longa meditatione velint retegī. Hæ non uno impetu emergunt, sed veluti sol autumnī tempore per densissimas nebulas lente prorumpit, sic illæ caligine discussa sensim sensimque lucem suam emittunt.

§. II.

Ex eo tempore, quo senescenti Ecclesiæ pristina laus atque honos restituta sunt, præclarissima viguerunt ingenia, quæ omnem operam, curam atque diligentiam in eo collocarunt, ut S. Scripturam suis commentariis illustrarent, dictaque nullum lumen habentia è tenebris eruerent. Attamen, quanta quanta fuerit illorum diligentia, non omnia explanarunt, sed posteris multa reliquerunt, quibus ingenium, eruditionem, omnem denique industriam suam experiri possent.

§. III.

Ne quis in malam partem sumat, quæ dixi, præstantissima ingenia S. Scripturæ loca nullum lumen habentia è tenebris cruissē. Non adeo mei oblitus sum, ut non noverim, quæ S. Scripturæ dos sit, ut oculos illustret & aviis infallibilis dux sit. Cum ea à Deo profecta sit, ὅς Φῶς ἐστὶ καὶ πᾶσι τῶν Θείων, omnino luce destituta esse non potest. Etsi quando nobis illa carere videtur, non ejus est culpa sed nostra. Quemadmodum non soli vitio vertitur, si cæcus jocundam ejus lucem non videt, ita non S. Scripturæ, sed nostræ cæcitati tribuendum est, si in clara luce non videmus. Nos natura in maxima caligine rerumque divinarum ignorance versamur, & nisi divino lumine illustremur, prorsus inepti sumus ad lucem oculis nostris videndam. Imo vero multis accidit, ut ipsis cœlestis lux officiat, sicuti naturalis lux eos lædit, quorum oculi acribus quibusdam & nocivis humoribus madent. Ad has tenebras discutiendas divina gratia

gratia nobis varia remedia suppeditavit, quibus uti debemus, nisi instituto Dei adversari velimus.

§. IV.

Certissimum atque præsentissimum remedium in artibus atque scientiis positum est, si piis animis & depositis pravis cupiditatibus nos ad eas applicemus. Qui sine illarum ope divina oracula interpretari vult, idem agit, ac si cum ratione insaniat. Historiæ, Philosophiæ, antiquarum consuetudinum & linguarum cognitio S. Scripturæ interpretem tantopere adjuvant, ut nemo talis haberi possit, nisi in his studiis versatus fuerit. Quot in Prophetarum oraculis occurrunt & dicta & facta, quæ non explicari possunt, nisi ex veterum monarchiarum historiis? Quot in Evangelistarum & Apostolorum scriptis occurrunt res obscuræ, quibus ex Judæorum Græcorumque consuetudinibus continuo nova lux affulget? Quot denique voces & loquendi formulæ è philosophorum scholis in vulgus emanarunt, quas deinde Apostoli, quia usu viguerunt, & ab omnibus facile intelligebantur, in sua scripta transtulerunt? At illas hodie nemo intelliget, nisi eos fontes studiose aperuerit, è quibus istorum philosophorum præcepta hauriuntur.

§. V.

Doctissimus atque de Historia Philosophica meriti-
tissimus Vir JACOBUS BRUKERUS, Augustanus, elegantissima dissertatione in verba Epistolæ ad Ephesios cap. II. v. 2. quæ *Tempe Helveticis* (a.) inserta est, clarissimum edidit exemplum, quantum præsidii veteris philosophiæ studium ad N. Testamenti explanationem conferat. Ego vero in præsentiarum docebo, quam sollicitus interpres esse debeat in ea significatione investiganda, quam vox quævis eo, quo posita est, habet loco; quamque misere in errores & falsas

fas opiniones trudemur, si vel minimam particulam non eo, quo par est, sensu interpretemur.

§. VI.

Verba divi Paulli, (a.) quæ mihi explicanda sum-
si, hæc sunt : ἄχρη γὰρ νόμος ἁμαρτία ἦν ἐν κόσμῳ. ἁμαρτία
δὲ ὅκ' ἐλογεῖται μὴ ὅντος νόμου. quæ interpretes hæcenus
omnes hoc fere modo latine reddiderunt : *Usque ad le-
gem peccatum erat in mundo ; peccatum autem non imputatur,
ubi non est lex.* Per legem vero intelligunt legem à Moi-
se in monte Sinai latam. Quotiens Paulli Epistolas re-
legens ad hæc verba perveni, sensus mihi obscurus
videbatur, semper igitur commentatores consului, sed
quod sæpissime nobis usu venit, in illorum explica-
tionibus acquievi, non cogitans, in versione literali
errorem latere. Cum vero paucis ante diebus in le-
ctionem libri incidissem, qui sub *DEMOCRITI
REDIVIVI* titulo circumfertur, in quove historia
de miserabili tristisque primorum hominum casu in al-
legoriam transformatur, & peccatum, quod Theolo-
gi originale vocant, fabulis atque commentis otioso-
rum hominum adnumeratur, egoque hocce caput
Epistolæ ad Romanos, quo de vitiosa lue, quæ in-
felici traduce ad nos propagata est, accurate agitur,
cum historia Moysis diligentissime contulissem, & Apo-
stoli mentem omni curâ atque sollicitudine investi-
gasssem, aliquantum temporis ad hæc verba tanquam
ad saxum adhæsi, nexum enim eorum, cum illis, quæ
versu præcedenti dicta erant, non reperiēbam. Nem-
pe Apostolus dixerat : *Unius hominis culpa factum esse, ut
peccatum venisset in mundum & per peccatum mors ; imo ve-
ro ut pallida mors omnes homines ad nigra tartara raperet.*
Hisce statim adjungit : *namque peccatum usque ad legem in
mundo vixit, ubi vero nulla est lex, peccatum non imputatur,*

§. VII.

Quocunque me vertebam, nexum horum verborum

Tom. III.

E

rum

(a) Rom. cap. V. v. 13.

rum investigaturus, cum invenire non potui. Peccatum, cogitabam, vixit quidem in mundo & tyrannidem quandam exercuit jam ante legem, nam primorum hominum peccatum ita in eorum posteros derivatum atque propagatum est, ut ipsi quoque lubentes peccaverint & sese in mortem præcipitaverint. Ita statuit Apostolus, ita claris verbis docet. At cur hisce adjungit, *ubi vero nulla est lex, peccatum non imputatur*; hoc modo homines, qui ante legem Moisis vixerunt, imputatione peccati iterum liberare videntur, cum tamen de omnibus hominibus affirmavisset, eos peccavisse & hanc ob causam morte periisse. Hæc mihi animo pervolventi alius subortus est scrupulus. Si imputatio peccati, ita porro mecum cogitabam, eo demum tempore fieri incipit, quo lex per Moysen data est, cur homines, qui ante eam vixerunt, tanquam lege damnati ad mortis supplicium rapiebantur? Infantes igitur & præterquam meruerunt, pœnas dederunt. Sic facile est, nos in gravissimos errores trudi, si veras rerum causas ignoramus, nam parum absuit, quin verba Apostoli contradictionibus volvi credidissem.

§. VIII.

Fateor, me diu in hac causâ tanquam in vado hæsisse. Quo plures commentarios evolvi, eo magis incertus ad pristina dubia relapsus sum, omnes enim pari modo laborare &, uti sese ex hac difficultate emergant, nescire observavi. Verba Pauli uno errore decepti in eundem fere modum latine exponebant, sensum eorum singuli ad præconcepas opiniones detorquebant. Tandem fortuito casu in erroris causam incidi. Communis illa verborum expositio mihi suspecta fiebat, cumque Lexica consuluissem, vocem *ἄχρι* non solum *usque*, seu terminum *ad quem*, uti aiunt, sed etiam *quamdiu*, ex quo tempore seu terminum *à quo* significare reperi. Simul mihi in mentem venit

venit verborum Lucæ in suo Evangelio cap. IV. dicentis : συντελέσας πάντα πειρασμὸν ὁ διάβολος ἀπέστη ἀπὸ αὐτῶ ἄχρι καιρῶ, quo loco ultima hæc verba ἄχρι καιρῶ manifeste significant, ab eo tempore, nempe *Diabolus peracta omni tentatione statim ab eo tempore Christum reliquit*; nec non verborum Paulli, (a.) Elymæ præsentissimam poenam annuntiantis : καὶ νῦν ἰδὲ χεῖρ τῆ κυρίας ἐπὶ σε, καὶ ἔσθι τυφλὸς μὴ βλέπων τὸν ἥλιον ἄχρι καιρῶ, *Ecce manus Domini petit te, cæcusque eris, ita ut solem ex hoc tempore non videas.*

§. IX.

Quia autem vereor, ne quis mihi has interpretationes in dubium vocet, rem altius repetam. Particulæ ἄχρι καὶ μέχρι extremum spatium & temporis & loci significant, ut notat Doctissimus Beza ad hæc verba : (b.) ἤλθομεν πρὸς αὐτοὺς εἰς τὴν τρωάδα ἄχρις ἡμερῶν πέντε, *venimus ad eos Troada intra dies quinque.* Hæ itaque particulæ, quod diffiteri nolo, proprie terminum ad quem denotant. Usus vero obtinuit, ut ipsis, quemadmodum latinæ vocolæ usque variæ præpositiones jungerentur, à quibus novas continuo significationes acceperunt. Ut clare pateat, latinos suum usque etiam de termino à quo adhibuisse, exempla proferam probatissimorum scriptorum; ita enim **TERENTIUS** ait, Eunuch. Act, III. sc. 2. v. 18.

Ex Aethiopia usque hæc est.

Et Adelph. a. V. s. 9. 5.

Ego istos vobis usque a pueris curavi ambos sedulo.

VIRGILIUS vero Georg. Lib. IV. 292.

Et diversa ruens septem discurrit in arva,

Usque coloratis amnis devexus ab Indis.

Et Aeneidos Libr. VII. 288.

Et latum Aeneam classemque ex Aethere longo

E 2

Dar-

(a.) Actor. cap. XIII: 11. (b.) Actor. cap. XX: 6.

Dardaniam Siculo prospexit ab usque Pachyno.

JUVENALIS denique Sat. XIII. 157.

*Hæc quota pars scelerum, quæ custos Gallicus urbis
Usque à Lucifero, donec lux occidat, audit.*

Græci vero cum in sermone suo plures admiserint ellipses, illud ἄχρι vel μέχρι absque præpositione ponere soliti sunt, quare factum est, ut multa loca Græcorum Scriptorum ab interpretibus incommode explicata sint, quia non attenderunt, qua ratione hæ ellipses suppleri deberent. Exempli causa, si verba Paulli: μὴ βλέψεις τὸν ἥλιον ἄχρι καιρῶ, exponere vellem, μὴ βλέψεις τὸν ἥλιον ἄχρι πρὸς ὥραν τῶ καιρῶ τῆς, repugnaret sensus, contra is planus & facilis intellectu est, si dixerō: μὴ βλέψεις τὸν ἥλιον ἄχρι ἀπὸ τῶ καιρῶ τῆς. Exempla vero, quod ἄχρι & synonymum ejus μέχρι nonnunquam reddenda sint per voces *quamdiu*, *tantisper dum*, ex **LUCIANO** & **ATHENÆO** exempla suppeditat de græcis literis meritissimus vir **Guilielmus BUDÆUS** in commentariis linguæ græcæ, pag. 1231. Qualia sunt ἄχρῃς ἐν παύσῃ ἦν, *quamdiu in ephebis fuerat.* & ἄχρῃς ὥρων τῶ ἡλίου φῶς, *tantisper dum solis lucem videbam.* Quid quod longus usus hebræorum gnad à communi significatione recedere, & eam assumere coëgit, quam latinorum *usque* & græcorum ἄχρι vindicavimus. Ita enim Elihu unus ex amicis Jobi ait: (a.) *vegnadekām ātbonan*, quod septuaginta reddiderunt: καὶ ἄχρι ὧμων συνήσω, hoc est: *At quamdiu vobis auscultavi.*

§. X.

His rebus inductus veterem versionem relinquere & Paulli verba hoc modo latine reddere institui: *Mors pervasit omnes homines, quatenus omnes peccaverunt, nam quamdiu lex fuit, peccatum erat.* Cumque novam hanc versionem, cum iis, quæ in præcedentibus Apostolus dixerat, diligenter contulissem, mihi visus sum mentem ejus divinando quasi affecutus esse. Postquam

(a.) Job. c. 32: 12.

quam enim dixisset : omnes homines esse peccatores & hanc ob causam morti obnoxios, ipse ordo & nexus rerum ab ipso postulasse videbatur, ut doceret, qua ratione omnes homines peccatores facti essent & mortis poenam promeruisent, nempe quia legem Dei violaverint, nam ex illo tempore, quo lex data sit, peccatum late lateque in omnes homines dominari. In hac sententia me facile confirmarunt verba, quæ statim consequebantur. *Peccatum non ducitur, si non est lex.* Apostolus enim videbatur dicere voluisse: *Unius hominis inobedientia peccatum venisse in mundum & per peccatum mortem; mortem autem pervasisse ad omnes homines, quia omnes peccavissent.* Nam ex eo tempore, quo lex data sit, peccatum esse in mundo, alioquin id homini non potuisset imputari nec mortis causam esse.

§. XI.

Hæc postquam ita restituissim & ad genuinum sensum reduxissim, sponte ruebar Clarissimi LIMBORCHII sententiæ, qui ad hæc Divi Paulli verba commentatus est. (a.) *Intelligitur peccatum quod lata lege non erat in mundo, sed ante legem, & si in præcedentibus Apostolus dicit, mortem pervenisse in omnes, quatenus omnes peccarunt, voce omnes non intelliguntur omnes omnino homines, sed illi omnes, qui inter Adamum & legem vixerunt.* Vir doctissimus in gravissimo errore versatur, existimans Divum Apostolum legem Moisis intelligere, hominesque qui ante eam vixerint, mortis reos judicare, non propterea, quod primi parentes luem contractam in eos propagaverint, sed quod ipsi legem naturæ violaverint.

§. XII.

Hanc ob causam præter voluntatem meam impellor ad inquirendum, de qua lege sermo sit. Non dubito fore plerosque, qui, licet in ceteris Limbor-

E 3

chii

(a.) LIMBORCHII Comment. in Epist. ad Rom. p. 318.

chii sententiam non probent, cum eo tamen intelligant

(a.) *Compositum jus fasque animi sanctosque recessus
mentis, & incoctum generoso pectus honesto,*

seu legem naturalem, cuius vim Paullus cordibus nostris inscriptam esse affirmat, cap. 2. Epist. ad Romanos dicens: τὸ ἔργον τῆ νόμου γραπτόν εἶναι ἐν ταῖς καρδίαις ἡμῶν. Horum sententiam ego ipse sequerer, nisi me gravissima ratio impediret. Hoc enim lubentissime fateor, me ab eorum opinione quam maxime abhorere, qui nobis a natura legem nullam datam esse credunt, sed jus omne a consuetudine & utilitate deducunt, quod *παράδοξον* HOBBSIUS ab orco revocavit. Quodsi enim mecum considero, esse Deum, qui sanctus sit, quia perfectissimus est; qui omnia regat, quia omnia fecit; qui hominem secundum suam imaginem creaverit, quia ipsi mentem ceu oculum dedit, quo bona malave cognoscat & fugienda petendis secernat, non possum à me obtinere, ut non credam, homini simul à benignissimo Numine rationem tanquam legem datam esse, quæ imperet honesta, prohibeat contraria. Præterea consensum omnium populorum in hac causa plurimum valere existumo, ille enim Cicerone, summo & Oratore & Philosopho, iudice, pro naturæ voce habendus est: Nulla enim gens tam barbara, tamque immanis est, quæ non infinitas quasdam & consignatas in animis honesti & turpis notiones habeat. Tandem si ipsam, qua jungimur, societatem ac communitatem hominum contemplor, eam ita constitutam esse reperio, ut si nullis moderetur legibus, non magis consistere possit, quam navis, quæ rectore destituta alto agitur. Qua ratione vero possemus nobis in animum inducere, ut de summa bonitate Dei crederemus, quod nos in mundo collocaverit & societate conjunxerit, ut sine lege

(a.) Pers. sat. II.

lege viveremus, affectibus obtemperaremus, aliorum incommodis nostra commoda augeremus, rivalem viribus editior cæderet, ut in grege taurus?

§. XIII.

Attamen si scopum Apostoli rite examinavero, cum hoc capite non tam communem naturæ legem, quam peculiarem illam, quam Deus Adamo dederat, quave fidem ac constantiam ejus explorare decreverat, respexisse puto. Nam Adamum & Christum frontibus adversis collocat, & ostendit, quantam in miseriam nos illius inobedientia præcipitaverit, quantamve felicitatem hujus bonitate & clementia adepti simus, cum nobis è summa miseria retractis & amissam sanctitatem & vitam restituerit. Miseriam nostram ab Adamo contractam Apostolus describit, dicens: *Per eum peccatum intravisse in mundum, & per peccatum mortem.* Quomodo peccatum in mundum intravit? Adami inobedientia, quia legi Dei non dicto audiens fuit. Ex eo tempore peccatum omnes homines pro lubitu agebat, seu potius torquebat, etsi non peccaverint ἐπὶ τῷ ὁμοιώματι τῆς παραβάσεως ἀδάμ, ut ait Apostolus. Adamus sciens, videns, atque prudens in peccatum veluti ruebat. Sciebat enim expressum Dei mandatum: ne comedas de fructu hujus arboris. Attamen improbæ cupiditati tantum indulsit, ut spreto mandato divino ederet. Quare factum est, ut gratia Dei excideret & crudelissimam peccati tyrannidem in se & posteros suos susciperet. Ex his intelligi potest, quo sensu Apostolus Adamum Christi typum fuisse dixerit, nam quemadmodum Christi opera omnes homines à dominio peccati liberati & in sumam felicitatem vindicati sunt, ita Adamus omnibus hominibus lethi auctor extitit, peccandi & rectæ rationi, quæ ipsis instar legis fuit, adversandi consuetudinem infelicer in eos propagans.

§. XIV.

Habuerunt enim homines legem naturæ, at ea peccatum cohibere non potuit, quin latius grassaretur, quia enim non expressis verbis scripta erat, sed ratiocinando investigari debebat, homines aut eam non magni fecerunt, aut quod etiamnum accidit, prorsus neglexerunt. Quare Deus commotus est, ut legem suam per Moysen daret clavis verbis expressam & promissis comminationibusque stabilitam. Quis hujus legis finis fuerit, Paullus docet, (a.) ἵνα πλεονασμὸν τὸ παράπωμα, quæ verba interpretes hætenus male exposuerunt; ut abundaret peccatum, seu ut Clarissimus Vir *Sebastianus CASTALIO* latinus reddit, quo plus delicti esset, nam si significationem vocis ἵνα examinemus & scopum Apostoli rite perpendamus, videbimus, hæc verba reddenda esse, quia abundavit peccatum, seu quia peccati nimia vis ac potestas fuit. Nam vox ἵνα in N. Testamento, quod pluribus exemplis demonstrare possem, non nunquam sumitur pro particula causali, uti Grammatici loquuntur. Res autem per se clara manifesta que est. Deus dedit legem, non ut homines se magis magisque peccato dederent, sed ut peccato frenum injiceretur, quo moderari atque cogi posset. Malum enim ira se in animos hominum insinuaverat, eosque dulcedine quadam ceperat, ut ignorarent peccatum, quod Apostolus de se ipso fateri non dubitat: (b.) τὴν ἀμαρτίαν οὐκ ἔγνων, εἰ μὴ διὰ νόμου. Hac de causa sapientissimus Græcorum Philosophorum *SOCRATES* dicere solebat: *Leges non bonorum sed improborum causa factas esse.* Non enim legum publicarum hic finis est, ut hominum dicta factaque secernant, & quæ natura neque bona neque mala, hoc est indifferentia essent, vel iusta vel iniusta pronuntient, quam sententiam olim secta Cyrenaica tuebatur, statuens; (c.) μηδὲν εἶναι φύσιν δίκαιον ἢ καλὸν, ἢ αἰσχρὸν, ἀλλὰ νόμῳ καὶ ἔθει: sed in

(a.) Rom. c. V. 20. (b.) Rom. VII. (c.) Laert. l. II. §. 93.

In hunc finem leges datæ sunt, ut impotentes affectus hominum doment, æterni juris fineis sine modo transcendendum. Natura enim omnes docet, quid bonum & malum, quid faciendum & fugiendum fiet, imo vero nos ad recte faciendum impellit, ut ZENO, Stoicorum pater, recte judicaverit: (a.) *Secundum naturam vivere, est secundum virtutem vivere, ad eam quippe natura nos ducit.*

§. XV.

Neque nobis exempla defunt horum hominum, qui justitiam sola natura duce sine legibus coluerint. Abrahamus (b.) curavisse dicitur, ut liberi sui a primis statim ævi rudimentis pietatis seminaria imbiberent, & jus observarent & justitiam. Moyses (c.) populo Israelitico jus dicebat, antequam ipsis leges tulisset; & de Scytis Justinus Trogi Epitomator prodit: (d.) *Justitia gentis ingeniis culta, non legibus.* Ingenium vocat, quod alias natura dicitur, qua significatione hæc vox apud Classicos frequentissime obvia est. Satis erit exempli loco hæc verba TACITI (e.) protulisse: *Honestæ suapte ingenio petuntur.* Ex ipso autem Justino apparet, quod per ingenium naturam ipsam intellexerit, quandoquidem de Scytis statim refert: *Ipsis natura dedit, quod Græci longæ sapientium doctrina, præceptisque Philosophorum consequi nequeunt,*

§. XVI.

Ex hisce videmus, quod quidem natura, quid bonum quidque malum sit, nobis revelet. Utinam illa quoque vires conferre posset, bonum faciendi & malum vitandi! at at meliora videmus, deteriora sequimur. Quod si causas investigare velimus, cur natura tam inops sit auxilii, inter alias hanc quoque esse puto, quod peccanti non statim pœnam infligat; maxima autem peccandi illecebra impunitatis spes

E 5

est.

(a.) Laertius Lib. VIII. §. 87. (b.) Gen. cap. XVIII. (c.) Exod. cap. XVIII (d.) Lib. II. c. 2. (e.) Annal. Lib. III. c. 26.

est. In hac parte leges publicæ fortiores sunt, nam metu pœnarum coërcent malos, quamvis propterea non meliores fiant, sed tantum prohibeantur, ne improba sua consilia effectui dent. At prima & præcipua causa est, quod ipsa natura nostra Adami culpa corrupta sit, quo fit, ut vitiosis voluptatibus non solum non mederi possit, sed eas foveat, alat, magisque incendat. Quicumque igitur ex miserrima hac lucta emergere, voluptates carni nostræ insitas vincere & virtutis laudem & gloriam consequi velit, is auxilia optare, quærere & supplex orare debet, quæ nobis à Deo ejusque Spiritu veniunt. Hoc præstat Ethica Christiana Philosophiam gentilium, ut nos non solum doceat, quid nobis faciendum, quidve committendum sit, sed etiam nos ad ea remedia ducat, quibus malum vincere possimus.

§. XVII.

Nescio, quâ confidentia hodie Philosophi quidam audaculi eo procedant, ut legem Dei nimis severitatis accusent, quod eas voluptates damnet, ad quas à corrupta natura inflammamur, in quibus est *Baptista GUARINUS*, Eques Ferrariensis, in *Pastore fido*, quem librum non solum Italia, sed tota fere Europa cum maximo applausu excepit, his utens verbis. (a.)

*Sans doute la nature est imparfaite en soi,
Qui nous donne un penchant, que condamne la loi;
Ou la loi doit passer pour une loi trop dure,
Qui condamne un penchant, que donne la nature.*

Natura nostra satis superque imperfecta est, nam pravis voluptatibus atque concupiscentiis, quas ipsa

(a.) Secundum Gallicam versionem, par la Comtesse de la Suze.
A. III. S. 4.

vincere nequit, agitur, quid, quod rapitur? Lex autem ob hanc causam non dura censenda est, quia has concupiscentias damnat, in eo enim facit, quod sanctitati Dei, ex qua ipsa fluit, conveniens est. Nos tantum in id incumbere debemus, ut naturam ratione & consilio sublevemus, idque quod illi deest, Deo duce & auspice suppleamus? quanta enim cunque ejus sit infirmitas, major tamen est Dei erga nos gratia, sicuti divinis oraculis proditum legimus: (a.) *ὅ δὲ ἐπλεόνασεν ἡ ἀμαρτία ὑπερεπερίσσευσεν ἡ χάρις.* Hac explicatione divi Pauli verba magnis me difficultatibus liberasse eorumque sensum in claram lucem protulisse puto. Eam in lucem edere in animum institui, non quod lectores ex meis lucubrationibus magnam voluptatem capturos esse sperem, sed ut vir aliquis eruditus forsitan scripto meo excitetur, quo cogitationes has, quæ adhuc satis imperfectæ sunt, emendet, & tam castigatas tamque teretes reddat,

externi ne quid valeat per læve morari.

(a.) Rom. 5: 20.

TANTUM.

Contemnere & contemni.



JOH.

IV.

JOH. GEORGII ALTMANNI,

ΠΕΝΤΑΣ

Observationum Græcarum

Ad quædam loca N. Fœderis ex Antiquitate
illustranda.*Breviarium.*

- §. I. *OBSERVAT. 1.* In Matth. XXIV: 20. Explicatur, quid Christus per *Φυγην* intellexerit, atque demonstratur, quod hæc vox non *fugam* tantum, sed potius ex usu auctorum Græcorum *perpetuum exilium* significet, quod veterum testimoniis probatur.
- §. II. Demonstratur, quam concinne hæc explicatio ex subsequente Judæorum ex terra promissionis ejectione conveniat.
- §. III. Examinatur, quid per *Sabbatum* intelligendum. Markij sententia, per *Sabbatum* diem Dominicam intelligentis rejicitur. Per *Sabbatum* & communia Judæorum Sabbata & festa etiam intelligenda esse, docetur, atque hæc verba ex historia obsidionis Hierosolymitanæ explicantur.
- §. IV. *OBSERVAT. 2.* In Luc. XXI: 5. De *donarijs* templi Hierosolymitani differitur, & quanam illa & unde illuc deportata, exponitur.
- §. V. *OBSERVAT. 3.* In qua explicatur Loc. Rom. XV: 16. De *λειτουργοις* veterum prolixius differitur, eorumque munus exponitur. Quam convenienter secundum sensum vocis Apostolus se etiam vocare potuerit *λειτουργον*, docetur. Quid sit *ιεργεγειν* declaratur.

tur. Quomodo intelligenda verba Apostoli dicentis, *se sacra facere Deo, ut fiat oblatio gentium accepta Deo*, illustratur. §. VI. *OBSERVAT.* 4. Loc. 1. Tim. II: 7. exponitur. Declaratur, quinam fuerint κηρυκς apud Græcos, & ex vocis analogia inferitur, quomodo Paulus se ipsum dicere potuerit κηρυκα. §. VII. Quinam fuerint κηρυκς in primitiva Ecclesia illustratur. §. VIII. *OBSERVAT.* 5. Loc. Jac. I: 4. dilucidatur, Nexus verborum exhibetur. §. IX. Quinam sint *perfecti*, de quibus loquitur Apostolus. §. X. Quinam sint ὁλοκληροί, ex antiquitate adducitur. Applicatio verborum secundum allatam explanationem annectitur.

OBSERVATIO I.

§. I.

Matth. XXIV. v. 20.

ΠΡΟΣΕΥΧΕσθε δε, ινα μη γενηται η φυγη υμων χειμῶνος, μηδε εν σαββατω. Recte equidem hunc locum secundum sensum literalem transtulerunt viri docti. BEZA vertit, *Orate vero, ne fiat fuga vestra hyeme, neque Sabbato*. Habemus in hoc capite prædictionem de subversione templi, & totius Reipublicæ Judæorum, qui incredulitate, odio & varijs criminibus in Messiam, omnimodas pœnas divinas in se contraxerant; Postquam vero Salvator noster instantem hanc calamitatem fusius declarasset, cautelas quasdam adjungit, commate 16. & seqq. usque ad 20. & in hoc versu jam continetur admonitio ad orationem, cujus argumentum ipse præscribit Christus, vult autem ut orent, *ne fiat fuga vel hyeme vel Sabbato*: In his vero verbis interpretes non satis attendisse videntur ad emphasin vocis φυγη, quam per *fugam* tantum transtule-

stulerunt, majorem autem poenam & calamitatem hæc vox, ex ore sanctissimi nostri Liberatoris prolata, mihi in hoc loco innuere videtur, cum satis constet, quod Φυγὴ fuerit communis poena apud Græcos, qua homines majorum criminum rei in perpetuum exilium mittebantur, hinc Illustris Præsul Cantuariensis *Job. POTTERUS in Archæolog. Tom. I. lib. 1. cap. 25. pag. 130.* edit. Venet. de hac poena recte commentatur. Φυγὴ erat perpetuum exilium, quo fons omnibus bonis suis exuebatur, quæ ad hastam locata divendebantur, & ex patria sine spe reditus expellebatur, nisi ab illo magistratu, qui eum in exilium pepulerat, domum revocatus. Similem ferre in modum ad hanc vocem commentatur eruditissimus *Christianus BRUNINGS in Compend. Antiquit. Græc. p. 136.* Inter majores etiam & graviores Græcorum poenas Φυγὴν recenset *POLLUX in Onomast. Lib. VIII. cap. 7. p. m. 896.* edit. Lederlin. Magna ergo erat differentia inter ὀστρακισμὸν & Φυγὴν, illa quippe poena damnatus per annos tantum decem, hac autem ad omne vitæ tempus dulcissimo patriæ solo carere tenebatur.

§. II.

Si jam hæc ad hunc locum velimus applicare, statim videmus ex hujus vaticinij expletione, hanc vocem pro hoc perpetuo è patria exilio sumendam esse, cum mox postea tota gens Judaica è terra Cananæa fuerit ejecta, non pro aliquo tempore tantum, ut illis evenit qui coguntur à patria abesse ad breve aliquod mensium vel annorum spatium, sed in perpetuum, cum sub cineribus templi & urbis, omnis Respublica cum toto choragio ceremoniarum fuerit condita, sepulta, & abrogata. Tantæ autem poenæ & justæ vindictæ divinæ sc reos Judæi fecerant scelesti filij Dei crucifixione, qua adhuc hanc Φυγὴν, hoc est exilium perpetuum sentiunt & ferunt, extra terram promissionis ejecti, patria sua extorres, sine ulla spe
redi-

reditus ad templum & aras illis miseris hodie adhuc desideratas, ita ut vere de illis prædicari possit illud Virgilianum.

*Nunc eadem fortuna viros tot casibus actos
Insequitur.*

Hortatur autem Christus Judæos, ut orent, ne tempus tristissimi hujus exilij incidat vel in tempus hiemale aut in Sabbatum; licet vero χειμων non hiemen tantum, sed & tempestatem turbidam; imbribus, ventis atque procellis ingratam denotet, ut facile videmus ex Matth. 16: 3. & Actor. 27: 20. consultius tamen putamus, si per hanc vocem *hyemem*, iter facientibus ingratam & periculosam intelligamus; hinc etiam inter magna Dei beneficia recensabant Judæi, quod excidium templi primi atque Judæorum transmigrationes æstate, non autem hyeme contigissent. *LIGHTFOOT* in *Hor. Hebr.* ad h. l. p. m. 365.

§. III.

Alia vero in hoc versu occurrit difficultas, quid intelligendum per *μὴν ἐν σαββάτῳ*? Ea tamen facile solvitur, si dicamus, nexum verborum petere, ut dicamus, Salvatorem nostrum in tota hac oratione loqui de Judæis contumacibus, doctrinam Evangelij spernentibus, & pertinaciter legi ceremoniali adhuc adhærentibus. Quidam, inter quos est *MARKIUS*, per *Sabbathum* intelligunt diem Dominicam, sed quantum video, hæc sententia omni caret veri similitudinis specie, cum dies Dominica nunquam hoc nomine veniat. Alij per *Sabbathum* intelligunt annum Sabbathicum, quo nullæ fruges in agris inveniebantur, Adeoque ut illud tempus Judæis fugientibus æque triste ac funestum fuisset, ac hyems; hanc sententiam prolixè *ALIXIUS*, cujus verba ad h. l. citat *WOLFIUS* in *Cur. Philolog.* & alij defendunt. Via ad hæc explananda & intelligenda mihi tutissima videtur, si

in

in communi Sabbathi significatione acquiescamus ; ita tamen, ut per Sabbata intelligamus dies festos & solemnes Judæorum, quibus ab omni opere cessabant ; nec hoc Scriptoribus Sacris infrequens, cum enim Deus apud Prophetam Judæis exprobrat, Ezech. 20: 21. *Sabbata mea profanastis*, haud dubie omnia festa & solennes dies cultui divino destinati intelligendi sunt, hinc etiam *RELANDUS* dicit: *Sabbathi nomen in sacro codice non nunquam latius, non nunquam minus late sumitur, & præter diem septimum hebdomadis aliis diebus festis tribuitur, Lev. 25: 4. 23; 32. &c. Antiq. Sacr. p. m. 443.* Notandum porro, quod per hoc Sabbatum, non una tantum dies, aut festum intelligendum sit, sed omnia festa tempore obsidij Hierosolymitani, cum enim Judæi nollent ex servitute ceremoniarum ad libertatem Novi Testamenti, à Christo partam & declaratam transire, adeo erant pervicaces, ut ex Josepho & alijs constat, & ferijs festalibus & Sabbaticis adhærebant, ut nollent se iis diebus contra inimicos suos defendere, qua de causa in longa oratione apud *JOSEPH. de Bello Jud. Lib: 2. cap. 16. p. m. 190. edit. Havercamp.* Agrippa Judæis exponit, quod Pompejus multum operam in obsidione promoverit, quia Judæi Sabbato noluerint se defendere. Nullo ergo modo clarius sensum verborum Christi declarabimus, quam si dicemus, Salvatorem nostrum in his verbis Judæis voluisse ob oculos ponere, tristem exitum & ruinam, in quam se per incredulitatem, quasi deliberato consilio præcipites daturi forent, observatione legis ceremonialis, quæ adventu Messiae fuerat abrogata ; cum enim tempore Excidij Hierosolymitani ingens Judæorum multitudo ad festum azymorum confluxisset, plurimi a Romanis captivi abducti, alij sub corona venditi, magna eorum pars gladio truncati, quæ omnia latius recenset, atque ita miserrimam Judæorum *Φυγήν* describit *JOSEPHUS de Bello Jud. Lib. 6. cap.*

cap. 9. p. m. 398. Ex eventu autem tristissimo, urbis, gentis, & templi excidio & everfione fatis cognoscimus, quis fuerit sensus exhortationis Christi Propheticae, de assidua oratione ad Deum facienda, ne imminens Judæorum exilium incidat in tempus hyemale, aut Sabbathicum, quo se defendere recusarent. Observandum tandem, quorsum stricta legis ceremonialis observatio, quæ Salvatore mundi à mortuis resuscitato debebat abrogari, miseram Judæorum gentem deduxerit, ut iusto Dei iudicio adeo mentem suam obturarent, ut nec corpus in libertatem asserere, nec vitam imminenti periculo eripere vellent, licet sapientiores inter illos satis docerent, nunquam Deum prohibuisse die Sabbathi imminente periculo vitam suam fuga servare, ut hoc probavit *Lud. CAPELLUS* in *Spicileg. ad Matth. 26. p. m. 34.*

§. IV.

OBSERVATIO II.

Luc. XXI. 5.

Καὶ τινὰ λεγοντῶν περὶ τοῦ ἱεροῦ, ὅτι λίθοις καλοῖς καὶ ἀνὰ θήμασι κεκοσμηται, εἶπε. *Et quibusdam dicentibus de templo, quod pulchris lapidibus & donariis ornatum esset, dixit. De magnificentia & splendore templi Hierosolymitani, ut erat tempore Christi, non est quod dubitemus. JOSEPHUS* prolixius recenset, quantas impensas fecerit Herodes ad illud exornandum, ut hoc modo sibi Judæorum animos, quos crudelitate sua atque tyrannide ad iram & odium concitaverat, conciliaret; per λίθους καλούς, *pulchros lapides*, recte sine dubio intelligimus non tantum lapides duriores ex albicanti marmore ad structuram templi allatos, sed etiam mira arte elaboratos & ad omnem ornatum compositos. Provida Dei cura factum, ut templum secundum ab homine peregrino, qualis Herodes erat, ita exornare-

naretur, ut Messias ad illud accedens dignum Messia templum inveniret. Pauca vero in hunc locum ex antiquitate Græca de his donariis commentari lubet, ἀναθηματα Authore POLLUCE in Onomaſt. Lib. 1. cap. 1. p. 20. edit. Lederl. ita describuntur, τα δὲ ἀναθηματα; οἷς ἐπὶ πολυτεφανοί, Φιάλαι, ἐκπωμαία, θυμιαθρία, χρυσίδες, ἀργυρίδες, οἰνοχοαί, ἀμφορίσκοι. Donaria sunt plerumque coronæ, phialæ; pocula, thuribula, aureæ argenteæque phialæ, cyathi, amphoræ. Usus donariorum apud Græcos erat antiquissimus, hinc jam HOMERUS de Ægysto Odyss. Lib. 3. vers. 274.

Πολλὰ δ' ἀγάλματ' ἀνήψεν, ὕφασματα τε, χρυσόν τε,
Multa donaria suspendit, vestesque aurumque.

Quilibet autem pro vitæ suæ statu & conditione donaria, etiam pro diversitate Deorum, offerebat; Piscatores retia, Pastores fistulas, Venatores exuvias, Milites arma, ex captivitate liberati vincula & catenas, ex naufragio liberati tabulas, vestes &c. HORAT. Carm. Lib. 1. Od. 5.

- - - *Me tabula sacer*
Votiva paries indicat uvida,
Suspendisse potenti vestimenta Deo.

Prolixius de his veterum Græcorum & Romanorum donariis egerunt Vir illustris Joh. POTTERUS, in Archaeolog. Græc. Lib. 2. cap. 4. p. m. 260. edit. Venet. nec non Doctiss. LAKEMACHERUS in Antiq. Græc. Sacr. pag. 244. qui hæud ita pridem præmatura morte Reipublicæ Literariæ fuit surreptus.

Quæ vero fuerint ἀναθηματα templi Hierosolymitani, & à quibus hominibus illa templo fuerint illata, merito quæritur. Maximum & splendidissimum quod in templo Judæorum conspiciebatur donarium ab Herode illatum, nobis describitur à JOSEPHO
Antiq.

Antiq. Judaic. Lib. 15. cap. 11. p. m. 779. edit. Havercamp. luculentius autem illa vitis aurea exponitur apud eundem *de Bello Jud. Lib. 5, c. 5. p. 333.* Ἐίχε δὲ καὶ τὰς χρυσᾶς, ὑπὲρ αὐτῆς ἀμπελῆς, ἀφ' ὧν βότερες ἀνδρομηκεῖς κατέκρεμαντο. *Insuper autem habebat aureas vites, unde botri statura humana dependebant.* Eminēbat hæc vitis non auri pondere tantum, sed reconditæ artis testimoniis, ita ut omnibus illam aspicientibus maximam admirationem suscitaret. Hoc donum Herodis inter magnificentissima donaria recensendum esse, nemo haud dubie negabit; occasionem ad tantum donum templo inferendum fecit Aristobulus, qui vitem auream ab Alexandro Judæorum Ethnarcha donatam, Pompejo dederat, quique illam Capitolio intulit. Plurima etiam ἀνάθημα τῷ templo obtulit Julia Augusta, ex testimonio *PHILONIS in Legat. ad Cajum. p. m. 801.* Ὑψηλὴν τοιαύτην τῆς εὐσεβείας χρῆσαι μὲν καὶ ἡ προαμμία σὺν Ἰουλίας βασιλίσσῃ κατέκοσμησεν τὸν ναὸν χρυσαῖς φιάλαις καὶ σπονδείοις, καὶ ἄλλων ἀναθημάτων πολυτελεσμάτων πληθεῖ, *Hoc monente (sc. Augusto) pietatem exercuit proavia tua Julia Augusta, quæ ornaverit templum hoc aureis phialis & calicibus, aliisque plurimis & pretiosissimis donis.* Ipse Augustus, teste *PHILONE loc. cit.* ex suis redditibus voluit cottidie holocaustum offerri in templo, sc. taurum & agnos duos. Erat autem *donarium*, & auri immenso pondere, & artificis manu elegantissime elaboratum & pretiosum, mensa illa ex auro purissimo constans à Ptolomæo transmissa, una cum crateribus atque phialis, quæ omnia latius describuntur à *JOSEPHO Antiq. Jud. Lib. 12, cap. 2. p. 590. & seqq.* Omnibus his haud dubie accedebant alia adhuc dona vel a Romanis, qui hoc modo rebellem gentem Judaicam volebant delinire, vel ab ipsis Judæis extra terram sanctam habitantibus transmissa, nec certe dubitare possumus, quin magnificentia templi, augustissimus cultus Deo præstitus, Sacerdotum de Deo Israelis frequentiores, ser-

mones ad peregrinos, aut Hierosolymis habitantes, aut sacra eorum contemplantes, plurimos gentiles pellexerint ad donaria Hierosolymam transmittenda, præsertim cum apud moratiores gentes omnes, ut vidimus, mos receptissimus ubique fuerit, templa donariis ornare, hinc etiam memorat Josephus, quod templum in variis locis spoliis barbaricis fuerit ornatum. Hæc omnia facile, & discipulos, & alios, magnificum hunc donariorum ornatum intuentes pelli- cere in admirationem potuere. Plura adhuc de donariis templi recenset *Georg. Joh. HENKE in Dissert. de usu Lib. Apocryph. in Nov. Test. quam thesauro suo inseruere Hasæus & Ikenius Tom. II. p. 21.* Quam communis autem fuerit mos ἀναθημαῖα templo inferendi, videmus jam in exemplo Judithæ, quæ εἰς ἀναθημα τῷ Θεῷ suspendit vasa Holofernitis, Judith. 16: 19. ita etiam 2. Macchab. 5: 16. recensetur, quod multorum regum donaria in templo Hierosolymitano fuerint ubique suspensa. Ego vero plane nullus dubito, quin plurimi gentiles iis, quæ de Deo Israelis audiverant, permoti ad pia vota ad verum Deum concipienda, quibus ratis factis gratitudinem suam amplissimis ἀναθημαῖσι postea probarint. Potuit hæc etiam liquida via esse, per quam plurimæ gentes ad cognitionem Dei Israelis perducerentur, cum verus hic & æternus Deus solum illud nomen esset, quod vota & preces exaudire, atque supplicantes voti sui compotes facere potuit.

OBSERVATIO III.

§. V.

Rom. XV. 16.

Ἔς το εἶναι με λειτουργὸν Ἰησοῦ Χριστοῦ εἰς τὰ ἔθνη, ἵνα γενήτω τὸ Ἐυαγγέλιον τε Θεοῦ, ἵνα γενήται ἡ προσφορά τῶν ἔθνων εὐπροσδεχὴς, ἡγιασμένη ἐν Πνεύματι ἁγίῳ. Locum hunc certe difficilem, & quantum novi ab interpretibus ha-
tænus

ctenus nondum ex remota antiquitate explanatum ita explicare tentabimus, ut lectori constet, quis sit lucidus & planus sensus verborum Apostoli. Ita autem ex rei natura & genuina verborum significatione hæc verba reddenda sunt. *Ad hoc ut sim minister Jesu Christi apud gentes, sacra facientium more tractans Evangelium Dei, ut oblatio gentium fiat accepta, sanctificata per Spiritum Sanctum.* Ut jam ordine agamus, nostramque explicationem lectori planam & apertam exhibeamus, primo videndum, quis *λεῖψργος*? secundo loco demonstrandum erit, quid sit *ἐργεργειν*? quæ duo si probata fuerint, talem futuram speramus explicationem, ut de sensu dicti Apostolici nulla remanere possit disceptatio; Erant autem *λεῖψργοι* homines, qui vel a propria tribu vel universo populo publicos quosdam cultus peragere, vel propriis sumptibus Reipublicæ necessaria suppeditare jubebantur; varia horum genera fuerunt, qui omnes ex ditissimis civibus eligebantur, quos populus postulante necessitate omnia onerosissima & molestissima officia in Republica subire jubebat. Hanc de *λεῖψργοις* descriptionem exhibet **POTTERUS** in *Archæolog. Græc. Lib. 1. cap. 15. p. m. 82. edit. Veneta.* Erat ergo *λεῖψργος* talis vir apud Græcos, qui ad id erat electus, ut non omni cura tantum, labore & industria Rempublicam juvet, sed & flagitante necessitate facultates suas imo & vitam & sanguinem ad illam augendam, ornandam, juvandam subministret; Ne autem tale munus, quod erat gravissimum & onerosissimum, paucos tantum premeret, erat constitutio facta, ut plures, & singulis annis alii eligerentur, qui humeros huic oneri gravissimo supponerent; & qui hoc munus obibant, dicebantur *λεῖψεργειν*. Est ergo *λεῖψεργία* publicum ministerium, quod etymologia vocis ipsa probat, est enim à *λειον* h. e. publicum, & *εργον*, opus sive ministerium, & **HESYCHIUS** dicit, quod ideo *λεῖψεργειν* idem sit ac *δουλευειν*. Probat etiam **POL-LUX** in *Onomast. Lib. 8. cap. 10. sect. 157. Ἐργοντα χιλια*

καὶ διακοσιοί. Ἀπο τῶν ἦσαν οἱ λειψργαίτες. Δημοσθενὲς δὲ
 γραψας, ἀντιτοσμίῳ τριακοσίς τις πλυσιοαίς ἐποίησε. *Erant*
mille ac ducenti; Ex his erant munia publica obeuntes. De-
mosthenes vero lata lege, pro tam multis trecentos qui ditis-
simi essent elegit.

Nemo est, quantum confido, qui non facile vi-
 deat, quam recte & convenienter ex allusione ad ve-
 terum Græcorum consuetudinem Apostolus hoc si-
 bi nomen sumat & tribuat. Erat enim ille re vera
 λειψργος, vir ad hoc a Deo constitutus, ut pro Eccle-
 sia Christi omnem operam, laborem, ærumnam,
 curam, imò & tandem vitam impendat, non sibi vi-
 vens, sed Ecclesiæ, non sua curans, sed quæ Dei erant,
 qui onerosissimum munus doctoris Evangelici apud
 Judæos & Gentes sustinebat, ut uno verbo omnia
 absolvam, qui vitam & sanguinem suum ad commo-
 dum & incrementum cognitionis Ecclesiarum lubens
 & alacris impendebat. Ut autem demonstret, quæ
 sit sui muneris diversitas à λειψουγοῖς Græcorum, addit,
 quod sit λειψργος Ἰησοῦ Χριστοῦ, hoc est, à Domino suo
 ad id electus & constitutus, ut Evangelium prædicet
 inter Gentes, quæ autem prædicatio non minus quam
 λειψργων munus, conjunctum sibi habeat onus maxi-
 mum, per quod se totum debeat impendere pro Ec-
 clesia, cujus cura & plantatio ipsi incumberebat, &
 quod non propria auctoritate aut voluntate ad tan-
 tum munus prosiluerit, sed illud acceperit a summo
 & æterno Ecclesiæ rege & principe Christo. Posse-
 mus in hoc loco ad hæc probanda ærumnas Pauli
 apud Gentes, ad quas missus erat, enumerare, si hoc
 agendum foret, fecit autem id ipse in hac epistola ad
 Rom. 8 : 36. & 2. Cor. 4 : 11. & plurimis aliis locis.
 Varias autem Pauli & reliquorum Apostolorum tri-
 bulationes pro sua eruditione magna eloquentiæ &
 ingenii apparatu nobis describit eruditissimus atque
 plurimum Rev. MOSHEMIUS in oratione sacra cu-
 jus

ius est titulus, *Der Beweis des Lebens Jesu aus dem Tod der Apostel. Orationum sacrarum Tom. I. p. 34.*

Facile ex his judicamus, quam inepte, quam incommode, quam intulisse Papicolæ ex λειτεργια sacrificium missaticum deducant, ita quidem, ut insani illi homines verba Act. 13:2. λειτεργων δε αυτων τω Κυριω, vertere non erubescant, sacrificantibus illis; horum autem errorem auctoritate locorum plurimorum ex Græcis auctoribus & patribus allatorum docte confutavit Rev. Sal. DEYLINGIUS *Observ. Sac. Tom. I. pag. 289. & seqq.* ad quem etiam lectorem, cum in omnium sit manibus, remittimus, cui etiam adjungi potest SUICERUS in *Thesouro Eccles. Tom. II. p. 219.* qui hæc fuse ex Patribus retulit. Transiit autem sequenti tempore vox λειτεργα & λειτεργιας in Ecclesiam, per quam omnes functiones ad sacra pertinentes generaliter significabantur, indeque Diaconi dicti λειτεργοι, BINGHAM. *Orig. Eccles. Tom. V. p. 16.*

Munus jam Apostoli tanquam λειτεργα Ἰησοῦ Χριστοῦ apud Gentes erat ιερουργειν το εὐαγγελιον το Θεοῦ, operam sacram dare Evangelio Dei; sæpissime hoc verbum occurrit apud Scriptores profanos, ita HERODIAN. *Lib. V. cap. 3.* ιερουργησά δε τῶν ἐπεβλεπόν, hunc sacra facientem videbant. Sacra vero facere Evangelio, nihil aliud est, quam eo, quo convenit, modo Evangelium prædicare; egregie connectitur λειτεργια cum ιερουργια, tanquam λειτεργον Apostolus Paulus se promptum atque paratum sistebat, ad omnes ærumnas, quæ cum in prædicatione Evangelij manebant, ferendas. Talis ergo à Salvatore & Domino factus minister, faciebat id sancte, pro Evangelii divinitate, majestate & dignitate, hinc jam semetipsum vocat ιερουργησά το εὐαγγελιον, sacro & Deo accepto modo operam navantem Evangelio sibi commissio & tradito.

Scopum & finem λειτεργιας & prædicationis in po-

steriori parte hujus versus adjungit Apostolus, *ἵνα γενή-
ται ἡ προσφορά των ἔθνων εὐπροσδεκτος, ἡγιασμενη, ἐν πνευματι
ἁγίῳ, ut fiat oblatio gentium accepta, sanctificata per Spi-
ritum Sanctum.* Primo heic notandum, quod vox *προσ-
φορά* & actionem offerentis, & victimæ sive oblatio-
nis consecrationem significet. Priorem hujus vocis
sensum hoc loco eligendum esse quilibet facile ani-
madvertet, ad id enim Paulus constitutus erat mi-
nister sive *λεῖτεργος*, ad id Evangelium prædicabat, ut
Gentes tanquam gratam Deo oblationem adducere
posset ad Ecclesiam Christi. Tantundem ergo hæc Pau-
li verba valent, ac si diceret, totum meum munus &
ministerium, cum omni mea prædicatione ad id ten-
dunt & collimant, ut ex gentibus incredulis gratam
& acceptam Deo victimam vivam pararem. Modum,
quo hoc fieri & possit & debeat, addit, scil. per san-
ctificationem Spiritus Sancti; non ergo suæ conver-
sionem gentium tribuebat industriæ vel sagacitati, sed
Evangelio cooperanti Spiritui Sancto, qui illuminan-
do, convertendo, instruendo, sanctificando vivum
redderet semen Evangelij apud gentes sparsum, per
quod gratos Deo fructus possent producere ad lau-
dem vocantis ipsos ad gloriosam lucem Evangelij.
Omni ergo in opere conversionis Græcorum &
Romanorum gloriam à se amolitur Apostolus, illam
unice ad gratiam Dei, & Spiritus Sancti illuminatio-
nem transferens. Apud Judæos altare sanctificabat
oblatum munus, Exod. 29: 37. itidem apud Gentiles.
Paulus autem hanc sanctificationem non a Sacerdoti-
bus vel altaribus, ad Judæos & Gentiles instruendos,
deducit, sed ab illo qui potentiam sanctificandi ipse
in se contineret.

OBSERVATIO IV.

§. VI.

1. *Timoth. II. 7.*

'Εἰς ὃ ἐτεθῆν ἰγώ κηρυξ καὶ Ἀποστολος. *In quo positus sum ego præco & Apostolus.* Operæ pretium erit ex penetralibus Græcorum etiam indagare, quinam fuerint veterum κηρυκες, ut exinde videamus, quam recte Paulus sibi hoc nomen tribuat. Κηρυκες erant apud Græcos *Præcones publici*, qui sacris & sacrificiis adesse tenebantur; eorum officium fuerat tempore antiquissimo, sacrificia ad altaria adducere & mactare, ut ex *HOMERO* videmus *Odyss. Lib. 20. v. 277*

Κηρυκες δ' ἀνὰ αἶψα Θεῶν ἱερὴν ἐκασομβνῆν

Ἦγον.

Præcones autem per urbem sacram becatomben Duxerunt.

Eorum etiam munus fuit temporæ, quibus Deorum solemnia & festa celebranda erant, definire & promulgare, hinc *Angeli divini* dicti, cujus appellationis nobis fidem iterum *HOMERUS* facit, *Iliad. Lib. 4. v. 192.*

Ἡ καὶ τὰ λθυβιον, θειον κηρυκαὶ προσηυδα.

Dixit, & thalthibium divinum præconem allocutus est.

Nomen habebant ab officio, quod erat το κηρυττεῖν, *promulgare*; Versabatur autem præconum munus non tantum circa sacra, sed etiam circa civilia, erant enim publici belli pacisque præcones & nuncij, σπονδαφοροι, h. e. qui fœderis pacisque condiciones inter partes belligerantes deferebant; inde etiam κηρυξ tantundem valet apud Græcos, quantum caduceator aut fecialis

¶

inter

inter Romanos. *PFEIFFER. Antiquit. Græcar. Lib. 2. cap. 51. pag. 338.* Jubetur Priamus ad classem Achivorum missus neminem assumere secum, præter unum tantum κηρυκα γεραίερον, præconem ætate proVectiorem. De Corinthiis bellum Corcyræis illaturis narrat *THUCYDIDES, Histor. Lib. 1. p. m. 21.* quod κηρυκα præconem miserint, qui bellum declararet. προπεμφαντες κηρυκα, προεργον, πολεμον προεργνία. Miserunt prius præconem bellum prius indicentem. Ad quæ verba Scholiastes ita commentatur. κηρυξ ἐν πολέμῳ, πρεσβευς ἐν εἰρήνῃ. Qui præco est in bello, legatus est in pace. Plura de his etiam notavit *RHODIGINUS in Lectionib. antiq. Lib. 21. cap. 16. p. m. 1168.* Quæ autem cum fere convenient cum iis quæ jam dicta sunt, ea hoc loco brevitatis studio adscribere nolumus. Ex his jam facile videmus, quam apte Paulus, Evangelij apud gentes Apostolus, sibi nomen præconis assumerit. Egregiè hinc monuit *SCHWARZIUS in Commentario Ling. Græc. pag. 783.* verbum κηρυσσειν eleganter adhibuerunt Scriptores sacri ad res suas, nam apud Græcos κηρυκες cum in rebus sacris, tum etiam in judiciis, fœderibus & bellis denunciandis fungebantur munere spectato & probato. Cum autem hoc sibi nomen assumsit & tribuit, facile exinde Græci cognoscebant, quæ sit muneris ratio, cum enim κηρυκες publica sacra curarent, victimas diis placentes adducerent, cultum divinum præscriberent, modum Deos colendi exponerent, facile exinde Paulus gentes docebat, sui jam muneris esse, sacra Deo convenientia præscribere, victimas Deo placentes & vivas offerre, Rom. 12: 1. Rectam Deum colendi & cognoscendi rationem exponere, Evangelium gentibus hæcenus incognitum ubique proclamare. Si ita τῶν κηρυκῶν munus in pace & bello recte spectemus, egregiam certe cum munere Apostolico analogiam deprehendimus. Verus ergo erat κηρυξ divinus Apostolus omni respectu, alta voce ubique gentes ad salutarem cognitionem doctrina

na sua informans, veram grata Deo sacrificia offerendi rationem declarans, lætissima festa Novi Testamenti definiens; Præconum insuper erat belli pacisque declarationes & stipulationes inter dissidentes partes proferre; Ita Paulus erat magnus ille Fœderis gratiæ apud gentes caduceator, illis demonstrans, quomodo cum Deo possent reconciliari, hinc orat, rogat, invitat Græcos ad reconciliationem cum Deo, 2. Cor. 5: 20. καὶ ἀπαγγέλλετε τῷ Θεῷ reconciliamini Deo. Rom. 5: 11. gloriamur in reconciliatione, quæ facta est per Jesum Christum. Exponebat totam doctrinam gratiæ, per quam ad Dei iram & indignationem prolapsum totum genus humanum iterum pacis divinæ compos fieri posset, modum fœderis & reconciliationis per Christum factæ luculentissime describebat, omnes conditiones hujus gratiosi fœderis ob oculos ponebat. Bellum indicabat, impiis, impœnitentibus severissima Dei judicia, pœnam æternam, ejectionem ex regno gratiæ pronuntians. In his omnibus, quæ facile latius exponi & extendi possent, Paulus veri κηρυκας divini munere functus est inter Apostolos.

§. VII.

Hæc etiam ratio est, quare hoc nomen in Ecclesia Apostolica & etiam sequenti tempore manserit, ut hæc proluxius exequitur BINGHAM in Origin. Eccles. Lib. 1. cap. 20. pag. 310. Hoc autem nomine veniebant Diaconi, quos ideo teste Synesio ιεροκηρυκας, h. e. sacros Ecclesiæ præcones vocabant, quia monebant, ut omnia suo ordine fierent. Finito sermone Episcopi exclamabant, ne quis adsit infidelium, & silentio facto proclamabant, Orate Catechumeni, & omnes fideles attente orate pro eis, & tandem finito cultu divino populum dimittebant solemni & communi formula, ἀπολυεσθε, πρὸς εὐχὴν, ite, missa est; Inde etiam verbum κηρυσσειν in omnibus illis locis, in quibus obvenit sæpissime in libris

bris Novi Testamenti, non tam prædicare, quam divinum verbum annuntiare, ad orandum monere, ad præcepta Christi observanda omni fervore stimulare significat. Reliqua hujus commatis difficultatem non habent, Paulus autem jungit nomini κηρυκός, quod sit etiam *Apostolus*, legatus nomine Dei ad gentes, quod epitheton non tantummodo tribuitur duodecim illis viris, quos Christus immediate elegit ad Evangelium inter Judæos & Gentes disseminandum, sed etiam aliis Ecclesiæ ministris, qui similem potestatem a duodecim Viris vel a Paulo acceperant, hinc Epaphroditus Philippensium vocatur *Apostolus* Philip. 2: 25. Plura de his *SVIGERUS* in *Thef. Eccles. Tom. I. p. 476.* atque *HAMMONDUS* ad Rom. 16: 7. ad quos lectorem remittimus.

OBSERVATIO V.

§. VIII.

Epist. Jacob. I. 4.

Ἡ δὲ ὑπομονὴ ἔργον τελειὸν ἐχέτω, ἵνα ᾗτε τελεῖοι καὶ ὅλα κληροί, ἐν μηδενὶ λειπομένοι. *Ceterum tolerantia opus perfectum habeat, ut sitis perfecti & integri in nullo deficientes.* Scopus Apostoli Jacobi in hac Epistola erat scribere πρὸς δώδεκα φυλάς ἐν τῇ διαπορᾷ, *ad duodecim tribus in dispersione*, ut ipse declarat versu primo. Scopus erat, ut stabiliret animos fratrum ex Judæis ad Evangelium conversorum, ut forti animo ferant persecutiones hostium tum Judæorum, qui vi externa eos adoriebantur, tum etiam hostes internos, qui veram doctrinam corrumpere tentabant. Intentionem Apostoli hanc Epistolam scribentis elegantissime declarat *ARETIUS*, vir ob ingenij acumen & multivariam in politioribus literis, quæ tamen apud plurimos infelices audiunt, doctrinam nunquam sine laude nominandus, in suo commentario p. 47 f. *Generalis est una propo-*

propositio in hac Epistola, quam sume ex cap. 1. v. 22. Estote autem factores verbi, non auditores tantum, &c. quam Jacobus deinceps sapius repetet in sua Epistola; ad hoc ergo totius Epistola summa reduci debet, ut demonstret, Christianos curare debere, ut professionem suam studio bonorum operum ornent. Cum autem scripserit ad Christianos, qui novissime ex Judaismo ad Evangelij professionem accesserant, facile concipimus, ejus in hac Epistola dictionem ita esse comparatam, ut fratres suos omni legali jugo subduceret, & ad libertatem Novi Testamenti transferret, hinc etiam monet, ut jam perficiant legem Regalem secundum scripturas, quæ sit dilectio proximi, cap. 2 : 8. Cum enim perpetuus error esset Judæorum, justificatio ex operibus secundum legem, necessario cavendum erat, ne quædam reliquæ tanti fermenti in Ecclesia ex Judaismo collecta remanerent; ad aliam ergo perfectionem, quam legalem, illos deducit, quam ponit in voluntaria afflictionum tolerantia, ut hoc modo fiant perfecti & integri in nullo deficientes. Hanc autem ὑπομονὴν vocat ἔργον τελειον, opus perfectum, quia constantia in cruce debet esse perpetua usque ad finem, & hoc modo tribulationum & adversitatum tolerantia ducit ad plenariam perfectionem tandem aliquando consequendam, quæ autem in hac vita non datur; cum ergo dicit tolerantia vestra opus habeat perfectum, tantundem est, ac si diceret, perdurate fideles sine pusillanimitate, sine virium remissione in lubenti & alacri crucis vobis impositæ tolerantia, per quam ad plenariam omnibus fidelibus promissam perfectionem introducendi estis.

§. IX.

Facile exinde colligimus, quos Apostolus intelligat per τελειος, de quibus statim ἵνα ᾗτε τελειοὶ ὡς σίτις perfecti. Præcipit vero perfectionem non legalem, quam Judæi ex operibus suis jactabant; sed Evangelicam, quæ consistit in perpetuo bonorum operum atque

atque virtutum Christianarum studio, hanc eandem etiam perfectionem Salvator commendat & præcipit Matth. 5: 48. consimiliter Paulus Coloss. 1: 28. & 4: 12. de his autem diximus in *Observat. ad Matth. loc. cit.* Opponit Apostolus Jacobus hanc perfectionem discipulorum Christi imaginariæ justitiæ Judæorum, per quam se pios, bonos, probos, sanctos & beatos temere existimabant; sed hæc omnia hætenus explicatione vix indigere videntur. Primarius vero hujus observationis scopus est, ut ostendamus, quorsum respiciat ὁλοκληρίας epitheton, ad quam consimiliter fideles ἐν διασπορᾷ suscitatur atque impellit.

§. X.

Ut autem hæc recte intelligamus, opus est, ut videamus, quid veteres per ὁλοκληρον intellexerint, & ex vera hujus vocis explanatione planum fiet, quæ sit mens Apostoli in hoc loco. Dicendum ergo ὁλοκληριαν esse illam corporis omniumque membrorum perfectionem, quam & lex Divina, & constitutiones Græcorum in Sacerdote requirebant; Inde HESYCHIUS ad vocem ἀφελής ita commentatur. ἀφελής, αἰσίνης, καθαρός, ὁλοκληρός, ὁ μὴ πλεονάζων, μὴ δέων τι τοῦ σώματος. ἀφελής dicitur, illæsus, purus, integer, cui neque redundat quid in corpore, neque deest. Scripta hinc lex Græcorum, τὸν ὁλοκληρον ἱερασθαι h. e. ut non nisi corpore integer Sacerdotium consequatur. Examen illud vel visitatio corporis, in hominibus ad Sacerdotium eligendis δοκιμασία dicitur, ita nos docet auctor Etymologici magni. Παρ' Ἀθηναίοις καὶ βασιλεῖς καὶ οἱ ἱερεῖς ἐδοκιμάζοντο Ἀθηνηθεν εἰ ὁλοκληροί; apud Athenienses & Reges & Sacerdotes visitabantur, an corpore essent perfecto & integro. Plura de hac Sacerdotum gentilium integritate testimonia adduxerunt ὁ πανν SPANHEMIUS in Commentar. ad Callimach. p. 621. & LAKEMACHER in Græc. Antiq. Sacr. p. 268. & seq. Eandem legem dederat Deus Lev. 22: 23. Ad velum non ingreditur, & ad altare

altare non accedat Sacerdos, cui inest macula, ne polluat sanctuarium meum. Inde etiam sedulo & accurate visitabantur Sacerdotes Judæorum coram Synedrio magno, an nullo laborarent vitio, vitia autem recensentur 140. de quibus vide differentem *OTHONEM* in *Lex. Rabbin. pag. 334.*

Ex his jam, quæ brevissime dicta sunt, facile videbimus, qui sit sensus hujus dicti Apostolici, quo fideles ad perfectionem & integritatem extimulat. Nullum ergo est dubium, quin Jacobus in his, scribens ad Judæos, perfectionem Evangelicam voluerit comparare cum illa corporis perfectione, ad quam Judæi sub veteri œconomia debebant tam rigide in scrutinio Sacerdotum attendere; quemadmodum autem in illis plenaria corporis *ὁλοκληρία* requirebatur, ita Jacobus hanc integritatem ad spiritualem perfectionem transfert, ut non amplius sint pueri in Christo, sed adulti, ut Sacerdos fieri non poterat, qui non perfectam atque virilem ætatem contigerat. Desiderat ergo in hac integritate & perfectione, ut profectum faciant ab una cognitione ad aliam, ab una luce ad aliam, ad coagmentationem omnium partium cognitionis spiritualis, addendo unam virtutem post aliam ad illas quæ jam fuerant acquisitæ, illas probe excolendo, non amplius membra sistendo arma injustitiæ, quibus corpus maculent, atque ita *ὁλοκληρίαν* suam, sanctum studium omnia præcepta Christi observandi, perdant; & quemadmodum levissimo vitio naturali homines sub Veteri Testamento inhabiles & inepti reddebantur ad Sacerdotium coram Jehovah obeundum: ita etiam Sacerdotes spirituales Novi Testamenti per peccata in illis dominantia, & illis adhuc affectibus imperantia, ad illum purum & sanctum Dei cultum, qui jam mere spiritualis esse debet, ita redduntur inepti, & non magis apti sint ad verum cultum Deo præstandum, quam fuerant sub Veteri Testamento Sacerdotes in aliqua corporis parte deficientes & mutili.

V.

LUDOVICI COCHETI. V. D. M.

AD

SIMPLICII VERINI

ANIMADVERSIONES CRITICAS

In

DISSERTATIONEM

De Systematibus Orthodoxorum, Remonst. ac
Socinianorum,*Tempe Helv. Tom. II. Sect. II. p. 311.*

Contentas.

RESPONSIO.*

§. I.

Semel atque Authorem harum animadversionum
SIMPLICIUM VERINUM sese dicentem
 vidi, illum, eo modo has publici juris fecisse, qui
 huic egregio Christiano homine digno cognomini re-
 sponderet existimavi: nec ullum dubium fuit, quin
 Apo-

* Placuit Rev. & Doctissimo *SIMPLICIO VERINO*,
 ne temere animadversiones in dissertationem Ornatiss. *CO-*
CHETI scripsisse videretur, ulterius mentem suam de-
 clarare, atque plurima capita Religionis Reformatæ, qua-
 le præsertim est *Systema Supralapsariorum*, in clarissimam
 lucem collocare; Et ne molesta accideret inter *Responsio-*
nem Doctissimi *COCHETI* & Rev. *VERINI* notas
 collatio, ad lectorem hac in re sublevandum, utriusque
 litis defensionem simul oculis lectorum subijciendam exi-
 stimabam. J. G. A.

Apostoli monitum ἀληθεύειν ἐν ἀγάπῃ observasset ; Exindeque spes nata est , fore ut placide ac amice ea ostenderet, in quibus me a veritatis recto tramite deviasse autumat. Verum nimium oscitanter judicasse, spemque inanem animo concepissem, hisce animadversionibus perlustratis, luce meridiana clarius est ; Etenim nullibi spiritus Christi, qui est spiritus pacis, caritatis, & veritatis, vestigia ne quidem levissima cernuntur ; Quin e contra πάσις ἀνθρώποις ubique in hac dissertatione Polemica cum suis affectibus sese exerit ; ejusque auctori imperitasse, illum adflasse, quasi manu duxisse, tot sunt argumenta, quot fere sunt in ea paragraphi. Qua propter mirum non est, si verum suum nomen non adposuerit ; Ejusmodi homines, secundum Christum, *malunt tenebras quam lucem*, quia eorum opera mala sunt : Revera opus malum erit illud, in quo nec caritas Christiana, nec pax nec veritas coluntur. (a.) Talem autem esse hanc crisin, ejusque

Tom. III. G Autho-

NOTÆ Simplicii Verini.

(a.) Hæc mihi legenti in mentem venit Virgilii illud, *Aeneid. L. f. v. 15. Tantæ animis Cælestibus ira ?* ita enim exacerbata in me est illius mens, qui me docere vult, quid sit ἀληθεύειν ἐν ἀγάπῃ, ut verba eum fere deficiant, quibus suam in me excandescentiam satis exprimat. Uti vero mansuetus animus & mens a jurgiis abhorrens signa prudentiæ sunt, ita multa sunt, quamobrem non existimem futurum, ut me Animadversionum mearum criticarum in tuam V. D. Dissertationem, sub præsidio Clar. RUCHATI publice defensam, pœniteat ; si data opera ultro in imerentem invecus essem, si verborum petulantium modum non fecissem, ingenue confiteor, insanix id, & prudentis hominis non esset ; uti vero mecum prius quicquid inde nasci posset ita animo volutavi, ut imprudenti mihi nihil obveniret vel facile evenire possit, quod antea non putarim, ita gravem me apud nonnullos invidiæ tempestatem subiturum nunquam dubitavi, prædixique. Ubi tamen fidei sacrosanctæ nostræ, ubi honoris summorum Theologorum interest, ibi famam ipsorum tuendam, ibi causam justam defendendam esse, arbitror. Licet autem nunquam de ingenii mei aut Eruditionis viribus, quas novi quam sint exiguæ, præ-

Authorem *SIMPLICII VERINI* egregium nomen, quod sibi adtribuit, potius deprædatum fuisse, omnibus erit manifestum, qui meam dissertationem de systematibus Theologicis cum ejus animadversionibus conferre non recusabunt, sed æqua lance ponderabunt.

II Quid

clare senserim, causæ tamen quam tueor tantam esse justitiam & evidentiam scio, ut non dubitem, judicium de iis, quæ antea dixi & nunc dico, omnibus Ecclesiæ Nostræ Academiis deferre. Ne ergo quisquam existimet litigandi pruriginem esse, quæ me ut Dissertationem illam censoria Virgula notem permoverit, moneo, Viros eruditissimos esse, qui eam minus adhuc quam ego perferre potuerunt, eam Academiis nostris maculam adpersuram metuentes: Honori ideo Celeb. Virorum tuendo manum meam lubens commodavi, quamvis nimis brevitati studendum sit, ut res paucissimas & obiter tantum tangere potuerim. Cum vero existimares Vir D. me Tenebrionem aliquem esse, qui nomen suum publice profiteri non audeat, offero id a me petenti sive privatim sive publice, sive voce sive scripto illud communicare. Et facias deinde contra me quicquid poteris, nihil contra me efficies, nisi quod majoris cladis subibis periculum. Spem mihi dudum fecerant, D. Authorem parturire Apologiam aliquam, quam summo animi desiderio expectavi, & quod expectavi nunc obvenit, & evenit uti expectavi, ut D. Author sua defendendo, clarius quid de Theologia ipsius sentiendum sit ostendat. Cum autem atrocissimorum me accuses mendaciorum, meque veritati neutiquam studuisse perhibeas, certe ἀληθεύειν nec mihi nec aliis, qui Diss. tuam inspexerunt, videris, meque non tantum veritati studuisse, sed modeste adhuc locutum fuisse, ipsa tua Diss. perpetuum erit monumentum; neque a quoquam postulo, ut verbis meis fidem habeat, nisi ab iis, ad quos *Tractatus* tuus pervenit; si vero quidquam dixi, quod veritati consentaneum non sit. rogo eos, quos penes arbitrium est & jus & norma mihi imperandi, ut justam mihi propterea infligere velint poenam, meque ut publice tibi satisficiam obligent, paucissimis enim quis sum ignotum est; sed hujusmodi impudentissimi mendacii me nec accusatum nec convictum iri, satis perspectum mihi est. Insulsi autem hac tua accusatio prodit gravissimum vulnus, quod tibi Animadversiones meæ infixierunt; Quod telum cum ita toto corpore receperis, ut nulla medicina evelli posse intelligas, illud unum solatio tibi futurum arbitraberis, si innocentem me, falsissime licet, calumniarum ejusmodi accuses; nullo vero alio teste, quam Diss. Tua, hac in re opus habeo.

§. II.

Quid ad rem ? quivis sanus exclamabit Ironicus ille stylus, quem in tota sua crisi S.V. usurpat ; ita ut Histriionem potius, quam Theologum agat. *Ridendo dicere verum* equidem nihil vetat ; sed *Ridendo dicere id quod falsum est & injurium*, proximi famam aggre-
di, iniquas suspiciones in eum movere, illud ne-
fas est. Et equidem a limine suarum animadversio-
num talem se prodit ; hanc eximiam & modestam ob-
servationem præmittendo ; *Ita nimirum comparata est*
hæc Dissertatio, ut vel ipsa molē jam jam spectabilem sese red-
dat, plerasque alias magnitudine vincat, & admirationem
propterea apud Doct. Authoris populares commoveat, &c.
Quibus verbis non modo mecum, sed cum popu-
laribus meis etiam, rem sibi esse, declarat : veluti al-
ter Aman totam gentem tanquam alicujus facinoris
nefandi consciam involvit : sed quid quæso tibi
Simpl. cum popularibus meis hic negotii est ? An il-
li, ea quæ Theologi celebres clarissime docuerunt, temere & sine
ulla meditatione simul mecum compilaverunt, plebeio & sor-
dido stylo conscripserunt ? parag. 20. Sed non doluerunt, uti
omnes alii Lectores, tantam prætiösæ Chartæ copiam atque
vim frustra fuisse consumptam ; sed ea, quæ tibi & tuis
adseclis nauseam creant, mercem vix aspectum tuum seren-
tem mirati sunt. (b.) Nonne diceres, L. B. me inter

G 2

Getas

(b.) Quis dixerit Ornatissimo COCHETO, apud Sarmatas & Ge-
tas esse prodigium, si quis aliquid luci publicæ exposuerit ; itane
vir doctus vult, sibi rem esse cum fortissima Sarmatarum gente,
quæ integrām Phalangem Doctissimorum Virorum exponere ; &
in aprium producere posset. Cave ergo imposterum, mi Co-
chete, ne tibi talia temere scribendo, etiam cum Literatoribus &
Criticis res sit, qui contra fidem & auctoritatem veterum & ho-
diernorum scriptorum admissos errores forsā non facilius con-
donant, quam Theologi illos qui contra fidei fundamenta commit-
tuntur. Vidit id popularis tuus, Vir doctus, sed certe in poli-
terioribus literis non multum versatus, ubi non ex aliorum scriptis
integras paginas compilare & describere potuit, Johannes G L E.

Getas & Sarmatas natum esse ? apud quos aliquid publici juris facere sit prodigium , portentum aliquod ingens, *Munstrum mirabile dictu* ; quique omnia indiscriminatim & absque ullo delectu adprobant ? Quicquid sit, quomodocumque de popularibus meis sentiat *SIMPLICIUS* (qua de re magnopere sollicitos illos fore non arbitror) semper illorum suffragium magnificiam , ita ut si alicujus usus ipsis visa sit Dissertatio mea, illud Propertii ex intimo animo profitear :

*Exiguo quodcunque ex pectore vivi
Fluxerit, hoc patriæ serviat omne meæ.*

§. III.

Sed ea videamus, quæ exceptis popularibus meis cuivis Lectori nauseam creant. Statim *parag. 2.* a *Titulo*, quem præ se fert Dissertatio mea, initium facit *SIMPL.* deinde *Præmium*, quo illius finem & usum declaravi, exponit *parag. 3.* illudque absurdum reddere satagit *parag. 4.* mihi quidem affingendo ea, de quibus nunquam cogitavi, mihi & omni sano lectori arcana incognita, donec *SIMPLICIUS* ea in lucem prodidit. Quis enim mentis & rationis compos unquam ex illo eliciet præmio, *Quod me gloriæ ea invenisse quæ non hætenus deprehenderunt Theologi, summisque Theologis ignorata, omnibusq; numeris absolutum Systema Theologicum tradere, sicut & qua ratione Theologia in posterum docenda sit ostendere. (c.)* 1. Enim Proemium sicut & totam

RICUS ; qui autem ab omnibus nostri seculi Viris doctis ita fuit notatus, ut solæ refutationes & censuræ in illum passim conscriptæ, nomen ejus ad seram posteritatem possint transmittere,

(c.) Hæc ex iis, quæ Doct. Author in toto suo proemio dicit, fluere, quivis illud legens clarè deprehendet ; in illo enim accusat Theologos, quod ita conscribant tractatus suos, ut iis perlustratis in univ.ersum, eos de uno aut altero Religionis capite tali & tali modo sentire colligatur, eorumque sententia rationes prorsus vel fore ignorentur, vel saltem admodum imperfecte cognoscantur ; tractatum

tam dissertationem non ad Theologos sive Theologiam docentes, sed ad eam discantes dirigi nemo non videt, qui cœcutire non vult ut Simpl. (d.) Iis in specie, quæ ad calcem dissertationis meæ adposui, attendere noluit, quibusque finem feci: *Deum fili. T. O. M. orando, ut in erucendis Theologorum placitis conatus & labores Fratribus in Domino, Studiorum Sociis Dilectissimis, aliquid emolumenti afferrent*, quæ verba, saltem ut mihi videtur, non arguunt virum qui se nimis gloriatur pro Theologiæ studio modestiam exigente. 2. Præterea, quomodo is gloriari potest, se, quod hætenus non deprehenderunt Theologi, & summis Theologis ignorata invenisse, qui nonnisi ea quæ jam millies fuere excusa, ea quæ jam Theologi celebres clarissime docuerunt, compilavit. parag. 20. (e.)

S. IV.

3. Quomodo itidem ex Præmio inferri potest, quod omnibus numeris absolutum Systema Theol. tradere velim? Neutiquam enim hic de tota Theologia, sed tantum de ea Theologiæ parte quæ est *Polemica* (f.) sive de iis argumentis, de quibus in varias abeunt sententias Theologi, sermo instituitur. Ideoque nec

G 3

de

vero, cujus ope incommodum hoc vitetur, adhuc dum desiderari; talem autem se in hac Diss. exhibiturum promissis methodum, ex qua, quomodo studia nostra in posterum dirigenda sint, intelligi possit, & qua incommodum hoc, quod Theologi in Systematibus suis admittunt, vitetur. &c. &c.

(d.) An de docentibus, an vero de discantibus hæc loquatur, quæ defectum Systematum attinent, ex supra dictis clarum esse arbitrator, cum *Docentes* Systemata conficiant, non vero *discantes*.

(e.) Hæc non de omnibus rebus in Dissert. hac contentis, nedum de methodo, dicta volo; unde Doct. Auth. nonnisi omittere debuisse.

(f.) Lubens hæc concedo, Authorem tantum omnibus numeris absolutum Systema Theologiæ Elencticæ in lucem edere voluisse, nescio autem, cur ille etiam Systema, confusum quidem, Theologiæ nostræ *dogmaticæ* tradiderit, si merè *elencticum* esse debeat.

de novo Theologiæ Syntagmate, sed de tractatu, ea argumenta in quibus discrepant Theologi, quæque sparsim, & simul cum iis in quibus contentiunt, in Systematibus vulgo reperiuntur, exhibente. Jam vero ejusmodi Tractatus utilitatem quis negabit? (g.) Nonne præstaret in genere, ut scorsim hæc duo, tum fill. ea de quibus nulla est lis, tum ea de quibus lis est, traderentur, longe enim facilius hac ratione redderetur Theologiæ studium. Sed res ita se non habent. Hæc omnia simul immiscerentur; unde fit ut non parum confusionis accedat. Summorum autem Theologorum vitio me id adscribere, ne autumes B. L. probe equidem novi, rem sese aliter habere non potuisse; paulatim enim a simplicitate Christiana deflexere homines, innumerasque propemodum temporis lapsu controversias excitavere, unde evenit, ut sensim in crassa volumina creverint Theologici tractatus. Præterea rationes, de quibus Theologi circa argumenta modo aliquid negant vel affirmant, ab unoquoque facile non percipiuntur; sæpe enim eorum affirmatio vel negatio ab eo quod de aliq. argumento sentiunt pendet; Ita ut nexus inter has affirmationes vel negationes detur, quem nonnisi attentione & cura multa adhibita deprehendere possumus; præsertim in tanta rerum copia, quibus Theologici Tractatus referti sunt. Tractatum autem peculiarem, varias de capitibus controversis opiniones, illarumque inter se nexum exhibentem, quis improbabat, nisi ille qui ideis vagis & obscuris delectatur? Talem vero tradere in Dissertatione, quam aggreditur *SIMPLICIUS VER.* pro virium modulo conatus sum. Si hæc ille animo suo reputasset, non in insulsam ac frigidam illam exclamationem erupisset; qua veluti uno ictu totam meam Dissertationem funditus ruere credit.

(g.) Usus talis operis nemo unquam negavit, sed Dissertationem D. Cocheti usum hunc præstare, hoc est quod negatur.

dit. Nec enim, hanc fuisse mentem meam in præmio, quam supra declaravi, agnoscere *SIMPLICIO* difficile erat, modo *Simplicitati* & *veritati* litasset; sed ad institutum suum absurda mihi affingere omnino necesse erat.

§. V.

Qua de re neutiquam dubitabit Lector, qui ejus observationes, *parag. s.* contentas perpenderit. Præmii mei sub finem, non omnium inter Reformatos sectarum opiniones, sed tantum *Celebriorum Orthodoxorum*, (*b.*) *sill. Remonst. ac Socinian*: tradere velle, sicut & circa Authores, quos adire erat necesse, præmonueram. Tria autem observat de his S. V. 1. Statim vult, ut Lector attendat, systemata vulgatissima *Fontes* appellari; (*i.*) nescio, qua de causa illud nomen satis honorificum ipsi non videtur. 2. Deinde *notam*, quam in calce paginæ adjeceram, arguit; Hac nempe, quosnam per *Reformatos* intelligam, *sill. quoscumque Christianos qui Ecclesiæ Romanæ valedixerunt*, indigitatur. Et hoc omnino *SIMPLICIO* displicet qui longe aliter sentit; Existimat enim, nomen illud *Reformati* nonnisi *Orthodoxis* competere, quod equidem non totidem verbis asserit, sed tamen legitima consequentia ex ejus dictis deduci potest; sic sonant: *ne nempe eruditus Lector existimet, Authorem tantum de Secta Orthodoxorum (egregium Ecclesiæ fidelium nomen) acturum, dicit, per Reformatos se intelligere quoscumque Christianos, qui ab Ecclesiâ Romanâ*

G 4

seces-

(*b.*) Vellem ut D. A. fateri scivisset, quomodo vox *Orthodoxus* scribenda sit, & non ubique ad nauseam usque impingeret.

(*i.*) Imo nimis honorificum mihi videtur hoc nomen, *FONTEM* enim Theologiæ alium præter Scripturam Sanctam non agnosco, nec alius a Theologis agnoscitur: admirandum itaque est, quod Vir Doct. inter fontes, ex quibus *Orthodoxorum opiniones* hauriendæ sint etiam recenset *Theses Salmurienses*, quibus in Helvetia opposita est *FORMULA CONSENSUS*, in Doctrina imprimis de *Gratia universali*, quæ ab Ecclesiâ Helvetica hæctenus rejecta fuit, ceu verbo Dei non consona, hoc est non *Orthodoxa*.

secesserunt ; Verum cum secessio ab Ecclesia Rom. dicta fuerit *Reformatio*, inde existimavi, eos omnes *Reformatos* dici debere, qui hinc secessionem fecere ; nihil ad rem, quod alii hocce in negotio fuerint priores vel posteriores ; sed regerit *SIMPL. Remonstrantes & Sociniani* potius a vera Ecclesia, quam ab Ecclesia Romana secessionem fecerunt ; Ergo *Reformati* dici non debent ; Mira sane consequentia ! Remonst. & Sociniani ab Ecclesia Orthodoxa defecerunt, ergo non sunt Orthodoxi ; sed etiam ab Ecclesia Romana defecerunt simul cum Orthodoxis, (saltem Sociniani) ab ejus cultu & dogmatibus pariter abhorrent, simulque cum iis adversus Pontificios calamum strinxerunt ; Ergo sunt *Reformati* & in eorum numerum recenseri debent. Nullum aliud nomen datur generalius, quod omnibus iis, qui Pontificiam Tyrannidem excussere & ipsi rursus collum submittere recusant, applicari possit. (k)

§. VI.

Tertia *SIMPL.* observatio sic se habet ; in *scenam prodituram speravi Sectam Lutheranorum, & Sectam Anabaptistarum.* Undenam hæc spes ipsi nata sit latet. (l.) cum potissimum celebriorum inter *Reformatos*

(k.) Nomine *PROTESTANTIUM & Ecclesia REFORMATÆ* non tantum *ἀνιστοιχῆται* sed & *ἀπολογῆται* ita utitur D. Vir, ut sub hoc nomine *Socinianos* etiam, ut & *Sociniano-Arminianizantes* complectatur ; cum vero in libris Theologicis per *Protestantes & Ecclesiam Reformatam* semper Ecclesia vera intelligatur, non video, cur ii Ecclesię *Protestanti*, hoc est *VERÆ*, accenseantur, qui fundamenta fidei ipsius negant, talesque committunt *Errores*, qui Pontificiis adhuc longe deteriores sunt ; in libro igitur Theologico etiam hac in re caute agendum esse arbitror, ne Pontificiorum criminationibus nosmet exponamus : Nisi forsan differentia inter *Protestantium*, hoc est, verę Ecclesię Doctrinam & *Socinianorum* admodum exigua *TIBI* videtur. Quod autem ais, *Socinianos* cum Orthodoxis simul ab Ecclesia Romana defecisse, de hoc Historicorum monumenta nihil tradunt, sed potius, *SOCI- NUM* demum post Reformationem vixisse perhibent.

(l.) Ideo id speravi, quia D. A. dixerat, se acturum de principis

matos Sectarum opiniones tradere susceperam, prout id expressis verbis in præmio meo legitur : & prout ipsemet Simpl. hoc ipso paragrapho observat. Itaque de omnibus, quæ inter Reformatos vigent, secus dicere animus non erat. Equidem *Lutheranorum Sectam* celebrem esse fateor ; quare ergo de iis verba non fecerim, id agnovisset S. V. supra dictam notam integram perlustrando ; hæc enim legisset : *Hic omitto Lutheranos, quoniam eorum opiniones secundum institutum nostrum demonstrari nequeunt ; Revera in quibusdam solum differunt ab aliis Christianis, quæ Systema prorsus diversum non efficiunt, sed noster SIMPL. Impatiens ira hæc non animadvertit, vel potius hæc omitendo Lectori fucum facere voluit. Etenim si excipias argumentum de Eucharistia, & quædam huic adnexa, de reliquis Theologiæ capitibus simul cum Orthodoxis, & præsertim cum Remonstrantibus (m.) sentiunt Lutherani. Quandoquidem LUTHERUS de servo arbitrio librum conscripserit, ejus discipulorum maximam partem hac in re ipsi valedixisse, nemo nescit ; Quis etiam, Dogma de Prædestinatione absoluta, absque ulla operum prævisione, ipsis exosum esse, ignorat ? Quæ cum ita sint, Lutheranis peculiare Theologiæ Systema non esse, cuivis patet. Anabaptistas vero quod attinet, in varias scinduntur Sectas ; inde est ut eorum opiniones excutiendas non susceperim, iis solum hærendo, quæ non de uno aut altero argumento, sed circa Theologiæ summam versantur. Celebriores igitur dixi Sectas*

G 5

Or,

sectis *Reformatorum*, per quos intelligit eos, qui ab Ecclesia Romana secessionem fecerunt, qui sunt Ecclesiæ *Protestantium & Anabaptista*.

(m.) Certe vellem, ut D. A. hic modestius paulo de Doctrina *LUTHERANORUM* locutus esset, tales enim Vir Doct. Remonstrantes nobis in Dissert. sua describit, ut cum Socinianis idem sentiant, ut passim innuit, eadem principia statuunt, easdem ex iis principiis consequentias fere nectant, ideo Fratres Augustanæ Confessionis talis Hæresis temere accusandos non esse existimo.

Orthodoxorum, Remonst. ac Socinian. non propter eorum numerum qui eas tuentur, sed propter opinionum insignem differentiam. Iis quæ ulterius observat Simpl. nempe *Orthodoxos namine Sectæ, & Socinianos æque ac Orthodoxos Christianorum Theologorum comuni nomine complecti*, nunc non inmorabor, sed Lectorem ad responsa in *parag. 24.* in quo eadem clamat, amando.

§. VII.

Ex his nunc facile deprehendit B. L. quid de sequentibus sperandum: Cum *SIMPLICIUS* scopum Dissertationis meæ non perceperit, (n.) vel (ut verius dicam) percipere noluerit, sed talem mihi affingat, qui a mente mea prorsus sit alienus, ideo absurda quam plurima ex hac colligere, ipsi non multum difficile fuit. Igitur *parag. 6.* observationem generalem, quam a limine præmiseram, confutare satagit, quod ut facilius præstare posset, eam ob oculos Lectoris mutilam constituere, diu & multum non hæsitavit: Hæc secundum *SIMPL.* in mea dissertatione occurrunt: *Principium & fundamentum Theologiæ Christianæ esse statum hominis in peccatum lapsi tum in se spectati tum respectu justitiæ Divinæ*, sed secundum veritatem hæc extant: *Hoc Systema* (sill. Theol. Ortod.) *sicut talia quæ explicabimus, ab idea, quam sibi efformant Theologi, status hominis in peccatum lapsi, tum in se spectati, tum respectu Justitiæ Divinæ pendere, a limine observamus; prout enim hoc argumentum tradunt, ita etiam omnia, quæ hominum salutem spectant, modo qui suæ explicationi respondeat, intelligunt.* Hæc est bona fides *SIMPL. VER.* Non ergo de statuendo fundamento & principio Theologiæ Christianæ, sed de statuendo Fundamento & principio Trium Systematum; (o.) quæ duo sunt prorsus diversa.

(n.) Ipsissimis D. Authoris verbis scopum ejus proposui.

(o.) Ex hæc ergo D. Auctoris explicatione sequentia discimus: Aliud esse *Theologiam*, aliud *Systema Theologiæ*; *Theologiam & Systema Theologiæ* a se prorsus esse diversa; *statum hominis in peccatum*

sa. Quemadmodum enim (ut supra dictum fuit ad *parag. 4.*) non absolutum Systema Theologiæ conficere, sed tantum de capitibus inter Theologos controversis varia placita & Systemata tradere animus fuit; Ita etiam in prædicta observatione, non fundamentum & fons omnis veritatis Theologiæ, sed fundamentum & fons diversitatis circa illa capita unico quærendus est.

§. VIII.

Ut autem mentem meam in majori luce ponam, in Theologicis duo sunt observanda & sedulo distinguenda. Ea in quibus consentiunt, & ea in quibus discrepant Theologi. Unde duplex ipsis tribui potest Systema, alterum *Comune*, alterum vero *Peculiare*. *Comune* complectitur omnes Theologiæ naturalis partes, necessitatem Revelationis, Religionis Judaicæ & Christianæ veritatem ac divinitatem; Jesum esse Messiam; Mediatorem nostrum apud Deum, qui nos tum doctrina tum morte salvavit, qui Prophetæ & Sacerdotis vices adimpleverit, & Rex sit Ecclesiæ, aliaque quam plurima, de quibus in genere nulla est lis. (*p.*) *Systema* vero *peculiare*, modum, quo Deus per Christum homi-

lapse quidem esse principium & fundamentum Systematis Theologiæ non vero Theologiæ ipsius, ergo statum hominis lapsi esse principium Systematis Theologiæ Christianæ, non vero Theologiæ Christianæ ipsius. Si tam acutum ingenium habuisset, ut hanc distinctionem prælagire mihi licuisset, certe etiam tacuisset. Quod vero D. Auct. se explicat de fundamento diversitatis Systematum Theologicorum, illud nempe esse *varias ideas, quas Theologi sibi formant de dogmatibus Theologicis*, hoc est quod antè D. Cochetum nemo scivit, unde novum nascitur Axioma; *Diversitatem sententia Theologorum oriri ex Variis de eadem re conceptibus sive ideis*. Nunc demum recte percipio, qua in re consistat Novitas Methodi COCHETIANÆ.

(*p.*) In his rebus inter eos Theologos, quos D. Auct. Reformatis accenset, nullam item esse, hætenus nunquam audiui; de plurimis enim inter nos & Socinianos non convenire, omnibus Socinianæ Religionis gnaris compertum est.

homines salvare voluit, quo totam salutis oeconomiam dispensavit, spectat, circa magni illius operis initia & incrementa tum consummationem versatur; qua de re in diversa prorsus abeunt Theologi, ita ut unusquisque, longe lateque sese extendere illud Systema ejusque ramos per universam fere Theologiam diffundi, facile intelligit. Jam vero non de priori, *sill. Comuni*, in mea Dissertatione neque de illius fundamento agitur, sed de posteriori *sill. Peculiari*, de hujus principio & fundamento quaestio est. Recte sentit *SIMPL.* dum *Principium* vocat talem veritatem, ex qua omnes reliqua veritates doctrina alicujus per necessarium nexum, & consequentiarum concatenationem demonstrari possunt. Ergo secundum hanc definitionem, quodnam erit fundamentum & principium Systematis hujus/peculiaris, vel (ut clarius loquar) undenam illa opinionum diversitas, circa salutis Oeconomiam, circa modum quo Deus per Christum homines ad salutem adducit? sine dubio illa oritur ex opinionum diversitate, (q.) circa occasionem & causas, propter quas homo salvandus erat; Ad statum itaque hominis in peccatum lapsi tum in se spectati, tum respectu justitiae divinae, omnino ascendendum est.

§. IX.

Sed inquit *SIMPL.* hoc concipere non possum:

Quo-

(q) Acutissime hic Author moper, *Opinionum diversitatem* oriri ex *opinionum diversitate*, hoc ante ipsum nemo haecenus scivit, sed est novum inventum, cui tota ejus superstructa est Dissertatio; & nihil magis verum esse potest, quam quod, si Theologi consentirent in dogmatibus Theologicis, tunc consentirent, quia vero dissentiant, inde oritur opinionum diversitas; Porro Author dicit, *Causas*, propter quas homo salvandus est, esse *statum hominis in peccatum lapsi*, ita nempe loquitur sub finem §. illa, nempe *opinionum diversitas, aritur ex opinionum diversitate circa occasionem & CAUSAS, propter quas homo salvandus erat, ergo ad statum hominis in peccatum lapsi - ascendendum est.* Causas alias, propter quas homo salvandus est, scriptura non agnoscit, nisi gratiam divinam & meritum Christi, non verò statum hominis.

Quomodo Systemata contraria ex eodem principio fluere possint, ut Author statuit, omnibus tribus scētis idem principium adtribuens; Quasi vero unum idemque principium diversi modo statui non posset. (r.) Status hominis, in peccatum lapsi &c. est principium tribus scētis comune, ex eo fluunt Systemata contraria; ratio est in promptu, quam clare (ni fallor) his verbis indicavi; prout enim hoc argumentum tradunt Theologi, ita etiam omnia quæ hominum salutem spectant, modo qui suæ explicationi respondeat, intelligunt. Et quidem ab idea, quam unusquisque de statu hominis lapsi sibi efforinat, variorum Systematum de salutis Oeconomia nexus & concatenatio demonstrari potest; Ex statu, in quo unusquisque hominem salvandum constituit, fluit modus quo secundum ipsum salvari debet. Ad salvandum enim quemvis in genere ea solum adhiberi debent media, quæ ejus statui conveniunt. Exemplo mentem meam illustrabo; omnes homines (secundum Ortod.) nascuntur cœci intellectu, corrupti, veri omnis boni incapaces, æternis cruciatibus addicti, propter imputationem & propagationem peccati primorum parentum. Unde manifesto sequitur, Decreta hominum salutem spectantia absoluta esse debere, tum de personis, tum de mediis: Nisi etiam hominem salvandum

(r.) In hoc nunc fallitur Bonus Vir. quando putat, unum idemque principium diversimode statui posse; Nam si diversimode statuatur, tunc non unum idemque principium est hoc est, unum principium non potest simul verum esse & falsum, ita principium Religionis Socinianæ non simul potest esse principium veræ Religionis, nam illi habent principium falsum, vera autem Religio oportet habeat verum principium, adeoque Doctrina Socinianorum non unum idemque principium habere potest cum vera Religione; aliud ergo est principium Religionis nostræ, quod est Veritas aliqua fundamentalis, aliud est principium hæresum quod *negatorum & verborum* appellatur, & non unum idemque dici potest cum vero principio, cum toto cœlo inter se differant, Est ergo contradictio, quando D. Auct. ubique defendit, Mendacium & Veritatem unum idemque posse habere principium.

dum iustitiæ ultrici obnoxium constituas, ruit tota de satisfactione Orthodoxa Doctrina, ita ut, si his duobus capitibus *Imputationi & Iustitiæ ultrici* Orthodoxi valedicant, cadit prorsus totum eorum de salutis Oeconomica Systema; (s.) Quod apud omnes Systematis peritos in confesso est. Remonstrantes vero & Socinianos quod attinet, cum secundum eos, homo lapsus nec imputationi nec Iustitiæ ultrici sit obnoxius, hinc eos in varia prorsus abire tum circa Decreta de salute hominum, cum circa satisfactionem, mirum non est. Ea autem, de quibus hæc pauca, fusius in mea Dissertatione exponuntur. His positis, quam inanes *SIMPL.* hocce in parag. fundat clamores, nemo non videt.

§. X.

Posito itaque principio & fundamento generali trium Systematum, scilicet *statu hominis lapsi*, deinde Systematis Orthod. seriem tradidi, eam a modo speciali quo hoc principium statuunt, ex statu nempe, in quo hominem lapsum collocant, deducendo. Verum, ut status hominis lapsi & destituti rite intelligi possit, de ejus statu instituto ante lapsum prius dicendum est. (t.) Quomodo enim ea, quæ per lapsum

(s.) Ita comparatum est cum omnibus Articulis fundamentalibus sanctissimæ Religionis nostræ, ut si unus corruat, omnes ruant; adeoque hoc sensu omnia Dogmata Religionis nostræ dici deberent principium ejus. Non solum ille de *statu hominis lapsi*.

(t.) Hic non prætermittenda esse censeo quædam, quæ eruditionem D. Authoris spectant, quæ in animadversionibus meis uti multa alia omisi. De imagine nim. divina agens, admirabili quadam arte, Pontificiorum, Socinianorum & Orthodoxorum de hac re definitionem combinat, inter beneficia imaginem Dei constituentia etiam referens *sum* Naturam animæ spirituales, *sum* Dominium in (vel per Gallicismum *suprà*) Creaturas, in quibus Pelagianizantes omnes, corruptionem cum imaginis divinæ strage negantes, subsistunt; non verò attendit Author, exinde sequi, etiam in Diabolis & impiis superesse partem imaginis divinæ, quam ta-

sum amisit homo, agnosces, dum ea, quibus ante lapsum fruebatur, ignorabis? hac igitur de causa, a statu hominis instituto secundum Orthodoxos initium feci, ut ad illius statum destitutum secundum eodem deveniam. Nonne ergo risum excitat acutissimi *SIMPL.* observatio parag. 7. *Proxima inquit, consequentia, quam ex prima hac & capitali veritate, & reliquarum omnium fundamento (scil. statu hominis lapsi) elicit, est status hominis ante lapsum.* Nec etiam solidiora sunt, quæ addit. *Foran existimat B. L. Doct. Authorem necessitatem fœderis naturæ ex relatione mutua, quæ fuit inter creatorem & hominem ad ejus imaginem creatum, demonstrare.* Hæc demonstratio ad meum scopum inutilis erat, (u.)

men Orthodoxi totam deperditam tradunt. Maluerunt hætenus Theologi nostri in iis subsistere, quæ Apostolus dicit, quod imago divina consistat *ἐν δικαιοσύνῃ καὶ ἰσχύϊ τῆς ἀληθείας.* Malè ergo D. Auth. deinceps asserit, *Hominem tantum illustrioribus beneficiis, quæ imaginem Dei constituent, post lapsum destitui.* §. VIII.

Ut etiam Philosophum se ostendat D. Vir, eadem pag. satis ἀκριβοῦς cum Peripat. locuturus, facultatem judicandi vocat ultimum intellectus *practicum* judicium, potuisset dicere, *practici* scil. intellectus judicium sive dictamen.

Ibidem alienum putat à Voluntate, *appetere malum sub specie boni*, quod pugnat cum experientia ipsa, voluntas peccatoris non vult nisi malum, nec propter summam corruptionem & peccati servitutem aliter velle potest, semper enim per naturam suam fertur in bonum vel verum vel apparenter tale, quod tantundem est ac *appetere malum sub specie boni*; ita etiam Adamus & Eva transgrediendo legem divinam appetiverunt malum sub specie boni.

Nesciunt autem Theologi, quid D. Auth. sibi velit, quando dicit: *Deus autem ab homine lapsus easdem condiciones, easdem officia exigere nequit.* statuerunt hætenus Theologi, Deum per lapsum Adami non excidisse jure suo. sed nihilominus easdem officia ab homine poscere, imò Deum non posse non aliter quam à creaturis suis exigere perfectam obedientiam & amorem, quod etiam in lege sua facit, unde Catech. Heidelb. Q. IX. hoc tuetur, & adversus Pelagianizantium objectionem vindicat. Quamvis nunc his *C. CHETI* Authoritatem opposuisse sufficiat.

(u.) an melius ex ea status hominis destitutus innotuisset? neutiquam certe, existimabit B. L. Præterquam quod quicquam probare & argumentis adstruere, instituti mei non erat.

S. XI.

Nec hic omittenda est ejusdem observatio in notam, quæ sic se habet sub finem paginæ 11: Dissert. meæ. *Hinc* (sill. ex Doctrina Orthodoxa circa peccatum originale;) *sequitur*, quod ut actus sit peccaminosus, *necesse non sit ut fiat scienter & sponte, vel ut vocibus Scholasticis utar, ex προαιεσεως*. Adversus hæc ita SIMPL. *Datur inquit, peccatum originale, ergo ad actum peccaminosum non requiritur ut fiat sponte, quasi unum alterum excluderet, quasi anima in primo existentia sue momento pradita non esset voluntate, & per consequens quicquid agit, cum voluntate, vel quod idem est cum spontaneitate ageret, quasi actus peccandi voluntatem sive ipsam animæ essentiam præcederet. Tota lis circa sensum vocabuli sponte versatur, quod idem sonat ac Voluntario, ex Voluntatis assensu: significat etiam quandoque Libere, absque Coactione. Itaque ut omnem æquivocationem & Logomachiam vitarem, hæc sub finem notæ addidi, vel ut vocibus Scholasticis utar, ex προαιεσεως; ex quibus, omnibus (excepto Simpl. qui ad hæc attendere noluit) vocabulum sponte pro voluntario, ex voluntatis assensu, non vero pro Libere, hic a me sumi (w.) manifestum est. Jam vero nonne clare ex Doctrina Orthodoxa circa peccatum origi-*

(u.) Haud dubie ad institutum tuum hæc demonstratio necessaria erat, quia unam veritatem ex altera demonstrare promiseras. Cæterum vel ex hoc & præcedentibus duobus parag. B. L. quasi ex umbra aliqua judicare potest, quale Galimathias tota Dissertatio sit.

(w.) Hic nunc Author prodit, cujus spiritus filius sit dicens, se per sponte non libere intelligere; ut id ipsum quod Arminiani dicunt, qui negant, summum libertatis gradum in spontaneitate consistere, unde Doct. Author nec his sese occultare potuit.

originale sequitur, necesse non esse ad actum peccaminosum, ut semper fiat scienter & voluntario seu sponte? Cum homines nascantur impuri, & inquinati actus peccaminosos edere possunt, quamquam nec scienter nec voluntario agant. Ficulnea igitur est *SIMPL.* Observatio. Sed ea quæ subjungit, omnino Lectoris attentione digna sunt: *Ne quidem Deus Justus Judex esse potest, si actum invite commissum puniret, cum id puniret cujus homo contrarium voluit.* Indicium sane summæ Ortodoxiæ. Ergo motus primo-primi concupiscentiæ non sunt peccata, (x.) actus peccaminosi, qui poenam mereantur, siquidem nobis insciis & invitis oriantur, nec sint in nostra potestate. (Hæc est, fateor, Socinianorum opinio, quam ambabus ulnis hic amplectitur Simplicius.) Ergo homo, dum non facit bonum quod vult, sed facit malum quod odit, *Roman. 7.* iræ divini non subjicitur, (y.) sed longe injustior

Tom. III

H

justior

(x.) Hoc est quod negatur; nam eo ipso quod concupiscentiæ sunt actus voluntatis, adeoque *Voluntaria*, eo ipso etiam sunt *libera*; male ergo D. A. conclusionem ex verbis meis affert, quod ergo non sint peccaminosæ: quod autem non sint in nostra potestate, uti Author dicit, hoc inde est, quia homo natura ita corruptus est, ut non possit aliud velle quam malum; sed nihilominus libere vult, nam ipsa vox *concupiscentia* libertatem includit, sponte enim h. e. libere homo concupiscit. Infelicissime ergo Author Socinianismi me arguit ideo, quia assero, etiam concupiscentias sive morus primoprimos esse liberos & spontaneos; hic haud dubie memor fuit Consilij Apostolici, quod debeamus *ἀληθευειν ἐν ἀγάπῃ* (quod D. A. mihi ut salubre commendavit) & sapientis illius dicti Thaletis apud Diogenem Laërtium in Thalete §. XXXVI. qui interrogatus, quomodo justissime vitam transigamus? respondit *ἐὰν ὁ τοῖς ἄλλοις ἐπιτιμῶμεν, αὐτοὶ μὴ δῶμεν*. Si qua in aliis reprehendamus, ab iis ipsi abstinerimus.

(y.) Ridicule huc trahitur dictum Apostoli *Rom. VII: 19.* ubi Apostolus inde a v. 13. loquitur de lucta Carnis & Spiritus in homine regnito, non vero de statu naturæ, de quo hic agitur; unde Apostolus statim v. 20. subjungit, *si id facio, quod non volo, ego id non amplius operor, sed peccatum quod in me est.* Distinguendum ergo hic fuisset inter partem regnitam & irregnitam; pars irregnita

justior erit Deus, qui propter peccatum originale, omnem voluntatis & libertatis usum præcedens, (2.) homines punit; Quod tamen tum de reprobis, æternis cruciatibus addictis, tum de infantibus, qui in utero moriuntur, asserunt Orthodoxi. Sed de his hæc sufficiant: *Celeberr. Franc. Turret. Inst. Theol. Loc. 9. de Peccato, Quæst. 2.* Adeas B. L. & tibi, nonnisi puram ac genuinam Doctrinam Ortod. a me traditam fuisse, constabit, quam tamen multis argumentis hic impugnare *SIMPL.* non pudet.

§. XII.

Vix responsum merentur ea, quæ *parag. 9.* observat. Dixeram, hominem lapsum morti temporali, spirituali & æternæ esse obnoxium; unde miserrimus erat, & in æternum periturus, nisi Deus ipsi condonet, ideoque peccati primorum parentum imputationem & labem tollat. Sed condonationi gratiæ obstat Justitia Ultrix, cui repugnat ullum peccatum relinquere inultum: *Quomodo* (ergo dixi) *Deus sese erga genus humanum geret? An vult totum in æternum perire?* i. e. an propterea quod justitia sua peccati poenam sive satisfactionem requirat, an vult tamen totum perire genus humanum? *Minime voluit totum genus humanum æternò quod merebatur exitio involvi; sed ea quæ ad ipsius salutem pertinent non modo decrevit, sed etiam executioni mandavit, ideoque ea quæ ad Justitiæ suæ ultrici satisfaciendum necessaria erant. Quæ omnia sensum absurdum & contradictorium non fundunt, quem*
ex

aliquid operatur, quod pars regenerita non vult; nec tamen propterea homo regeneritus iræ divinæ amplius subjectus est, uti Author infelicitè infert.

- (2.) Hoc est quod iterum pernegatur; nam anima primo existentie suæ momento vult, sed malum vult, quia est semen Adami adeoque corrupta, ut non possit velle nisi malum, quod ipsum est *Peccatum Originale*, quod adeo voluntatem, hoc est animæ essentiam, in homine antecedere nequit.

ex his colligit *SIMPLICIUS*. *Idem est (inquit) ac si diceret, in Deo datur justitia ultrix ; Ergo hominem non vult punire, &c.* Nunc demum ex hac observatione percipio, quid sit cœcutire sponte, & qua ratione ea quæ sunt clara obscurari possunt. (a.)

§. XIII.

Hominem à miseria, in qua jacet, sese liberare non posse, inter alia hoc adstruxeram argumento. *An Dei imaginem in se restituere valebit, cum Deus illum ea privaverit ? Culpa (exclamat SIMPL. parag. 10.) amisse imaginis divinæ in Deum rejicitur, &c.* Privavit equidem Deus hominem imagine sua, quia fœdus violavit, (b.) in hoc fœdere illustriorum beneficiorum, quibus hæc imago constabat, privationem ipsi, si immorigerum se præberet, interminatus fuerat Deus. (c.) (ut Thesi 4. annot.) Lapsus est homo, Deus igitur comminationem executus est, sua dona subtra-

H 2

hen-

(a.) Iterum atque iterum oro B. L. ut perpendere velit hunc Nexum; *sed in Deo datur justitia ultrix: Quomodo ergo se erga genus humanum geret? an vult totum in aeternum punire? minime.*

(b.) Cum imago divina consistat ἐν ὁσιότητι τῆς ἐλπίδας, in sanctissimo studio veritatis, homo autem spiritui mendaciorum fidem habens ejus consilia secutus sit, eo ipso studium illud veritatis amisit, adeoque se divina imagine privavit, & ita se privavit, ut ulteriore privatione non opus habuerit; nondum ideo intelligere possum, quomodo homo jamjam imagine divina propria culpa privatus, à Deo ea re privari potuerit, quam non amplius habuit; ridicule ideo D. A. in integro hoc §. disputat, hominem quidem ipsum se imagine divina privasse, sed Deum cum etiam ea privavisse. nescit bonus Vir, quod aliud sit *privare*, aliud vero *negare*.

(c.) Hoc est quod nullibi legi in sacris litteris, quod Deus homini interminatus sit, *se eum illustrioribus beneficiis, qua imaginem Dei constituunt, privaturum*; sed hoc dicit Deus, *quo die comedes de ea* (hoc est, quo die legem meam transgrediendo te imagine mea privabis,) *morre morieris.* Ut adeo hic plane nulla mentio fiat de privatione illustriorum beneficiorum; sed quando Deus homini gratiam suam non amplius dat, eum non *privat* imagine sua; sed ipsi *negat* h. e. non dat gratiam suam.

hendo ; Itaque hæc duo, Deus hominem imagine sua privavit , & homo sese ea privavit , simul consistere possunt : Deus hic quatenus *Judex* , homo vero quatenus *Reus* , qui ultro & sponte privationem hanc in se accersivit , sese sistunt. Hanc autem esse mentem meam, ex tota dissertationis serie vidisset, non *SIMPLICIUS* affectibus & præjudiciis occæcatus , sed *SIMPLICIUS* veritatis & pacis amans.

§. XIV.

Verum eodem quo cepit pede suas observationes pergit *parag. 11. Demonstrata* (inquit) itaque *Mediatoris necessitate* , ex eo quod Deus hominem imagine sua privavit , *Author agit de Decretis*. Nescio, undenam tam audacter , necessitatem mediatoris, ex eo quod Deus hominem imagine sua privavit , à me deduci, asserat ? Veritas itaque B. L. (quam semper obscurare conatur S. V.) hæc est : Postquam de iis, quæ homini lapsu ad salutem necessaria erant , (justificatione nempe, adoptione & sanctificatione) verba feci ; Deinde nullum horum trium requisitorum ab homine præstari posse, assero variis de rationibus, ex quarum numero equidem est *privatio imaginis divinæ* ; Unde hanc consequentiam legitimam ni fallor elicio ; *Necesse est itaque, hæc omnia* (justificationem &c.) *ab alio vice hominis præstari , & ipsi conferri*. Nec minus audacter contendit , quod naturam Decretorum divinorum ex necessitate mediatoris deducam ; quia de hac ultima nuper dixeram ; *Nexus inquit, inter utrumque ita habet ; Ex supra dictis facile colligimus , quam Decretorum divinorum, salutem hominum & sædus gratia spectantium, sit natura*. Ergo secundum *SIMPL.* ex supra dictis necessario idem sonat ac ex proximè dictis. Quasi vero non pro exigentia loci extendenda, vel restringenda esset hujus phrasæ significatio. Legat autem attente hunc nexum *Thes. 18, 19. Dissert.* & videbit, quod is
non

non petatur ex supra & proxime dictis de *Mediatoris necessitate*, sed ex supra dictis de *Statu hominis lapsi*. (d.) Omnes enim Adami posterī æque a natura, propter peccatum originis, pœnis æternis cum sint addicti, totalique ac invicta ad bonum laborent impotentia; exinde liquet, quod si Deus quosdam salvare vult & decernit, Decretum de salute eos nominatim spectare debere, ideoque absolutum esse debere, tum de personis, tum de mediis. Hic nexus mihi ita clarus videtur, ut nullius captum superet, qui Theologiam saltem a limine salutavit.

§. XV.

Attamen *SIMPLICIO* adeo sublimis videtur, ut nequaquam illum percipiat; ast (ut verum dicam) nascitur hæc sublimitas ex eo quod ipsi displicet, nec secundum ejus mentem instituitur; Et hoc clarum est ex iis quæ *parag. 12.* subjungit: *Naturam* (inquit) *Decretorum divinatorum ita exponit Author, ut Decreta de hominis salvatione ex hominis lapsu, & ad satisfaciendum divinæ justitiæ impotentia, quam vero utrumque, & lapsus permissionem, & hominis ex miseria liberationem ex mera Dei gloriam justitiæ & misericordiæ manifestandi voluntate derivet.*

1. Hæc ordinem Decretorum in genere spectant, quæ quæstio ad Essentiam Systematis Orthodoxi non pertinet: Ea enim tota in eo est, ut salutis opus soli Dei gratiæ efficaci tribuatur; Ad hoc autem, sive ante lapsum sive infra lapsum illud opus decreverit Deus, parum refert: Non minus enim Decretum erit ab-

H 3

solu-

(d.) Hic nulla alia responsione opus est, quam ut B. L. orem, ut ipsam Dissertat. D. Authoris evolvat, uti enim ex integra Dissertatione, ita etiam ex §. XVIII. quivis colliget, vertigine ipsum eam scribentem fuisse percussum: nescio autem, contra quem hic disputet, quando contendit, *supra dicta* esse illa quæ supra dixit, hoc est, quod ipsi lubens concedo, cum nimirum nescivit, quomodo sese extricare verbisque suis sanum sensum dare possit, alicui rei inhæreret, quæ nihil ad rem facit, nisi ut tamen aliquid dixisse videatur.

solutum tum de personis, tum de mediis. 2. Præterea qua fronte hanc methodum esse hætenus desideratam affirmare audet *SIMPLICIUS*, qua nempe, Decretorum de salute, natura, sicut & eorum executionis modus, ex statu hominis lapsi adstruitur; Quasi vero Theologorum Ortod. maxima pars hominem conditum & lapsum Decreti de salute objectum non statuerent. 3. Sed mirare B. L. quantum sibi constet *SIMPL.* Is qui nunc in *Supralapsariorum* castra involat, idem est quem nuper *parag. 10.* exclamantem, cœlos & terram clamoribus implentem vidimus, quasi aliquid Blasphemix proximum protulissem, *Deum* nempe *hominem sua imagine privasse* dicendo, quæ tamen stricte & absque ulla exceptione admittere debuisset. Idem est iterum, qui *parag. 8.* in hanc quæculam vocem erumpit, *Et Deus (absit blasphemia dicto) ne quidem iudex justus esse potest, si actum invite & coacte commissum puniret.* Idem est inquam ille, qui nunc *Supralapsarium* agendo fatetur, *Deum* lapsum & peccatum certo & efficaciter procurare debuisse, ut propositum de salvando & damnando executioni mandaret. (e.)

§. XVI.

(*) In hoc toto *paragr.* Author, ut ingens aliquod crimen, mihi imputat, quod sententiæ *Supralapsariorum* faveam; *SUPRALAPSARIUM* me esse aperte confiteor, me vero propterea in Dei sanctitatem Blasphemum esse, Deumque constituere Authorem peccati, hoc est quod manus meas & calamum nunc in gratiam *Supralapsariorum* ita versabit, ut Author non amplius habeat quo accusationes suas defendat. Sed ne prolixus fiam, accedo ad defensionem. non mei solius, sed Theologorum Ecclesiæ nostræ Celeberrimorum, qui cum ratione ordinis decretorum sint *Supralapsarii*, à Doct. Authore falso accusantur, quod *DEUM* constituent *PECCATI AUCTOREM*:

Velim sibi persuasum habuisset, eos qui ex nobis sunt *Supralapsarii*, non temere, sed gravissimis divinaque Majestate, Sapientia, Potentia, Independentia dignissimis rationibus ad ea ruenda fuisse adductos. Sed cum nihil sit usitatus, quam eos, qui, in levissimis

simis licet, à se dissentire deprehendantur, quacunq̃ fieri potest facie, gravissimarum Hæresium accusari; Idem etiam hic imprudenter factum esse, quantacunque potero ostendam claritate, nihil enim Veritatis, nihil Sapientiæ, nihil pietatis studio esse posse indignius arbitror, quam dissentientibus invitis consensum aliquem cum Hæreticorum pessimis obtrudere; inde nostræ fidei sacrosanctæ, pietatis tot Virorum Dei, interesse quam maxime puto, ad ejusmodi profanas criminationes compescendas ostendere, quam inique Summis Theologis ejusmodi Blasphemæ consequentiæ impudentur.

Ut autem appareat, contra quid pugnem, Doct. Authoris verba, quæ in dissertatione ejus hac de re extant, etiam huc ponenda esse censeo, quæ ita sonant: *Priores (SUPRALAPSARII) statuunt, Deum primò cogitasse de gloria sua manifestanda, exercitio misericordia & justitia, per salutem & damnationem hominum; itaque hominem prædestinationis objectum constituunt nondum creatum & lapsam. Creatio & lapsus secundum eos Electionis & Reprobationis media haberi debent; quibus positis DEUS AUTHOR PECCATI STATUITUR, lapsum procurare certò debuit, ut decretum suum locum habere posset, misericordia & justitia ejus in salvando & damnando paterent. Quam benè fecisset Doct. Vir, si non tam iniquum judicium tulisset de re, quam illum non intellexisse, verba ejus satis produnt.*

Subtilissimus BÆLIUS in Voce Pauliciens dicit: *Il est fixe de tems immemorial à cet usage, qu'etre Manicheen, & faire Dieu auteur du pechè, sont deux expressions, qui signifient la meme chose: & lors qu'une secte Chrestienne, accuse les autres de faire Dieu auteur du pechè, elle ne manque jamais de leur imputer à cet egard le Manicheisme.* Cur vero Doct. Author tantam hæresin Theologis nostris imputet, rationem aliam invenire non potui, nisi vel quod invidia erga Gomarum, qui Arminii fuit Antagonista, ductus: vel quod hæc in Authore arminianizante, qui Theologos nostros magni hujus erroris accusant, aliquo legerit quem Orthodoxum credidit. In criminatione autem hac refutanda felicissime me versaturum existimo, si veram SUPRALAPSARIORUM sententiam ex Gomaro aliisque exponam, deinde ab hac adversariorum criminatione liberem, Variorumque Celeb. Theologorum de hac re sententiam breviter ostendam: Prius ut expediam α duorum Supralapsariorum, unius Theologi, alterius Philosophi verba de hac re adducam, β totum Supralapsariorum systema ex ipsorum mente breviter & clarè Lectori ob oculos ponam.

GOMARUS, Theologus sui temporis celebris, at Supralapsarius. Disput. X. prædestinationem hisce verbis definit. — *Divina*

*Hominum predestinatio est particulare Dei decretum, quo ex Homi-
nibus indefinite præscitis omnes eos, qui fuerunt, sunt & erunt, in
eum finem bonos creare, & recta gubernatione lapsum eorum ac ju-
stitia Originalis amissionem permittere, ac porro ad æternum anima
corporisque statum dirigere decrevit, ut in electis eorum per miseri-
cordem cum Christi Servatoris, tum salutis æterna per eundem do-
nationem sua misericordis gratia, in reliquis vero præteritis justa
per meritum ipsorum condemnatione vindicis sua Justitia, gloriam
celebrandam manifestaret. LEIBNITIUS vero, Philosophus
subtilissimus atque Celeb. qui recte rigidissimis supralapsariis ac-
censetur, mentem suam de consilio divino, ratione mali moralis,
inter alia in Theodicea sua P. II. §. 239. ita exponit. Mais lors
qu'on considère, que Dieu, parfaitement bon & sage, doit avoir
produit toute la Vertu, bonté, félicité, dont le meilleur plan de l'
univers est capable, & que souvent un mal dans quelques parties
peut servir à un plus grand bien du tout, l'on juge aisément, que
Dieu peut avoir donné place à l'infélicité & permis la coulpe, com-
me il a fait, sans en pouvoir être blâmé. C'est l'unique remède,
qui remplit ce, qui manque à tout les systèmes de quelques manie-
res, qu'on range les decrets.*

Cum Orthodoxius definitione GOMARI nil videam, & in ver-
bis illustrissimi LEIBNITII nihil inveniam, quod perfectioni-
bus divinis aliquid deroget, ex horum Virorum aliorumque Su-
pralapsariorum verbis ordinem decretorum, quem illi statuunt,
hic breviter exhibebo, ut inde patefiat, an juste à Doct. Authore
Manichæismi fuerint accusati. Concipiunt nimirum SUPRA-
LAPSARIi, Deum ut mentem perfectissimam, independen-
tem omni modo à se & per se; In hac autem omnium præstan-
tissima mente, pro mentis suæ imbecillitate, duo distinguunt, quæ
tamen simplicissimo modo unum sunt, nempe omni modo per-
fectissimum Intellectum & Voluntatem, per prius sui cognitionem,
per posterius sui amorem intelligunt. Per intellectum intelligunt
eam perfectissimi Spiritus perfectionem, qua se suasque, quas in
ipso distinguimus perfectiones, intimè penitusque cernit atque
cognoscit. Inter has autem Virtutes etiam Omnipotentia est, quam
quia cognoscit, etiam uno & simplicissimo actu omnia ea cogno-
scit atque intuetur, quæ sumis suis perfectionibus non contrari-
antur, adeoque possibiliæ sunt; & ea ita scit, ut omnis quam de
ijs habet scientiæ ipse sibi causa sit. Infinita autem infinita Men-
tis Omnipotentia nos dubitare non sinit, quin Deus infinitè plu-
ra, infinitè plures rerum ordines, ex cognitione sui, id est, Om-
nipotentia suæ possibiliæ cognoscat, quam revera vi decreti sui in
actum produxit. Obversatus ergo huic divino Intellectui inter
res possibiliæ etiam fuit hic rerum ordo, in omnibus suis circum-
stan-

stantiis, qualem nunc in hoc rerum Universo deprehendimus; & in hoc ordine etiam *homines creabiles, labiles*, deinde, *creati* in primis Parentibus *integri*, postea verò *lapsi*, quorum alteri à Christo *redempti, vocati, credentes, justificati, sanctificati & glorificati*, alteri verò *non redempti, non vocati, non credentes, non justificati, non sanctificati & ideo etiam non glorificati*: Hæcque omnia Deus vidit UNO SIMPLICISSIMOQUE actu.

Uti verò divina hæc mens perfectissimum habet Intellectum, ita ei etiam VOLUNTAS, hoc est *sui ipsius amor*, adscribendus est, quo hæc mens se sibi sufficientem, se solam beatam, satis suis bonis divitem, sui in summa solitudine plenam, & inde gaudio abundantissimam *admiratur & amat*: Et qui aliter fieri potest ab eo, qui natura sua possidet, quicquid est verè bonum, quicquid pulchrum, quicquid eximium, quicquid summum, quicquid omnibus numeris perfectum? cumque naturà se ipsum quam maxime suasque Virtutes amet, ita neque operari nisi ex sui solius amore potest: & uti Deus omnia ex se intelligit, ita cum nihil velle posse, nisi ex sui amore, existimandum est; ideoque omnium actionum suarum *ipse sibi finis sit*. Uti vero Deus omnes res possibiles ex intuitu omnipotentia suæ cognitas habet atque perfectas, ita etiam nihil velle potest, nisi quod in omnibus suis circumstantiis accuratissimè perfectum habet atque exploratum;

Quid verò aliud ex hoc concludi potest, quam Deus etiam hunc mundum, hunc rerum ordinem, hos homines, in omnibus suis circumstantiis actionibusque, habuisse exploratissimum, & cum in cognitione ejus nihil prius, nihil posterius, nihil clarius, nihil obcurius sit, hinc sequitur, Deum omnia in hoc mundo prima, media, postrema, in omnibus suis combinationibus atque circumstantiis, uno & simplicissimo actu clarissimè & distinctissimè ab æterno cognovisse, cumque hunc rerum ordinem, in omnibus suis circumstantiis, maxime ad *illustrationem GLORIÆ*, hoc est, perfectionum suarum, facere sciebat, hinc ex *SUI*, hoc est, *Virtutum suarum Amore* etiam hunc rerum ordinem in omnibus suis circumstantiis atque combinationibus creare decrevit; unde optimum *Mundum creasse* dicitur.

Uti nunc ea quæ prolixius paulo dixi contraham, ex mente *SUPRALAPSARIOREM* Decreti divini ratio hæc est. Deus hunc rerum ordinem, in quo omnes homines & singuli creabiles & labiles, creati integri, deinde lapsi, ex his alij per Christum redempti, vocati, regenerati, credentes, justificati, sanctificati & glorificati, alij vero ex lapsis non redempti, non vocati, &c. non glorificati, sed tanquam impij damnati, quales divinæ omnipotentia obversati sunt, ideo creare decrevit, quia hunc rerum ordinem perfectionibus suis, hoc est, *illustranda gloria sua dignissimum* scivit.

Si hunc decreti divini modum considero, nihil invenio divinis perfectionibus dignius. *Independentissimum* enim hoc decretum est, quia Deus nonnisi à se ipso dependet, huncque mundum cum omnibus suis circumstantijs ideo creare decrevit, quia ita cum Amore sui ipsius, hoc est, perfectionum suarum conveniebat. *Liberrimum* simul est, quia quo convenientior divinis virtutibus illustrandis hic mundus est, eo etiam lubentius eum creare decrevit. Sed & *Simplificissimum*, quia Deus omnia maxima, minima, medioxima, *Uno* eodemque decernendi *actu* decrevit. Nec non *Amplissimum*, quia minimas circumstantias & rerum vicissitudines in se complectitur. *Sapientissimum* etiam est, quia Deus nihil decrevit, nisi quæ maximè habet perspecta, & ad illustrationem Gloriz, hoc est, *Omniū* perfectionum suarum, facere sciebat. Etiam *Immutabile*, quia Deus in ijs, quæ maximè gloriam suam spectant & illustrant, sine sui abnegatione nihil mutare potest. *Sanctissimum*, quia in omnibus sequutus sui *Amorem*. Et *Iustissimum*, quia Deus in hoc decreto creaturis suis ea tribuit, quæ sibi ipsi sui que Amori debet.

Simul etiam *Efficacissimum* est, quia nihil accidit, quod Deus non decrevit, & nihil non accidit ex ijsque decrevit. Hoc ergo statuunt Supralapsarij; *Finem* Dei in decretis fuisse *Manifestationem GLORIE sue*, & sui extra se communicationem, divitiarumque suarum representationem: ad hunc finem assequendum Deus convenientissima elegit media, quæ cum Deus uno intuitu accuratissimè atque perfectissimè habuit cognita atque perspecta, inde statuunt, Deum decernentem, hominem quidem considerasse tanquam *creabilem* & *labilem*, alias non creari & labi potuisset, sed etiam tanquam *creatum* & *lapsum*, ex lapso vel redemptum, vocatum, credentem, justificatum, sanctificatum, vel non redemptum, non vocatum, non credentem, non justificatum, non sanctificatum; huic enim operi non erat locus, nisi in lapsis; labi autem non poterant, nisi labiles crearentur; creari autem non poterant, nisi essent creabiles, hoc est illustrandæ divinæ gloriæ apti.

Nunc horrendum illud *SUPRALAPSARIORUM* Systema, si ve objectum divinæ prædestinationis ex eorum mente, quantacunque potui claritate, exposui. Ergo ex ipsorum fide Deus infinite sanctus, sapientissimus atque iustissimus est, ergo impiæ voces, quod *DEUM* faciant *Authorem peccati*, crassissimæ criminationes habendæ sunt. Quod si itaque hoc de prædestinatione dogma principiis sanæ rationis adversum, si Attributis Dei Essentialibus repugnans, si non suavis Rationis & Revelationis in hac re concordia sit, omnino rejiciendum esset. Quod vero hæc Supralapsariorum fides multis monstrosa videatur, inde est, quod vel mentem eorum nunquam perceperint, vel quod nunquam accurate cogitare meditarique didicerint.

Diluen-

Diluendæ nunc nobis veniunt *OBJECTIONES* quædam, qualis primò est *CLERICI* Tom. XXVII. de la Biblioth. Ancienne & Moderne, Artic. III. pag. 101. *Quoi qu'il soit difficile de digérer le Supralapsarianisme pour ceux, qui ont étudié l'Ecriture sainte, avec les secours, que l'on a à présent.* Si Supralapsarii cum sacra Scriptura conciliari non possent, vel si non cum scriptura loquerentur, ego primus essem, qui sententiam ipsorum abominaretur. Hoc ergo observandum, quod si Revelatio de Homine lapsò loquatur, ut proximo Prædestinationis objecto, eam propterea reliquos Hominis status non excludere; quos Deus uno eodemque intuitu cognovit. Quomodo enim homo Deo ut creatus & lapsus obversari potuit, nisi simul creabilis & labilis? Nec ideo Supralapsarii negant, hominem Dei Prædestinanti etiam obversatum esse ut creatum & lapsum, cum omnia Media ad summum finem ita coordinata sint, ut unum alterum semper includat. Ut si res iusta rationis lance, sepositis omnibus præjudicijs, perpendatur, differentia nulla alia sit inter *SUPRA-* & *SUB, Lapsarios*; quam quod priores Decretum *laxissimo* sensu, posteriores autem *strictiore* sumant; Calumnizque, quas Infralapsarii Supralapsarijs objiciunt, ex nulla alia re Originem suam habeant, quam quod Systema Supralapsariorum vel non intelligant, vel nunquam ex scriptura ratiocinari didicerint; Uti etiam sapientissimè hac de re judicavit Celeb. *SALCHLINUS in Dissis. Stricturis contra Cel. PFAFFIUM*, pag. 34.

Neque etiam quicquam valet, quod dicant, Infralapsariorum Sententiam in *Synodo Dordracensi* fuisse adoptatam, nam altera non fuit rejecta, quia optimè noverunt Concilij illius Patres, etiam Supralapsariorum Sententiam cum Sacra Scriptura & sana Ratione optimè convenire.

Alteræ obiectio, quæ Supralapsariorum causam apud eos, qui eam non intelligunt, maximè invitam atque odiosam reddit, hæc est; *Quod ea DEUM omnis Mali moralis & PECCATI causam unicam & AUTHOREM faciat.* Deum præscivisse omnia ea, quæ in hoc rerum ordine fiunt, negari non potest, nisi quis Deo invito aliquid accidere statuere malit, & Infralapsarii ipsi id negare non audent. Cum ergo juxta Infralapsarios Deus præscivit actionum omnium in hoc mundo ordinem, nexum cum antecedentibus causis, & liberas nostrarum mentium actiones, scivit etiam, ex hoc rerum ordine, hominem productum in talibus & talibus circumstantijs peccaturum, nihilominus decrevit hominem talem producere, productum in talibus circumstantijs constituere, ita constitutum labi finire; quæ acciderunt *DEO* aut Nolente aut Volente, nolente accidere non potuerunt, quia Deus talem actionum sibi invicem succedentium ordinem creare decrevit; Etsi vero Deus hæc omnia præsciverit, alium tamen rerum ordinem discernere noluit, quia hunc optimum scivit.

scivit, hoc est, illustrandis perfectionibus suis convenientissimum; Si hæc sit Infralapsariorum mens circa permissionem mali, uti non possunt non ita statuere, tunc idem planè cum Supralapsarijs sentiunt. Uti verò Deo summæ maximæque perfectiones constitissent, & in se solo beatissimus fuisset, si nihil extra se produxisset, ita etiam, si ipsi visum fuisset, talem rerum ordinem constituere potuisset, in quo homo tantis perfectionibus conderetur, quantis beatas aliquando mentes futuras credimus, & in quo nullum peccatum locum habuisset; sed hunc rerum ordinem, in quo peccatum locum obtinet, ideo producere constituit, quia *summo fini*, id est, illustrandis omnibus perfectionibus divinis optimè convenit; hoc sensu Supralapsarij hunc rerum ordinem, & omnes quæ in eo sunt actiones, tanquam media considerant, quibus Deus summum sibi præfixum scopum obtinet; Cum verò inter perfectiones divinas etiam ejus Justitia & Misericordia sint, ordo ille rerum, quem Deus producere constituit, ita comparatus esse debuit, ut etiam his duabus perfectionibus illustrandis locus esset. Ex hisce nunc omnibus luce meridiana clarius esse mihi videtur, quam malè Doct. Author Supralapsariorum Systema intellexerit, quam injuste de eo judicaverit. Et licet ex eo tempore, quo præjudicia seponere didici, hæc Supralapsariorum hypothesis Deo & Ratione longe dignissima mihi visa sit, non temerè tamen eam ijs proponendam credidi, qui præjudicijs vincti tantæ lucis vim perferre non possunt; non enim nisi ijs placere potest, qui debellatis præjudicijs clarè meditari didicerunt.

Si autem serio objiciant, *Justitia divinæ, sanctitatis, reliquisque ejus virtutibus hoc contrarium esse, quod Deus ad illustrandam Gloriam infinitarum suarum perfectionum salem mundum creaverit & creare decreverit, in quo plurima mala moralia, eaque sequens mala Physica, deprehenduntur.* Ipsi respondemus cum Philosophorum Modernorum Principe; Imperfectionem partium facere ad perfectionem totius, perfectionem autem totius in eo consistere, quod plurimæ perfectiones divinæ in eo demonstrari possint, cumque ad illustrationem ejus perfectionum TOTUM hoc universum simul sumtum, quale Deo in decreto observatum fuit, pertineat, ideo perfectionibus illis contrariari, quas illustrat, dici non potest.

Si vero etiam in hoc Systemate, ratione gubernationis mali, remaneant difficultates, quibus Supralapsarij læsæ Sanctitatis & Justitiæ divinæ arguuntur, aliæ non sunt, quam quas PAULUS, ipse Supralapsarius, sibi objici vel objici posse monuit; Omnium enim harum Criminationum vim his verbis complectitur. Rom. IX. v. 14. *Τι ἐν ἑαυτῷ, μὴ ἀδικία παρὰ τῷ Θεῷ. Μὴ γένοιτο. versu 20. Μενεργε, ὡ ἄνθρωπε, εὐ τις ἐὶ ὁ ἀνταποκρινομένης τῷ Θεῷ; μὴ ἔχει τὸ πλάσμα τῷ πλάσαντι, τι με ἔκωσας οὕτως; Ἴf ἂν ἔχει ἔξωθεν &c.* Neque ergo Justiti-

Justitiæ divinæ ex hac sententia quicquam decedit, nullos enim ad æternum exitium damnavit, nisi eos qui in statu peccati permanent, neque obligatus fuit, creaturas non labiles creare, quia creaturis nihil debet, nisi quod sapientissimo suo consilio ijs destinavit; *τις γὰρ προέδωκεν αὐτῷ?*

Si nunc profanis criminationibus uti vellem, easdem calumnias, quæ *Supralapsarijs* impurantur, in *Infralapsarios* retorquere possem. Unicum tantummodo de eorum mente circa ordinem decretorum hic observo; per eam nimirum decretorum rationem, quam ipsi ineunt, decreto divino non licet esse simplicissimo; Varia enim à se distinguunt, quasi Deus non omnia uno & simplicissimo actu cognovisset & voluisset. Reliqua nunc transgredior, quia ipsis consequentias attribuere nolo, quas illi non admittunt, uti illi *Supralapsarijs* falsa ideo imputant, quia mentem eorum non percipiunt.

Restat, juxta institutum, ut Variorum Celeberrimorumque Theologorum de hac re mentem hic ipsorum verbis exponam; ut Doct. Authori patefiat, *vel* Theologos ex nostris summos fuisse *SUPRALAPSARIOS*. *vel* si alij non tales fuerint, saltem modestius de ijs judicasse.

Beatus ZWINGLIUS de providentia, ad Phil. f. Magn. Cap. V. ita secundum mentem *Supralapsariorum* loquitur: *Creando hominem Deus, ut labi posset, bonitatem suam manifestavit, lapsu enim justitia divina splendor illuxit; Ergo non est periclitata divina bonitas, cum hominem talem creavit, quem scivit esse lapsurum. Nunc de eo, quod neque Sapientia sit laesa, quasi aliter exiverit homo, quam ille constituerit. Quod Sapientia hallucinata non sit, hinc patet, quod homini redemptio posterius sit constituta quam creatio. At redemptio constitui non potuit, nisi sapientia vidisset fore ut laberetur homo. Et in fidei suæ Ratione ad Carolum V. pag. 538. Scio, Numen istud summum liberè constituere de rebus universis, ita ut NON pendeat Consilium ejus ab ULLIUS creatura OCCASIONE, hoc enim est mutila illius sapientia humana proprium, procedente discursu aut exemplo statuere. Deus autem qui ab æterno usque in sempiternum universa unico & simplici actu inspicit, non habet opus ulla ratiocinatione aut factorum expectatione, liberè constituit de universis, sua enim sunt, quacunque sunt. Hinc est, ut, quamvis sciens ac prudens hominem principio formaret, qui lapsurus erat, aque tamen constitueret filium suum humana natura amicare, qui lapsum repararet.*

CALVINI, qui recte *Supralapsariis* accensetur, de hac re verba hæc sunt, *Instit.* Lib. III. cap. 23. *Ad hoc sic ex Dei predestinatione pendet eorum perditio, ut causa & materia in ipsis reperiatur, lapsus enim est primus homo, quia Dominus ita expedire censuerat;*

cur censuerit, nos latet; certum tamen est, non aliter censuisse, nisi quia videbat, neminis sui gloriam inde merito illustrari, & adversus Pighium de Prædest. In hac AUGUSTINI sententia non minus tranquille quam libenter acquiesco; Deum qui creavit omnia bona valde, & mala ex bonis oritura præscivit, & scivit magis ad suam Omnipotentissimam Bonitatem pertinere, etiam de malis bene-facere, quam mala esse non sinere.

BEZA. de Prædest. contra Castellionem. Justam esse probavimus reproborum condemnationem, qua ipsorum perditio sic pendet à Dei Prædestinatione, ut tamen causa ipsorum exitij ac materia tota in ipsis reperiat. & in Absters. Calum. Heshusii. Novum & inexplicabile crimen tibi videtur, quod dicamus, Adamum non potuisse nisi ex Dei decreto & ordinatione labi; si pro decreto substituerimus permissionis nomen, fortassis non ita exhorresceres; sed qua hæc inficitia est, Deum existimare aliquid Satana permittere vel nolentem vel ignorantem? Restat ergo, ut volens permittat. - superest ut ostendamus, ita decretum esse à Deo Adami lapsum, ut tamen tota culpa penes Satanam & Adamum resideat.

ZANCHIUS de Natura Dei, Cap. I. Q. X. Quis inficias eat, Deum potuisse hominem talem creare, qui neque voluisset neque posset peccare, quales jam sunt in Cælo Beati Spiritus! Sed cur neque perfectiores fecit naturas, neque pluribus eas ornavit Virtutibus, donis, perfectionibus? hoc ex Dei pendet Voluntate & Sapientia, deinde causas apud se habuit se cretas: de quibus Apostolus: O altitudo &c Cap. IV Q. III. Voluntas Dei est liberum, æternum, sapientissimum Dei decretum, sum de universis & singulis rebus, quas condidit, ad certos usus & fines per certa media deducendis; sum de malis, qua non fecit nec facit, nempe peccatis, fieri permittendis idque ad suam Gloriam, . - Etsi Deus peccata non vult, ea tamen volens permittit, - neque tamen sine causa permittit. Verum ut nostris peccatis, qua sua est immensa Bonitas & Sapientia, ad suam utatur gloriam, nempe ad sua justitia, ea puniendo, aut ad sua Misericordia, ea condonando, patefactionem & illustrationem, ut ostendit Apostolus Rom. IX. v. 22. 23. Mala non vult, quod aut per se bona sint, aut ad finem per se conducant: sed tantum, quia constituit ijs etiam ad sua immensa gloria illustrationem uti.

Ex his nunc Doct. Author facile intelligere potest, an Supralapsarij Deum constituant peccati Authorem nec ne? brevissimè adhuc aliorum Theologorum judicia hac de re perpendenda sunt.

SPANHEMIUS Dissert. Theol. pag. m. 197. Sententiam hanc haudquaquam acerbè flagellandam nec fautores ejus perstringendos esse, asserit.

BUR.

§. XVI.

Iis, quæ ulterius parag. 13. 14. 15. circa modum exequendi Decreta ratione Electorum objicit, non im-

BURMANNUS, postquam in *Synopsi Theol. Lib. I. cap. 37. §. 21. 22. & cap. 38. §. 14.* objectum decretorum secundum mentem *Supralapsariorum* sapientissime exposuisset, tandem §. 15. concludit, ex mente Apostoli *PAULI*, Rom. IX. *Sententiam Supralapsariorum esse præferendam.* ideo tamen non arbitror, ipsum Deum facere Authorem peccati.

VAN TIL ex mente *Supralapsariorum Prædestinationem* ita definit; esse *Consilium Dei* particulare circa *Creaturas rationales de gloria gratia & iustitia* in ipsis manifestanda convenienter decentijs suis, ordinans omnia, qua successive illis evenirent, facerent, aut ab ijs fieri permetteretur, qua legitimam connexionem cum hoc fine habent & deinde. Ad manifestationem gloria *Misericordia sua* ab æterno & liberè constituit Deus, humanum genus ad imaginem suam creare, lapsum permittere, & quosdam ex lapsis nominatim interveniente satisfactione sanctificare & consequenter glorificare, alijs pro libertate præteritis. - - Media, qua secundum perfectam Dei simplicitatem considerata ut unum complexum concipi debent, ita ut creare, lapsum permittere & hominem restaurare, quasi simul concipi debeant, tanquam unicum medium ad finem illum faciens.

BRAUNIUS Doct. Fœd. Vol. 1. Loco IV. cap. IX. §. 24. *Supralapsariorum* partes expressis verbis amplectitur, & cum mente Apost. Pauli optimè convenire existimat, & tandem §. 28. concludit, inter *Supralapsarios & Infralapsarios* nullam esse discrepantiam, adeoque eorum sententias faciliè conciliari posse.

RODOLPHUS utramque *Sententiam* suis premi difficultatibus asserit, in *Dissert. de prædest.*

FRANCISCI TURRETTINI iudicium, quem Author Doct. inter fontes Theologiæ recenset, adhuc adjungam; mitius ille de *Supralapsarijs* judicat, quando dicit, Loco IV. Q. IX. §. 4. *Observandum, qualiscunque Theologorum in hac parte diversitas, manere tamen apud utrosque saluum fidei fundamentum, & Loco IV. Q. XVIII. §. 5. dicit, nihil habere istum ordinem (nempe Supralapsariorum) quod fundamento salutis & Analogia fidei absolute repugnet, & Viris magnis de Ecclesia bene meritis placuisse.* Ex his omnibus mihi nunc conficere licet, Doct. Authorem incaute in tam justam causam & in tot tantosque Dei Viros debacchatum esse. Arctissimi limites, quibus circumscriptus sum, plura addere mihi non permittunt.

immorabor ; Ea autem omnia nonnisi falsa ejus opinione, qua scil. statuit, absolutum Theologiæ Systema tradere me voluisse, innituntur. Ex supra dictis in *parag. 5. & 6.* satis superque liquet, quare hic de Christo fiat mentio ; nec tamen dicam, *quis sit ille, quomodo ad munus Mediatorium ordinatus fuerit.* (f.) Apud omnes Theologos utique Christum mediatoris partes suscepisse, ad id ordinatum fuisse, in confesso est. Hæc ad *Systema Comune*, de quo supra, pertinent ; Id unum solummodo mihi secundum institutum præstandum incumbebat, scil. quomodo secundum Orthodoxos Christus fuerit mediator, quænam secundum eos, ut mediatoris partes adimpleret, in eo requirebantur, ex supra positis ostendere. Uno verbo non de omnibus, quæ munus mediatorium spectant, sed de iis unice, in quibus Orthodoxi ab aliis de hocce argumento discrepant ; Qua propter itidem mirum non est, si speciatim de omnibus mediatoris officiis non dixerim, *Prophético scil. & Regio, nec de ejus in cælos ascensione, apud patrem pro fidelibus intercessione, indeque spiritus sancti effusione.* Ea autem, in quibus circa hæc differunt Orthodoxi, ex mediatoris requisitis, prout in mea dissertatione traduntur, deprehendere facile est.

§. XVII.

Nec melioris sunt notæ ea, quæ *paragrapho 16.* circa *Decreti Reprobationis executionem* addit ; promissi oblitum fuisse me accusat ; quasi vero ea omnia, quæ
ad

(f.) D. A. promisit unam Veritatem sive unum dogma Theologicum per consequentias ex altero demonstrare ; inter alias autem methodi demonstrativæ regulas etiam hæc est, ut nihil assumatur, quod antea non explicatum & probatum fuit. Author verò, quamvis antea ne *pro* quidem de Christo locutus fuerit, tamen conclusionem hanc infert: *Claram esse, Christum in hoc negotio Mediatorem pro nobis agere.* Sed D. Authori in responsione hac hic mos est, ut ea quæ maximè responsione opus haberent, silentio transeat, & alicui rei inhæreat, quæ nihil ad rem facit.

ad illud decretum pertinent, exhibere fuisset pollicitus: Ea tantum annoravi, quæ præcedentium erant consecratoria, quibus positis, quo modo Deus sese cum Reprobis gerat, quinam sit eorum status, secundum Orthodoxos, intelligi possit. Sed hæc nec sufficiunt, nec *SIMPL*, placent; quod è contrario ea improbat: Lectoris enim hic attentionem, quasi ad aliquid stupendum & inauditum, postulat. Primum consecrarium, quod ex præcedentibus circa Reprobos deduxi, hoc est: *Cum Reprobi & Electi in se spectati* (quæ verba omittit *SIMPL*.) *sill. ante eorum Reprobationem & Electionem, peccato & pœnis æternis simul addicti sint, sequitur, Deum nulla alia de causa eos reprobare, nisi propter merum ejus beneplacitum.* Quid verius? nonne Deus in decreto Reprobationis vel Electionis homines lapsos in Adamo corruptos, veri omnis boni incapaces & miseræ æternæ addictos considerat? ergo Reprobi & Electi in se spectati ante Decretum divinum eodem sunt in statu. Ergo si alios eligat vel reprobet, id facit ex *euphoxias*. (g.) Forsan existimat *SIMPLICIUS*, dum tam enixe Lectoris attentionem rogat, quod *sill*, Decreti Reprobationis & Electionis objectum non

Tom. III.

I

homi-

(g.) Rationes duæ sunt, quare Lectoris attentionem tanquam ad aliquid inauditum excito: prima est, quod Author dicit, *Reprobos & Electos ANTE eorum Reprobationem & Electionem peccato & pœnis æternis ADDICTOS esse.* Ego nondum concipere possum, quomodo dici possit, Reprobos & Electos ante reprobationem & electionem addictos fuisse pœnæ æternæ; si jam ante Reprobationem Reprobi pœnæ æternæ & laqueis peccati addicti fuere, tunc duplex statuenda est reprobatio, quarum una ante alteram fuit facta; illud ante deinde etiam supponit tempus in æternitate. Secunda ratio, quare attentionem *B. L.* excito, hæc est, quod Author dicit, Deum hominem reprobare, hoc est, ad æternum exitium destinare propter merum beneplacitum; ego autem cum alijs Theologis credo, Deum hominem destinare ad exitium propter peccatum. Sed D. Author hæc maluit silentio præterire, & pro more semper talibus rebus inhærere, de quibus ego nunquam cogitavi, ut semper aliquid dixisse videatur.

hominem conditum & lapsum statuatur, sed uti ipse (qui *SUPRALAPS.* partibus favet) primum Dei propositum fuisse de manifestanda justitia & misericordia in salvando vel damnando, asserat. Quod dictu est horrendum, ne dicam blasphemiae proximum, sed simul absurdum & contradictorium. (b). Qui enim dicit, Deum primo cogitasse de justitia & misericordia manifestanda, nescit quid dicit; hæ perfectiones sunt relativæ ad aliquod objectum, cujus existentia saltem supponi debet; Qui etiam dicit, primo Deum cogitasse de salvando vel damnando, sibi ipsi contradicit, salus enim & damnatio objectum aliquod supponunt, de quo prius cogitaverit Deus, sed hæc ἐν παροδῳ in gratiam *INFRALAPSARIO- RUM.* - - Alterum Consecrarium hoc est, cum omnia, quæ ad salutem necessaria sunt, sint Dei dona, justificatio nempe &c. sequi, reprobos ullum actum bonum & salutiferum (quod etiam omittit *SIMPLICIUS*) edere non posse. (i.) Et hoc etiam necessario ex principiis Orthodoxis fluit;

(b.) Infeliciter iterum hic Vir docte, debaccharis in miseros *Supralapsarios*; sed loco responsionis huc apponere lubet verba Celeb. *SALCHLINI* in solidissimis suis stricturis contra *Clariss. PFÄFFLIUM* pag. 34. quæ tibi etiam dicta putes, ita autem sonant; Et tales adhuc se ingerere volunt in Ministerium nostrum, quod rubore suffusus & cum dolore dico, nec dicerem, ni notum mihi, Viros pios & eruditos in omni Religione sæpe querelas movisse de ignorantia Sacerdotum & Pastorum sua Religionis, adeo ut ubique idem obtineat; ex hac ignorantia etiam factum, plurimos nescientes, nullam plane esse differentiam inter sententiam *Supralapsariorum* & *Infra-lapsariorum*, præter diversum concipiendi modum, ex uno vel altera quasi hæresin fecisse, nec observasse, neutram harum sententiarum alteram. &c. Vivis hic coloribus D. *COCHETUS* depictus mihi videtur.

(i.) Hæc Authoris verba sunt quam verissima; ratio, quare ea in animadversionibus meis apposuerim, hæc est, quia Lectori integram hujus dissertationis dare volui ideam, neque ea planè omittere quæ bona sunt, ex §. enim 1. Animadv. mearum patet, me exhibere voluisse summarium dissertationis hujus propter eximias quas continet res; unde consecrarium hoc simpliciter recensco

fluit; Quomodo is ullius boni & salutiferi actus effect capax, qui omnis boni est incapax, qui non magis Deum audire vocantem, vel ipsi credere, & alia ad salutem necessaria præstare quam mortuus actus vitales edere, valet; si electi bonum faciant, id omne Dei gratiæ efficaci tribuendum est, quam gratiam cum prorsus iis, quos prætermisit, & in Decreto reprobavit, denegat Deus; hinc luce meridiana clarius, nostrum de Reprobis confectarium necessarium esse. Quid vero sint actus Decreti Reprobationis *Excæcatio* & *Induratio* secundum Orthodoxos, facile colligitur. (Vellem ut B. L. hic attenderet, nimirum ad bonam fidem *SIMPLICII* in citandis his duobus confectariis, cujus antea plurima jam extant monumenta.) Denique cum gravissima in Systema moveatur difficultas, illud nempe libertatem in agendo evertere, si quidem bono non possint non esse addicti Electi, sicut & reprobi malo & peccato; ad hanc solvendam ea attuli responsa, quæ suppeditat Systema, (è definitione libertatis sili. petita.)

§. XVIII.

Itaque non multum iteratis *SIMPLICII* clamoribus *parag. 17.* movebitur Lector. Quod autem nec omnia, quæ ad Essentiam Systematis Ortod. pertinent, nec ordine demonstrasse conqueritur, certe indicium manifestæ in judicando præcipitantiæ prodit. Tria capita essentialia, in quibus ab invicem discrepant variæ sectæ (secundum ipsum) non explicui. 1. *Necessitatem Revelationis.* Ut quidem ne γερ de ea dicendum erat, de hac nulla est lis. (k.) Sed *Sociniani Religio-*

I 2

ligio-

absque ulla addita observatione vel crisi, nihilominus Author illud defendere satagit, ea autem plerumque omittit, quæ responsione quam maxime indigerent.

(k.) De insufficientia Theologiæ naturalis & revelatæ absoluta necessitate, nullam esse litem, hætenus præter *GOCHETUM* nemo

ligionem comunem omnibus natura notam statuunt, ergo Revelationis necessitatem impugnant. Quid absurdius dici potest? quare (si verum hoc esset) Sociniani Religionis Christianæ veritatem ac divinitatem tuerentur, nulla esset ratio: præterquam quod & hoc verum non est, Sociniani & Remonstrantes quemquam damnare nolunt; Existimant eos esse Deo gratos & acceptos, qui juxta lumen ipsis concessum vitam agunt; sed an ex eo sequitur, ut Religionem comunem, omnibus natura notam, quæ per se sufficiens sit ad salutem, statuunt, ac proinde perinde esse, quamcunque Religionem profitearis? Consequentia nullo modo valet. (1.) Ea quæ pag. 88. Dissert. nostræ ad quæstionem, *An Theologia naturalis sufficiens sit ad hominem adducendum ad salutem?* id evincunt; Ex iis enim evidenter tum de Remonstrantibus, tum de Socinianis, eos Religionis naturalis insufficientiam & Revelationis necessitatem agnoscere, probatur. 2. *Doctrina de S. S. Trinitatis mysterio secundum Ortod. prolixius explicanda, & adstruenda fuisse.* Sed Remonstrantes, Lutherani,

unquam dixit, sed dies diem docet; fuerunt non tantum inter Veteres ante Pelagium nonnulli, qui inconsiderate locuti statuerunt, Gentiles per Philosophiam suam fuisse servatos, ita CLEMENS ALEX. & JUSTINUS MARTYR, sed eam sententiam etiam defenderunt Pelagiani Veteres & Novi, ut Sociniani ita etiam Remonstrantes, sic EPISCOPUS Sociniano-Arminianizans in *Instit. Theol. Cap. X. Lib. I.* contendit, in primis mundi sæculis usque ad diluvium & ultra non aliam nisi Relig. naturalem viguisse, eaque servatos fuisse homines, & quanquam ejus agnoscat infirmitatem, causam tamen non in ejus insufficientiam rejicit, sed in culpam hominum. CURCELLÆUS quoque contendit, Gentiles sine cognitione & fide Christi Salvatoris potuisse salvari, in *Disput. peculiari contra Maresum*.

(1.) Omnino consequentia valet, quod si aliquis secundum lumen naturæ Deo servit: illi gratus esse potest. tunc Revelatio absolute necessaria non erit; etsi tamen usum aliquem habere statuaturs Revelatio in hominis salvatione, uti fit à Socinianis, tamen eo ipso absolute necessaria non est, quia juxta illos homines secundum lumen naturæ viventes Deo grati esse possunt.

rani, Pontificii alique quamplurimi Christiani de hoc argumento cum Orthodoxis consentiunt. (m.) Ideo cum de Systemate Ortod. res fuit, de hoc Dogmate nihil protuli quam quod huic Systemati proprium erat, v.g. *neceſſe omnino fuiſſe, ut mediator eſſet Deus.* Præterea ea quæ de *Persona Chriſti*, ubi de Socinianis actum eſt, quantopere hac de re ab aliis Chriſtianiſ differant Sociniani, ſatis innuunt. Fuſius equidem de hoc Dogmate dicendi locus fuiſſet, ſi Chriſtiani Theologi in mea diſſertatione ſolummodo, ut à Socinianis diſſentientes ſeſe ſiſterent; ſed longe aliter ſe res habet.

§. XIX.

3. *Nec omittenda* (pergit *SIMPL.*) *fuiſſet Doctrina de Sacramentis, cum Sociniani ritus illos ſymbolicos tantum habendos eſſe pro Tetheris &c.* Nec etiam omiſi; Conſectarium enim ex Systemate Ortod. circa Baptiſmum retuli, (n.) (de quo etiam mentionem facit ipſe *SIMPL.* parag. ſequenti) *Baptiſmum nempe, infantibus neceſſario adminiſtrari debere, ſiquidem tanquam ſignum & ſigillum fœderis gratiæ a Deo decreto ſuo abſoluto ſit ſtatutus;* Quod concipere nequit, quanquam per ſe clarum: cum enim ab una parte Baptiſma ut ſigillum fœderis gratiæ complectatur Decretum divinum abſolutum, & ab alia in infantium numero dentur Electi, qui fato fungi poſſent antequam ad adultam ætatem pervenerint, ideoque antequam Baptiſma ſigillum fœderis gratiæ acceperint; Maniſeſto hinc liquet, Baptiſma

I 3

tiſma

(m.) Eſſi ipſi conſentiant, tamen non conſentiunt Sociniani adeoque cauſa diverſitatis in hoc dogmate inter Orthodoxos & Socin. oſtendenda fuiſſet; ſed fateor, difficile hoc fuit demonſtrare ex principio Religionis noſtræ ſive Systemate Religionis noſtræ, quod ex mente *COCHETI* eſt *ſtatus homini lapſi.*

(n.) Conſectarium hoc 1. non ſufficit ad oſtendendam diverſitatem inter nos & Socin. 2. de Sacra Coena plane nulla facta fuit mentio, ſed etiam hoc dogma ex *ſtatu hominis lapſi* elicere difficile fuit.

tissima infantibus quantum fieri potest administrari debere. Futilis omnino est *SIMPL.* exceptio, quæ sic se habet : *Eo enim modo sequeretur, Circumcisio & Pascha constituta sunt absoluto Dei decreto signa & sigilla fœderis gratiæ, quod unum est sub V. & N. T. Ergo infantibus sub Novo Test. necessario administrari debent :* 1. Etsi alicujus ponderis esset hoc ratiocinium, nullo modo *Thesin* meam tangeret. Id unum esset concludendum, *SIMPLICIUM* nempe confectarium ex *Systemate* necessarium totis viribus impugnare. (o.) 2. Sed revera debile est admodum, nec confectarium ferit; Equidem circumcisio & Pascha decreto divino constituta sunt signa & sigilla fœderis gratiæ, sed ad tempus administrari debuerunt, quandiu fill. per idem decretum *Vetus Oeconomia* duratura erat. Denique de hoc te monitum volo *B.L.* (quod jam *pag. 88. Dissert.* monueram) fieri potuisse, ut quasdam discrepantias omiserim, sed numero paucas, præcipuas enim, unde aliæ ortum suum ducunt, annotasse, satis duxi, & præterea dari possunt tales, quæ nullum cum *Systemate* nexum habeant.

§. XX.

Parag. 18. non multum hæreo, siquidem ex parte supra fuerit responsum; Cœtera vero quod attinet (nexum nempe illum mirum, quem instituit *SIMPLICIUS*) sane hominem, cujus bilis ita effervescebat, ut amplius sui compos non sit, sapiunt. Duplicis generis consequentias ex tota *Systematis Orthodoxi* serie deduxi; aliæ spectant *Novi Fœderis cum Vetere harmoniam & consensum*, aliæ vero *Novi Fœderis Oeconomiam externam*. Sed *SIMPLICIUS* omnia confundit; quasi eas consequentias, quæ spectant *Fœderis Novi Oeconomiam*, deducerem ab iis, quæ illius cum *Vete-*

(p.) Rem in confectario contentam non impugno, sed modum, quæ confectarium elicitur.

Vetere consensum declarant. (p.) Etsi utrasque diversas esse & ex eodem fonte fluere sedulo observaverim. Quod ipsemet fatetur ab initio paragraphi. *Ex dictis*, inquit, *quasdam deducit consequentias, quæ spectant tum fœderis gratiæ Oeconomiam externam, tum fœderis Novi cum Vetere Harmoniam.* Sed in sequentibus confessionis hujus plane est immemor. Hæc est simplicitas Christiana, qua mecum utitur *SIMPLICIUS*, cuius unicum propositum est, ut tanquam absurdam ob oculos Lectoris dissertationem meam traducat; Quomodo-cunque autem finem suum assequatur ipsi perinde est. Parag. 20. prætermitto, quia totus, plebeis & sordidis convitiis, eleganti stylo quidem concinnatis sed ad rem nihil facientibus, refertus sit.

§. XXI.

Ad parag. 21. devenio, in quo *SIMPL.* Methodum, quam in *Systemate Remonstrantium* tradendo usurpavi, improbat. Eorum B. L. quæ ad parag. 6. observavi memor sis, & tibi, *statum hominis in peccatum lapsi* revera hujus Systematis esse principium & fundamentum, constabit; quod etiam cuivis Theologiæ non plane imperito dijudicandum relinquo. (q.) In hunc finem legantur *Quinque Articuli Confessionis Remonstr.* à Synodo Dordracena damnati, summamque

I 4

Syste-

(p.) Verba ipsius Auth. Dissert. pag. 28. hæc transcribam, ut pateat, qua ratione duo illa corollaria eliciat, ita scil. *Si ita se habeat, ex supra positis, Vetus Fœdus respectu Novi, indidem etiam hoc discimus, de posteriois Oeconomia externa &c.* quis nunc non ex his verbis agnoscit, Auth. corollaria hæc duo ex consensu V. & N. Fœderis deduxisse, quando expresse dicit; *Si ita se habeat V. F. respectu novi, inde etiam hoc discimus, ut adeo D. A. non habeat cur de mea simplicitate conqueratur.*

(q.) Occasionem & πρῶτον ψεδος, adeoque etiam principium. diversitatis doctrinæ Remonstrantium à doctrina nostra esse doctrinam de *Prædestinatione*, satis clare patet 1. ex Epistola illa *ARM. N. I.*, quam 15. Cal. April. 1591. ad Veterem suum Præceptorem

Syltematis eorum de oeconomia salutis exhibentes ; Ex quibus patet, totum illud ruere, nisi hominem lapsum alicujus boni capacem statuunt. Quomodo enim aliter Decretum electionis & reprobationis ex prævisa fide vel incredulitate tuerentur ? qua propter Articulorum prædictorum *Tertius* & *Quartus* affirmant, esse in omnibus & singulis hominibus communem gratiam, consistentem in lumine naturali, & donis post lapsum relietis ; ita ut sit in potestate liberi arbitrii, se non convertere vel convertere ad Deum vocantem &c.

§. XXII.

Expositionem *Systematis Sociniani* ex principio supra memorato deducti etiam male se habere arguit *SIMPL. parag. 22 Oblitus* (secundum ipsum) *animæ, centri, & fundamenti totius Socinianismi, quod est Religio communis omnibus natura nota.* Quasi vero hoc dogma, dari Religionem naturalem omnibus communem, Socinianis peculiare esset, cum sit fundamentum totius Religionis Christianæ, quæ hanc supponit, absque qua nec intelligi nec probari potest. *Premisit* (inquit Tertullius) *naturam magistræ, submissurus deinde prophetiam, ut facilius credas prophetiæ, discipulus naturæ.* Et Orthodoxi ipsi, dari Theologiam & eo ipso Religionem naturalem, adversus Socinianos affirmant. (r.) Si dicas, hic
agi

GRYNEUM Basileam exaravit, 2. ex ijs quorum doctrinam nostram accusavit, quod ea inducatur *fatum stoicum, Manichæismus, libertatis excidium, necessitatis Asylum, desperationis bazarum, exhortationum, correptionum, Orationum interitus ; extinguere omne pietatis bonorumque operum studium.* Hinc nunc facile patet, quæ in re *ARMINIUS* primum à veritate discesserit, & quodnam sit ejus *novus Deus*, nempe quod *absolutum & efficax Dei decretum cum libertate ætæternæ conciliare non potuerit ;* quomodo verò deinde error errorem traxerit, cum ab alijs jam sit ostensum, id hic brevitate causa facere supersedeo ; etsi enim facerem, solius *COCHETI* auctoritatem illis opposuisse sufficeret, qui ut res in posterum se aliter habeat jubet.

(*) Bene se habent, quæ Auctor hic dicit, non enim de hoc queritur,

agi de Religione comuni, quam Sociniani per se sufficientem ad salutem credant, id stricte negatur ex rationibus ad par. 17. allatis. (s.) Nihilo minus tamen (secundum **SIMPLICIUM**) omnia quæ de Socinianis dixi, inverso ordine sese habent; *Unicum* inquit, *solummodo exemplum asseram ex pluribus, ex eo nimirum quod Sociniani satisfactionem Christi negant, fluere dicit, Christum esse merum hominem.* Exemplum hoc aliis addas B. L. quibus luculenter bonam suam fidem testatam facit **SIMPLICIUS**. (t.) Quemadmodum enim, cum de Systemate Orthodox. actum est, nexum Doctrinæ Trinitatis cum hoc Systemate declaravi, hanc consequentiam de mediatore ex statu lapsi hominis justitiæ divinæ obnoxii eliciendo, *necesse fuisse nempe, ut esset beatus spiritus*; Ita etiam cum de Socinianis res est, Trinitatis dogma nullum nexum habere, imo cum eorum Systemate de oeconomia salutis pugnare, duplici ratione ostendi. 1. *Ex iis, quæ circa ejus dogmatis vim ac necessitatem in salutis negotio statuunt, nihil est quod Christum alium esse quam merum hominem innuat.* Secundum enim eos, nec poenam ipsam peccati, nec poenam qualemcunque vicariam, ut justitiæ divinæ satisfaceret, nec legi perfectam obedientiam loco hominis pecca-

I 5

toris

(s.) Fundamentum Religionis **SOCINIANÆ** esse, studium fabricandi Religionem communem aliquam, per quam homines ex omnibus confessionibus salvari queant, in qua articuli fundamentales ex omnibus Religionibus maneant salvi, ostendunt sex eorum Articuli fundamentales; quos statuunt, & totum eorum lis superstructum Systema, omniumque Religionum tolerantia; quomodo vero totum illorum Systema ad *πρωτον* hoc *ψευδος* sese habeat, hic ostendere nimis prolixum foret, idque à Celeb. **VAN TILL** aliisque (quos quidam male suadi infinitis partibus doctiores fuisse **COCHETO** audent putare) præstitum est. At illi sua sibi habeant, nos sanè **COCHETI** auctoritatem sequimur; nec addendum quidquam amplius censemus illis, quæ supra jam sunt annotata.

(t.) Ubi D. A. fidem meam accusat, ibi semper evolvenda est ejus dissertatio, quam ille de quidem intellexisse videtur.

toris præstare debebat mediator &c. Nulla ergo ratio datur, cur esse debeat Deus. (u.) 2. Præterquam, quod munera Regis & Sacerdotis, quibus defungi debebat mediator, nonnisi in hominem secundum eos cadere possint. Ea enim leguntur *CATECH. RACOV. Sect. 7. Quæst. 1.* Sed Rex, qui simul & Sacerdos sit, Deus ille unus esse non potest, sed necesse est, ut homo sit ad utramque hanc dignitatem à Deo hominum bono evectus. Hæc omnia prætermittit *SIMPLICIUS*, quæ sane ordinem nullo modo inversum fuisse demonstrant. Sed addit, loco quod hactenus existimarunt Theologi, ex eo, quod Sociniani rationem faciunt Religionis normam fluere, quod negent mysteria, ex hoc vero quod negent divinitatem Christi, inde vero quod negent ejus satisfactionem. 1. Sociniani non aliter quam alii Theologi rationem Religionis normam profitentur: (w.) nec ulterius ejus jura extendunt. Brevitatis studio hic mitto ea quæ ad hanc controversiam solvendam in dissertatione mea occurrunt; Lectores ad *CATECH. RACOV. Sect. I. Cap. 3. ad Quæst. At quo pacto obscuriores scripturæ loci possint intelligi? amandando.* 2. Sociniani Trinitatis dogma non, quod rationem superet, negant, sed quod sanæ rationi & divinis litteris simul illud adversari autument. (x.) *CATECH. RACOV. Sect. 4. Cap. 1. pag. 25.* 3. Quod denique asserit *SIMPLICIUS*, Socinianos negare satisfactionem Christi, eo quod negent ejus divinitatem, ex supra

(u.) Quia Christi divinitatem negant, hæc ut ea, quæ Author verbis sequentibus dicit, statuenda fuerunt; nam quia Mediator secundum illos non est Deus, nec justitiæ divinæ satisfacere nec loco peccatoris obedientiam infiniti valoris præstare potuit; unde etiam fluit, quod ille, qui munera mediatoria administrat, tantum homo sit.

(w.) Et tamen articulos fundamentales absque revelatione notas esse dicunt.

(x.) Ex eo quod Mysterium Trinitatis Rationi & S. Scripturæ repugnet, sententiam suam Sociniani tueri volunt, inde tamen non sequitur, quod id statim sit πρῶτον ψευδος doctrinæ alicujus, quo illam probari conantur ejus Patrimi.

pra dictis confutatur ; (y.) Socinianos utique suæ negationis rationem reddentes, & contrarium prorsus asserentes audivimus.

§. XXIII.

Notam deinde aggreditur *parag. 23.* qua rationes, de quibus Systema Socinianorum, post Systema Remonstrantium in Dissertatione mea sese sistat, indicantur ; absurda ipsi videntur ea, quæ in hunc finem observavi : *Quasi ideo inquit, quia Dissertatio est Theologica, nullus observandus esset ordo ; quasi ordo non potius requirat, ut cum Sociniani non tantum priores fuerunt tempore, sed Arminiani multa ex Socinianis Dogmata assumpserunt, ii qui antesignani fuerunt præcederent.* Equidem observandus est ordo in Dissertatione Theologica, sed quinam ordo ? ordo sermonis. Jam vero quid ad hunc ordinem, quod *Faustus SOCINUS* ante *Jacobum ARMINIUM* vixerit, opinionesque suas sparserit ? quod Remonstrantes multa dogmata ex Socin. assumpserint ? Nonne Remonstrantium, & Socinian. Systemata, ad eorum originem nulla attentione facta, tradere licebat ? An ordo temporum hic quicquam ad ordinem & perspicuitatem sermonis confert ? quin è contra, cum Remonstrantes inter Orthodoxos & Socinianos medium teneant, ordini & perspicuitati consului, Remonstrantes Socinianis præmittendo. Comparent itaque primi Orthodoxi, deinde Remonstrantes ab Orthodoxis dissentientes, & denique Sociniani in plerisque cum Remonstrantibus consentientes, sed ulterius procedentes. Sed lis quam mihi hac de re creat *SIMPL. V. ἐξ αμετρίας τῆς ἀνθολογῆς* proficiscitur, & virum, qui minimis hæret, redolent hæc omnia (z.)

§. XXIV.

(y.) Supra dicta, ex quibus hæc confutantur, nullibi vidi ; nisi sit sola D. *COCHETI* Autoritas.

(z.) De hoc ordine quid tenendum sit, judicent ij, qui §. XXIII. *Animadv.* mearum legerunt.

§. XXIV.

Lectorem monet ab initio *parag. 24.* quod de *Logomachiis Theologicis* sub finem Dissertationis acturus, quid sit *Logomachia*, nesciam, aliaque de re plane agam. Verum antequam hoc monstret, observationes maximi ponderis præmittit. *Prima hæc est. Insignem inquit, suam notitiam iterum prodit, Socinianos & Remonstrantes, Theologorum Protestantium nomine insigniens.* Equidem stricte loquendo, nec Socinianis nec Remonstrantibus nec ipsis Orthodoxis, sed unice Fratribus Confessionis Augustanæ hoc nomen competit. Sed verba valere usu existimavi; atqui usu *Protestantium* nomen comune evasit. *Ecclesia Protestantes* vulgo dicuntur hodie omnes, quæ tum olim in Gallia & nunc in Anglia, Batavia, Germania, Polonia, Hungaria, Helvetia, & alibi colliguntur. (a.) Quapropter hoc nomen quamplurimis magni nominis viris ita placuit, ut illud omnibus, qui ab Ecclesia Romana secessionem fecerunt, in suis scriptis adplicent. Quis rem adeo notam Doctis. *SIMPLICIUM* latere unquam cogitasset? sed quid miror! illi omnia ignorare licet, qui *Orthodoxos, Socin. & Remonst. comuni nomine sectæ designari; qui Socinianos, Reformatos & Christianos Theologos appellari*, non modo improbat, sed veluti adversus aliquid nefandum insurgit.

§. XXV.

(a.) Recte dicit D. A. omnes illos, qui ad veram Ecclesiam pertinent, hodie appellari *Protestantes*, ubicunque terrarum degant; illi verò qui secessionem ab illa Ecclesia fecerunt, & talia dogmata profitentur, quæ fundamenta veræ Religionis plane subruunt, & quæ qui credit salvari non potest, illi inquam non amplius insigniri possunt nomine, quod veræ Ecclesiæ datur; non magis ergò *Sociniani* Protestantes dici possunt, quod nomen vi originis soli Ecclesiæ veræ competit, ac vera Ecclesia dici potest Pontificia, quia Sociniani ratione doctrinæ tam longè ita longius à nobis remoti sunt ac nos à Pontificiis. Quinam verò magni nominis Viri sint, quibus placuit Socinianos veræ Ecclesiæ nomine insignire, mihi compertum non est, vellem ut A. vel unicum nominasset.

S. XXV.

Illud itaque *primò* crimini vertit, quod Orthodoxos simul cum Socinianis sub nomine *SECTÆ* complectar; qua de re supra apud Lectorem jam multoties conquæstus est. Verum omnibus (excepto *SIMPLICIO*) illud vocabulum *secta* in bonam vel in malam partem sumi posse constat; Præterea *sectæ* nomine venire potest, *omnis cætus sententiæ, opinionis, cuiusdam favens, sive vera aut falsa sit illa opinio*; quo ultimo sensu hanc vocem me usurpasse publice fateor. Et hac in re dux fuit Apostolus gentium, qui Phariseos, quorum opinionibus ex parte adhærebat. (b.) *Sectam αἰρεσὶν ἀκριβοῦσαν*, secundum quam vixit, vocat *Act. 26*. Quinimo & ipsam Religionem Christianam nude *ὁδὸν viam* & ex versione Bezae *Sectam* appellat, (c.) 2. Peccavi, *SOCINIANOS, Reformatos Theologos, & Christianos* appellando; jam supra de voce *Reformatos* responsum fuit datum. Superest ut

Theo-

è contra Theologi nostri quemque nomine suo appellare, (Socinianum nempe vocant Socinianum) non vero cælum inferno miscere solent.

(b.) Dicendum est *adhaeserat*, nam non amplius Phariseus erat; & rectè Phariseismum *sectam* appellat.

(c.) In hoc miserè fallitur bonus vir, quando dicit Apostolum secundum *BEZÆ* versionem *Religionem Christianam* appellare *Sectam*; *BEZÆ* enim non vocem *ὁδὸν* per *sectam* vertit, sed vocem *αἰρεσὶν* vertit per *hæresin* i. e. *sectam*, uti etiam in Bibliis nostris Vernaculis vertitur. Dicit nempe Apostolus: *Hoc autem confiteor tibi, quod secundum viam istam, quam sectam dicunt, colo Deum.* Adversarij nempe ejus per contemtum v. 5. ejusdem cap. dixerant, ipsum esse *πρωτοῦσάτην sectam Nazarenorum*, hæc nunc repetit Apost. & dicit, se Deum colere secundum viam illam, quam illi *sectam* appellant; ipse ergo Religionem Christianam quam profitebatur ita nominare volebat, sed potius refutat adversarios suos, indicando, doctrinam suam non esse *sectam*, ut illi eam nominabant, sed viam illam antiquam perveniendi ad Deum. Infeliciter ergo A. 1. falsò attribuit malam *BEZÆ* versionem 2. dictum citat, quod id, quod ille defendere satagit, planè evertit.

Theologorum Christianorum Epitheton, quod Socinianis tribuitur, vindicem. Quare ergo Theologos Socinianos non appellassem, cum quotidie de Theologia gentili fiat mentio. Si inter gentiles fuerint Theologi, dantur etiam tales inter Socinianos; Et eo magis quod Christiani sint, nec ipsis illud nomen denegari possit. Qui enim Christo nomen dederunt, qui per Christum se salvatum iri profitentur, (d.) qui ipsum invocant, in

(d.) Rectè D. A. in integro hoc §. contra me probare allaborat, nomen *Christiani* aliis etiam ac veris Ecclesiæ membris sæpe tribui, & hic se aliquid contra me effecisse existimat, quando ex fonte suo Theologiæ, (uti *Franc. TURRETINI* opera appellat in Dissert. sua) contra me probat, etiam *Socinianos* ab illo Christianos vocari. Contra hoc suum *avros tpa* nihil habeo quod excipiam, dicere tamen mihi liceat quod res est; Cum nimirum animadv. meas, quæ D. COCHETO tantopere displicent, composuissem, Viris quibusdam ob magnam ipsorum in rebus Theologicis eruditionem conspicuis, eas simul cum Dissert. illa sive novæ Theologiam docendi methodo, tradidi, rogans eos, ut si aliquid inveniant in notis meis criticis, quo vel injuria fieri posset Authori, vel nimis acerbè locutus sim, id mihi indicare velint; nihil autem se in his notis cum ipsa Dissert. collatis desiderare aiebant, nisi quod vel decimam tantum partem virgula censoria notaverim ex iis rebus, quæ castigatione opus habuissent; præcipuè autem perferre non poterant, quod D. A. ita compilaverit Dissert. suam, ut tres illas, de quibus agit Religiones, tantum confideret, ut ejusdem, nempe veræ, Religionis varias sectas, quæ nomini diverso aliquo concipiendi modo articulorum quorundam non magni momenti differant, qui diversus concipiendi modus in Ecclesia Reformata schismatis causa sit; & hac mente Socinianos æque ac nostros Theologos semper comuni nomine complectatur, nempe mox nomine Protestantium, mox Reformationum, mox Christianorum, qui varias habeant *opiniones* (dogmata enim nostra Theologica & veritates æquè opiniones appellat ad Socin. & Remonst. doctrinam) inde factum fuit, ut D. Auth. etiam hac in re amicè monuerim, ut in posterum paulo distinctius & cautius loquatur, ne malam apud alios erga se suspensionem moveat; quando vero D. A. ita partes Socin. suscipit, ut eos ab Ecclesia verâ excludere nolit, eosque ut ejusdem pretiosæ fidei consortes tolerare velit, fortemque eorum defensorem agit, & Theologos nostros accusat, quod ipsis falsas affingant opiniones, hoc pacifico

in ejus promissa sperant, tanquam generis humani judicem expectant, ad Evangelii præceptorum normam mores suos instituunt, Nonne & ii sunt Christiani, etsi circa quædam capita errent, sunt tamen Christiani, quamquam errantes; Contrarium tamen tanta cum fiducia hic tuetur *SIMPLICIUS*, ut apud Lectorem propterea tanquam alicujus criminis reum me traducat. Verum ut os obturetur viro, quem authoritati & præjudiciis potius quam veritati litare, ex toto ejus sermone liquet, nostram sententiam etiam magnorum virorum authoritate suffulcire juvat. Unus tantum audiatur, Celeberr. nempe *Francis. TURRETINUS*, unus ex authoribus *Formula Consensus*, Instit. Theol. Loco 9. Quæst. 9. de Imputatione peccati *πρωτοπλασαν*. Licet, inquit magnus ille Theologus, omnes Christiani consentiant in agnitione peccati Adami, non tamen parum inter se dissident, quoad ejus effecta, potissimum quoad ejus imputationem, quæ à variis vel in dubium vocatur vel aperte negatur. Quinam sint illi Christiani dissidentes circa imputationem, (Systematis Orthodoxi præcipuum cardinem) sequentia te docebunt. Pelagiani scilicet. Sociniani, Anabaptistæ, Remonstrantes. Celare itaque non possum, quod si vir ille magnus *SIMPLICII* ævo vixisset, quin sicut ego Socinianismi se suspectum fecisset & hac ratione promotioni suæ ad S. S. Ministerium obesse potuisset, nisi S. V. hac

ejus animo adscribendum arbitror. Eo autem nomine ipsos inter alia in hoc §. defendit, quod Christo nomen dederint, quod per eum se salvatum iri profiteantur, quod tantum circa quædam capita errent. certe in his D. Vir ipsis multum largiri mihi videtur; quomodo enim illi, qui propriæ justitiæ litant, qui Christi pro peccatis satisfactionem negant, qui dogmata veræ Religionis fundamentalia evertunt, Christo nomen dedisse, per eum se salvatum iri profitentes, & circa quædam tantum capita errantes dici possint, hoc est, quod sola D. A. authoritate mihi niti videtur. Cum verò os mihi obturaverit, plura hic addere mihi non licet.

hac in re eum defendere sategisset, hæc nempe Clarissimi Viri ignorantia potius quam nequitia adscribendo. De cæteris vero, quæ insuper hoc paragrapho observat, satis superque quid sentiam, supra annotata indignant.

§. XXVI.

Paragrapho 25. id quod paragrapho præcedenti subinnuerat, ostendere conatur. 1. Quidem, quid sit Logomachia, me ignorare, in *Transitu* inquit *observandum*, per Logomachiam in *methodo* hætenus desiderata, ex ignorantia significationis non controversiam in *mero vocabulorum dissensu consistentem* intelligi, sed talia dogmata, quæ *Sectæ* alicui falso imputantur. Sed hoc verum non est: (e) Hæc verum in mea dissertatione occurrunt (quæ *SIMPLIC.* præcedenti parag. refert) parag. 1. p. 85. *Præcipuum itaque tantummodo unum confirmabimus. Methodo sill. à nobis usurpata. Logomachias è Theologia exulare, nec cuiquam opinionem, quæ à suis principiis abhorret, vel elare non fluit, affingi.* Quibus verbis Logomachia manifeste distinguuntur ab opinionibus quæ sectæ alicui falso imputantur. Utrasque equidem sub nomine generali Logomachia complexus sum, quia in Controversiis Theologicis *λογομαχείαν* plerumque accidit, unde sæpe adversariis dogmata tribuantur, à quibus prorsus sunt alieni. 2. Non modo quid Logomachia nescivi, sed plane de alia re egi, quod solide & *Savantissime* duplici ratione ostendit *SIMPLICIUS*. 1. Ordine eas controversias quas in Logomachiarum Catalogum recensui, exponendo; Id unum observabo circa *septimam*, quæ propter Typographicum mendum sensum falsum exhibet, ea nempe sic se habere: *An in aternâ Dei existentia nulla sit successio prioris ac posterioris?* 2. Ne Lectori nauseam creet singulis hærendo, generale de his iudicium fert. *Causa* inquit, *cur*
Doctus

(e.) Consulenda ergo est ipsa Authoris Dissert. ut ea clara fiant, quæ dixi, & contra ipsius negationem probentur.

Doctus Author hæc omnia Logomachiis annumeret est, quod subinde mentem adversariorum nostrorum non perceperit, subinde vero aliquid invenerit, in quo unus Socinianorum ab aliis dissentit, inde factum fuit, ut Author existimaret reliquorum Socinianorum esse mentem.

S. XXVII.

Quod adversariorum mentem non perceperim, id demonstrandum erat, non verò silentio prætermittendum; (f.) Loca ex eorum scriptis excerpta, quæ in medium attuli, saltem mihi ita clara videntur, ut

Tom. III.

K

diffi-

(f.) Ne id silentio præmittam, quod Author à me postulat, id faciam, quantum penuria loci & arcti, quibus circumscriptus sum, limites permittunt; primum nempe quod D. A. inter *Logomachias* recenlet est, quod *SOCIN. falso imputemus, quod negent, Theologiam & Legem naturalem.* Ut res recte intelligatur, distinguendum est inter Theol. naturalem *innatam*, cujus principia naturæ per creationem collata, ut homo facultatem habeat sine institutione de Deo cogitandi; alia vero *acquisita*, quæ acquiritur per discursum & considerationem operum divinorum. *SOCINUS Præleſt. 2.* utramque negat, contendens, cognitionem Dei omnem ex patefactione proficisci, & traditione inter Homines propagari; ita etiam cum eo facit *OSTOROD. inſtit. cap. 3. VORSTIUS in Exeg. Apol. ejusque Epitome.* A *SOCINO* autem abit discipulus ejus *CRELLIUS*, & *EPISCOPIUS*, *CRELLII* discipulus, qui contendunt, dari cognitionem Dei naturalem, sed *acquisitam* tantum. Sequentia ergo D. Viro consideranda fuissent, antequam Theologos nostros accusaret. illos Socinianos falso aliquid imputare, 1. Illos non indiscriminatim contra omnes Socin. affirmare, dari ideam Dei tum *innatam* tum *acquisitam*, sed contra unumquemque id affirmant, quod ipse negat, ita affirmant contra *SOCINUM*, *OSTORODIUM* & *VORSTIUM*, dari ideam sive cognitionem Dei *innatam* & *acquisitam*, contra eos vero qui *acquisitam* concedunt, tantummodo affirmant dari *innatam*; Recte ergo non tantum contra *SOCINUM*, sed etiam contra *Socinianos* affirmant, dari cognitionem Dei naturalem sive *innatam*, sed cum distinctione. 2. Doct. Vir observare debuisset, quod hodierni etiam Sociniani in multis suis dogmatibus in varias abeant sententias, & non omnes *Catech. illam Racov. librum suum symbolicum agnoscant*, quæ est pro-

prie confessio fidei communionum illarum Socinianarum in Polonia habitantium, cum quibus non solis nobis bellum est, sed etiam cum aliis qui præcise in Catech. illam non jurant. 3. Locus ille, quem Author è Catech. illa citat, planè nihil facit ad rem suam probandam, cum plane nulla mentio fiat, quod res illæ, quæ ante legem fuerunt cognitæ, ex ideis innatis, non vero ex traditione fuerint cognitæ, ut hic locus plane nihil faciat ad probandum, Socinianos statuere etiam Theol. naturalem ex principiis innatis, non vero tantum ex acquisitis. Nec ad rem aliud facit, quod D. A. dicit, *CRELLIUM* existentiam Dei etiam ex conscientia vi probare, non enim omnia, quæ conscientia mihi dictat, habeo ex cognitione ingenta, alias omnium illarum rerum, quarum mihi conscius sum, cognitio mihi innata esset, quod absurdum est; ex quibus omnibus concludo, falso Auth. Theologos nostros taxare, quod contra Socinianos Theol. naturalem ex principiis innatis affirmant

Secundus articulus, quem V. D. *Logomachii* annumerat, est quod male tribuatur *Remonstrantibus*, quod statuunt, Theol. naturalem ad salutem sufficere; jam supra annotavi, eos qui hoc statuunt esse speciatim *EPISCOPIUM* & *CURCELLÆUM*, quibus etiam addendus est *GROTIUS*, qui statuunt, præter Patriarchas ante Oeconomiam Mosis viventes, tales extitisse homines, qui per cultum secundum solum lumen naturæ & dictamen rationis institutum, se Deo commendaverint, & viam ad sempiternam felicitatem sibi paraverint. Unde iterum concludo, recte contra hos, qui certe sunt *Remonstrantes*, affirmari, quod Theol. naturalis ad salutem non sufficiat. Inter *Logomachias* porro A. recenset, quod contra Socin. negetur, quod ratio humana sit principium sive norma, ad quam omnes de religione controversia & ipsemet scriptura sensus judicari debeat. Ea quæ A. de his in Diss. dicit, satis clarè ostendunt, ipsum statum quæstionis non percepisse, qui hoc modo se habet, si mihi licet D. A. docere; nempe Sociniani omnia Mytheria hoc prætextu repudiant, quod cum ratione pugnent, ut V. D. ipse supra ex *Cat. Rac. Sect. IV. cap. 1.* citat, adeoque res maximi momenti in scriptura revelatas ad trutinam & decempedam rationis examinant; hinc est, quod Theologi nostri contra ipsos defendunt, rationi in exponenda scriptura tantum non esse tribuendum, ut dogmata fidei ex plurium consonantium scripturæ locorum concorde consensu clarè demonstrata, aut sensum scripturæ ex vocum & Phrasum vera significatione & orationis contextu evidenter adstructum, hoc prætextu liceat repudiare, quod cum ratione pugnent, & quidem in rebus quæ vi intellectus humani penetrari non possunt; Contra Veri Christiani esse, ratiocinationi potius suæ quam claræ Revelationi diffi-

difficillime detorqueri queant ; vellet forsan *SIMPLICIUS*, ut adversariis omnem fidem denegarem, cosque vere suam mentem non aperire, sed aliam esse, quæ latet, verbis nullo modo consonam ; sed absit, ut unquam Christianæ caritatis & simplicitatis eosque sim oblitus. *Tu quis es ô homo, qui judicet alium?* sed præterea unius aut alterius opinionem tanquam aliis comunem habui, si *SIMPLICIO* credendum sit ; Quo autem fundamento innitatur hæc insimulatio, prorsus me fugit, imo ad tale præjudicium amoliendum jam à limine dissertationis omnem navavi operam ; Lectorem circa fontes vel Authores quos adire erat necesse præmonendo ; *Eos nempe potissimum, qui de Sententia cui favent recentiores edidere tractatus, siquidem Theologos à suis antesignanis in pluribus differre, variisque opinionibus, quas illi tuebantur, valedixisse, experientia compertum sit.* Quæ ut Socinianis adplicem, (cum de his in specie loquatur *SIMPL.*) nonne cos Socino in pluribus valedixisse, notum est ? Nonne etiam inter Socini discipulos circa plura capita fuere lites ? Quapropter ne quicquam præter eorum

K 2

men-

diffidere, ita secum reputare, Revelationem in ejusmodi casibus non pugnare cum ratione, sed cum rationis sive fallacis ratiocinationis qualicunque specie. Unde iterum concludo, recte hæc contra illos Mysteria fidei ad rationis tutinam examinantes statui, atque D. *COCHETUM* iterum falso de nostris Theologis quod Logomachias moveant judicasse : Ita nisi mihi inculcatum fuisset, ut brevis sim, etiam facile ostendere possem, *HOORNBECKIUM*, *SPANHEMIUM*, aliosque, qui doctrinam Socinianorum extus & intus noverunt, etiamsi non contra *Cat. Rator.* tamen contra *Socinianos*, recte asseruisse, textum Authenticum S. Scripturæ plurimis locis non esse corruptum ; D. Vir enim ut monui nunquam distinguit inter Homines cum quibus ipsis Lis fuit ; lubens etiam ostenderem in reliquis controversiis, ut supra feci, quas Author *Logomachiis* accenset, illum vel statum controversiæ vel sensum Adversariorum non percepisse ; sed angustia spatii me hic subsistere jubet.

mentem ipsis adscriberem, Eorum placita in *CATECHESI RACOV.* quam suæ Ecclesiæ nomine publici juris fecere anno salutis 1630. potissimum quæsi; Quod si aliter quidam Sociniani sentiant, quam illa Catechesis, hoc neutiquam mirabitur, qui hæc in illius præmio legit. *Unum est adhuc, quod te monere volumus B. L. de hac Catechesis nostræ editione, eam non tam novam in publicum produci quam renovatam; Est eadem aliquo modo illa, quæ anno salutis 1609. edita, sed jam plurimis in locis aucta est & locupletata, quin & correctæ & immutata à præcipuis Ecclesiæ nostræ luminibus JOH. CRELLIO, MART. RUARO &c. Non enim erubescendum putamus, si in quibusdam Ecclesiæ nostræ proficiat; Non ubique clamandum credimus, sicut in filo, hic pedem figo, hinc me dimoveri ne tantillum quidem patiar; Stoicorum enim est, omnia mordicus defendere.* In Socinianorum itaque causa neque *SO-CINUS* ipse, neque *SMALCIUS*, neque *VOLKELIUS*, neque *WOLZOGENIUS*, neque *SCHLICTINGIUS*, neque *CRELLIUS*, neque alii sunt audiendi, nisi quatenus prædictæ catechesi consentiunt; *Ex hac (inquiunt loco supra citato) Catechesi, quam modo publici juris facimus, de nostro in Religione sensu judicari volumus.* His positis, has omnes Controversias cum Socinianis, quas in Logomachiarum classẽ adposui, revera in ea locum habere debere, ingenue fatebitur, qui veritati & paci studet. Talis confessio equidem à *SIMPLICIO* expectanda non est, qui potius multiplicandis Logomachiis quam vitandis operam dat. Quid enim aliud sunt lites, quas de vocibus *Principii, Reformatorum, Protestantium, &c.* excitavit, nisi meræ Logomachię? Verum iis nec finis nec modus unquam erit, dum illi qui ad contra sentientium placita eruenda sese accingunt, eo erunt ducti animo, ut nihil cum iis comune habere velint, sed potius longissimè quantum licet ab
iis

iis recedant ; Talibus minima munstra videntur , ex voce æquivoca opinionem adversariis affingendi ansam arripiunt , & (ut uno verbo dicam) non secundum veritatem , quæ non quæritur , sed ex affectibus & præjudiciis , quibus indulgetur , judicium fertur. Tunc crassa undiquaque prelo committuntur volumina , quorum Authores in mutua odia sæviunt , mutuis & omnigeneris convitiis sese lacerant. Tractatus autem hæc methodo conscriptos *SIMPLICIO* familiares fuisse , omnia suadent.

§. XXVIII.

Sed finis coronat opus. Denique parag. 26. ejus crisis versatur circa quinque miscellaneas Theses , quæ sub finem dissertationis meæ occurrunt , & in specie circa secundam , quæ sic habet. *Temere & immerito Reformati nomen sibi vindicat , qui scriptum humanum , ut controversiarum de Religione judicem summum habet ; Hominem enim , seu viva voce seu scripto loquens , cæca fide audiatur , PAPAM esse perinde est. Illius posterior pars ænigma SIMPLICIO & aliis ejus fociis est , ut sensum ejus ne Oedipus quidem assequi posset ; Quandoquidem verborum quibus constat constructionem hanc esse clarum est : Perinde enim est , hominem PAPAM esse , siue audiatur cæca fide , loquens viva voce , seu loquens scripto. Oedipi itaque , qui hunc nodum solvant , non longe lateque sunt quærendi ; necesse non est ut hic SIMPLICIUS ad illustrium virorum manes evocandos Pythonissam Endoream agat. Concurrite & adeste solummodo Linguae Latinæ Tyrones ! (g.) In*

K 3

SIM.

(g.) Rectè hic D. A. monet , ad verba hæc explicanda *Tyronibus* opus esse . talis enim his verbis latini sermonis inest elegantia , ut videatur , latinæ linguæ Tyronem hoc corollarium composuisse , adeoque ejusdem illius Tyronis explicatione opus habet ; nondum tamen ita clare Tyro ille , quem D. Vir advocat , ejus vero personam ipse agit . corruptum hunc locum explicavit . ca-

SIMPLICIUM & ejus Sociorum gratiam horum verborum sensum & ordinem explanate ! ita ut rite judicare possint, num *tam invisam* (referente *SIMPLICIO*) quibusdam Formulam Consensus ob oculos habuerim. Hæc sunt ultima criseos *SIMPLICII*, quæ mire cum præcedentibus quadrant.

§. XXIX.

Nunc æquo Lectori dijudicandum relinquo, num nimium præcipitanter à limine responsi *SIMPLICIUM VERINUM* illud Ecclesiæ fidelium egregium nomen in suis animadversionibus ementitum fuisse dixerim ; nequidem umbra *Simplicitatis* Christianæ & *Veritatis* in toto ejus sermone apparet ; Ejus crisis nonnisi malitia & ignorantia spectabilem sese reddit, utriusque in ea singulare edidit monumentum ; ita ut alias omnes hujus generis exercitationes propterea vincat. Quapropter hic duo mirari Lectorem nequaquam dubito. 1. Quidem *Methodum*, qua suas animadversiones concinnavit *SIMPLICIUS*, quæ sane à sæculi quo vivimus moribus abhorret, nec ab ullo hodie desideratur. Beata enim prædicantur nostra tempora, quod sæculorum præcedentium Barbaries victa jaceat, *ringensque suas mordeat irata catenas*, sed denuo solutis vinculis à *SIMPLICIO* in libertatem vindicatur ; Quicquid sit de hac Methodo *artificiali* *benignæ* aggrediendi, *SIMPLICIO* propriam esse & in posterum fore existimandum est ; Ita ut quod olim *TULLIUS* de ævi sui vitis grassantibus, *Vitium* nem-

stigavit & in ordinem redegit, ut Latine consuetudini traditus dici possit, & idem Tyro, qui in gratiam *SIMPLICII VERINI* locum hunc explicavit, negare non audeat, sub homine illo *PAPA* latere *FORMULAM CONSENSUS*, & eo minus mihi dubium est, Virum Doctum naturale contra eam concepisse odium, quia silentio præterivit animadversionem meam, quod inter Orthodoxos etiam numeret *Universalitas*,

nempe esse *Temporis non Hominis*, nunc dici non possit, quin potius, *vitium esse Hominis, non Temporis*, quisque percipit. 2. Ideo & aliud mirum Lectori videbitur, quod sill. tali crisi responsum fecerim, verum ad id multa me moverunt; Cum Clarissimus Editor *Tempe Helv.* huicce in sua collectione spatium aliquod concesserit, id mihi argumento manifesto est, plures ea reputasse quæ mihi imputat *SIMPLICIUS*; Præterea quamplurimi sunt Lectores meam dissertationem præ manibus non habentes, quos inermes præcipitanter de ea iudicium laturos ex suis animadversionibus, uti ipse existimavit adversarius meus. Quod si rursus *SIMPL.* animum hunc, superbia ferocientem, furoreque insanientem, quem nuper exhibuit, prodere vellet, solus in arenam descendat, silebo. Vale igitur B. L. stylo nostro indulge, de rebus non de vocibus judica. *Multi enim hodie Latine, pauci Romane loquuntur.*



VI.

JOH. RODOLPHI
CRAMERI,*Theologi Tigur. Celeberrimi,*

VITÆ FATORUMQUE

Brevis Narratio. *

QUOD ad vitam, fata atque virtutes *Clarissimi Antecessoris* attinet, missis rhetoricationibus & undequaque quæsitis elogiis, ex prolixiore *Βιογραφία* ab ipso pie defuncto olim consignata, ea quæ ad institutum nostrum pertinent, in summam contraham, atque servato temporis ordine, quantum quæque mihi nosse datum est, narrabo.

Natus est autem *JOH. RODOLPHUS CRAMERUS*, nunc pie defunctus, Anno 1678. die 14. Februarii, *Elcovia*, Patre Viro admodum Reverendo *Joh. Jacobo CRAMERO*, Classis *Elcoviensis Camera-rio*, matre vero *Dorothea HULDRICA*. Jactis apud Parentem Linguae Latinæ & Græcæ fundamentis, 1691. Tigurum missus, hospitio & mensa usus *Avunculi*, Viri *Pl. Reverendi Joh. Jacobi HULDRICI*, *Canonici & ad eadem Sp. S. Pastoris*. Adjutus autem est *Cramerus* noster juvenis in studiis suis promovendis a fratre suo *JACOBO*, *Viro postea Clarissimo*, sed præmatura morte rebus humanis exempto.

Con-

* Excerpta hæc est ex *Clar. Successoris Joh. Jacobi ZIMMERMANNI* Oratione Inaugurali, pag. 26. sqq. Catalogum autem Scriptorum a *Cel. CRAMERO* in lucem editorum videre licet *Temp. Helv. T. II, p. 131-155, add. infra p. 160.*

Confilio optimorum Parentum & Amicorum Medicinæ vacare debuerat Studiis Noster ; at postquam inopina morte Parens 1693. decessisset, filius, fratri obtemperaturus, totum sese sanctioribus disciplinis tradiderat, atque in iis singulari studio atque animi contentione ita profecerat, itaque sese Reverendis Præsidibus probaverat, ut Anno 1699. in numerum V. D. Ministrorum fuerit receptus. Eodem vero anno cum fratre doctissimo, ad docendam Theologiam *Herbornam* vocato, ad nobile hoc optimarum artium ac disciplinarum Emporium commigravit. Hic per biennium substitit, ab ore fratris pendens, singulari cum fructu illius institutione publica & privata usus est, auditis etiam Cl. Viris, *Hildebrando, Florino, Kirchmeyero, Dukero & Schrammio*. Non leviter autem Nostrum turbaverat peracerba mors fratris optimi atque doctissimi, febris hæctica in ipso ætatis flore consumti, Tigurique Anno 1702. demortui.

Ipse interea, ut cursum studiorum absolveret, atque fratris olim datis monitis obtemperaret, majoresque in Antiquitatibus Hebraicis progressus faceret, relicta *Herborna Nassoviorum*, totius Belgii splendidissimam lucem, *Lugdunum Batavorum* contendit, atque ibi familiariter usus est Cl. Viris, *Triglandio, Markio, Witsio*, optime Nostro ob singularem diligentiam, fratrisque eruditionem & commendationem, cupientibus, **TRIGLANDIUS** inprimis fratris precibus motus effecerat, ut ædibus & institutione Cl. **SURENHUSII**, Prof. L. *Hebraicæ Amstelodamensis* uti posset, adhibito etiam ad hæc studia prosequenda *Rabbino, Isaaco Polono*, quocum aliquot tractatus Talmudis, adhibitis etiam Commentariis Gemaricis, evolverat, Salutaverat noster Amstelodami frequen-

rer doctissimos Viros, *Stresonem, van. Leuven, Alphenium, Limborchium, & Meibomium.*

Postquam autem *Amplissimorum* Gymnasii nostri *Procerum* Benevolentia *CRAMERUS* noster ad prosequenda studia Philologica eximium nactus fuerat stipendium, hortatus eum est Frater, tunc temporis adhuc in vivis, ut de specimine Hebraico edendo, atque *Amplissimo Magistratui* nostro ad gratam mentem testandam inscribendo, serio cogitaret. Cujus voluntati obsecundaturus noster, adhibitis in consilium Professoribus Lugdunensibus, ad vertendas *Constitutiones de Primitivis* seu *Hilcoth Bicurim*, notisque Philologicis illustrandas, animum adiecerat. Quem laborem per modum septem disputationum sub praesidio Cl. Virorum, *Triglandi, Markii, & Witsii*, additis ad singulas disputationes ἐπιμετρεῖς ex variis disciplinis depromptis, sumtibus *Academiae Lugduno-Batavae* edi curavit.

Postquam autem doctissimus Frater, ut diximus, praecoci nimium fato abreptus fuerat, *Amplissimi & Venerandi* Scholae nostrae *Proceres* absentem nostrum *CRAMERUM* in locum defuncti fratris substituerunt, demandata illi Linguae Hebraicae Professoris in Collegio Inferiori, quod Humanitatis vocant, provincia.

Audito hoc laeto nuncio *Noster* sine mora circa Junium Anno 1702. itineri sese accinxit, salutatisque, qui in itinere occurrebant, Viris Celeberrimis, insigni Eruditionis copia locupletatus, salvus & incolumis ad suos fuit in patriam delatus. Redux, oblato *Magnificentissimis Patriae Patribus* libro in Belgio, ut dixeramus, elaborato, d. 18. Septembris novum munus auspicatus est Oratione inaugurali, habita de *Philologis a Reformatione in Schola Tigurina Claris.*

Anno 1703. thori sociam sibi adjunxerat lectissimam fæminam, *Dorotheam WERTHMULLER*, ex quo conjugio illi aliquot liberi nati, quorum pars mature decessit, relictis duntaxat in vivis filia, nupta Viro Reverendo, *J. Georgio HIRZELIO*, Diacono ad eadem Sp. sancti Vigilantissimo, filioque Joanne Jacobo, numero V. D. Ministrorum ante annum adscripto, Viro Juvene modestissimo, & ad paternam gloriam citis passibus grassante.

Anno 1705. post discessum Cl. *Suizeri*, Professoris Theologiæ Heidelbergensis, facta, ut fieri solet, stationum mutatione, demandata fuit *CRAMERO* nostro Historiæ Sacræ & Profanæ docendi provincia, cui dignitati mox, ita volentibus *Utriusque Ordinis Amplissimis Præsidibus*, aliud officium adjunxerant, nimirum ut esset *Illustri Senatui Ecclesiastici Collegio ab Actis*, quo officio difficillimis temporibus per 13. annos singulari cum industria defunctus est.

Anno sequente 1706. Professionem Linguae Hebraicæ in Collegio Carolino ornare incepit, substituto in ejus locum *H. HIRZELIO*, Patre, Lingue nunc Græcæ Professore Celeberrimo, Canonico dignissimo, & hoc quidem tempore, Rectori Scholæ nostræ Magnifico. Hoc ipso autem anno ad emendandam & perficiendam *H. Altingii* Historiam Ecclesiasticam animum adjecit, quam etiam, ut & Cl. *Suizeri* Chronologiam ad suam usque ætatem magna cum industria perduxit.

Postquam autem per aliquot annos singulari cum diligentia, nec minore cum successu, demandatis sibi officiis vacasset, variisque Collegiis privatis & publicis non solum optimarum Literarum studiosos sibi devinxisset, sed inprimis *Amplissimis Præsidibus* sese commendasset, anno labentis Seculi 17. in Collegium Reverendorum Canoniorum fuit receptus, præstitaque

que fideliter opera Venerando *Joh. Jac. Lavatero*, *Patri*, *Theologiae Professori* Præstantissimo, sed animo & corpore tum temporis languenti, An. 1725. tandem post Clarissimi hujus Viri obitum creatus est *Veteris*, ut vocant, Testamenti Professor, cui dignitati Anno 1731. post obitum Cl. *Holzbalii*, gravissimum *Venerandi Canonorum Capituli Decani* munus adjectum, & denique mortuo Cl. *Hottingero*, Eidem An. 1735. in Professione *Theologica Novi Testamenti* successit.

At hi ipsi concatenati labores & honores, hæc ipsa munera atque onera, ut est cum rebus humanis comparatum, non parum animi, potissimum vero corporis, cujus fulturis animus sustinetur, vires attenuarunt atque fregerunt. Duo ferme anni sunt, cum externa corporis specie vigorem referente fortis tamen & lætus & alacer esse desineret; ex quo facile erat ad conjiciendum, intus latere, quod mortalitatem celeraret. Haud multo post manifestis indiciis proditum est, præstantissimum Virum non bona uti valetudine, & malo corporis habitu omnia alimenta corrumpi. Ipse sæpenumero, inter familiares, valetudinis adversa ita querebatur, ut quisque intelligeret, eum quotidie mori, nec pigre & meticulose, sed confirmato animo ultimis appropinquare. Testis etiam præter hæc *Meditatio Theologica* in egregia *Pauli II. ad Corinth. V: 1.* verba, ab Auctore in ipso languore conscripta & a nobis edita, cui aliæ insuper ejusdem argumenti erant, si per fata licuisset, addendæ. Sperabant equidem Boni omnes futurum, ut hac illacve medicina languentis vires refoverentur; at aliter Sapientissimo omnium rerum Moderatori visum. Posteaquam enim pauculos dies cum invalescente difficultate spirandi, quæ hydropem pectoralem prænuntiabat, colluctatus esset, pridie *Eidus Julias* placide, nil tale, qui ægroto adstiterant, opinan-

opinantibus , supremum peregrinationis diem explevit, vix dum LX. ætatis annum ingressus. *Fuit, Fuit* ergo *CRAMERUS* noster, longiore via, si quisquam alius, dignissimus; vocatus a summo totius Orbis Rectore ex tenebris ad splendissimam lucem, ad ærumnarum curarumque concatenatorumque laborum requiem, & cœlicolarum choris mistus, delicias a Jesu partas cœpit prælibare.

De virtutibus ipsius & eruditione ut prolixè disferam, necesse non est. Cum enim Vos omnes testes habeam, quanta cum diligentia, cura atque sollicitudine, spartam utramque exornarit; quos labores & molestias devoraverit; quot egregios libros scripserit; quanta eruditione, pietate, gravitate atque humanitate eluxerit; quam bene de Ecclesia nostra & Gymnasio nostro meritus fuerit; pluribus dicere nil attinet. Deo potius O. M. æternas dicamus grates, quod *CRAMERUM* Scholæ nostræ bono per plures annos concesserit, Eumque rogemus, ut tales semper nobis concedat Doctores, qui eruditione, pietate, morum gravitate cæterisque Bonorum Virorum virtutibus ornati, nobilitatique sint.



VII.

Nova Litteraria.

CUM jam ex aliquo tempore Celeberrimæ A-
cademiæ Helveticæ ex obitu Clarissimorum
Virorum, ut in novis literariis Sectionis
VIII. significavimus, tristes starent & attonitæ, ac-
cessit novus dolor ex morte Viri Admodum Vene-
randi atque Celeberrimi, *Joh. Rodolphi CRAME-*
RI, S. S. Theologiæ in Academia Tigurina Prof.
Primarii, atque Collegii Canoniorum Decani me-
ritissimi, qui prid. Eid. Julii placidæ peregrinatio-
nis suæ diem explevit, postquam per aliquod tem-
pus adversæ valetudinis assultibus fuisset conficta-
tus. Petiit autem tanti Viri memoria, ut ejus vi-
tæ factorumque prolixior nonnihil jamjam exhi-
buerimus descriptionem. Successor ipsi designatus
in Cathedra Theologica Vir Pl. Reverendus at-
que Celeberrimus, *Joh. Jacobus ZIMMER-*
MANNUS, plurimis jam editis in orbem litera-
tum ingenii & eruditionis haud vulgaris monumen-
tis celebris, Histor. Eccles. & Jur. Nat. hætenus
Prof. cui in Historia Ecclesiastica ab Amplissimis
Academiæ Tigur. Proceribus successor datus Cl. *Joh.*
Henr. HIRZELIUS, Fil. V. D. M. & Eloquen-
tiæ Professor. Ad vacuam vero sedem, quæ do-
cendo Jur. Nat. destinata est, vocatus Vir Rev. &
Doctiss. *Joh. Jacobus WTS S.*

Novi

Novi etiam in Academia Basileensi beate defunctis successores dati; atque exinde Antistitis dignitas collata Viro Pl. Venerando atque Doctissimo *Joh. Rodolpho MERIAN*, Pastori in Templo S. Elisabethæ dicato meritissimo. Ad Professionem V. Testamenti suis vocatus meritis Vir inclytus *Ludovicus FRET*, S. S. Theol. Doct. Ling. O. O. & Histor. Prof. cui tandem surrogatus in Professione Historiarum Vir Rev. & Clarissimus *Jacobus Christophorus BECKIUS*, V. D. M.

*Libri vel Dissertationes
prodire.*

1. Specimen Historico-Policum de institutis militariis Helvetiorum, quod Præsides *Joh. Rod. ISELIO* defendit *Joh. Petrus STUKELBERGER*. Basileæ 1737. 4. plag. 4.
2. Dissertatio Juridico - Politica de Jure Legatorum Libera Reipubl. Helvetiorum, quam præsides *Joh. Rodolpho ISELIO*, defendit *Emanuel FALKNER*, V. D. M. Auctor & Resp. Basil. 1737. 4to plag. 4.
3. Dissertatio Philosophica, de Judiciis Temerariis. quam Præsides *Petro RYHENERO*, Log. Prof. Ord. defendit *Petr. RAILLARD*. Basil. 1737. 4to plag. 4.
4. Thesum Philosophicarum Collectio 2. quam Præsides *Joh. Balth. BURKHARDO*, Rhet. Prof. defendit *Joseph. BURCKHARD*, Basil. 4to plag. 3. 1737.

5. Differtatio Philosophico - Politica, quam sub præfidio *Joh. Georgii ALTMANNI*, defendit Auctor *Joh. Jac. WOLFIUS*, V. D. M, Bernæ 4to plag. 9. 1737.
6. *Joh. Georgii ALTMANNI*, Differtatio Philologico - Exegetica de actis Apost. Pauli apud Ephesios, secunda, quam defendit Frid. Huldricus. Bernæ 4to plag. 4. 1737.
7. Examen de L'Essay sur l'homme de Mr. *POPE*, par Mr. *DE CROUSAZ*, 8vo Lausanne. Chez Bousquet. plag. 10. 1737. Exhibet hic liber refutationem Philosophiæ Leibnitzianæ, quam an viderit Poëta celeberr. Pope, valde mihi est incertum.
8. *Joh. Rod. CRAMERI*, Theologi dum viveret in Tigurinis Clarissimi, Meditatio Sacra in verba S. Pauli, quæ 2. ad Corinth. V : 1. Beatitudinem in Domino morientium veram ac certam demonstrat. Eam una cum annexis. Thesis Theologicis publice defendebat *Joh. Jac. Zimmermannus*, S. Theol. Prof. & Candidati seqq. Balth. Wolfius, Georg. Oerius, Casp. Ofyvaldus, Casp. Müllerus, Joh. Jac. Tschudi, Glar. Tiguri 1737. 4to pl. 5½.
9. Die Lieblichkeit der Wohnungen Gottes, vorgestellt in unterschiedentlichen Predigten, über den 84. Psalm, zusamt zwey Predigten, bey Anlaas der ledig- und wider besetzt- gewordenen Oberst- Pfarr- Stell, über den 95. Psalm, gehalten von *Johann Baptist Ott*, Archidiacon und der Stift zum Grossen Münster, Zürich bey *Joh. Heinrich Bürkli* 1737. 8. 10. Bogen.

10. Grund-

10. **Grundliche und Schrifftmäßige Abhandlung des VIII. XI. und XII. Capitels der Epistel St. Pauli an die Römer, wie selbige in öffentlichen Predigten vorgetragen, und nun auf Begehren dem Druck übergeben worden, von Johann Heinrich Frieß, Pfarrer der Kirch bey St. Peter, Zürich, bey Johann Heinrich Bürkli, 1737. 4. 5. Alphabet.**
11. **Joh. Jac. REUTLINGER** *Grammatica Germanico - Latina major. Oder grundliche Anweisung die Art der Latein. Sprach aus und nach der Teutschen glücklich zubegreifen, und selbige auf eine anständige Weise zugebrauchen; also abgefasst, daß das meiste in Teutschen Haupt: Regeln, Anmerkungen und Exceptionen auf das deutlichste und einfältigste vorgetragen; Mehrere Notæ samt der Prosodie in Lateinischer Sprach beygefügt, und alles mit vielen und klaren Exemplen aus den Auctoribus Classicis erläutert und bekräftiget wird; samt dienlichem Register: Für die Schul zu Zürich ausgefertigt, Jussu & Auctoritate Superiorum. Zürich, bey Heidegger und Comp. 1737. 8vo 2. Alph.*
12. **Davidis LAVATERI**, *Philos. Prof. Ord. Theologiæ Naturalis Pars Secunda, sistens brevem delineationem Attributorum Divinorum. Respp. Balthasare Wolfio, Georg. Oerio, Henr. Hottingero, Casp. Osvaldo, Dav. Schmuzio, Jac. Schmidlino, Abrah. Rordorfio, & Jac. Tschudi, Glaronensi, Tig. 1737. 4to pl. 3½.*

13. **Des Freyherrn von Lant Satyrische** und sämtliche übrige Gedicht nach Herrn Königs Lesarten / auch mit desselben abgekürzten Historischen Erklärungen ; samt einer Vorrede von der Dicht = Art des Verfassers , und den Quellen des Vergnügens , das aus seinen Gedichten fließet. Zürich, in Verlag Hans Ulrich Dänglers , 1737. 8vo 9. Bogen.
14. **Jacob Lauffers**, Profess. Eloq. & Histor. genaue und umständliche Beschreibung Helvetischer Geschichte, aus den bewährtesten Verfassern der alten und neuen Historien und darzu dienenden Urkunden zusammen getragen , Zwölff er Theil / von 1600. bis zum Friede mit Savoyen. 1615. Zürich, verlegt Conrad Orell und Comp. 1737. 8vo ein Alphabet.
15. **Joh. Jacobi ZIMMERMANNI**, S. Theologiae Profess. Oratio de præcipuis Virtutibus , quibus S. Theologiae Professore ornatum esse oportet ; dicta a. d. 10. Sept. 1737. quum Professionis Theologicae Munus in Athenæo Patrio solemniter aspiciaretur. Accessit brevis Vitæ Fatorumque *Joh. Rodolphi CRAMERI*, Antecessoris Clarissimi, Narratio. Tiguri, ex Officina Heideggeriana, 4to plag. 5.
16. *Ejusdem* Disquisitionis Historicae Theologiae de Visionibus , quæ primis quatuor post Christi & Apostolorum excessum Seculis , Christianis quibusdam contigisse dicuntur ; *Pars prior.* Respondente Joh. Casp. Pfenningero , V. D. M. Assumente

mente Joh. Henr. Gossveilero, S. Theol. Stud.
postridie Synodi Autumnalis. Tiguri, ex Officina
Gelsneriana, 1737. 4to pagg. 59.

*** ** * * * * *

INDEX

Sectionis Nonae.

- I. *Ludovici BURGETI* Dissertatio de vero atque genuino Juris Naturalis studii usu. pag. 9.
- II. Historia Vitæ, Operum & Obitus Viri Clar. *Jacobi Christophori ISELII*, S-S. Theol. & in Academia Basil. Prof. Publ. p. 42.
- III. *Joh. Conradi FUESLINI* Commentatio Philologico - Critica in Rom. V: 13. p. 61.
- IV. *Joh. Georgii ALTMANNI* ΠΕΝΤΑΣ Observationum Græcarum ad quædam loca Novi Foederis. p. 76.
- V. *Ludovici COCHETI*, Responsio ad *Simplicii Verini* Animadversiones Crit. in Dissertationem de Systematibus Orthodoxorum, Remonstrantium ac Socinianorum, Tempe Helvet. Tom. II. Sect. 2. pag. 311. contentas; Additæ sunt ejusdem *Simplicii VERINI* Notæ ad hanc Responsionem. p. 96.
- VI. *Joh. Rodolphi CRAMERI*, p. m. Vitæ Fatorumque brevis Narratio. p. 152.
- VII. Nova Literaria Helvetica. p. 158.


One

TEMPE HELVETICA,

Dissertationes atque Observationes
THEOLOGICAS, PHILOLOGICAS,
CRITICAS, HISTORICAS,
EXHIBENS.

Tomi Tertii

Sectio Secunda.



TIGURI,

EX OFFICINA HEIDEGGERIANA.

M DCC XXXVIII.



V I R O

Speſtatiffimo, Nobiliſſimo,

Honoratiſſimo,

MARCO MORLOT,

Illuſtriſſimæ Reipublicæ Bernenſis

Senatori Ordinario.

Collegii Speſtatiffimi, quod Mercaturæ &
Nundinationi præeſt, Præſidi Meritiſſimo.

Academiæ Bernenſis

Atque

Laufannenſis

Curatori Benevolentiffimo.

Literarum atque Literatorum

Mæcenati Optimo.

Hanc Sectionem Tomi Tertii

Secundam

MISCELLANEORUM

Theologico - Philologico -

Criticorum

Eo quo par eſt cultu

Offert & conſecrat

J. GEORGIUS ALTMANNUS,



I.

MARCI MORLOTI*
DISPUTATIO THEOLOGICA
DE
IDOLOLATRIA
GENTILI.

Argumentum.

§. I. Necessitas indagandi Veterum Idololatriam ad plurima loca S. Scripturæ exponitur. §. II. Origo Idololatriæ ad posteros Chami refertur. §. III. Ab
M 3 his

* Scripserat hanc Dissertationem Vir Nobilissimus atque Spectatissimus, cui propter insignia in Rempublicam & orbem literatum merita hanc Sectionem Sacram fecimus, anno 1688. cum in Belgio sub ductu Celeberrimorum Virorum, præsertim autem *Herm. Witsii*, animum suum elegantissimarum literarum cognitione imbueret. Cum autem in paucissimis pagellis omnia ea Vir Amplissimus exhibuerit, quæ alii in magnis voluminibus vix tradere potuerunt, eruditam hanc Dissertationem, cum in paucorum hodie sit manibus, hoc loco merito recudendam esse existimavimus. J. G. Altm.

his descendit Idololatria ad Chaldaeos, Ægyptios & Arabes, illaque à Phœnicibus, commercium ubique exercentibus, in varia loca fuit deportata. §. IV. Initia Idololatriæ fuerunt rudiora, nec statim ad illum devenit cultus & superstitionis gradum. Solem primos idololatras adorasse probatur. §. V. Ritus antiquissimorum idololatriæ exponuntur. Primus usus fuit templorum & altarium. §. VI. Mox lucorum. §. VII. Sequebatur adoratio & inter numina Heroum relatio. §. VIII. Plurima ex historia sacra in cultum gentilem translata fuisse, demonstratur. §. IX. Quænam fuerit idololatria in colendis Bæalim. §. X. Devenit tandem idololatria ad ipsa animalia, quod probatur, & productis exemplis asseritur & explanatur. §. XI. Quomodo Deos suos paulatim etiam in forma animalium, hircorum præsertim, coluerint, exhibetur. §. XII. Ægyptiorum idololatria latius exponitur. §. XIII. De cultu Apidis & vituli aurei differitur.

§. I.



Pythagoreorum illud, *μη ειναι προς παντας παντα εντα*, temere infregisse censebantur, quotquot curiose nimis de Diis, ea quæ celanda essent, effutierunt. Hinc in Homerum ac Hesiodum tetricam hanc sententiam ferre Pythagoras, referente divo Hieronymo, non dubitavit, se vidisse Hesiodi animam, columnæ æreæ adstrictam, & Homeri, ex arbore suspensam, propter ea quæ de Diis dixerant. Ægyptii pervetusti illi mythologi, eâ sanè prudentiæ famâ apud cæteras gentes inclaruere, quod mysteria sua miris ambagibus involvere nossent, ne scil. incautum vulgus profanis suis oculis ea temeraret.

raret. Hinc Plutarchus, in libello de Iside & Osiride, ubique Sphinges ante templorum limina collocatas asserit, mysticis scilicet animantibus mystica sua sacra indigentes. Nimis curiosum, ac beatis nostris temporibus parum conveniens, etiamnum forsitan quis clamabit, de antiquis Gentilium Deastris differere, potius sepeliendis quam in medium protrahendis. Cui adstipularer, nisi reclamarent sacræ pagellæ, quæ quidem veterem *ειδωλοπώαν*, non ita siccò prætereunt pede, quin nonnunquam idolorum interserant nomina, ac idololatricos perstringant ritus. Hinc vox cantantium Exod. 32: 18. item com. 6. *sedit populus ut manducaret ac biberet & surrexerunt ut luderent.* Ritus verò hos in Ægypto in honorem Apidis Memphitici, vel Mnevis Heliopolitani, usitatos fuisse, cuius vel leviter in antiquitatibus exercitato notum est. Hinc etiam nomina Baal, Baal - Peor, Baal - Berit, Teraphim, & alia satis frequentata in sacro codice; nisi itaque vel otiosi, vel negligentes, scripturarum lectores velimus esse, omnino nostrum est scire, quid per nomina hæc Spiritus Sanctus intelligat. Hac ergo de materia in præsentiarum agere decretum est, in quantum & tenue ingenium, & angustæ permittunt pagellæ.

§. II.

Diaboli foetus idololatria, diluvii undis non ita potuit extingui, quin mox renasceretur, ac renatus majora quam antea acciperet incrementa; non uno tamen partu est in lucem editus, nec unam tantum habuit matrem. Indubium est, Ægyptios, è Chami posteris ortos, albo ipsius progenitorum jure merito inscribi posse: id tradunt fere quotquot sunt Auctores profani. Sic Herodotus de Ægyptiis in Euterpe, *βωμῆς καὶ ἀγάλματα καὶ νηὲς, θεοῖσι ἀπονέμει σφέα πρῶτες, καὶ ζῶα ἐν λίθοις ἐγγλύφαι.* h. e. *Altaria, & imagines, & delubra, primos (Ægyptios scil.) Diis tribuisse, nec non pri-*

mos animantia lapidibus insculpsisse. Sic Diodorus Siculus Biblioth: Hist. Lib. 1. ἐπεὶ δὲ κατὰ τὴν Αἰγύπτου θεῶν τὴν γενέσιν ὑπάρχει μυθολογῆναι; *Siquidem in Aegypto Deos natos esse fabulantur.* Lucianus itidem de Dea Syria, πρῶτοι μὲν ἀνθρώπων, &c. *Primi hominum quos scimus Aegyptii, dicuntur Deorum percepisse scientiam, templa statuisse & lucos.* His non postponendi sunt Zabii, vel Zabæi, vetustissimi illi idololatræ, de quibus multa habet Maimonides More Nevoch. Part. 1. Cap. 29. *Notum est, Abrahamum patrem nostrum educatum esse in fide Zabiorum, qui statuerunt, nullam esse Deum, præter stellas: dicunt stellas esse divinas, & solem esse Deum magnum, ita quoque dicunt, reliquos quinque planetas esse Deos, sed duo luminaria majores, &c.* Per Zabios autem qui populi intelligendi sint, non facile dici potest; verosimile est Orientaliores populos, quales fuere Chaldæi, Assyrii, Arabes, hoc generali vocabulo indigitari; cum certum sit, has gentes jam ab antiquo idololatriæ deditas ac immerfas fuisse. †

§. III.

Sicut Chaldæi, Aegyptii, Arabes, idololatriæ sunt Authores, sic Phœnices illius dispensatores, quique eam longe lateque per terrarum orbem propagaverunt.

† Quinam sint Zabii, vetus & difficilis est, ut recte omnino animadvertit Vir Amplissimus, apud eruditos quæstio; hinc etiam Viri Celeberrimi in diversas abiverunt de Zabiiis sententias; hanc difficultatem agnoscit *Spencerus in Prefatione Lib. 2. de Legib. Judæor.* Frequens equidem Zabiorum mentio apud Scriptores Arabes, altum autem apud Græcos & Romanos silentium. Quinam autem per Zabios sint intelligendi, omnium optime nobis exposuisse videtur *Hottingerus Hist. Orient. Lib. 1. Cap. 8. p. 170.* quem etiam sequitur ipse *Spencerus l. c.* hoc solo discrimine, quod hic putet, limites Zabiorum latius esse extendendos, quam putavit *Hottingerus*; verba *Spenceri* hæc

runt. Phœnicum gens etsi non sit obscura, nomen tamen incertæ ac obscuræ originis esse, jam dudum a Viris Doctis observatum est. An autem sic dicti fuerint, quasi בני ענף, eo quod inter Cananæos Ana-keorum familia omnes alias & corporis mole, & virtutis splendore superarit, quod eruditissimo Bo-charto placet, in suo Canaan Cap. 1. sive Phœnices quasi rufi, Φοινίξ enim & purpuram & rufum signifi-cat, adeo ut Φοινίξ idem sit quod ἐρυθρός, ac respon-deat Hebræo אדום. Sic autem vocati fuerint Tyrrii, eo quod e mari rubro, ita ab Idumæis illud occu-pantibus dicto, primum solverint, quod Gerardo Vossio, libro de idololatria gentili 1. Cap. 54. arridet: sive tandem Phœnices, quasi בני נסים, eo quod profligati Cananitæ ab Israhælitis, fuga salutem quærere coacti fuerint, hinc eorum posterii, qui se in munita loca, qualia fuere Tyrus & Zidon, ut bona sua tueri pos-sint, receperunt, filii fugientium vocati fuerint: quæ non minus ingeniosa Etymologia nuper a Clarissimo Vitringa, Professore Franequerano, data est; hic nec nostrum est determinare, nec disquirendi locus. No-bis sufficit, extra omnem dubitationis aleam esse, Phœnices mortalium primos mari potitos, rei nau-

M 5

ticæ

sunt. Hottingerus aliique, Zabios illos eosdem fuisse cum Sabiis & Sabæis, sentiunt, quia eorum nomen haud multum abludit à Zabiorum nomine. Ego ipse nomine illo, sensu la-tiori sumto Veteres Idololatrias omnes, Chaldaeos, Arabes, Sabæos, hoc nomine intelligendos esse opinor. Sub finem au-tem Cap. 1. Lib. 2. concludit Spencerus, quod per Zabios intelligendi sint Orientis populi plurimi, & quod nomen Zabiorum fuerit commune pluribus, quia tam late fuerit assumptum, ut nomen Chaldæorum, vel Ægyptiorum, quo titulo gaudebant omnes artis magicæ asseclæ. Pro-luxe autem de Sabiis dicere, esset actum agere post *Spencerum Lib. 2. Cap. 1. &c. J. G. Altm.*

ticæ operam dedisse, ac colonias undique terrarum emisisse, hinc una cum ritibus Orientalibus, cultum idololatricum, in ipso Orientis sinu ortum, in regionibus occidentalioribus propagasse. Περσέων μὲν οἱ λόγοι Φοινικᾶς Φασὶ γενέσθαι τῆς διαφορῆς αἰτίας, &c. *Persarum sapientes dicunt, dissensionum Authores extitisse Phænices, qui a mari, quod rubrum vocatur, in hoc nostrum proficiscentes, continuo navigationibus incubuerunt; inquit Herodot. Lib. 1. ab init. Pompon. Mela Cap. 12. Lib. 1. Phænices vocat Solers hominum genus, literas & literarum operas, aliasque artes, maria navibus adire, classe conflare, imperitare gentibus, regnum præliumque commentos. Hinc Græci, ac penè omnes populi occidentales, Phœnicum ope, orientalium literas, artes, sacra, etsi non nihil interpolata, & quicquid ingenii humani sapit acumen, acceperunt. Cadmum Phœnicem fuisse, ac ex Cadmonæis, de quibus Moses Gen. 15: 19. clarissimè probat Celeberrimus Bochartus in suo Phaleg. Cap. 19. illum verò cum Phœnicibus, doctrinas ac literas non antea usitatas Græcos docuisse, dicit Herodot. in sua Terpsich οἱ δὲ Φοινῖκες ἄτοι οἱ σὺν Κάρδιω ἀπικόμενοι, ἐσήγαγον διδασκαλίαν, καὶ δὴ καὶ γράμματα ἐκ ἑόντα πρὶν Ἑλλήσι ὡς ἐμοὶ δοκεῖ. h. e. Phænices illi, qui cum Cadmo venerunt, introduxerunt doctrinas, ac literas, quæ ut mihi videtur, non antea Græcis in usu fuerunt. Sed ne nimis à scopo abripiamur, hæc prælibasse sufficit.*

§. IV.

Ac porro notandum, idololatriæ initia fuisse admodum rudia: nec enim mortales tantam & vix numerabilem primitus Deorum turbam cultu religiosò prosequuti, qualem processu temporis Hierophantæ, ac Diaboli satellites, humano generi obtruserunt. Magnificentia ac splendor templorum aurò & argentò micantium, nimis etiam mores excultos ac politius redolet ingenium, quam ut primis ac simplicibus post

post diluvium sæculis adscribi possit ; simplici nimirum ætati competit simplex cultus divinus. Hinc divinitatem primi mortales sensu ac usu metientes, eos haud dubie primum in Deorum numerum receperunt, quos optime de se meritos, ac quorum ope non parum commodi ac boni ad se provenire experiebantur. Sic Soli, magno lucis dispensatori, gratissimam lucem ac dici vicissitudinem deberi, quotidianâ edocti experientiâ, omnium primo honorem divinum haud dubie exhibuerunt, cui mox lunam ac cætera corpora cœlestia, tanquam Θεὸς βυλαίης, *Deos Consiliarios*, (ut Seldenus de Cultus Extr. prim.) sive inferioris ordinis, adjunxere. Cum omnium penè gentium animis infixum esset, eorum suavi influxû lætas fieri segetes, agros fœcundari, arbores progerminare, ac vineta uberes proferre fructus. Sanè hæc ipsa ratio est, cur cultui solis ac lunæ (quam מלכת השמים vocat Jeremias) Israëlitæ adeo mordicus adhæserint, quam optimè observat Pater R. David Kimchi, quem citat filius ad Caput 2. Hoseæ, in hæc verba, : ואחרו בַּאֲהָבָה : ואֲזַל פִּי : אחרי השמש חיריה וחכוכים שהיו עוברים להם וכוונתם היתה כי הם נותנים מזונם ספוקם וכול *h. e. pater meus p. m. explicat, post solem, lunam ac stellas quas coluerunt, existimantes, sibi ab iis suppeditari cibum ac necessaria sua.* Adeò ut probabile sit, solem ac cætera corpora cœlestia, prima cultûs idololatrici objecta fuisse ; quod & ipse magnus Rambam norat, etsi malè Henosum inter idololatras ponat, delusus scil. sinistrâ interpretatione verborum Genes. 4 או הוּחַל לְקָרָא בִּשְׁם יְהוָה. Verba ejus sunt in Libr. de Idol. Gent. אמרו האל ברא כוכבים אלו והגלגלים להנחין את העולם ונתנם במרום וחלק להם כבוד, והם שמשים משמשים לפניו : ראויים הם לשבחם ולחלוק להם כבוד וכו' : *h. e. dixerunt, siquidem Deus creavit luminaria illa ac sphaeras ad regendum mundum, & posuit illa in altum, & tribuit illis honorem, &* ipsius

ipsius sunt ministri ministrantes coram ipso, conveniens est et illa laudamus, & honorem iis tribuamus, &c. Hoc & Diodori Siculi calculo comprobatum est, cujus in libro I. Bibl. Historiarum hæc sunt verba. Τὸ δ' ἐν κατ' Αἰγυπτίον ἀνθρώπων, τὸ παλαιὸν γενομένης, ἀναελέφαντας εἰς τὸν κόσμον, καὶ τὴν τῶν ὄλων φύσιν καταπλαγέντας, καὶ θαυμάσαντας, ὑπολαβεῖν εἶναι δύο θεοὺς αἰδίδας τὴ καὶ πρώτας, τὸν τὴ ἥλιον, καὶ τὴν σελήην. h. c. *vetustissimi in Ægypto mortales mundum supra se spectantes ac omnium rerum naturam demiratos, putasse duos esse æternos ac primos Deos, solem scilicet & lunam.* Hinc Deus rigido admodum præcepto hæc idololatriæ objecta, in qua præ aliis malè sanum ingenium humanum maximè pronum esse videtur, profligata voluit. Deut. 4: 19. *ne fortè tollas oculos in cælum, & videns solem, lunam, ac stellas, cum omni exercitu Cælorum, impellaris, והשתחיייתָ ac incurves te coram illis, ac colas ea.* Ad quem locum R. Aben Ezra notat: *השמש והירח שהם המארים הגדלים Sol & luna, quia maxima sunt luminaria h. c. quæ maximè in sensus incurruunt, ac ad quorum cultum homo proclivis est.* Paulò post addit, *ne impellaris בִּי יֵשׁ לְכוֹל עִם וְעַם כּוֹכַב יִדּוּעַ וְכֵן יֵשׁ מִזֶּל לְכֹל עֵר וְעֵר.* Quoniam una quæque gens colit peculiare suum astrum, una quæque urbs peculiarem planetam: quod verum esse fatebitur quivis, cui non ignotum, sicuti cœlestium corporum cultus primitus, sic dein generaliter, apud omnes penè gentes locum invenisse. Quis enim nescit, solem ab Ægyptiis sub Osiridis nomine (non unum tamen tantum Numen hoc nomine Ægyptii indigitarunt) cultum fuisse? Phœnicibus ac Syris, sub Adonidis involucro, summâ etiam in veneratione erat. Adonidem enim Phœnicibus eundem esse qui Ægyptiis Osiris, notat Celeberrimus Præses in suis Ægyptiacis pag. 67. Cujus ἀφανισμὸν sive recessum in Mense Junio deflebant. Hinc idem Adonis Hebræis *דִּמְנָה* dictus, de quo Ezechiel Cap. 8: 14. infanarum

narum muliercularum describens planctum à Deo in spiritu ipsi monstratum. Pariter מולך, etsi מלך בני אמון *Abominatio filiorum Ammon*, 1. Reg. Cap. 11: 7. vocetur, non tamen idolum solis Ammonitis proprium, sed & cæterorum Orientalium, putà Assyriorum, Chaldæorum, numen fuisse, quo solem præcipuè in simulacro coluerunt, eruditè à Doctissimò Spencerò observatum est Cap. 1. lib. 2. de ritibus Hebræorum: quem τεκνοθυσία placasse ac lustratione igne factà, ejus sacris liberos initiassè, non uno ex locò scripturæ sacræ patet. Hinc cum eundem fuisse cum Saturno, quem horrendâ liberorum immolatione cultum fuisse constat, etsi non satis firmâ conjecturâ, quidam existimarunt. Sic Persarum numen Solem fuisse omnes norunt, Massagetarum itidem Deum, & quidem solum, tradit Herod. lib. 1. θεῶν δὲ μᾶλλον ἥλιον σέβονται, τῷ θυσιῶσι ἱππικῶν. Pariter Lunam penè ab omnibus Orientalibus, Ægyptiis sub Ifidis, Zidoniis Astartæ, Persis Mitræ, Assyriis Militæ, Arabibus Alilat, Babyloniiis Veneris nominibus, cultam fuisse, probat Seldenus in suo de Diis Syris libro. Cæterorum verò Astrorum cultum in Ægypto, Chaldæa, Persia, viguisse, apud omnes in confesso est; ut hinc pateat, quàm longè latèque, processu temporis, cœlestium corporum cultus fuerit diffusus. Itaque ne populus Israëliticus in sacra lunæ, cui primi quique Mensis dies apud Idololatrias sacri erant, rueret, Deum Neomenias instituisse Spencerus hariolatur, quibus detinendo domi populum suum ac sacris suis occupando, cavit, ne sacris Gentilium, ubique receptis, ex occasione illaquearetur.

§. V.

Sed ut in viam redeam, simplici cultu ac non ridiculo, variisque modis fraude Diaboli interpolatò, qui sequioris demum est ævi, antiquiores gentes,

tes, in Diis placandis ac propitiis sibi reddendis usæ sunt. Inter vetustissimos colendi ritus, illum qui Hebræis השתחוה, quod propriè manum ori capite inclinato admovere significat, non immeritò ponit Seldenus. ferè ab initio proleg. Hinc Job in Apologia suâ adversus amicos, *si adspexi lucem cum splendet*, *וְתִשָּׁק יָדִי לָפִי* *si manus mea deosculata est os meum*, R. Aben Ezræ glossa ad hunc locum hæc est: *ממני: ידי לפי עבודה זרה כי רובי הקרמונים קדם באו הנבאים היו עובדים* *h. e. hic ritus est Idololatriæ species: quia ante prophetarum adventum duo luminaria plerique Orientalium sic colebant.* Pariter multò ante templorum usum, *במות* Excelsa, editiora loca, colles, Antiquos idololatræ sacrificiis offerendis, precibus fundendis, ac cultui sacro peragendo, præ aliis elegisse, eo magis credibile est, quod tempore Israëlitarum usus eorum ubique ferè invaluerit. Persuasi nempe erant, preces ac vota eò citius à Diis superis exaudiri, quo cœlo propiores essent. Eandem ob rationem Diis inferis posteriori ævo sacra facturi, humiles deligebant aras, ut minus a Diis his, quos in locis subterraneis sedem habere fabulabantur, remoti, eò facilius gratiam ac favorem eorum aucupari possent. Morem priorem apud Persas usitatum fuisse, notat Herod. lib. 1. *αγάλματα μὲν καὶ νῆες, καὶ βώμους ἔκ ἐν νόμῳ ποιεῖντες &c.* *imagines, templa, altaria, nulla secundum eorum legem constituunt, solent Jovi, ascendentes altissima montium, sacrificia offerre.*

§. VI.

Lucorum usus, qui Hebræis אֲשֵׁרִים dicuntur, non minus antiquus est: quod rursus Seleni suffragiò confirmatur, Cap. 2. Syntag. 2. Morem hunc antiquissimum lucos aut arbores frondosas Diis consecrandi, ubique in Oriente receptum processu temporis fuisse, ex frequenti mentione Script. S. colligere facile est: imò non intra Orientis terminos substituisse, sed

sed in Europam penetrasse, ac inter Græcos & Romanos usitatum fuisse, certum est. Hinc nomina, *Diana Nemorensis*, *Jupiter ἐνδεδεσος*. Germanis nostris item olim familiarem fuisse, docet Cluverius lib. 1. German. antiquæ Cap. 54. Nec mirum est, Gentes plerasque morem hunc in deliciis habuisse, cum luci obscuri in regionibus præcipuè Orientalibus, ubi omnia plerumque æstu ac solis ardore torrentur ac arcescunt, non potuerint idololatriis non esse gratissimi: utpotè qui amœnitate suâ (erant enim plerumque consiti ex Cedris, aliisque speciosis arboribus) oculos plurimùm pascebant, ac umbrâ suavi, æstu laborantes, refrigerabant. Iisdem sanè illecebris populus Israeliticus illectus, lucos, ac עץ רענן lignum viride, adeò deperibat, ut posthabito Dei præcepto Deut. 16: 21. in hunc morem laxatis habenis quâvis datâ occasione rueret. Hinc, Jud. 5: 7. *servierunt Baalim* אֲשֶׁרֹת בָּאָל. quanquam hoc in loco per אֲשֶׁרֹת ex collat. Jud. 2: 15. intelligi possit, sic 2. Paral. Cap. 15: 16. Jerem. 2: 20. Ezech. 6: 13. &c.

§. VII.

At in corporum cœlestium cultu non substitit animus mortalium, ad idololatriam proclivis, sed mox accessit Heroum ac Baalim cultus, cujus non una fuit causa & ratio. Qui beneficiis humanum genus obstrinxerunt, vel re præclare gestâ, vel inventô quô multum commodi in homines redundaret, eorum memoria non potuit non esse posteris charissima: hinc monumenta ad nomen ab interitu vindicandum erecta, accesserunt anniversaria festa, eorum virtutibus ac insignibus gestis celebrandis instituta, ac tandem processu temporis, augeſcente veneratione, in Deorum numerum referebantur. Hoc Diodorus confirmat Bibl. Hist. libr. 1. αἰσας δ' ἐκ τῶν ἐργείων γενέσθαι φασιν ὑπάρξαντας μὲν θνητοῖς, δια δὲ σύνεσις καὶ κοινὴν ἀνθρώπων ἐνεργεσίαν τελευτῶντας τῆς ἀθανάτου &c. Sed

alios

alios esse præter hos, terrestres Deos dicunt, naturâ quidem mortales, sed mentis solertiâ, ac propter beneficia in homines collata, ad immortalitatem evectos. hinc paulò inferius Ἡφαίστιον sive Vulcanum, ab Ægyptiis summo in honore habitum propter ignis usum mortalibus commonstratum innuit: Isidem ac Osiridem, ob agriculturæ ac aliorum egregiè repertorum beneficia: *Hermetem sive Mercurium*, propter ingenii perspicacitatem, litterarum ac blandæ orationis cultum.

§. VIII.

Sed & traditio corrupta, fabulis referta, non minima fuit Heroum apotheoseos causa. In Gentilium enim sacris, antiquæ veritatis haud pauca, licet obscura, deprehendi vestigia, à Doctis jam dudum observatum est: in Saturno Noachum latere, perquam eleganter ostendit jam sæpè laudatus Bochartus tere ab initio sui Phaleg. Quem etiam cum Abrahamo à Sanchuniathone scriptore antiquissimo confusum fuisse, probat Celeberr. Præses in suis Ægyptiacis; Jovis itidem Hammonis, cujus apud Ægyptios, Thebanos maximè, venerandum erat nomen (secundum illud Lucani:

*Quamvis Ethiopum populis, Arabumque beatis,
Gentibus atque Indis, unus sit Jupiter Ammon;*)

cuique oves sacræ erant, non aliundè petenda est origo. Ex חמ Hammon, & aspiratione ablatâ, αμῶν factum esse, quis est qui non videt? Chamo ac posteris Ægyptum cecidisse indubium est, ex Genes. 10: 6. à quo forsitan χημία denominata est Ægyptus, ut Plutarchus habet in libro de Iside & Osiride, Ægyptum in sacris Isidis χημία vocari, nisi illud malis à חם derivare, quod calorem, ac solem dicit, eò quod Ægyptus Zonæ torridæ maximè propinqua, & partim subjacens, æstui ac solis calori obnoxia sit. Sic ex מֶצְרַיִם Chami filio, suum Osiridem majorem Ægyp-

Ægyptios fabricasse, Vossius de Idol. gent. Cap. 27. lib. 1. vult. Cujus tamen conjectura mihi non satis firma videtur: cum מצרים, sicut & כוש ac alia, non tam sit filii nomen, quàm gentis ac nationis a Chamo oriundæ, quod a Bocharto non semel observatum est. Multo verosimilius, Osiridis ac Typhonis fabulas, plurimum historiam Mosis ac Pharaonis redolere, probavit Bochart. in Hieroz. lib. 2. Cap. 34. cum præsertim Typhonis filii, Hierosolymus & Judæus, de quibus Plutarch. in Isid. nimis hoc manifeste indicent: non quidem quod Osiris ac Typho sint Mosis ævo recentiora numina, cum antiquissima Ægyptiorum esse constet, uti probat Clariss. Præses in Ægypt. libro 3. sed quod ex corrupta traditione, ea quæ Mosis conveniunt suo antiquo Cacodæmoni tribuerint, ac in tantum Fabulam auxerint; gesta enim (quod hic notare juvat) Deorum suorum adeo interpolarent ac intorserunt mythologi, ut tandem quid per Numina illa intelligerent ipsi nescirent. Varias de Iside, Osiride, Typhone, Ægyptiorum hariolationes, legat curiosus, si libeat, in Plutarchi hac de materia composito libro, ac in Diodoro. εἰσὶν οἱ λέγοντες, inquit Plutarch. κατ' Ἀιγυπτίους νῦλον εἶναι τὸν Ὀσίριν, Ἰσιδι συνόντα τῇ γῇ, τύφωνα δὲ μὲν θάλασσαν, εἰς ἣν δὲ Νεῖλος ἐμπέπων ἀφανίζεσθαι. *Sunt qui dicunt apud Ægyptios Nilum esse Osirim, qui cum terra, quam Isis designat, coeat, mare verò esse Typhonem, in quod Nilus incidens absorbetur; hinc τὸν ἄλλα Τυφῶνος ἄφρον vocitant. Sunt vero alii qui Osirim ἥλιον εἶναι λέγοντες, Osirim solem esse dicunt, ac Isidem lunarem orbem. Sunt vero alii qui facultatem humectantem Osirim esse ajunt, ac exsiccantem Typhonem, & quid non? Quis itaque, in tantâ opinionum varietate, divinare poterit, quid proprie Ægyptii per suum Osiridem indigitare voluerint? Verosimile est, ut jam notatum, sub Osiridis involucro non unum tantum Numen illos coluisse, at præcipue Solem ac Nilum,*
Tom. III. N qui

qui Hebræis שִׁיחור dictus, Esaj. 23 : 5. &c. quod paululum mutatum ac inflexum, Osiridis nomen parere potuit : si quidem Doctorum non fallat conjectura. Sic sub Typhonis nomine infausti ac diri quidvis execratos esse. Atque his tandem varias ac peregrinas ita affuisse historias, ut vix quid nominibus hîsce intellectum velint ipsi scirent. Ea etiam quæ Mercurio tribuuntur, Canaani ; quæ Baccho, Nimrodo apprimè conveniunt. Bacchus enim vini patronus celebratur, ac vitibus præsidere creditur : quam belle hæc in Nimrodum, ut alia taceam, cadunt ? Qui cum Babylonem condiderit, ubi vinum præstantissimum, non immerito ejus inventor, ac patronus, apud Ethnicos mythologos audit. Adeo ut ex dictis videre sit, ex corruptione veræ historiæ ac traditionis, tanquam ex putrida radice, non paucos progerminasse Gentilium Deastros. Sed ne nimis his inhæream, alio me convertito,

§. IX.

Inter Gentilium Baalim, in scriptura memoratos, celebris est בעל פעור, Baal-Peor, Moabitarum Numen, de quo Num. 25. וַיִּצְמַר יִשְׂרָאֵל לְבַעַל פְּעֹר. & *adjunxit se Israël Baâl - Peori.* De eo non eadem omnium est sententia. R. Selomo Jarchi in hunc locum commentatur. על שם שפוערים לפניו פי הטבעת ויוצאיו *h. e. Sic dictus eo quod coram ipso distendebant podicem, ac educebant stercora, hic erat ipsius cultus.* Multi itaque Baal-Peor Numen aliquod obscœnum, quodque ritibus impuris coleretur, faciunt, quale Priapum apud Græcos fuisse, cuius, nisi in his planè hospes sit, notum. Hanc sanè sententiam juvare videntur supra ac scortationes Israëliitarum, sese cum Moabitidibus commiscentium, Num. 25. quæ de initiatione in honorem Peoris factâ intelligit Targum Jonathanis : in primum enim Capitis versum hæc

hæc habet : וְשָׂרִיאוּ עִמָּהּ לֹא־פָסַח קְרוּשְׁתָּהּ וְלֹא־פָעַר
 ! וְכוּ' *Et capit populus irritam red-
 dere, vel profanare sanctitatem suam, ac retegere corpora sua
 coram imagine Peoris.* Eadem in sententia est Maimo-
 nides, More Nevoch. Cap. 45. part. 3. *Porro non te la-
 tet, qua ratione cultus idololatricus Peoris olim perficiebatur,
 refectione nempe : hinc præcepit Deus sacerdotibus facere sibi
 femoralia, ad nuditatem suam tegendam, quando cultui divi-
 no vacant.* His adstipulantur Philo Judæus, ac inter
 antiquos Patres Hieronymus, qui Baal-Peor quasi
 בַּעַל פִּי עוֹר *in ore habens pellem* interpretatur ; ac inter
 recentiores quam plurimi. Hoc utique fatendum est,
 ac magno Seldeno concedendum, ex Num. 25. ritus
 ejusmodi obscenos, à quibus referendis ipsa prope-
 modum abhorret lascivia, in cultu Peoris usitatos
 fuisse, equidem probari non posse, cum populus
 amore Moabitidum Amasiarum illectus, ad cultum
 Baal-Peoris pellici potuerit, ut Salomon ob amorem
 Zidoniarum, ac Hammonitidarum, Astartæ ac Mil-
 comi sacris se addixit. Non pauca sunt tamen in
 scriptura loca, ex quibus patet, Israëlitarum nonnul-
 los, gentium mores æmulatos, turpi ejusmodi cultui
 deditos fuisse, ut ex Historiâ Machabæ colligunt erudi-
 ti, 1. Reg. Cap. 15. item ex Hoseæ Cap. 5. sic ex præ-
 cepto Lev. 19 : 29. : אַל תַּחֲלֵל אֶת בְּתֻרְךָ לְהוֹנוֹתָהּ : scil. in
 honorem ac cultum alicujus Dei ; & Baal-Peorem
 tale numen fuisse innuere videtur Hoseas, qui ipsius
 cultum cum foedis Israëlitarum gestis conjungit. Sic
 itaque Baal-Peor, Heros, sive idolum aliquod, in
 Moabitarum monte Peor, de quo Num. 23. cultum,
 si cui scil. S. Jarchii & Hieronymi etymologia minus
 placeat. Non obstat tamen hoc, quo minus cultu
 foedo, quali scil. Priapus, vel Venus, apud Babylo-
 nios, quemque αἰχλὺς τῶν πορνῶν vocat Herod. lib. 1.
 prout communis Doctorum fert sententia, placatus
 ac cultus a Moabitis fuerit. Hæc itaque de Baal Peor.

§. X.

Sed nec in Baalim, five Heroum, cultu, substitit idololatria. Verum sicut ad humana quævis se demisit, secundum illud Prudentii:

*Quicquid humus, pelagus, Calum mirabile signant,
Id dixere Deos, colles, freta, flumina, flammæ.*

sic præcipue Bestias divini honoris participes reddidit, quas si non Deos crediderunt Idololatræ, ut Deos saltem venerati sunt. Ægyptios præcipue Bestiarum cultû insaniisse, quis est qui nescit? Hoc tradit omnis propemodum Historicorum profanorum caterva. Diod. Siculus Bibl. Hist. lib. 1. *σέβονται γὰρ ἑνία τῶν ζῴων Ἀιγυπτίοι καθ' ὑπερβολὴν, ἢ ζῶντα μόνον, ἀλλὰ καὶ τελευτήκοια.* h. e. *Nam animalia quadam Ægyptii, supra modum, non viva tantum, sed & mortua venerantur.* Herod. lib. 2. *ἔσσα δὲ Αἰγυπτος ὁμῆρες, τῇ λιβύῃ, ἢ μάλα θηριώδης ἐστὶ, τὰ δὲ ἑόντα σφι ἀπάντα ἰσὶ νενόμισται.* h. e. *Cum Ægyptus sit Libya finitima, non admodum bestifera est, quæ autem ibi sunt omnes pro sacris habentur.* Et Mela lib. 1. Cap. 9. *Colunt effigies multorum animalium, atque ipsa magis animalia.* Sed quid hæreo in re tam tritâ? Bestias autem colendi morem apud Ægyptios, non heri tantum natum, sed ipso exitu populi Israëlitiçi vetustiore esse, non ex uno solum scripturæ loco colligi potest; ut enim vitulum aureum taceam, de quo inferius, id manifeste innuit responsio Moysis Pharaoni data. Exod. 8: 16. *Et respondit Moses non convenit ut sic agamus,* *הן נזבח את תועבות מצרים,* *Ecce nos Egyptiorum abominationem sacrificaremus, in oculis eorum, an non lapidarent nos?* Quem locum sic Onkelos *פאראפראזי;* ואמר משה לא תקן למעבר כן ארי בעירא דמצראי דחלין ליה מיני אנחנה *h. e. Et dixit Moses, non commodum est sic facere, quoniam ex pecoribus quæ Ægyptii colunt, acciperemus ad sacrificandum Deo nostro.* Eadem pro-

ptemo-

pemodum habet Targum Jonathanis : ארס אמריא דהינן סעותהון דמיצראי מינהון ניסכ וניקרב קרם " אלהן ; *quoniam ex Ovibus, sive pecoribus, quae sunt idola Aegyptiorum, acciperemus, & sacrificaremus Jehovae Deo nostro.* His concinunt Hebraei Commentatores, R. Sel. Jarchi. תועבות מיצרים יראת מיצרים כמו ולמילכום תועבת בני עמון : *Abominationem Aegyptiorum, terriculamentum Aegyptiorum; sicut & Milcomo Abominationi filiorum Ammon, &c.* Sic Aben Esra כתב כה לגנות עבודה זרה כי לא אמר אלהי מיצרים. *Sic Moses scribit in opprobrium idololatriae, quia non dignatus est Pharaoni illos vocare Deos Aegyptiorum.* His, si placet, addas interpretationem LXX, qui תועבות per *βδελύγματα* reddunt, vocabulo quo idola frequentissime designare solent. Hi itaque omnes uno ore supponunt, Bestiarum cultum ante exitum populi Israëlitici in Aegypto receptum fuisse. Hoc magis planum fit ex Genes. 43 : 32. non enim possunt Aegyptii cum Hebraeis cibum sumere, ארי דמיצראי דחלין ליה, inquit Paraphraustes Onkelos, בעירא *Quia Bestias quas Aegyptii colunt, Hebraei comedunt.* Odii illius internecini, quo Aegyptii in pastores gregis ferebantur, Genes. 46 : 34. eandem causam reddit R. Selomo Jarchi, in comment. suo ad eum locum. *Propterea, ait, est Aegypto abominatio omnis pastor gregis.* *quoniam illorum Dii sunt.* Deus itaque, ne populus suus se ad imitationem idololatrarum turpi brutorum cultu macularet, severissimo præcepto illum proscriptum voluit. Deut. 4 : 16. 17.

S. XI.

Utut Brutorum cultus per totam Aegyptum jam ab antiquo receptus fuerit, Idololatræ tamen in deligendis Brutorum speciebus fuere discordes. Animalia quidem omnes venerabantur, at alii alia, ut ait
N 3 Pom-

Pomponius Mela in loco jam citato. Sic Herod. lib. 2. θεὸς γὰρ ἔ τες αὐτὰς ἀπαντες ὁμοίως αἰγυπιοὶ σέβονται, nam omnes Aegyptii non eosdem colunt Deos. Qui in Thebanorum Nomo sunt, abstinēt ovibus, sacrificant capras, qui vero Mendesium fanum possident, ἔτοι αἰγῶν ἀπεχόμενοι, οἷς θύουσιν, a capris abstinentes oves mactant. Τραγολαλρεία insanierunt præcipue Mendesii, eo quod Pana inter octo Deos numerent, quem statuarii Caprina facie sculpunt, Herod. lib. 2. Addit Diodorus, Hirci Apotheoseos causam, ob foeditatem hic non recensendam, Bibl. Hist. lib. 1. Quæcunque hircorum cultus causa statuatur, hoc a vero non abhorre videtur, Dæmones olim Hircorum specie Idololatris conspiciendos plerumque se præbuisse. Hinc in præcepto Lev. 17. non sacrificent amplius, sacrificia sua ירשעל; Hircis, plerique interpretantur Dæmonibus, ut Onkelos ירשעל, quem sequuntur Selo-mo Jarchi & Aben Esra; quod & tradit Maimonid. More Nevoch. Cap. 47. part. 3. Ad hunc modum ex Zabibis quidam fuerunt, qui Dæmones colebant & existimabant, quod formam Hircorum habeant. Hanc autem legem a Deo latam fuisse, ad præcavendum Hircorum cultum, apud Mendesios receptum, cujus contagio jam quidam Israëlitarum, in eorum viciniâ degentium, infecti fuere, extra omnem dubitationem est.

§. XII.

At non Hircos tantum colebant Aegyptii, sed & Boves, cum masculos, tum foeminas. Foeminarum cultum latissime se per Aegyptum extendisse, dicit Herodotus, καὶ τὰς βοῦς θηλέας αἰγυπιοὶ πάντες ὁμοίως σέβονται, προβάτων πάντων μάλιστα; Boves foeminas Aegyptii omnes simul venerantur omnium pecudum maxime, quasque propterea sacrificare non licebat, utpote Isidi sacras. Isidis enim simulacrum βέκερόν ἐστι, h. e. Bubulis cornibus præditum. Inter masculos boves, duo maxime erant

erant celebres, Memphiticus & Heliopolitanus, hic *Apis*, ille vero *Mnevis* dictus; τὰς δὲ ταύρας τὰς ἱεράς, λέγω δὲ τὸν τε Ἄπιν καὶ μνεῦιν, τιμᾶσθαι παραπλησίως τοῖς θεοῖς: inquit Diod. lib. 1. *Taurus vero sanctus, Apim & Mnevim dico, non secus ac Deos honorari.* Plutarchus de Isid. & Osī. ὁ δὲ ἐν Ἡλιωπόλει τρεφόμενος βῶς, ἐν μνεῦιν καλῶσι, μέλας ἐστὶ, καὶ δευτέρως ἔχει τιμὰς μετὰ τὸν Ἄπιν. *Qui vero Heliopoli nutritur Bos, quem Mnevim appellant, niger est, & secundos post Apim habet honores. Apim populi omnium (Ægyptiorum putā) Numen vocat Pomp. Mela, illumque sic describit. Bos niger, certis maculis insignis, & caudā linguaue dissimilis aliorum, raro nascitur, nec coitu pecoris, ut ajunt, sed divinitus & cælesti igne conceptus.* Illum autem Osiridi sacrum fuisse indubium est: Plutarchus enim in Isid. vocat eum εἰδῶλοι τῆς ἐκείνου ψυχῆς: ipsius animæ simulachrum. Non autem est probabile, per Osiridem suum minorem Ægyptios Josephum intellexisse, uti acute ac erudite a Magno Vossio in libro de Idolol. Gent. asseritur. Bove vero symbolum Josephi esse, multis de causis contendit: quia cum Josephus tempore famis Ægyptios sua prudentia ab interitu liberarit, non alio convenientiori symbolo hoc beneficium exprimi potuisse; cum annona ab agriculturā, agricultura autem a Bove dependeat. Interpretationem itidem somnii Pharaonis, de vaccis pinguibus & macilentis, hoc symbolo aptissime potuisse designari; huic accedit modius, quem Serapin (qui Clarissim. Vossio idem est cum Apide) in capite gestasse tradit Suidas, convenientissimum beneficio toti Ægypto per Josephum allato exprimendo monumentum. Harum & aliarum rationum, ut ut speciosarum, vis subito evanescit, accedente historia Moysis, qui alium Regem extitisse dicit Exod. 1: 8. *qui non agnoscebat Josephum*, h. e. qui nullam ipsius beneficii rationem habuit; quomodo vero hoc cum Josephi, per totam Ægyptum post


eius obitum veneratione, ac in Apide cultu, consistere possit, non video. Quoad Serapim, illum Numen Neotericum esse ac Apidis ætati multum inferius, probat Clariss. Bochart. in Hieroz. lib. 2. cap. 34. Huic confirmando sufficeret sane silentium Herodoti, qui etsi de Apide & aliis Diis Ægyptiorum accurate differuerit, ne hilum quidem de Serapi habet. Sed non tutum existimo, de rebus, tantâ antiquitatis caligine circumfusus, iudicium ferre.

§. XIII.

Apidem itaque Bovem, & quidem certis gnomismatis ab aliis distinctum esse, ejus itidem cultum per totam Ægyptum receptum fuisse, constat. Israelitas autem cultu Apidis inquinatos, coluisse vitulum aureum, volunt plerique Doctorum. Et sane tot sunt rationes, ut vix dubitari a quopiam possit. Non quidem ut fingamus necesse est, Israelitas eo facilius cultui vituli animum addixisse, quod scirent in Apide sive Bove, Josephum, cujus memoriam venerabantur, ab Ægyptiis coli, ac idcirco etiam Jeroboamum, è Josephi stemmate ortum, hæc symbola aliis prætulisse, uti vult Grotius; cum in aliorum gentium sacra, quantumvis absurda, Israelitas præcipites se dedisse, Historia sacra doceat. Probabilius est, quod Israelitæ, in Ægypto colentes idola Dominorum suorum, antiquam consuetudinem non ita deponere potuerint, quin datâ occasione rediret; secundum illud Horatii: *Naturam expellas furcâ, tamen usque recurret.* Israelitas, dum in Ægypto versarentur, idololatriæ lue contaminatos fuisse, extra omnem dubitationem ponit Josua. Cap. 24: 14. *Amovete Deos vestros, quos coluerunt majores vestri trans flumen & in Ægypto.* Ac in ipso hoc facto corde in Ægyptum aversos fuisse, dicit Stephanus Actor. 7: 39. *Καὶ ἐγκατέστησαν τοὺς κατε-
διδασκ*

ῥίσις αὐτῶν εἰς Ἄιγυπτον : Sed quid hisce opus est , cum ritus in cultu aurei vituli a Mose descripti , manifeste nimis superstitionem Ægyptiacam redoleant. Aurea enim Moſis, è monte cum Josua festinantis , primum ferit קול ענות *vox cantantium* , quod de inconcinnô ac in multos clamores effuso gaudio , in idolorum festivitatis usitato , interpretantur Targumistæ , Hierosolymitanus , & Jonathan. Prioris hæc sunt verba. קל בקלסון בפלחנה נוכראה *vox ridentium in cultu alieno h. e. idololatrico.* Posterioris fere eadem קל פלחי פולחנה נוכראה. Aben Ezra idem gaudium intelligit , cum נתינות , vel *instrumentis musicis* , LXX. habent τῶν ἐξαρχόντων οὖς , *vocem compotantium* ego audio. Huc etiam faciunt ductæ Choreæ , lusus , ac tripudia Israëlitarum , quæ omnia , cum festivitates , gaudia publica , ac carmina , quibus Apis inventus , ac magnâ cum solemnitate Memphim ductus excipiebatur , sapiant , unô ore clamant , Israëlitas Ægyptiorum mores æmulatos , vitulum aureum coluisse ; Accedit & חרט sive stilus , quo illum formasse dicitur Aharon. Quid enim convenientius est , quam hic de notis sive maculis Apidis cogitare , quas simulacrô aureo , hóc instrumentô Aharon insculpserit ? præferenda enim mihi videtur ininterpretatio Onkelosi , qui חרט per זיפא , quod stilum sive cælum notat , uti & LXX. reddit , interpretationi paraphrastis Jonath. illud per שושיפא , quod sudarium , Masupim denotat , exprimentis : Cui accedit magnus Bochartus in suo Hierozoi. lib. 2. Cap. 34. Cæterum non est quod quemquam offendere debeat vox עגל , quæ vitulum significat , cum constet Apidem sive Mnevim Boves fuisse : Herodotus enim ipse Apidem μόγι vocitat libro 3. quô LXX. vocem עגל expriment.

Nec etiam, quod Apis fuerit Bos vivus, vitulus vero cui Israëlita sacra fecerunt, simulacrum aureum: quis enim ignorat, Ægyptios non animalia viva, ac demortua tantum, sed & effigies animalium, ut Mela habet, coluisse? Ea autem quæ de vitulô aureo disserui, dicta etiam velim de aureis Jeroboami vitulis, nisi quod hic superstitionem auxerit, simulacro Apidis addendo effigiem Mnevis, qui secundos post Apim obtinuit honores, ut ait Plutarchus, cujusque apud Heliopolitanos maximè venerandum erat nomen. Veritati enim accedere videtur, Jeroboamum, dum in Ægypto moras ageret, superstitionem Ægyptiorum imbibisse, dein regni factum compotem, cum novâ Regiminis formâ, Ægyptiorum Religionem, quorum potentiâ adjutus suum Regnum adeptus est, introduxisse. At angusti his exercitiis præscripti limites, me in immenso illustrissimæ materiæ mari velificantem, vela contrahere jubent; manum igitur de tabulâ.



II.

JOH. CASPARI
BRUNNERI,

Dum viveret,

*Archi-Diaconi & Canonici Tigurini
Plur. Venerandi,*

De Spiritu non extinguendo,

Ad Locum 1. Thessalon. V. 19.

ORATIO PANEGYRICA.

Cui subjungitur

Historia Vitæ Celeberrimi Authoris,
à Nepote

JOH. CASPARO HULDRICO,
Uticon, Pastore.

* * * * *

AD LECTOREM.

CUm nuper varia in Ven. Soceri mei *καμηλιῶ*
 „ latentia MScta perlustrassem, incidi etiam
 „ in hanc quam manu teres Orationem Cel.
 „ BRUNNERI Soceri sui. Perlecta illa scitabar,
 „ nam ægre ferret Ven. Socer, si ejus *ἐκδοσι* heic lo-
 „ ci susciperem; approbavit consilium, (non enim
 „ ex illorum numero est qui sibi soli vivunt, sed, si
 „ quisquam alius, Facilis, Largus, Beneficus:) eò ma-
 „ gis, quum jam olim cum Viris Doctissimis, quos
 „ inter & acutissimus GOTTH. HEIDEGGERUS,
 „ dignam judicabat, quæ à pluribus legeretur. Pla-
 „ cuit eidem V. Socero, ut Vitam C. Authoris sub-
 „ jungerem; quam in rem mihi non solum præcipuas
 „ circumstantias, quas ipse sæpius ex ore Beati Viri
 „ audivit, narravit, sed & schedas, ipsa *τῆ μακαρίτης*
 „ manu consignatas exhibuit, ex quibus biographi-
 „ am Tibi hancce fideli calamo trado; nullatenus
 „ dubitans, quin gratiam, si non magnam, aliquam
 „ saltem, apud T E hac opella inirem. Habita hæc
 „ est Oratio An. MDCCI. d. 14. Maij. Vigilia Pen-
 „ tecost. Patebit ex ejus lectione, nihil heic inve-
 „ niri, quod ab *ἀναλογία τῆς πίστεως* longius quam
 „ par est abeat, licet nonnulli id olim putarint, &
 „ nescio quæ errorum monstra ibidem quæsierint.
 „ Hæc sunt, de quibus T E monendum duxeram.

ARGU-

* * * * *

ARGUMENTUM.

Post *Exordium*, à temporis circumstantia desumptum, pergit Cl. Author ad rem ipsam, ubi *Nexus* primò & *Scopus* Loci ostenditur, Materia dein methodo sequenti pertractatur. Occurrit in Textu nobis tum *Beneficium*, tum *Officium*. *Beneficium* est τὸ πνεῦμα. Variæ hujus vocis notiones: *Spiritus* Deus; *Spiritus* tertia Deitatis Persona, cujus etiam dona Spiritûs nomine veniunt. *Officium* in Textu requisitum: *Ne extinguite*. *Spiritus* Dei instar Ignis se habet atque Lucis. Quomodo *Spiritus* extinguatur. *Spiritum* non debemus extinguere A.) in nobis ipsis, sed potius excitare. B.) in aliis. *Vindiciæ Textûs* contra I.) Patronos liberi arbitrii. II.) Patronos Apostasiæ Sanctorum. III.) Enthusiastas. *Elenchus* eorum qui extinguunt *Spiritum*, A.) Cognitionis, a.) in se ipsis, b.) in aliis. B.) Pietatis. C.) Charitatis. D.) Fortitudinis. *Hortatio* directâ ad I.) omnes donis Spiritûs insignitos. II.) Magistratus. III.) Pastores & Professores. IV.) Studiosos. *Extinguendus* *Spiritus* malus. *Peroratio*.

ORA-

ORATIO.

Summo semper in Ecclesia Christi loco fuit stupendum Omnipotentis Spiritus miraculum, cuius commemoratio gratissimis animis anno verrente celebratur. *APOSTOLI*, Ecclesiæ N. T. Patriarchæ, homines Galilæi, natura linguarum literarumque imperiti, (a.) nulla prævia institutione, nullo exercitio, ἐκ τῆ παραχρῆμα cœperunt loqui variis linguis, iisque omnibus deprædicare τὰ μεγαλεῖα τῆ Θεῆς. Tria sapientissimus vitæ emendator, *PLUTARCHUS*, (b.) ad felicem in virtutum studio & stadio profectum concurrere oportere, autor est; Φύσιν, μάθησιν, ἀσκησιν, naturam, institutionem, usum, horum unum si deficiat, virtutem (addo & eruditionem;) mancarn esse. Φύσις γὰρ ἀνευ μαθήσεως τυφλὸν, μάθησις δίχα φύσεως ἄδικπες, ἀσκησις χωρὶς ἀμφοῖν ἀτελές. At his omnibus destitutos fuisse Apostolos, Sacræ Literæ docent. Deerat illis Natura, erant enim ἐ gente rudiorē & incultra; Institutio, erat enim iis res paupercula, quippe qui hamiotæ, famelica hominum natio; Exercitium, nullam enim habebant cum literis hætenus rationem. Hinc quum primùm à Sospitatore nostro vocarentur, cœlestis doctrinæ admodum fuere igno- rantes; imò postquam ad triennium disciplina Christi gavisi fuissent, non ita ab errorum ac præjudicio- rum rubigine fuere defricati, quin circa genium at- que indolem regni Dei tota errarent via. Hi tamen ipsi, in alios derepente mutati homines, novis quas nunquam didicerant linguis, eximia illa & mirabilia, quæ recit ὁ δυνατὸς, τὸν ἀνέξιχνιαστον πλῆτον τῆ χειρὸς, καὶ τὴν πολυποίκιλον σοφίαν τῆ Θεῆς, ἐκ τῆ παραύχοντος (c.) magnificè concelebrarunt.

(a.) Act. 4: 13. (b.) De educ. Lib. §. 7. (c.) Luc. 1: 49.

Ephes. 3: 8, 10.

Unde

Unde hæc tam subita mutatio ? Inde , quia ex vaticinio *JOELIS*, de spiritu novissimis temporum spatiis effundendo , imbuti sunt virtute ex alto , & repleti cœlitus in ipsos descendente spiritu , per quem Dominus noster , qui majestatem suam supra cœlos locavit , *ex ore infantium & lactentium* (d.) hoc est , hominum præ cæteris simplicium & proletariorum , qui ad eloquendum divina mysteria ex se æquè inepti erant , ac infantes & lactentes ad quidvis enuntia-
dum , fundavit robur , hoc est Evangelii , quod est potentia Dei , (e.) organum , per quod Deus potenter efficax est ad fidem & salutem , annuntiavit : ita ut infantes hi & lactentes non balbutierint , sicut , qui annis adhuc innocentibus dimidiata tentare verba consue-
scunt , sicque loquelam fundunt ipso offensantis linguæ fragmine dulciorem ; sed de rebus tam sublimibus omnemque cogitationem excedentibus , de mysterio Dei & Christi , in quo omnes thesauri sapi-
entiae & cognitionis absconditi (f.) promptè , expedite , ad audientium stuporem & convictionem , verba fecerint . Qui inde Spiritus divini dotibus instructi , & , si ita loqui liceat , pleni & mixti Deo , universum in orbem , divitias Christi inexhaustas & sapientiam profundissimam omnibus monstraturi , commearunt . Quis enim ab illo tempore locus in terra est , quem non Christi possederit nomen ? qua sol oritur , qua occidit , qua erigitur septentrio , qua vergit auster , totum Venerandi Numinis majestas implevit . Et li-
xet adhuc (JULII FIRMICI MATERNI (g.) ver-
bis utor .) in quibusdam regionibus idololatria morientia pal-
pitent membra , tamen in eo res est , ut è Christianis omnibus terris pestiferum hoc malum funditus amputetur .

At verò incredibilis illa Spiritus effusio , quæ ma-
 etati

(d.) Psalm. 8 : 3. (e.) Rom. 1 : 16. (f.) Coloss. 2 : 3.
 (g.) De errore Prof. Relig. p. 42.

Etati sunt Apostoli, quid nisi argumentum quoddam ac veluti arrha fuit Spiritûs omnibus fidelibus largè effusèque donandi? Apostolorum tempore propheta *JOELIS*, de effundendo ultima penè seculorum hebdomade in omnem carnem spiritû, impleri cœpit: continuatio ad magnum usque & terribilem Domini diem est extensa. Et quia Apostoli primitias Spiritûs se habere testati sunt (*h.*) post primitias autem Deo oblaras messis sequi solebat; quidni post Apostolicas primitias simile quippiam sequutum ac porro sequutum credi debeat? idque eò magis, quia Christus ipse Spiritum S. ideo se Ecclesiæ relinquere dixit, ut cum illa maneat in æternum, omnesque fideles eundem, quem Apostoli, habeant magiltrum, spiritum veritatis, αψευδῆ, qui ducat eos, ut columna nubis & ignis Israëlitas, in omnem veritatem & virtutem, ad salutem scitu & factu necessariam, id est, efficaci mentium illuminatione & voluntatum flexu ita dirigat, ut non possint incidere in peccata & errores, qui salutem intervertant. (*i.*)

Quid autem nostri erga illum, qui adhucdum æque ac Pater & Filius operatur, spiritum inter alia sit officii, *PAULUS* Apostolorum Princeps nervose admodum *1. Thef. 5: 19.* hisce edocuit verbis:

SPIRITUM NE EXTINGUITE.

Non heic ulterius vos carmine longo, atque per ambages & longa exorsa tenebo: odiosa enim est oratio, cum rem agas, longinquam loqui. Cum hoc die, qui anniversariam missi Spiritûs S. memoriam præcurrit, pro cathedra hac scholastica differendi vices, ex ordine, & Ven. Antistitis nostri auctoritate, ad me sint devolutæ, in monito isto Apostolico & ipse inveniam, quod opportunè satis proponam,

(*h.*) Rom. 8: 23. (*i.*) Joh. 14: 16. 16: 13.

nam, & Vos, quod, ut spero, sine nausæ molestia audiat.

Solent opulentiores apparatu recto & lautis exquisitisque dapibus fatigati victus tenues interponere, & plebeja pulpa admonere ac reficere palatum: Vos Audit: Humanissimi, ἐν παντὶ λόγῳ καὶ πάσῃ γνώσει πλεονέχοντες, (k.) politas plerunque & nitidas ex hoc loco orationes audire assueti, in minus tersa ac limata hæc vice acquiescite, & linguis animisque favete.

Interea corrigat balbutiem nostram Spiritus facundia, & dispertitæ ab illo linguæ ita intellectus nostros illuminent & labia aperiant, ut ex paucis istis Sacro-Sancti Canonis verbis eliciamus salutaria & prædicemus Dei magnalia. Adesto (ita cum CYPRIANO, (l.) ex Patribus, qui in memorias exierunt, haud postremo, in antecessum oremus omnes:) Adesto Sancte Spiritus, & paraclesin tuam expectantibus illabere cœlitus; sanctifica Templum corporis nostri, & conscra in habitaculum tuum; Desiderantes Te animas tua præsentia letifica; dignam Te habitatore domum compone: adorna thalamum tuum, & quietis tuæ reclinatorium circumda varietatibus virtutum; sterne pavimenta pigmentis; niteat mansio tua carbunculis flammis, & gemmarum splendoribus, & omnium charismatum intrinsecus spirent odoramenta; affatim balsami liquor fragrantia sua cubiculum tuum imbuat, & abigens inde, quicquid tabidum est, quicquid corruptelæ seminarium, stabile ac perpetuum hoc facias gaudium nostrum, & creationis tuæ renovationem in decore immarcescibili solidas in æternum!

Postquam homo ille Dei, quem Salvator noster parvo momento ex inimico familiarem, ex hoste amicum, ex adversario administrum, è lupo ovem oviumque pastorem, denique ex Angelo Satanæ Angelum Dei reddidit, dux ac lux gentium; de decre-

Tom. III.

O

torio

(k.) I. Cor. 1:5. (l.) Serm. de Spir. S.

torio illo & extremo volventium seculorum die, ab omni æternitate præstituto ; quo ad vitam revocatis, quotquot unquam nati sunt, Dei Filius è coelo ad iudicium exercendum multa cum maiestate descensurus, & ad utram quisque (beatorum an damnatorum ?) pertineat classem, in celeberrimo superum inferumque conventu lata sententia planum facturus est ; sermonem habuisset, eum inopinanter improbos deprehensurum, ut, qui hæc habent consilia, ubi data est occasio, rape, clepè, tene, harpaga, noctu eos opprimunt, qui securi malorum omnium jacent, sopore demersi altissimo ; multiplices inde deducit admonitiones, quibus animi ad pancriticum illum diem & improvisum Domini adventum parantur.

Eas inter locum occupat, quam hac hora, hoc loco, his auribus, mea denique vocatione dignum satis & congruum fore ratus sum argumentum : τὸ πνεῦμα μὴ σβέννυτε, *Spiritum ne extinguite,*

Insigne heïc nobis occurrit tum *beneficium*, tum *officium*.

Beneficium τὸ πνεῦμα, *Spiritus* est. *SPIRITUM* in genere sumtum, quis nescit, modo substantiam, modo effectum & affectum, in cœlesti chirographo denotare ? Ista autem *substantia* vel creator est Deus, vel res creata, eaque aut corporea, ut ventus, aër, spiritus animales, vitales, naturales in corpore humano, & quæ sunt huiusmodi ; aut corpore & omni materia vacans, ut Angelus & Anima, quæ tamen ipsa, utut spiritus & corpus res sint toto genere & natura diversissimæ, prodigioso sanè conjugio ita arctè atque intimè corpori colligata est, ut ad varios ejus motus varias in se experiri cogitationes, & varios vicissim ciere in corpore motus possit. Ad *effecta* & *affecta* referuntur accidentaria, cum Dei dona interna à gratia efficaci, & externa per verbum ; tum
ejus-

ejusdem judicia in hostibus averruncandis aut infatuandis : Hinc spiritus vertiginis & sobrietatis, sapientiae & soporis, dilectionis & dissidii, mundus & mundi.

At verò instituti mei non est in *Pneumatologiam* excurrere, sed tantum, quid Apostolus per spiritum notet, indicare. *Spiritum* autem *Dei*, ἐμφαλῶς τὸ πνεῦμα, illum spiritum, qui ἐξαίρετον θεῶν δῶρον, significari, non est ut quicquam dubitandum videatur.

Parentem omnium *DEUM*; qui nec principium habet nec terminum; qui nativitatem omnibus praestat, sibi perpetuitatem; qui universa quaecunque sunt, verbo jubet, ratione dispensat, virtute consummat; *SPIRITUM* esse palam est, imo tam clarum & apertum, ut ipsis in tanta temporum caligine, tantaque Dei & rerum divinarum ignorantia non plane occultum fuerit Gentilibus. *PLATO*, quasi Philosophorum Deus quidam, ut *Ciceroni* vocatur, in omnium rerum opifice atque moderatore ὦν, mentem agnovit, quæ nullis subjici sensibus, sed sola concipi cogitatione queat. Jam ante eum celebris ille Philosophus Ægyptius, *HERMES*, ob virtutem & doctrinam singularem *Trismegistus* dictus, Deum esse docuit αἰώμαλον, nullis aspectibus subjectum. Deum esse animum per naturam rerum omnem intentum & commeantem, *CICERO* inter *PYTHAGORÆ* recenset sententias, quas juratos ejus discipulos velut totidem Pythii Apollinis oracula adorasse notum est. In Stoicorum schola Jupiter Spiritus mundani hujus operis cluet. Ipse dux gregis & princeps *ZENO*, Deum esse dixerat spiritum per totum mundum penetrantem. Cui illud Mantuani *MARONIS* assonat, qui principio, ait, cælum & terras, & cetera mundi membra spiritus intus alit, & infusa mens agitat : (m.) Quem spiri-

spiritum alio loco Deum nominat, *Deum namque ire per omnes terrasque tractusque maris cælumque profundum.* (n.) Deus namque, ipsorum sententia, id in mundo, quod in nobis animus seu spiritus est: Spiritus mundi Deus, corpus Dei mundus. Quid aliud & a nobis Deus quam spiritus prædicatur? Hic nec videri potest, visu clarior est; nec comprehendi, tactu purior est; nec æstimari, sensibus major est; Spiritus infinitus, immensus, & soli sibi tantus quantus est notus, nobis vero ad intellectum pectus angustum est, & ideo sic eum digne æstimamus, dum inæstimabilem dicimus.

Quamvis autem, *Deum esse Spiritum*, rationi quodammodo pervium sit: tamen *esse in Deo SPIRITUM*, qui eandem cum Patre & Filio habeat essentiam divinam, sed & quædam obtineat sibi propria, quibus a Patre & Filio tanquam diversa ab iis Persona discernitur, frustra in natura quænaveris, frustra expectes ab hominibus divino lumine destitutis. Discendus est ex sacris divini Testamenti tabulis Spiritus S. qui a Patre & Filio *spiratur*, h. e. ab utroque æterna processione, modo, qui omnium Angelorum hominumve captum superat, procedit; qui in æterno pacis consilio, quo Filius a Patre constitutus est Sponsor & Mediator eorum, qui in Christo sunt electi, intervenire voluit tanquam eorum Paracletus, atque adeo vinculum est nostræ cum Christo unionis, signaculum nostrum & arrhabo nostræ *παραποιήσεως*, salutisque nobis conferendæ, ut sciamus, nos in Christo esse cum Patre *τελειωμένους εἰς ἓν*; (o.) qui & ipse *spirat*, h. e. solus ceu Virtus Altissimi vorticordia vi sua efficit, ut veritates salutares clare & distinctè in vera sua & nativa forma cognoscamus, cognitatas amemus, amatas vita & operibus exprimamus, & secun-

(n.) Georg. Lib. IV. 221, 222. (o.) Joh. 17: 23.

secundum eas ad imaginem Dei transformemur. Et hic Spiritus ille est, quo de Apostolo sermonem esse, firma Interpretum consensio manet. Neque tamen ipsa intelligitur Spiritus S. Persona, quæ, cum sit virtutis Omnipotentis, superari atque adeo extinguere nequaquam potest; sed Spiritus Sancti *dotes*; dona fidei, spei, charitatis, donum linguarum, cognitio salutaris, doctrina sana, exhortatio fida, consolatio pia, alique afflatus & impulsus. Quæ omnia *Spiritus* nomine veniunt, quia Spiritus ea in nobis operatur, & nos internis agitatur regiturque motibus, ut stimulante divina illius gratia adducti, ad verum pulcherrimo ardore indagandum & virtutem summo studio excolendam prompti inveniamur. Quis hinc amplissimum sub Spiritus nomine designari beneficium non agnoscat?

At quodnam sibi beneficium hoc deposcit officium? *SPIRITUM*, inquit Apostolus, *NE EXTINGUITE*.

Spiritus Dei, quem nobis elargitus est, *ignis* instar se habet. Ideo per ignem, qui de cælo delapsus sacrificia accendit & consumsit, adumbratus est. Et in Pentecoste spiritus cum igne missus est, visæ enim sunt igneæ flammæ & faces, linguarum divissarum εἶδος & formam habentes; quæ quid aliud quam efficaciam sermonis, lucem veritatis, zelum igneum, τὴν θερμὴν ἀγάπην, aliaque dona in sanctos effundenda denotarunt? Ignis alia quidem corpora depascitur, alia vero purgatoria mundioraque reddit. Spiritus Dei, qui & ipse Deus, ignis est consumens impuritatem, (p.) qui susceptis flagitiorum sordibus foede contaminatos absorbet, fideles autem expurgat, & assidue gliscentes in iis concupiscentias & vitia exurit atque excoquit. Penetrat ignis, neque facile prohiberi

O 3

(p.) Hebr. 12: 29.

beri potest, ubi semel serpere cœpit & ardere: Quis retardabit progressum Spiritus S. & vim ejus omnia pervadentem? Qui abscondidit ignem in sinu, diu illud celare non potest: Spiritus quovis modo inclusus quærit exitum. Cum descendisset super Apostolos, cœperunt confestim loqui, prout spiritus ille dabat effari: & quam primum cor Davidis eructat verbum bonum, lingua fiet calamus velociter scribentis. (q.) Ignis calefacit: Spiritus non finit esse frigidos aut tepidos, qui eum accipiunt, sed facit eos ζῆλον; Zelum in iis excitat, qui eos actionis est, & fermentum illius in Evangelio massæ, quod præparat & condit illam ad panificium: nescit tarda molimina Spiritus S. gratia.

Ut autem Ignis etiam *LUX* est; ita & Spiritus Dei illuminat corda & cognitionem veritatis indies uberiores eis præbet, & ad eam quærendam per charitatem incitat: insuper radiis suis pectora mirifice recreat, & omnia nobis læta reddit. Dum lampas seu candela suum noctu in conclave immittit lumen, omnia illustrat & splendentia sistit, quæ ad ornatum peristromata stragulaque auro intertexta parietes vestiunt; ea autem absente vel extincta, quanquam pretiosissimo auro atque argento omnia obducta sint & ornata, in caligine omnis splendor jacet, nec cognosci potest decus, quod ad loci ornamentum pertinet. Haud aliter, ubi Spiritus S. gratia nobis affulget, omnia in nostris actionibus splendent, & decus nobis lætitiæque ex illa benignitate communicant; sed ubi præsentiae vultum nobis aufert, tum veluti nocte & tenebris sepulti, nullam amplius cognoscimus jucundis in rebus inesse pulchritudinem, inquietoque dolore anxii agnoscimus, præsentiam Spiritus S. unicuique vitæ nostræ esse solamen, sine quo nihil nobis amœnum, sed cuncta videntur mortua, quæ alias maximo prosecuti sumus amore. (q.) Psal. 45: 2.

Que

Quemadmodum autem ignis, sive caloris sive lucis gratia accensus, vel subtracto alimento, vel injecto pulvere, vel super infusa aqua, vel venti flatu, vel olei defectu *extinguitur*; ita Spiritus, sive per charitatem moveat, sive mentes illustret, sive gaudium impertiat, idque in nobis agat, vel in aliis ad ædificationem corporis Christi, *EXTINGUITUR*, quando gratia ejus exinanitur, studium charitatis sive Zelus minuitur, aut cognitio impeditur; quod in nobis ipsis fieri potest per γογγυσμὸς καὶ διαλογισμὸς, per vanas cogitationes & curas seculares, per malas cupiditates, per crapulam atque ebrietatem, per desidi-
diam & ignaviam, qua bonum otium conteritur, & dona Dei in nihilum rediguntur, cum profectu quotidiano accensæ a Deo scintillæ magis ac magis excitari & continuo usu foveri deberent; & omnino curando atque cogitando magis ea quæ sunt carnis quam quæ sunt spiritus. In aliis vero, qui tanquam lucernæ in candelabris positæ non cessant se consumere, ut alios illustrent; ab iis, qui ipsorum studium in opere bono, ἐν τῷ παρακαλεῖν καὶ οἰκοδομεῖν non modo non adjuvant, sed potius remorantur, ut ita vel minus ardeant & alios accendant, vel minus luceant; qui pios conatus frangunt, ardorem reprimunt, pusillanimes reddere conantur: qui præclara ingenia nec fovent, nec pro officii ratione, ut excolantur, curant.

Ex his conjectu proclive esse autumo, quis monelæ Apostoli insit sensus. Non Thessalonicenses modo, sed omnes Ecclesiæ filios, qui discussa caligine de tenebrarum profundo in sapientiæ & veritatis lucem emersere; in quos divinum Lumen & Numen virtute Spiritus S. qui ignis vel lampadis instar in eorum animis relucet, varia & singularia contulit dona; cavere jubet, ne ea, quibus neque melius neque amplius aliud in natura mortalium est, inculta atque

ſocordia torpeſcere ſinant, & vel ambitione, vel ri-
xis & contentionibus, vel curis terrenis, vel ſecuri-
tate carnali, aliisque atrocibus peccatis præfocari pa-
tiantur, ſicque ipſum Spiritum S. quantum in ſe eſt,
in animo ſuo extinguant, atque adeo in horrendam
cœcitatem incidant, qua eos, qui ſemel illuminati
fuerunt, ubi tam pretioſum Dei donum reſpuunt, vel
clauſis oculis ſe in mundi vanitatem abripi ſinunt,
percuti cernimus, ut ſint aliis in exemplum. Hunc in
modum emuncti & ſubaſti iudicii Commentatores
Apoſtoli verba explanarunt. CALVINUS: *Eſtis*
Spiritu Dei illuminati, videte, ne veſtra ingratitude lux iſta
vobis pereat. VATABLUS: *Dona Spiritus ne ſinatis*
interire. CLARIUS: *Spiritum nolite extinguere, tan-*
*quam lucernam, quæ in caliginoſo loco ambulanti-
bus ſit neceſſaria.*

Dum autem Spiritum extinguere vetat Apoſtolo-
rum omnium laborioſiſſimus, quid aliud eum ex ad-
verſo præcipere putamus, quam ut dona Spiritus fo-
veamus & excitemus, cordisque januam cuſtodiamus,
ne malignus ille Spiritus ſubingreſſus ſalutarem lam-
pada extinguat? ut meminerimus ἀναζωπυρεῖν τῇ Θεῷ
χαρίσματα? quo vocabulo admodum emphatico erga
Timotheum ſuum utitur Apoſtolus. (r.) Ἀναζωπυρεῖ,
qui ſopitos ſuſcitatur ignes, qui ignem cineribus reſcitum
& quaſi emortuum reſuſcitatur, ſive ignem alit; quo-
modo DIONYSIUS HALICARNASSÆUS
ſcripſit, prudentes Reip. præſides αἰεί τινας ἐκ τῶν αἰδοε-
θῶν ἀναζωπυρεῖν ἐχθρας, ſemper alere aliqua externorum
bellorum ſeminaria. (s.) Elegans omnino metaphora!
Ut enim ſcintillæ cineribus coopertæ facile moriun-
tur, quæ eadem folliſus admotis ſtatuque levi adju-
tæ ignem ſuum explicant, & appoſitis lignis in arden-
tes tandem flammæ excrescunt; Ita dona Spiritus,
ſecuritatis & negligentiae quaſi cineribus ſepeliuntur,
quæ

(r) 2. Tim. 1: 6. (s.) Lib. 8. Antiq.

quæ precibus, gratiarum actione, assidua verbi meditatione, indefessa diligentia, jugi operatione, & perpetuo pietatis studio suscitata nescio quid ignei spirant, & flammaram suarum calore astantes etiam calefaciunt. Hanc ipsam autem hortationem aliis verbis scite expressit Apostolus noster: *Μὴ ἀμέλει τοῦ ἐν σοὶ χαρίσματος; ἐνδυναμοῦ ἐν τῇ χάριτι τῇ ἐν Χριστῷ Ἰησοῦ.* (t.) & quando tria ista conjungit τῇ σπουδῇ μὴ ὀκνεοί, τῷ πνεύματι ζῶντες, τῷ κυρίῳ δουλεύοντες, (u.) quid aliud postulat, quam ut studio minime pigri, sed spiritu ferventes Deo inserviamus? In quo autem fervor spiritus multiplicata iniquitate & charitatis frigore non repescit, in eo spiritus neutiquam extinguitur, sed curæ illi est illud Servatoris, *πρῶτὸ ἐννυχον λῖαν*, (x.) mane valde diluculo, ut mature pensum aggrediatur, quia mane quod tu occæperis negotium agere, id totum procedit diem, & ferme ut quisque rem accurat suam, sic ei procedunt post principia denique.

Sed & ea Apostolo mens est, nec dona Dei in aliis per nos sint infructuosa, sed potius operam demus, ut ii, qui ea acceperunt, occasionem habeant talentum suum bene collocandi, quo ita dona Dei ad plurimorum redundent utilitatem, & Deus illustrius glorificetur. Hoc dicit, inquit AMBROSIUS, *ut non facile alicui per spiritum loquenti interdicator; (extinguitur enim, si incipientis loqui fervor contradictione sopitur.) ne forte non intelligentes dici ab eo spiritualia injuriam faciant Spiritui S. & peccent per ignorantiam.* Etiam majores nostri, quorum illustrior gloria est, quam ut eorum merita verborum laudibus repensari possint, locum nostrum de non extinguendo in aliis spiritu, & quidem spiritu Prophetico, seu explicationis SS. Litterarum, intellexerunt. ZUINGLIUS, Si, inquit,

O 5

spiri-

(t.) 1. Tim. 4: 14. 2. Tim. 2: 1. (u.) Rom. 12: 11.

(x.) Marc. 1: 35.

spiritus alicui revelarit sensum scripturæ, quem hætenus alii non attigerunt, hunc audite, & hoc donum ne spernatis, ne suppressatis, quisque mansuete audiat alium de rebus divinis differentem. (y.) Et BULLINGERUS, Solent, inquit, oriri non nunquam dissidia ex diversitate donorum, dum quibusdam nihil probatur, nisi quod ipsi fecerint. Hi aliorum dicta & scripta etiam pia vel palam improbant, vel apud se se contemnunt. Contra horum insolentiam, arrogantemque contemptum aliorum, Apostolus Spiritum ait ne extinguatis, subdensque suæ sententiæ expositionem dicit: Prophetias ne aspernemini. Et post: Spiritus per Prophetas fideliter semper dona sua in nos transfudit. Hodie quoque variis donis ingeniisque locupletavit nos divina bonitas, Jam quis tam iniquus, qui hæc dona extinguat, & prophetas loqui prohibeat, nisi qui se suaque quærens ambitione quadam invidet omnibus? Iterum: At si pius aliquis vel sui oblitus, vel occasionibus certis sibi ipsi ereptus effutivit aliquid imprudenter, prudenter & cum reverentia quadam ab illo declinemus. Neque enim impudenter & procacius suggillandi sunt propter unum atque alterum lapsum, qui per omnia Ecclesiæ Dei & veritati bene voluerunt. Hæc sapientissime ο πάτερ BULLINGERUS noster. (z)

Hætenus monelam Apostoli fuisse satis, & ut opinor, perspicue explicatam tradidi. Jam major mihi rerum nascitur ordo: majus opus moveo, ut vobis ostendam, tum quid ex illa falsi eliciatur, tum quid contra illam mali committatur, tum quid secundum illam boni a nobis omnibus requiratur.

FALSUM ex illa eliciunt, qui, ut gratiæ efficaciam deprimant, & liberi arbitrii facultates extollant, inde colligunt, in hominis arbitrio esse, vel extinguere vel fovere lucem oblatam. Quamvis enim efficaciter in electis suis operetur Deus, neque lucem tantum illis admoveat, sed & ut videant, oculos men-

(y.) Oper. Tom. III, p. 324. (z.) Comment. in h. l.

mentis aperiat, apertosque teneat; quia tamen semper ad desidiam caro inclinat, & se luxui atque inertiae dat corrumpendam, exhortationum stimulis opus habet. Verum quod Pauli voce Deus mandat, intus ipse praestat. Interea partes nostrae sunt, ardentibus humilis & a Deo unice pendentis animi precibus continuo divinam opem implorare, & a Domino petere, ut lampadi in nobis accensae oleum suppeditare, ellychnium purum servare, nobisque sua dona amplificare dignetur. Non ergo frustra sunt admonitiones, si Deus omnia in nobis operatur. Nam ad hoc ipsum Deus verbum suum & admonitionem fidelium ordinavit, ut abundet gratia & frugifera sit.

Perperam dein, qui *Apostasiam Sanctorum* astruere contendunt, ipsi facti Apostatae, ex Apostoli verbis, spiritum ne extinguite, concludunt, spiritum extinguere posse, atque adeo ad semel renatos non esse sic alligatum, ut non queat flagitiorum turpitudine excuti. Nam, ut AUGUSTINI verba habent, *de spiritu, qui nullo modo potest extinguere, dictum est tamen, spiritum nolite extinguere, h. e. quantum in nobis, nolite sic agere, tanquam conemini spiritum extinguere. (a.)* Equidem, quod quidam spiritum extinguant, minime inficiamur; nempe fideles nominales, externa professione, iudicio charitatis, in foro soli, καὶ αὐτῶν & specietenus, coram Ecclesia renati; quos, quia intus hypocritae sunt, non fideles reales, vere, interne, in foro poli, κατ' ἀλήθειαν & coram Deo regenerati, dona spiritus communia & externa extinguere posse, lubentes concedimus. Neque dubitamus, quin ipsi regeni astu satanae, propria negligentia & nativa corruptione in horrenda saepe peccata incidant, sicque Spiritum Dei contristant & tantum non extinguant. Attamen in maximis ipsorum lapsibus semen gratiae non penitus eradicatur, nec spiritus totaliter extinguitur.

(a.) Lib. 2. contra Ep. Parmen. c. 13.

tur, sed sub cinere variarum tentationum delitescit, similisque est animæ, quæ ita hæret corpori, ut non raro cum ipsa morte luctetur, & in eas redigatur angustias, ut corpus relinquat non dissimile mortuo, omni motu privatum, & omni sensu pro tempore orbatum, cum tamen in universa hac lucta non recesserit a corpore, sed æque tota in eo fuerit atque in alio, cujus plenissima est sanitas, sed tantum infirmior, a qua infirmitate & sensuum & motuum oritur defectus. Quin imo & hoc fateri cogimur, vere fideles spiritum penitus extinguere posse quoad omnia dona, si sibi permitterentur. Quid enim voluntate humana mutabilius? Quid viribus arbitrii imbecillius? Quid carnis & mundi illecebris potentius? Quid Satanæ furore violentius? Inde tamen neutiquam periclitatur perseverantia sanctorum, quippe quæ non nititur viribus hominum, sed gratuita Dei benevolentia, efficacissima Christi intercessione, & consolationis plenissima Spiritus S. obsignatione, qui ea dona, quæ sunt ἀμεταμέλητα, quale est donum fidei & sanctificationis, tanquam autor eorum, ita fovet & refocillat semper, ut extingui non possint. Neque tamen, quia certissima perseverantiæ spes est, exhortationes ad eam sunt supervacaneæ, quia non sunt cadendi, sed cavendi & perseverandi media, quibus fides conservatur, carnalis securitas depellitur, & nos nostræ imbecillitatis admonemur.

Tandem longissime de vicinia veritatis errant *Fanatici & Enthusiasta*, cœlestibus revelationibus gravidi; qui suis opinionibus, doctrinæ aut factis, extraordinarium divini spiritus prætendunt & mentiuntur afflatum, cui si contradicatur, spiritum exsibilari & extingui quiritantur. At vero Apostolus noster, dum Thessalonicenses hortatur, ne spiritum extinguant, non sublimiter eos arripit ad inanes sine verbo speculationes, sed continuo subjicit, non spernendas vel
nul-

nullius faciendas prophetias : quo procul dubio innuitur, spiritus lucem præfocari simul atque in contemptum veniunt prophetiæ. Quid ad hæc tumidi Enthusiastæ, qui hanc unam reputant eximiam illuminationem, ubi secure omisso ac valere jussu Dei verbo, quicquid stertendo conceperint, non minus confidenter, quam temere arripiunt ? Filios certe Dei longe alia decet sobrietas, qui, ut omni veritatis luce sine Dei spiritu orbatos se vident, ita non ignorant, verbum esse organum, quo spiritus sui illuminationem Deus dispensat. Alium autem spiritum nesciunt, quam qui in Apostolis habitavit & locutus est, cujus oraculis assidue ad verbi audientiam revocantur : qui ita suæ, quam in scripturis expressit, veritati inhæret, ut vim tum demum suam proferat atque exerat, ubi sua constat verbo reverentia ac dignitas. Mutuo enim quodam nexu Dominus verbi spiritusque sui certitudinem inter se copulavit, ut solida verbi religio animis nostris insadat, ubi affulget spiritus, qui nos illic Dei faciem contemplari faciat ; ut vicissim nullo hallucinationis timore spiritum amplexemur, ubi illum in sua imagine, h. e. in verbo recognoscimus. Non enim verbum hominibus communicavit Deus, quod spiritus sui adventu extemplo aboleret, sed eundem spiritum, cujus virtute verbum administraverat, submisit, qui suum opus efficaci verbi confirmatione absolveret.

Sed & quid contra admonitionem Apostolicam *MALI* designetur, diligenti æstimatione perpendendum venit. Dies me deficeret, omnia persequi tentantem. Omnia igitur, quæ ita extra rem sunt, ut nec circa rem quidem sint, relinquam, & ea saltem, quæ ad rem sunt, extremis, quod ajunt, digitis attingam.

Malum sine dubio, *extinguere spiritum sapientia & cogni-*

cognitionis. At quam multi extinguunt illum in se ipsis? Qui nimirum, postquam animus captus pravis cupidinibus ad inertiam & voluptates corporis perfundatus est, per socordiam vires, tempus, ingenium defluere sinunt, & dediti corporis gaudiis per luxum atque ignaviam ætatem agunt; nec minus tædio investigandæ penitus veritatis cuilibet potius opinioni temere succumbunt, quam in explorando pertinaci diligentia perseverant; & dum verborum lenocinio a rerum intentionibus avocantur, sine delectu assentiuntur dictis omnibus, nec a rectis falsa secerunt, nescientes, inesse & in incredibilem verum & in verisimili mendacium; vel si quid agunt, ingenium inter irrita exercent, & disputationibus nihil profuturis otium terunt; cum, cui ingenium est omnium bonarum artium capacissimum, hoc ipsum melioris ingenii pignus sit, non corrumpi bonitate ejus, ut illo male utatur. Torpent ecce cumprimis, idque parentum culpa, qui liberos luxuriose nimisque liberaliter habent, ut insuescant amare, potare, sacra profanaque omnia pollueri, divina atque humana promiscua, nihil pensi neque moderati habere, ingenia desidiosa juventutis, nec in ullius honestæ rei labore vigilatur; Cantandi saltandique studia effœminatos tenent, & capillum frangere pulvereque aspergere odorifero; fluctuantes jubas leunculorum more auris & curis agitandas ostentare bene pectinatas, discriminatas, in annulos coactas serpentesque, ad muliebres blanditias vocem extenuare, mollitiæ corporis certare cum fœminis, immundissimis se excolere munditiis, helluari, totos dies perpotare, cursando atque ambulando totas contere noctes, nostrorum adolescentium specimen est: cum isthoc illecebrosius nihil fieri possit, nox, mulier, vinum homini adolescentulo. At nimis homo nihili est, qui piger est & voluptarius, & si, cum faciem videas,
videa-

videatur esse quantivis pretii : vigilare decet hominem , qui vult sua temporis conficere officia. Nulli erit impune , talentum quodcunque fidei suæ concreditum terra obruisse ; nulli non piaculum , lucernam in candelabro ad usum erigendam sub modio nequiter occultasse.

Sed & indignandum indolescendumque est , jam inde a longo tempore in exteris Ecclesiis scholisque Spiritus Prophetarum contra se invicem insurgere , ut vix dici queat , cujus spiritus sint , qui , sive diro livore perciti , sive ambitione , quæ inter prima bonæ mentis impedimenta , turgidi , sive præjudiciis occæcati , sive zelo sine scientia & charitate abducti , spiritum in aliis extinguunt , inque eo sibi laudem eunt quæsitum , si procace in summa capita libertate insultare , magna nomina tanquam animalia gloriæ & venalia rumorum mancipia infamare , omne acerbitalis virus aut magno laterum nisu eructare , aut inani tumore & vanissimo verborum strepitu perituris chartis fastidiosè illinere , & manibus pedibusque obnixè omnia facere possunt , iis ut incommodent , qui non saltant ad ipsorum fistulam , etiamsi incertissimum edat modulamen.

Et si nostra nobis vineta cædere non displiceat , vereor sane , ut Apostolicæ admonitioni satisfiat ab iis , qui obliti , vetera & nova ita esse disponenda , ut & vetera a nobis recipiant nitorem , & nova a veteribus auctoritatem , ita a novitate abhorrent , ut eo ipso omnem in cognitione veritatis profectum velint diminutum , & aliis , qui in Reformatæ Ecclesiæ sententiam non solum pedibus , sed & manibus , imo toto pectore libentissime eunt , hac solum de causa volunt male , quia in explanandis scripturis multa observarunt , quæ a prioribus fuerunt præterita , atque adeo seorsim abire necesse habuerunt. Coeperunt
boni

boni (ita ut fit, ubi quid in animo est molestiæ ;) super hoc aliam rem ex alia cogitare , & ea omnia in peiorem partem , redeuntque ad illos , qui dicunt, quid si nunc cœlum ruat ? Est certe Scriptura Thesaurus , qui a nullis unquam , vel veteris vel recentioris ævi , Interpretibus ita est exhaustus , ut nihil amplius novi ex illo depromi possit ; & ad unumquemque nostrum pertinet mandatum Christi , quod est in ore omnium , *Scrutamini Scripturas* ; cuius vi obligati sumus , ut in primis etiam ex iis addiscamus mirabilia Dei opera in fatis Ecclesiæ conspicua , quæ manu Prophetarum ita sunt præformata & prædelineata , ut Historia futurorum appellari possint ; quorum quædam sua luce adeo radiant , ut in omnium fere oculos sese ingerant , modo sua sponte non claudant , quod facere solent Judæi , qui Messiam in scripturis non vident , & regnum ejus spirituale ignorant ; quædam vero nubibus sunt obducta , alia tenuioribus , alia crassioribus , quæ detegenda & evolvenda sunt majore quadam difficultate , adhibita antecedentium vaticiniorum luce , quæ ut prædicta olim sub V. T. nunc impleta sub Novo conspiciuntur ; cum quibus si cohæreant , quæ vel alii ante nos viventes impleta videre , vel nos nunc impleri videmus , idque certa quadam serie prophetica & ordine , non est quod dubitemus , nos in intelligendis SS. Literis profecisse . Sunt præterea plurima alia in scripturis , in quibus hæserunt Interpretes , sponte fatentes , nondum a se salubras omnes superatas , in quæ inquirere non potest esse *περίεργία ἀχρήστου πράγματος* . Imo quis unquam tam feliciter & accuratè vel unum scripturæ locum examinare aut interpretari possit , ut nemo valeat vel ipsum clarius explicare , vel aliquid amplius in eo observare , quod ad doctrinam , aut cohortationem , aut aliorum locorum conciliationem faciat ? Digna , quæ hæc allegentur , sunt verba Venerabilis BEZ Æ , ex
Epiſto-

Epistola ejus ad ANDREAM DUDITHIUM; An nunc Deus O. M. Spiritus sui lucem intelligendis scripturis parcius quam antea largitur? Minime profecto; quanquam si hoc faceret, juste profecto faceret. Et hoc spero mihi concessuros, quicumque vel unicum linguarum donum nostri temporis hominibus collatum tanti fecere, quanti fieri debet; & (absit verbo invidia) multorum nostræ memoriæ scripta cum veteribus etiam excellentissimis comparabunt. Hæc scripsit vir ille Dei anno temporis novissimi supra millesimum quingentesimum septuagesimo. Quid illum, si hoc tempore post centum triginta & quod excedit annorum decursum viveret, dicturum putamus, quo studium linguarum principum ^{expun} quasi concedit? Annon illum plurima hodiernorum scripta Theologica cum sui temporis etiam præstantissimis comparaturum existimamus, cum intelligentia scripturæ abundantior postremis reservata sit temporibus? (b.) Haud igitur exsufflandus videtur illorum conatus, qui (ad quod aliquoties excitat, ab omnibus attendendus & sequendus inter candelabra aurea Peripatericus, qui habet aurem, audiat, quid spiritus dicet Ecclesiis;) in animæ solamen piè, modeste, & debitis mediis, ea eruere satagunt, quæ spiritus eo fine tradidit, ut investigantis industriam utilitate compensaret. Certe accuratius scripturæ scrutinium contemnere, & charismata Spiritus S. in scriptis magnorum virorum, penes quos acumen in imam penetrans veritatem, ubique fere intermicantia negligere, imo (horresco referens!) tanquam nugas & proprii cerebelli phantasmata susque deque facere, quid aliud sit quam spiritum extinguere, & prophetiam (per quam fit, ut verbum Christi copiose habitet in Ecclesia, atque ita cognitio Dei abundet, ut terra ea impleatur, sicut fundus maris aquis:) (c.) pro nihilo habere, non video.

Tom. III.

P

Sed

(b.) Dan. 12: 4. 9. 10. (c.) Esaj. 11: 9.

Sed quid de *Spiritu pietatis & timoris Domini*? E-
quidem non diffitendum est, nonnullos (id quod
suar, quam moliuntur, separationi ab Ecclesiis no-
stris prætexunt;) haud immerito conqueri, sinceram
atque illibatam pietatem, præcipuum spiritus donum,
& omnium virtutum clarissimam, per quam cæteræ
fulgent & dignissima luce se commendant, tantum
non *extinctam* inter nos jacere. Christus olim ἐν πνεύ-
ματι πνεύμασιν ἐκήρυξεν. (d.) Et nobiscum spiritus Chri-
sti contentionis ferram adhucdum reciprocatur. At
quot ἀπειθεῖς, qui spiritui contumaciter reluctantur?
Nunquam vel lamentari vel irasci desinet pius, si
semel cœperit; hebescit virtus, omnia sceleribus ac
vitiis plena sunt, neque quicquam hîc vile nunc est
nisi mores mali; eorum licet jam messem metere
maximam: plurimi mores majorum laudant, sed
eosdem lutulant, quos collaudant. Certatur ingen-
ti quodam nequitiae certamine; major quotidie pec-
candi cupiditas, minor verecundia est. Expulso me-
lioris æquiorisque respectu, quocunque visum est,
libido se impingit, nec furtiva jam scelera sunt, præ-
ter oculos eunt, adeoque in publicum missa nequi-
tia est, & in omnium pectoribus evaluit, ut inno-
centia non rara, sed pene nulla sit. Plerique ho-
mines, quos, cum nihil refert, pudet; ubi puden-
dum est, eos deserit pudor, cum usus est, ut pudeat.

Quid insuper de *Spiritu Charitatis*? Extingui illum
magis magisque, charitatem perfrixisse, & Christi
nomen professos in mutua odia sævire, res ipsa lo-
quitur. Alter alterius imminet exitio, & fratrum
quoque gratia rara est. Nemo nemini verum loqui-
tur ex amore, blandimentorum venena nobis propi-
namus promiscue, latitante interim odio interneci-
no & zelo plusquam amaro in corde, qui subinde
nullo lenitatis spiritu adhibito in maledicta erumpit;
isthic enim est thesaurus stultis in lingua situs, ut
(d.) 1. Petr. 3:19. quæ-

quæstui habeant male loqui melioribus. Ubi is est Amicus, qui in re dubia re juvat, ubi re est opus? Quid se retulit beneficum esse oratione, si ad rem auxilium emortuum est?

Quid denique de *Spiritu roboris & fortitudinis*? qui superveniens suis, mundum per eos arguit iniquitatis admixtæ, æquitatis prætermixtæ, & suorum omnium scelerum, sed & illos contra omnia satanæ machinamenta & satellites animosos reddit? Annon *extinguunt* illum *Δειλοί*, timidi & meticulosi, qui, si homines capiundos sibi inimicos esse sciant, impostorum instar, alienam mentiri personam, quam quod credunt profiteri, malunt; quibus formido obstat, quo minus id quod oportet loquantur aut faciant, vel audeant se iis opponere, qui veritati pietatique resistunt, quia illos defendit numerus junctaque umbone phalanges: vel purum putum Dei sermonem tradere, quum homines veritate non gaudent, sed quærunt doctores secundum pruritus aurium: qui, quum secundæ res sunt maxime, haud secum meditantur, quo pacto adversam ærumnam ferant, pericla, damna, exilia, mortem; ideoque quod fors fert, æquo animo ferre non possunt?

Reliquum est, ut, quid secundum Apostoli admonitum a nobis omnibus *BONI* requiratur, paucis expediamus.

Omnes, qui præclaris a Deo insigniti sunt spiritus donis, decet ante omnia, obsecrare quotidie Deum, ut hoc constanter possint gaudere bono; dein summa ope niti, ne vitam silentio transeant, sed ut Dei gloriam proximique commoda promoveant, ad gloriam virtutis via grassentur, & integerrima vita, suavissimo consortio, pulcherrima conscientia famam sibi perpetuam conficiant, sicque ceteris præstent ingenii, doctrinæ, & virtutis gloria hominibus;

Luceat Lux illorum coram hominibus, nec sit spiritus in iis, sicut lampades fatuarum virginum, quæ sub adventum sponsi extinctæ sunt, quia oleum ad manus non habuerunt; (scitum est, periculum ex aliis facere, tibi quid ex usu fiet:) sed ut Lucerna mulieris strenuæ, quæ noctu non extinguitur: (e.) imo ut ignis, qui diu noctuque in altari olim ardebat.

Quos ab aliis distinxit divina benignitas, & maioribus donorum ornamentis sustulit, PATRES PATRIÆ, communis iustitiæ & æquitatis Præsides; illud submissiore agnoscant animo, seque tanto magis obstrictos agnoscant, ne spiritum extinguant, sed ut a se removeant scelera & flagitia, & cogitationes improbas, & avida consilia, & libidinem cœcam, & alieno imminentem avaritiam, quæ, ubi in animos Magnatum veluti tabes invaserit, in polypos eos convertit, qui sibi quicquid tetigerint tenent; qui magnitudine pecuniæ a bono honestoque in pravum facillime abstrahuntur; quorum animis avidis atque insatietatibus neque lex neque tutor est, qui capere possit modum: ut discant continentiam augere, luxuriam coercere, gulam temperare, iracundiam lenire, paupertatem æquis oculis aspicere, spes effrenatas & animum in futura eminentem velut sub vinculis habere; bonum publicum privatæ gratiæ anteferre; non unam modo, sed & alteram partem audire; iustitiam ita administrare, ut nec propter invdiam adimant diviti, nec propter misericordiam addant pauperi; ut sint sermone affabiles, accessu faciles, vultu venerabiles, æquis desideriis propensi. Eam demum felicitatem ac supremum illud bonum iudicent, non quod in opibus, honoribus, purpura ac sceptro consistit, sed quod propius mentem conjungit Deo, castamque & illibatam conscientiam cœlo imponit. Sic iis feliciter cuncta provenient, opulentia,

(e.) Prov. 31: 18.

lentia, pax, copia, sanitas, & divina majestate protecti subditos felici gubernabunt imperio.

Sed & iisdem curæ sit, dona spiritus in aliis fovere. Summa sæpe ingenia in occulto latent, sub fordido palliolo & paupere tecto sæpe etiam virtus ingeniosa latet; At haud facile emergunt, quorum conatibus obstat res angusta domi. Ne igitur illorum domus extinguantur, & generoso in coelum fervensque pectus honesto refrigeretur, præmiis excitandi, muneribus decorandi sunt; neque existimandum, in bidental abjici sumtus, qui alendis iis fovendisque impenduntur. Decet omnino principe loco positos, homines magnæ spei haud insuper habere, sed lætis aspicere oculis, & virtuti favorem debitum non inficiari. Neque enim, qui vitæ formandæ apti nati sunt, vitæ commodis carere verum est, ut nihil iniquius, quam ut, qui se vitiis dedecoraverè, bonorum præmia ereptum eant.

In vestris quoque auribus nunquam non insonet Apostoli vox, *spiritum ne extinguite*, VIRI FRATRES, sive jam erudiendæ publi scholasticæ vacetis, quæ semet ipsam ministerio verbi divini in Ecclesia addixit; sive fidelem plebem doceatis ea, quæ ad salutem sunt necessaria, & profectum urgeatis in ulteriori doctrinæ veritatis, quæ est secundum pietatem, cognitione, & mores ipsorum informetis in timore Dei & charitate erga proximum. Si sub modio delitescat lux vestra, vel in tenebris plus non dirigat quam ligna putrida & lampyridum stricturæ, frustra *lux mundi* vocamini. Sacris igitur meditationibus impallefcite; Legem Dei in scripturis revelatam, quo nomine legem fidei & quæ ei succenturiantur intelligimus, diligenter scrutamini, ut ita tanquam homines Dei ad omne opus bonum sitis instructi. Sit apud vos ἀποδείξις πνεύματος καὶ δυνάμεως

πνευματικῇ καὶ δυνάμει, quæ, quia habet comitem Spiritum S. divina potentia armatum, non in vestibulis hæret, sed in interiores cordis recessus penetrat, & præjudicia extirpat; non tumultuantes affectus, qui impediunt animum, ne possit cernere verum, excitat, sed eos potius sub obedientiam Evangelii subjugat; intellectum illustrat, ut cœlestem bonorum suavitatem percipiat, & voluntatem flectit, ut illa firmo assensu & fiducia amplectatur, iisque innitatur imperterrita, neque ullis minis, promissionibus, ullave vi humana se inde abstrahi patiatur. Ne veritatem quærentibus præstringant oculos clara nomina & auctoritas, quæ liberum non relinquit animum ad speciosa stupentem; nec expectentur testimonia humana, cum præcedunt divina suffragia. Sicut in Paradiso innocentiae signum fuit nuditas, ita hucusque veritas Dei melius spectatur nuda, quam humanis velaminibus obtecta. Absit a nobis illa Josuæ indignatio, qui Eldad & Medad prophetantes in castris a Mose cohiberi petiit, at responsum accepit dignum Mose, dignum omnium seculorum memoria: *An invides tu mea causa? Utinam totus populus essent Prophetae, indente illis spiritum suum Jehova. (f.)* Hinc JACOBUS Apostolus, *An putatis, inquit, scripturam κενῶς, inani-ter dicere: An ad invidiam fertur spiritus, qui sedem posuit in nobis? sed majorem affert gratiam. (g.)* q. d. An Spiritus S. quo regeneriti, quo Christiani facti sumus, cujus nos sacra sedes & templum sumus, cujus nutu regi nos oportet, & an spiritus ille vel suapte inclinatione fertur, vel eos, in quibus habitat, vitiosa cupiditate impellit ad invidiam, ut aliorum bonis & donis indoleant? Absit: imo vero majorem dat gratiam, facitque, ut quisque bonis proximi gaudeat, plura & majora ei apprecetur, ex iis uti suis voluptatem capiat, & ipse denique ita instituens gratiæ di-

vinæ

(f.) Num. 11: 28, 29. (g.) Jac. 4: 5.

vinæ incremento augeatur. Vix dubitandum, quin *Jacobus* ad id digitum intenderit, quod *Moses* spiritu Dei plenus de spiritu illiusque operationibus loquens *Josue* invidenti aliis communionem spiritus dixit: Ecquid tu mea causa invides, meque ad invidiam excitas? An hoc dignum eo spiritu, qui in me, qui in te sedem fixit, & in aliis figet pro lubitu? Bona invicem concordia atque sincera amicitia alter alterum colat observetque, damnatis mutuis odiis infestoque despectu, quum omnes pariter ad decorandam Dei Ecclesiam civitatemque accersiti simus. Diversi generis columnæ æquo ornamento unum insigniunt palatium, dum quæque sua posita loco, suisque destinata usibus, majore excellentia auget structuræ dignitatem, præstanti diversitate insignem. Nos quoque, qui imparibus gaudemus donis, oportet despiciere neminem, aut proximi expolitas minus eminentesque fastidire virtutes, si ipsi altioribus præstamus dotibus, quum & illum suo loco decorum Deus collocet, etsi tantis eum muneribus non ornaverit. Sed & eadem postulat ratio, ne alteri suas invidiamus virtutes, & diro hinc livore contabescamus, quum, etsi minores nobis adsint dotes, loco tamen nostro pulchri insignesque stemus. Si nos quibusdam videmus antecellere virtutibus, quæ alteri haud accessere, animadvertamus, nos forte etiam quibusdam implicatos vitiis, quæ alios non contaminant. Ita quisque sua bona ac mala possidet, omnesque nævis nostris laborantes, nihil habemus quod non alter alteri exprobrare possit. *Spiritus Prophetarum Prophetis subjiciantur*, (h.) neque ex hominum placitis, sed ex scripto Spiritus S. dictamine sapiamus; depositum solícite custodiamus; externum mundi typhum interni hominis tranquillitati postponamus; exsuscitemus gratiam nobis collatam, & obliviscentes ea quæ retro sunt,

P 4

exerto

(h.) I. Corinth. 14 : 32.

exerto quasi collo, irretorto oculo & constanti gressu, ad destinatum supernæ vocationis brabæum nosmet ipsos extendamus, nec magna solum loquamur, sed & vivamus; maximum enim hoc est & officium sapientis & indicium, ut verbis opera concordent, neque orationi vita dissentiat. Qui legem Dei veluti certissimam dirigendæ vitæ cynosuram aliis commendatam vult, ipse vero cursum suum alio obliquat, lineas præscriptas turbat aut transilit, ad legem & testimonium non attendit, quem institutionis suæ polliceri sibi ausit fructum?

Turpe est doctori, cum culpa redarguit ipsum;

si addas, *At fateor monitis sum minor ipse meis*; confessionis hoc quidem speciem sæpe habet, sed scandalum non tollit. Imposita sunt patriæ ab impietate & impudenti dissolutius vivendi licentia vulnera, ea sunt a nobis sancti zeli, pietatis, integritatis, & scientiæ mediis sananda. Toleremus invicem in spiritu charitatis, & cum unanimes simus in fundamento, liceat in cæteris dissentire salva gratia, si salva conscientia consentire non semper possumus.

Diversum sentire duos de rebus iisdem

Incolumi licuit semper amicitia.

Sed ad vos me converto, Studiosi & Candidati ornatissimi, qui foro vos & honoribus paratis, in quibus ipsa quæ sperantur timenda sunt. Magna est hominum opinio de vobis, magna commendatio ingenii, magna spes industriæ: magnus Literarum, cum primis sacrarum, scientia campus, omnibus apertus ad laudem cursus. Vita brevis, ars longa, iter longinquum, parum viatici; multa restant peragenda, & nox appropinquat, in qua (monente Servatore) nemo potest operari. Si huic occasione tempus sese sub-

subrederit ; nunquam quadrigis albis indipiscetis
 postea. Maſti igitur nova virtute ; *Spiritum ne extin-*
guite ; ἀναζωπυγεῖτε, quæ in vobis, charismata ejus ;
 excitate, quos habetis, igniculos ; studete opprime-
 re hanc, quæ obvenit, occasionem : facite, ut, quod
 recto consilio ac flagranti cupiditate ingressi estis, id
 peracri contentione exequamini usque ad extremum.
 Sunt prope in speculis homines, & omnes observant,
 quomodo se gerat unusquisque vestrum ; nec tan-
 tum vos amici & studiosi vestrarum laudum, sed eti-
 am obrectatores & malevoli intuentur : pudeat ab
 illis vestram acculari, ab his videri, negligentiam &
 levitatem ; facite, ut alteros juvet bene velle, alte-
 ros invidisse poeniteat ; hæc vobis cura suscipienda,
 hæc opera sumenda est ; nihil aliud agite, nullum
 aliud vestrum esse officium ducite, nisi ut, quo ab-
 undatis ingenio, cum re ita studium certet, ut in dif-
 ficili existimatione, utrum præstet alteri, utriusque
 non modo laudem sed & admirationem consequa-
 mini. Nolite quæso per ignaviam amittere, quod
 vobis est in manibus ; tanta vobis sit bonarum rerum
 cura, quanto studio aliena ac nihil profutura mul-
 tumque etiam periculosa alii petunt, & eo magni-
 tudinis procedite, ubi pro mortalibus gloria æterni
 fiat. Prospicite vobis, prospicite existimationi, pro-
 spicite æternitati : viget ætas, ad summam laudem
 omnibus rebus ornata ; animus valet, quem nihil
 nisi excelsum magnificumque delectat ; magnum
 quiddam est, quod a vobis vestrum & genus & in-
 genium, quod hi Mecœnates, quorum consiliis ve-
 stra studia reguntur, quod omnes, qui hic adsunt &
 vestris favent conatibus, Clarissimi Viri, non exspe-
 ctant solum, sed & postulant, qui etiam vos taciti
 mecum hortari videntur ; &, si quæ vobis proposita
 est merces multo magis, quam cujusquam oratio,
 incitare debeat ; Ne illi falsi sunt, qui diversissimas

res pariter expectant, ignavia voluptatem & pramia virtutis ! Ambulat inter candelabra ἐργασίας vobis & ἀγωνοθέτης , qui laboranti, vincenti, perseveranti , coronam , thronum , stellam matutinam , alba vestimenta , gratis porriget , quæ nemo auferet. Eritis ut mons Zion , qui æternum non movebitur , ut palma vel cedrus in Libano extendetis ramos ; non defluet folium , non arescet radix , non extinguetur lucerna ; fluet unda de situlis vestris ad multorum refrigerium. Eja igitur excitet quivis quod in se est donum spiritus , & quotidie pridie caveat , ne faciat , quod pigeat postridie. Semper in hoc facito cogites , id optimum esse , tute ut sis optimus : si id nequeas , saltem ut optimis sis proximus.

Sed

*Adsunt & illic Spiritus ,
Sunt sed magistri criminum ,
Vestræ & salutis aucupes ,
Vagi , impotentes , sordidi.
Qui vos latenter incitos
In omne compellunt nefas. (i.)*

Hi spiritus , posteaquam simplicitatem substantiæ suæ onusti & immersi vitiis perdidierunt , ad solatium calamitatis suæ non desinunt perditum jam perdere , & depravati errorem pravitatis infundere , & alienati à Deo inductis pravis religionibus à Deo segregare. Itaque quia in solatium perditionis suæ perdendis hominibus operantur , omnia insidiis , fraudibus , dolis , erroribus complent. Inde ab orbe condito ad hunc usque diem nihil prætermisit Diabolus cum Angelis suis & spiritibus seductoribus , quod hominem miserum aut debilitaret aut perderet ; ideo se in omnes formas multiplici diversitate convertit ; ideo se di-

versi

(i.) Prudent. in Vincent. Mart. v. 77. fqq.

versi generis calliditate composuit, ut variis ac multiplicibus fraudibus homines irriteritos interimeret. Ex illius instinctu infelicem animum nunc superbia inflammas, nunc cupiditate distendimus; alias voluptate laxamus, alias solitudine exurimus. Hic spiritus ille veterator est, cujus pravas suggestiones, hic nequam ille spiritus, cujus spicula & jacula ignita (k) per fidem extinguere debemus. Sanguis autem Christi per fidem haustus salutare remedium est, quod à Dei plebe mortiferum serpentis antiqui virus excludit, & ignem exstinguit, qui perpetua tormentorum continuatione grassatur.

Sed ad finem decurrit nostra oratio.

Sit Tibi, o benignum NUMEN, Sancte Spiritus, Domine & Gubernator mentium Angelicarum & humanarum, laus & gloria pro tua in nos gratia; perficiatur tua virtus in nostra infirmitate; da cautelam periculis, morbis medelam, spem afflictis, opem miseris, solatium calamitatibus, laboribus levamentum; inspira salutare motus: manuduc nos per omnes hujus mundi anfractus, ut non intelligamus tantum, sed & sentiamus & palpemus ea, quæ Deus nobis est gratificatus: præserva nos ab erroribus, qui salutem damnum inferrent; concede nobis istam σύνεσιν, qua perpendamus ea quæ audimus, ut per nos ipsos ex certis principiis, quid rectum sit & veritati revelatæ congruum, ad amissim decernamus: dirige tanquam Lucifer exorians nostris in cordibus τὴν εἰλικρινὴν διάνοιαν, sincerum mentis nostræ judicium, ut expergefiat juxta sacra monita ad devotum veritatis scrutinium; Confer αἰσθητήρια γεγυμνασμένα, exercitatos sensus, qui per habitum a lacte solidiorem cibum, à malo bonum noverint expedite distinguere. Qui quasi

(k) Ephes. 6: 16.

quasi gallina maturandis ovis primigeniis incubabas
 aquis, omnes nos sub alis tuis collige, & semper
 fove; leva super nos lucem vultus tui, & Facies tua
 gratiosa nobis præluceat in omnibus conatibus & cœ-
 ptis nostris; qui descendisti sicut columba ad Serva-
 toris lavacrum, inde pectoribus nostris mansuetudi-
 nem istam simplicem & columbinam, qua & amicis
 grati, & hostibus non suspecti, beatitudinis scalam à
 Servatore propositam ascendamus. Surge Aquilo &
 veni Auster, perfla hunc hortum, ut fluant illius aro-
 mata in omnes Ecclesiæ, Scholæ, Reipublicæ angu-
 los, quæ carnes nimium ferinas, otio & luxuria pu-
 trescentes salubriter & sincere condiant, & à foetore
 conservent. Sanctifica nos magis magisque indies, &
 ita in omnem veritatem virtutemque dirige, ut refi-
 ciantur quasi & inebrientur corda nostra non inter-
 rumpendo solatio, donec Deus nos à corporis mi-
 seri carceribus emissos beato cœlitum choro permi-
 sceat, ubi Deo pleni æternum gaudebimus & soli-
 dum gaudium.

D I X I.



JOH.

JOH. CASPARI BRUNNERI VITA.

JOH. CASPARUS BRUNNERUS patriam fortitus est, veterem illam optimorum ingeniorum, ad omnis eruditionis laudem efflorescentium, nutriculum, TIGURUM nostrum. Patrem habuit ex honestissima & vetere Familia JOH. CASPARUM BRUNNERUM, Pastorem Zollickonensem per quadraginta & quod excurrit annos Vigilantissimum, & in Templo Cathedrali Præconem facundissimum. Matrem verò REGULAM WYSSIAM, sanctissimam ac præstantissimam foeminam, quam vel ex Filio agnoscas. Avus Paternus fuit JOH. RODOLPHUS BRUNNERUS, Art. LL. in Collegio, quod ab Humanitate nomen habet, Professor Celeberrimus: Maternus verò Reverendissimus quondam Tigurinorum in Æde Abbatissiana Ecclesiastes, FELIX WYSSIUS, variis ingenium, eruditionem & pietatem spirantibus scriptis Clarissimus atque Celeberrimus. Non ergo BRUNNERUS noster obscure natus fuit; natus autem fuit prid. Id. Decembris. An. MDCXLIX.

Puer provide & curate à laudatissimis Parentibus educatus, cumque in finem ab ephebis pædagogo immissus est, cujus classes omnes non sine modestiæ ac diligentiae singularis laude superavit, donec ad superiora illustis Gymnasii phrontisteria rite promotus fuisset: Ubi tunc studiis Humanioribus Philosophicisque primum, dein præcipue Theologicis, sub ductu Clarissimorum Dn. Professorum, cum primis Virorum de Ecclesia Jesu Christi & Rep. Literaria meriti-

ritissimorum CASP. SUICERI, JOH. HENR. HOTTINGERI (*cujus præmaturum & tragicum exitum solenni deploraverat oratione*;) JOH. LAVATERI, J. H. HEIDEGGERI, JOH. MULLERI, assiduam felicemque navavit operam; secuto profectuum non mediocri specimine, Disputatione *De Baptismo pro mortuis*, An. MDCLXVIII. Mox, cum in Examinibus votis Ven. Præsidium abunde fecisset satis, Ministrorum Verbi Divini albo V. Kal. Mart. An. MDCLXIX. insertus est.

Quum vero non omnis ferat omnia tellus, nec unus angulus omnia præclara sibi vendicet ingenia, noluit ὁ μακαρίτης noster paternæ domus semper custos esse, quapropter ad pertexendam studiorum telam capeffendumque majorem animi cultum, (Socio Excellentiss. postea M.D. Physices in Athenæo nostro Professore & Canonico, DN. SALOM. HOTTINGERO;) III. Kal. April. An. MDCLXIX. iter instituit literarium, per Germaniæ, Belgii, Angliæ & Galliæ Academias. Lugduni Batavorum cum primis per aliquod tempus commoratus, Viros toto orbe Celeberrimos, COCCEIUM (*cui a Cl. HEIDEGGERO & HOFMEISTERO intime commendatus erat. Vide sis Ep. CCCCLI. & CCCCLII. Tom. II. Oper. Posthum. p. m. 796, 797. insertas.*) & HILDANUM, audivit Londini viros itidem doctissimos consuetudine sua sibi devinxit. Oxoniæ verò Cel. THOM. BARLOW, Collegii Reg. Oxon. Præpositum & pro D. Margarita SS. Theologiæ Professore publicum, EDUARD. item POCOCKIUM, Lingg. Græc. Hebr. & Arab. Prælectorem doctissimum, aliosque qui inter doctos eruditosque principatum obtinebant salutavit, mensa saleque usus Cel. THOM. HYDE,

HYDE, Protobibliothecarii Bodlejani, (*Tractatum tunc de Ludo Latrunculorum meditantis*;) cujus manu-
 ctione per bimestre Bibliothecam Bodlejanam, eo-
 dem quo GUILHELMUS, *Hassie Landgravius*,
 Parisiis postmodum diem functus, tempore, sedulo
 iustravit. Oxonia relicta LUTET. PARISIO-
 RUM appulit, ubi itidem varias Bibliothecas, &
 publicas & privatas, inspexit atque perreptavit; Hinc
 prid. Kal. IXbris profectus per Burgundiæ Comita-
 tum, vulgo *Franche Comté*, patrios petiit lares, suo-
 rumque amplexibus est redditus An. MDCLXX.
 exeunte.

Reversus Christum frequenter ex suggestu præ-
 dicare magno cum successu & applausu orsus; Ven.
 Parentis aliorumque, Rev. cumprimis MURERI,
 Pastoris in *Buchs* emeriti, vices alacriter suffulcivit;
 quo tempore tantam eruditæ pietatis sibi famam con-
 ciliavit, ut ex Ven. Præsidibus essent, qui illum &
 ad Ephoratum & ad Professionem Theologiæ Cate-
 chetiæ promoveri cupiebant.

Cum ad constituendam deinceps familiam ani-
 mo cogitationeque se NOSTER converteret, No-
 bilissimam suique Sexus ornamentis decoratissimam
 Virginem CATHARINAM HOSPINIANAM,
 Viri plur. Venerandi, RODOLPHI HOSPI-
 NIANI, *Collegii Carolini quondam Præpositi, & Ludi-*
magistri, Gnatam, Magni illius Polyhistoris R. HO-
 SPINIANI, ut & Theologi JAC. HULDRI-
 CI ex Filia abnepten, sibi An. MDCLXXII.
 Conjugem legit, quacum pie atque jucunde annos
 plusquam unum & viginti vixerat; Hæc illi, larga
 Dei benignitate, septenam progeniem dedit, at libe-
 rorum

rorum tres tenelli fere diem suum obierunt, Filia vero tres tribus (a.) etiam Pastoribus nupserant, de quibus sigillatim dicere instituti non est; Filius autem unicus (b.) Pastor Rorbacensis, (ubi lucem primo aspexit, ubi & Pater, ut mox videbimus, Pastoris officio functus erat) fuit creatus.

Menſe VIIbri An. M D C L X X V I. Paſtor Rorbaceniſis Mureſ miſere necatus atque truncatus una cum Sorore & ancilla in ædibus paſtoralibus inveniebatur; quiſ flagitii huius immanis atque nefandæ autor fuerit, in hunc uſque diem, exactiſſime licet inquiſitum ſit, ignoratur. Huius loco ſuſſectus fuit Venerandus noſter, qui etiam in hoc ſuo munere recte laudabiliterque tuendo, omnes, ut par eſt, nervos ætatis, ingenii, induſtriæque exſeruit; ſtudebat namque docta atque igne caritatis incenſa oratione ex animis hominum vitiorum radices evellere, & contrarias illis virtutes inferere; privatis vero ſermonibus non ceſſabat ſuis opem afferre, afflictoſ conſolari, errantes in viam reducere, peccata in odium adducere, pacem componere, ad diſcordiam cauſas, ſi quas inter aliquos intercedere noverat, funditus tollere. Quæ oratio apud ſuos gravior habebatur, quod cum ejus vita mirabiliter congruebat. Cumque per luſtra duo, magna ſanctitatis cum laude

(a.) Vel quatuor, maxima nimirum natu Catharina, primo Coniuge gaviſa eſt D. Antonio Kittio, Paſt. Medio-laceniſi, ſecundo D. Rod. Rhanio, Paſt. Rikenbaceniſi; altera, Regula nomine inſignita, nupſit D. Joh. Conrado Reutlingero, Paſt. Alſtettano & Ven. Claſſis ad Lac, Tig. Camerario, Socero Colendiſi. tertia vero Eſther, D. J. Jac. Oerio, Paſt. Delliconenſi; Earum nonniſi prima adhuc ſuperſtes eſt.

(b.) Rodolphus, qui obiit 1721.

de, inter Rorbacenses suos vixisset, factum est, ut a Venerabili Canonorum Collegio ad Diaconatum Ecclesiæ Cathedralis An. MDCLXXXVII. Id. Februarii vocaretur.

Denata fidissima thori Socia, secundas vere secundas iniit nuptias cum honestissima Matrona DOROTHEA SPÖNDLINA, Domini CASPARI SPÖNDLINI *Plebis Tribuni* Filia, ex octo primogenita, (ex hisce binæ binis Consulibus DD. JAC. ESCHERO & JAC. HULDRICO nupserant;) CASPARI CLINGLERI, Fratris ANTONII CLINGLERI S. S. Theol. Doct. pereximii atque Ecclesiæ Antistitis, relicta vidua.

Tandem tandemque maximo suo merito Canonicus atque Archi-Diaconus I. fuit creatus Anno MDCCIV. XIV. Januarii. (c.) Munus hoc suum singulari diligentia, & fide ac dexteritate pari administravit, nihil sedulitatis & curæ defugiens, ut Ecclesiæ Christi prodesset. Concurfus civium ad eum audiendum haud leves erant, omnia quippe aderant in eo, quæ in Oratore sacro desiderantur; formæ dignitas, oris decor, orationis elegans copia, verborum sane bonorum cursus, quæ non magis suaviter in aures influerent, quam cum pondere in animos caderent; Vitæ probitas & integritas, sine qua omnia, quæ sunt in Præcone bona, vilescunt; quibus virtutibus assequeretur, ut voluntates Auditorum sibi mire conciliaret.

At, quæ humana inconstantia est, non diu officio huic præfuit, corpus quippe habuit male constitutum,
 Tom. III. Q

(c.) Concionem Inaug. habuit d. 9. Martii, in 2. Tim.
 2: 3.

tutum, ægrum, infirmum & acerbissimo podagræ & calculi dolori (cui minime par fuisset perferendo, nisi Deus animi robur ipsi inspirasset,) fere semper obnoxium, quo factum est, ut celerius quam ætas illius, nondum morti matura, postularet, vitæ munus impleret; Festo enim omnium sanctorum, pridie Synodi, *An. MDCCV. inter devotas preces & suspiria, postquam integris sensibus nihilque prorsus turbata mente, crucis onus se patienter ferre, quin imo CHRISTUM JESUM crucifixum in corde habere, ultimis verbis testatus erat, (d.) divinam illam animam DEO Creatori & JESU CHRISTO Redemptori lubens reddidit, atque sic ad *μυριάδας ἀγγέλων, πανήγυριν καὶ ἐκκλησίαν πρωτόδικων ἐν οὐρανοῖς ἀπογεγραμμένων* discessit, expletis in hac mortali vita annis sex supra quinquaginta. Quantum & quam triste Doctrinæ, Probitatis, Eloquentiæ, Prudentiæque desiderium suæ bonis omnibus reliquerit, is facile cogitatione assequetur, qui sapientis illius dicti meminerit, *tum denique nostra nos intelligere bona, cum, quæ in potestate habuimus, ea amisimus.*

Plura ingenii & pietatis monumenta reliquit, quæ tamen, singulari quadam animi magnitudine, a rerum omnium humanarum despicientia ducta, typis

(d.) Inter intensissimos atque effrenatos calculi dolores ὁ μακαρίτης noster, paucis ante beatam ἀνάλυσιν momentis, ex noto illo Hymno Ecclesiastico. Ach Gott und Herz! wie groß und schwer, &c. misericordiam misericordis summi Sacerdotis hisce implorabat atque exposcebat verbis: Soll's ja so seyn, daß Straff und Peyn auf Sünde folgen müssen, so fahr hie fort, und schone dort, und laß mich hie wohl büßen! Gib, Herz! Gedult, verzeiß der Schuld, verleihe ein ghorfam Herze, &c. &c.

pis mandare noluit ; spectant huc Meditationes in
 GENESIN Tomis V. in EXODUM Tom. III.
 in PROVERB. decem priora capita Tom. II. in
 CANTIC. capita sex & partem septimi Tom. I.
 in Matth. capp. XII. priora Tom. III. In Nov. Test.
 Fragmina, de quibus videatur Præfatio Viri pl. Ve-
 nerandi JOH. HEINRICI FRISII Pastoris ad
 D. Petri Vigilantissimi meritissimique Tom. I. Oper-
 Bibl. *Schriftmäßige Erklärung und Zueignung des ganzen
 Neuen Testaments.* pag. 7. seq. taceo alia minora. Ex
 hisce operibus, ut jamjam monui, publici juris nihil
 fecit, nisi Dissertationem supra citatam & Concio-
 nem in funus Nobilissimi Hans Meisen, Domini de
 Norbass, Zeuffen und Freyenstein, ex Philipp. I: 21. die
 30. VIIIb. 1680. habitam. זכר צדיק לברכה :

TANTUM.



Q₂

LUDO-

III.

LUDOVICI TRON- CHINI.

V. D. M. ut & S. S. Theologiæ in Academia
Genevenſi Profeſſoris Publici,

ORATIO

Inauguralis,

De requiſitis Doctōris Evangelici.

In 2. Tim. II: 23 - 25.

Cui adjecta Vitæ, Fatorum, Obitus & Operum

V. CL. JOH. ALPHONSI TURRETTINI DESCRIP TIO.

IN quacunque Diſciplina vel diſcenda vel docenda, præter ingenii ac animi dotes neceſſarias, duo ſunt, ſine quibus aliquis ſucceſſus vix poſſit exſpectari, quæque juncta maximam vim a ſe invicem mutuantur, *Regulæ & Exempla*. Ope *Regularum* aperitur via, qua propoſitus finis certius, promptius, feliciter attingitur, & obſtacula, quæ occurrunt, devitandi aut

aut superandi modus indicatur : *Exempla* vero Regularum utrumque viamque sequendam velut digito commonstrant, & eam in animis ingenuis æmulationem ingenerant, qua ad præstantium & clarorum virorum imitationem potentissime feruntur. Ab utroque illo scientiarum acquirendarum medio materiam dicendi in præsentiarum sumere, me, *Professionem Theologicam* auspicantem, maxime decet. Verba **PAULI** mox lecta optimam cœlestis hujusce Disciplinae tractandæ normam præbebunt, a qua declinare sit nefas ; & Magni **TURRETTINI**, quem lugemus, commemoratio efficacissimum nobis erit incentivum, ut eximii illius Doctōris Christiani vestigiis toto conatu nostro insistamus. His duobus constabit Oratio : Et prius quidem sine mora aggredior, iis parum utilibus exordiis, quibus, qui publice dicunt, Auditorum benevolentiam captare solent, prætermisissis, ne longius quam par est procedat Oratio, & ut vestræ patientiæ consulam.

PAULUS a Doctore Christiano tria desiderat, 1. Ut sapientem habeat delectum inter ea dogmata, illas disquisitiones, quæ ad res Theologias vulgo referuntur. *Rejice*, inquit, *stultas & ineruditas disquisitiones, quæ, ut scis, pugnas gignunt &c.* 2. Ut Doctōr Christianus sit *didacticus*, i. e. ad cœlestem disciplinam aliis instillandam idoneus. 3. Ut erga eos, qui controversiam ipsi movent, & quidem erga contumaces, placidum, tolerantem ac lenem se præbeat. Hæc tria leviter attingenda.

I. In primis Doctōri Christiano sapiens habendus est delectus eorum, quæ ad Theologiam vulgo referuntur. Theologia Christiana, qualis a Christo ipso & ejus Apostolis fuit tradita, divina quadam nitebat simplicitate, paucisque constabat momentosis capitibus, quibus mens attenta, veritatis amans, de Dei volun-

voluntate observanda serio cogitans; de salute æterna obtinenda vere sollicita, prompte ac sincera cum fide acquiescebat, statim atque ipsi credenda proponerentur. Verum jam a temporibus Apostolicis hæc cœlestis Disciplina infusari & deturpari cœpit a quibusdam insanis hominibus, qui spuriiis cum scholæ Judaicæ, tum Ethnicorum Sophistarum opinionibus ac placitis imbuti, ea in Religionem Christianam, ad quam accefferant, temere intulerunt, gravissimoque quo laborabant, quæstionum morbo Ecclesiam infecerunt. In hos falsos Doctores frequenter ac vehementer insurgit *PAULUS* suis in omnibus Epistolis, & præsertim in duabus ad Timotheum. Iis exprobrat, quod (a.) *diversam a vero Evangelio Doctrinam doceant, quod attendant animum fabulis . . . quæ potius quæstiones præbent quam ædificationem Dei, quæ est per fidem; quod a scopo aberrantes divertant ad vaniloquentiam; & putantes, se esse Doctores egregia præditos intelligentia, nesciant omnino nec quæ loquuntur nec de quibus asseverant.* Hujus acerbissimi mali principiis Apostoli, quamdiu vixerunt, totis viribus obstiterunt. At prævaluit hominum audacia ac malitia, & quo numerosior evasit Ecclesia, quo magis a Sæculo Apostolico recessit, eo etiam spuriiis placitis, stultis ac inutilibus quæstionibus magis laboravit, quibus purum Evangelium pene fuit obrutum. Hinc quot & quanta orta sint dissidia, quibus Ecclesia discerpta fuit, quot horrenda bella, quot detestanda facinora, nemo vestrum ignorat, nec est animus referre.

Ergo hoc præcipuum esto Doctores Christiani officium, ut *χόλον καὶ καλῶμεν, fanum, stipulam, sordes ab auro & argento sedulo distinguat atque secernat: μαρὰς καὶ ἀπαιδεύτες ζητήσεις παραίτῃς*, inquit Paulus; *stultas & ineruditas*, i. e. quæ ad bonam institutionem nequaquam inserviunt, *quæstiones rejice.*

(a.) 1. Tim. 1: 3 - 7. vide etiam cap. 6: 3. 5. & 20. 21.

Stultas appellat, quæ ob earum absurditatem, impietatem vel summam futilitatem, omnino & cum indignatione sunt prætermittendæ, quales a Scholasticis Theologis non ita pridem agitabantur.

Ad Quæstiones vero *ineruditæ*, vel quæ ad rectam Christianæ Discipulinæ institutionem non conducunt, eæ pertinent, quæ versantur circa res supra mentis humanæ limites positas; Eæ, quibus satisfieri non potest sine expressa Dei Revelatione, quam hominibus denegavit; tum illæ, quæ solos Veteris Testamenti Fideles respiciunt, & ad nos nostramque salutem non attinent.


Omnes has & similis generis quæstiones, quarum exempla proferre non vacat, nec est necesse, Doctor Theologus prudens omittat, ut quæ ad sanam Doctrinam non pertineant: vel si de iis omnino silere ipsum non deceat, eas leviter attingat & unicuique suum verum assignet pretium, aut potius de illarum inutilitate Auditores sedulo moneat. Uno verbo, veram Evangelicæ Doctrinæ naturam introspeciat, germanumque ejus scopum semper animo præsentem habeat. Quænam autem est natura, quis scopus Evangelii? scilicet, ut homines per fidem in Jesum Christum, per poenitentiam & sanctimoniam, ad Deum & salutem æternam adducantur. Quicquid eo tendit, inter momentosa capita reponi debet, illud urgendum, illi insistendum; cetera, ut curiosa potius quam utilia parvi facienda. Si istius simplicissimæ ac æquissimæ regulæ aliquam habuissent rationem Doctores Christiani, longe melius cum Ecclesia fuisset actum, & etiamnum ageretur.

II. Delectu sapienter facto eorum, quæ ad διδασκαλίαν τὴν ὑγιαίνουσαν, i. e. Doctrinam sanam vel salubrem pertinent, sequitur alterum, quod PAULUS a Doctore Theologo requirit, scilicet ut sit διδασκλικός, ad

docendum idoneus, quod indicat & Methodum qua res disponendæ sunt, & stilum vel loquendi modum quò in iis exponendis utendum.

In qualicumque disciplina progressus omninò pendent a Docentis *Methodo*, adeo ut prava tantum obsit quantum recta infervit; quod obvio exemplo patebit. Si quis Arithmeticam docens a divisione, vel proportionum regula, inciperet, prætermittis adjunctionis, subtractionis ac multiplicationis regulis, quas in posterum tradendas reservaret; tyrones ita institutos num in arte numerandi multum profecturos putatis? Immo vero hac methodi inversione, eos necesse esset concipere maxime confusas numericarum proprietatum notiones, quibus in errorem continuo inducerentur, ita ut nuda iis ignorantia fuerit potior. Eadem est ratio ceterarum omnium disciplinarum, ac speciatim Theologiæ, in qua tradenda maxime necessaria est recta Methodus, cujus præcipuos *Canones* paucis indicare, non abs re erit.

1. Quædam primariæ dantur veritates, quæ sunt instar fundamenti, quo nititur totum Theologiæ Systema, ita ut, nisi quis eas jam habeat probe cognitæ, ad cetera Dogmata tuto pervenire non possit; manifestum est, ab his veritatibus primariis initium esse faciendum.

2. Cum Deus pro sua summa Sapientia sese hominibus revelaverit (b.) πολυμερῶς καὶ πολυτρόπως, multis vicibus, multisque modis, tumque um Revelationum aliæ aliis magis aut minus sint claræ ac perfectæ; cavendum, ne inter se confundantur, sed unaquæque in seipsa & seorsim a ceteris spectanda est, ut accurata illius habeatur notitia. Istius Canonis neglectu factum est, ut quidam Theologi priscis Revelationi-

(b.) Hebr. 1:1.

lationibus eandem ferè lucem, eandem perfectionem attribuerint, quæ ultimæ per Christum Revelationi unice competit; quod manifesto falsum, summoque generis humani Doctori injurium.

3. Cum aliquod Theologiæ Christianæ dogma tractat Doctor Theologus, primum nitidam ejus notitiam det; dein illud solidis probet argumentis, ex re-cta ratione fluentibus, & quæ ad id dogma fulciendum allegabit e sacro Codice deprompta testimonia, secundum sanæ critices regulas applicet. Quam frequenter in id a viris Theologis fuerit peccatum, taceo; at hoc unum quantumvis tritum observari velim, quod maximi sit momenti, nempe, nihil veritati magis officere quam imbecillia argumenta & testimonia perperam allata; inde enim fit, ut vel firmissimæ rationes, vel certissima testimonia in vani ac falsi suspicionem apud incredulos veniant. Illa autem ad quoddam Religionis dogma confirmandum selecta argumenta & testimonia ita sunt ordinanda, ut, quantum fieri poterit, posterius aliquid priori addat, & cum ipso quandam quasi cognationem habeat & connexionem, unde efficiatur veluti probationum concatenatio, cujus tanta est vis, ut mens subattenta ipsi resistere non valeat.

Non modo Methodi, sed & *Stili*, seu dictionis, ratio est habenda Theologo, ut sit *διδασκλικός*. Dicendi genere utatur puro, simplici, nitido; voces adhibeat, quarum sensus apertus sit & auditoribus familiaris; & si de aliquo momentoso dogmate agatur, illud tradat ipsissimis, quantum fieri poterit, S. Scripturæ verbis, ne humano sermone utens in periculo sit veritatem coelestem adulterandi: Hinc faceffant illa Scholastica vocabula, ab usu vulgari alienissima, barbara, & sensu vacua, quibus Theologia tamdiu inhorruit, quæque densam ipsi caliginem affuderant;

Q

hinc

hinc faceſſant vana illa & inania ſermonis ornamen-
ta, *meteora orationis* a Clariffimo quodam Theologo
(c.) lepidè dicta, quæ *Φανταſίας* quidem movent ac
oblectant, ſed ad veritatis lumen mentibus inferen-
dum nequaquam conducunt, quin potius ipſi quam
maxime obſunt; eo enim inflato, & ut ita dicam
phalerato, dicendi genere, parum fideles, imo &
identidem falſiſſimæ rerum divinarum notiones exci-
tantur, quibus mens incauta in errorem facile indu-
citur; Nec alia quærenda eſt cauſa plerumque falſo-
rum dogmatum, quibus purum Evangelium fuit con-
taminatum, quæque a magna Chriſtianorum parte
etiānum pertinaciter retinentur.

III. Doctōri Theologo non ſufficit, ut ſalutarem
Doctrinam accurate & apte tradiderit; ejus eſt præ-
terea, illam ab adverſariorum petitionibus defende-
re. Quo autem modo quavē mentis diſpoſitione
Theologus has partes agere debeat, *PAULUS* do-
cet; *Non oportet*, inquit, *ſervum Dei pugnare*, ſed eſſe
ἡπιον, placidum, *ἀνεξίκακον*, tolerantē, *ἐν πραότητι παιδεύ-
οντα τὰς ἀντιδιαλεγόμενους*, cum lenitate erudientem adverſa-
rios vel contumaces. Jam dicta ſi probe obſerventur,
plurimum conducent ad pleraſque controverſias præ-
cidendas. Verum, ut ſunt homines, cum controver-
ſiæ omnino nequeant vitari, cum res Theologo ple-
rumque ſit habenda cum adverſariis varii admodum
ingenii, & quidem quandoque malignis, pertinaci-
bus, hoc tertium caput diſtinctius nobis eſt conſide-
randum.

Quando igitur ipſi controverſia movetur; in quo
ſita ſit, ante omnia perpendat Theologus, an in re-
bus ipſis, num forte in vocum ambiguitate. Si in
vocibus, poſtquam, quo ſenſu eas ſumat, declarave-
rit, eo ipſo finem controverſiæ faciat; quid enim
pueri-

(d.) D. SAMUELE WERENFELSIO.

puerilius, quid stolidius, quid Doctōri præsertim Christiano indignius, quam λογوماχεῖν? hanc in rem nequeo mihi temperare, quominus Clariss. WERENFELSIUM adducam praeclare differentem; (d.) „Dum frivolis his controversiis tempus terimus, inquit ille, quot utiliora, quot necessaria prætērimus? Monstrat nobis Theologia salutis viam; „proficiendum in cognitione Dei, in cognitione nostri; proficiendum non in eruditione modo ac sapientia, sed in fide, in ipse, in charitate: Et nos „cum tantum pensum habeamus, quasi nihil esset „quod ageremus, puerorum instar litteris & syllabis „ludimus. Quin ingredimur denique veræ sapientiae viam? omnis hic mora periculosa est; satis libus est datum, satis disputationi; incipiatur aliquando actio; mors instat, quanto satius est ut ab ea deprehendamus agentes, quam de verbis concertantes? Oh sapiens, oh vere Christianum monitum! Si vero de rebus ipsis controversia sit, earum momentum sedulo attendat Theologus; scilicet num res, de quibus agitur, ad mentis humanæ captum, an forte supra sint posita. Si supra, ita ut insuperabilibus difficultatibus utrobique scateant, sobrius Theologus & veri amans ab his iudicium cohibere quam de his temere pronunciare, controversiam declinare quam sustinere, longe satius ducit, ostensisque hinc inde scopulis, promte loco cedit, ignorantiam ingenue fassus. Sunt controversiæ de rebus, quæ ad Dei gloriam, ad Evangelicæ Doctrinæ finem, ad hominum salutem parum conferant, nec nisi oblique ac e longinquo pertinent; adeo ut de istis, quoquo modo quis sentiat, neque Dei Majestas offendatur, neque Evangelium temeretur neque salutis periculum subeat. In illos, qui de his controversiam nobis movent, cur excandesceremus? quin potius

(d.) Diss. de Logomach. Cap. IV. pag. 489.

tius modestissime, moderatissime, amicissime cum iis contendamus; quin animo placido & ab omni affectu vacuo rationes afferamus, quibus nostra nititur sententia, & incommoda ostendamus, quibus sententia contraria nostro iudicio laborat; quo peracto, si eos ad partes nostras trahere non valemus, eos ideo tanquam carissimos in Christo fratres habere ac tractare ne desistamus.

At alii dantur adversarii, erga quos non ita facile videtur, hanc, quam præcipit *PAULUS*, animi lenitatem ac tolerantiam servare; qui nempe in rebus magni momenti a nobis dissident, qui pro exitiali errore contendunt, aut veritatem, a qua salus hominum omnino pendeat, acriter impugnant, quorumque pertinacia nulla ratione, vel evidentissima, vinci potest. Nec minus, Auditores, cum ejusmodi adversariis placide, comiter, patienter est agendum, ita tamen ut cœlestem veritatem ignave non deferamus, sed eam, ut par est, fortiter tueamur. Quid enim apud adversarios tuos proficere te putas tu, qui tantopere in eos effervesces, tu qui inter causam tuam defendendam indignationi, acerbis rixis, convitiis, intemperantius te permittis? In hac, quæ es, animi perturbatione, num de recto controversiæ statu inter vos convenire poterit, quo non intellecto aer inaniter vapulat? num solidiora ad veritatem firmandam & contrariam opinionem evertendam argumenta invenire, seligere, illaque urgere valebis, qui mentis compos non sis? num te adversarium ab exitiali errore suo redimere & ad veritatem flectere posse præsumis, qui ea uteris methodo, qua nulla est aptior ad illum a te tuæque sententia quam longissime avertendum? Nec dicant acres illi doctores, Dei gloriæ, ejus Religionis, ejus Ecclesiæ, zelo se ardere; Caveant, ne quem affectum *zelum* vocant, is potius

potius sit κακοζηλία ; Caveant ne dum Dei gloriam , Religionis & Ecclesiæ salutem conclamant, immodesto potius partium suarum studio teneantur, & propriæ famæ , propriis commodis inservire cogitent.

Is demum verus est ac germanus Dei zelus, qui honeste ac moderate se gerit ; qui cum ea, quam suis Christus adeo impense præcipit, caritate est conjunctus ; qui hominum ignorantiam, errorem, pertinaciam, sincere & ex animo dolet ; qui non, ut ipse vincat, sed ut adversarii ab evidentia vincantur, serio cupit & quærit, quique a pravis omnibus ac violentis sententiam suam propagandi modis summopere abhorret ; qui vel maxime pertinaces eo amore , eo studio prosequitur , ut summa cum patientia illos ad viam revocare, illos erudire, admonere pergat, (e.) experturus , num aliquando daturus sit eis Deus resipiscentiæ ad agnitionem veritatis. Hic zelus cum eximiis erga dissentientes affectibus a PAULO Doctore Christiano præceptis optime consentit.

Hoc PAULI monitum , non pro ejus momento , sed pro circumstantia præsentī, levissime attigimus : Aliud enim est quod nobis potissimum requiritur ; & , ut præstantissimi Theologi , nuper , heu ! acerbo fato nobis erepti, piissimam memoriam recolamus, moræ forte impatientes exspectatis. Oh ! si nobis contingeret aliquanta pars facundiæ, qua pollebat magnus ille Vir ! At , utut in dicendo rudes, hoc tristi officio pro virili fungamur : ad TURRETTINUM recte decantandum non opus est oratore, simplex sufficit & candidus narrator , quodque a parte ingenii deerit, id forsân supplebit animi affectus.

Si laudes a Majoribus desumendæ sint , Noster sane hinc habuit, ut quisquam alius, de quo posset gloriari ; utpote ab antiqua & nobili Reipublicæ Lucensis

sis

(e.) 2. Timoth. 2 : 25.

sis familia oriundus, quæ veritatis Evangelicæ causa jam a pluribus annis Genevam se recepit; res procul dubio sic dirigente Providentia, huic Urbi singulariter favente, de quo beneficio est cur ipsi gratias immortales habeamus: Quam multi enim præclari Viri ex hac familia prodire, qui tum de Ecclesia & Academia, tum de Republica optime sunt meriti. Verum iis immorari parum videretur decorum, & *No- stro* pene injurium, quasi non esset in eo satis ampla dicendi materia.

Patre *Francisco Turrettino*, Matre *Elisabetha de Mafse* in lucem editus est *JOANNES ALPHONSUS TURRETTINUS*, Mense (f.) Augusto, anni 1671. Eximias dotes, quas a benignissimo Creatoris numine una cum vita acceperat, Parentes ejus optima coluerunt institutione, ipseque a teneris annis sua diligentia, assiduitate, industria, magis ac magis perfecit. Et hic observare est, ut quis ad scientiarum apicem perveniat, vel felicissimas ingenii dotes nequaquam sufficere, ni adsit sedula cura, labor impiger, in hac prima vitæ periodo, quæ ad ingenuas artes addiscendas est aptissima; qui hanc ætatem desidiose præterlabi sivit, fere in cassum deinceps litteris insudat, saltem e semidoctorum vulgo se eximere non valet, quod constans experientia plus satis probat. Puer his raris animi dotibus ornatus, eo paterno instituto ac exemplo adjutus, eo vehementi, quo ipse ferebatur, in Litteras affectu, non poterat, quin maximum in iis, prout ætas ferebat, profectum faceret, ita ut vel doctissimorum singularem benevolentiam ea ratione sibi conciliaret.

Cum 16. ætatis annum ageret, (g.) amisit, Deo sic volente, Venerandum Patrem, qui, cum se in ultimo

(f.) Die Mensis 13. secundum veterem tempus computandi rationem. (g.) d. 28. Sept. 1687.

rimo vitæ termino versari sentiret, filium pluribus allocutus est, ac, præter varia, hæc inprimis illi præscripsit, (b) *Ecclesiæ Dei curam, si aliquando ad sacrum vocaretur Ministerium, Veritatis amorem, humilitatem & caritatem.* Oh sapientem, oh vere paternam, sanctoque Dei servo dignissimam adhortationem !. ad quam Noster cogitata, dicta, scripta, facta, ad finem usque vitæ ita religiose conformavit, ut eam constanter animo præsentem & quasi ante oculos positam habuisse visus fuerit.

Tunc temporis Philosophiæ studio incumbibat, duce & auspice præstantissimo Viro *JOANNE ROBERTO CHOUET*, primum Academiæ, deinde Reipublicæ splendidissimo jubare, qui primus in hac Urbe Philosophiam a Scholæ sordibus ac tricis, quibus squalibat, defœcavit, & germanam ratiocinandi normam mira cum arte miroque cum successu tradidit. Sub tanto Magistro talis Discipulus quantos brevi progressus fecerit, nemo non facile percipit: Eo tempore Magister & Discipulus arctissimam inter se necessitudinem inierunt, quæ nonnisi alterius morte finiit.

Sic optime in Philosophicis exercitatus, (i.) ad Theologiam animum appulit, eam tum docentibus *PHILIPPO MESTREZATIO*, solidissimo Theologo, qui paulo post e vivis excessit, *BENEDICTO PICTETO*, de nostra Ecclesia, vel, ut rectius loquar, de omnibus Ecclesiis Reformatis, optime merito, qui non ita pridem *FRANCISCO TURRETINO* successerat, & *LUDOVICO TRONCHINO*, Avo meo, qui, quanti pretii Noster esset, optime sensit, & cum eo intimam conjunxit amicitiam.

Duo.

(b.) In Oratione Parentali, quam Cl. *PICTETUS* de *FRANCISCO TURRETINO* habuit, pag. 22, (i.) Anno 1689.

Duobus circiter annis, in rebus Theologicis maxima cum diligentia impensis, Turretinus de itinere ad exterarum gentes faciendo cogitavit; (k.) annos 19. & aliquot menses natus. Hac juvenili ætate, in qua, qui juris sui facti peregre mittuntur, ex suis, ut plerumque accidit, itineribus plus damni quam emolumenti reportant, Noster eam præ se ferebat sapientiam, eam ad omnia, quæ cernebat quæque audiebat, in suos usus convertenda sagacitatem, quæ a viro maturo & experto potuisset expectari. Lugduni Batavorum stupendum ingenii ac eruditionis, pro ætate, specimen dedit in Theſibus, *Pyrrhonismus Pontificius* inscriptis, quas in lucem protulit (l.) & sub Clariss. FRID. SPANHEMII præsidio defendit; quarumque BAYLIUS, cui placuisse non ultima laus est, in suo *Dictionario* (m.) perhonorifice meminit. Ex Hollandia discedens, in Angliam trajecit, omnigenarum scientiarum veluti centrum, & ubi speciatim vigeat eximia τῆς Θεολογίας Methodus, adeo ut Noster, peritissimus in iis iudex, dicere soleret, „ Ex omnibus Theologis Anglos Religionis Christianæ indolem optime percipere, & verum ejus scopum quam proxime attingere sibi visos fuisse. Non vacat, nominatim numerare omnes Viros Doctrina & Muneribus Ecclesiasticis conspicuos, a quibus Noster in ea beata regione comiter ac certatim fuit exceptus. At silentio premi non debet Illustriss. BURNETUS, Episcopus Salesburiensis, qui Nostrum Salesburiam secum deductum per aliquot hebdomadas hospitio amicissimo recepit, eumque commendavit & conciliavit Doctissimis Viris LLOYDIO, WHITBY, ALLIXIO, & speciatim summe Reverendo WHILIELMO WAKE, dum viveret, Archi-Episcopo Cantuariensi, quocum Turretinus consuetudinem junxit, quam

(k.) Febr. 1691. (l.) Mai. 1692. (m.) In Art. Turretin (Franc.) & pag. 2223. litt. b. ad Marg. in artic. Nicole.

quam deinceps ad illius mortem usque coluit frequenti Epistolarum commercio. Ex Anglia Lutetiam Parisiorum se contulit, ubi omnes alicujus nominis Doctos frequentavit : magnus præsertim ipsi fuit usus cum Abbate *DE LONGUE RUE*, Linguarum Orientalium peritissimo, a quo Linguam Arabicam didicit ; adeo ardentè omnia scire cupiebat. Tandem (n.) iter Patriam versus direxit, magnam, ubicunque locorum peregrinatus fuerat, sui existimationem post se relinquens, & pretiosissimam omnis generis cognitionum messem secum reportans.

Paulo post ejus reditum (o.) Sacro Ministerio fungendi potestatem a Venerando Coetu accepit ; paucis mensibus elapsis, in ipsum Coetum honoris causa fuit admissus, & biennio post in *Pastorum Urbanorum* (p.) numerum aggregatus eo solemni quo utimur more : Verum Pastoris Munus ordinarium non suscepit, quod obstaret tenuis, qua erat, valetudo ; Nihilominus tamen satis frequenter concionabatur, & semper eo auditorum concursu ac applausu, eo fructu, ut nullus concionator majorem unquam habuerit.

Interca, scilicet anno 1697. (q.) Amplissimus Senatus Genevensis, utilitati publicæ indefinenter invigilans, Turretino nostro *Historiam Ecclesiasticam* docendi provinciam demandavit, & illius causa novam erexit Cathedram. Non multo post (r.) *Rektor Academiae* constitutus, hoc splendidum Munus per decem annos continuos exercuit ; & hinc, Auditores, illæ cedro dignissimæ Orationes, quas, quo Artis Oratoriæ quis est peritior & est eloquentior, eo majore cum voluptate atque admiratione legit. Dum ea dignitate Academica fuit insignitus, Bibliothecæ publicæ

Tom. III.

R

cæ

(n.) An. 1693. vel 94. (o.) 30. Mart. 1694. (p.) *les Pasteurs de la Ville*. (q.) 12. Mart. (r.) 30. Maji 1701.

cæ, adhuc velut in cunis jacenti, utilissimam impendit curam, ita ut quod meliore flet loco, quod amplior sit ac rectius ordinata, id præsertim ipsius operæ tribui debeat. Cum autem anno 1705. sub finem vergente (s.) Avus meus vitam hancce momentaneam cum æterna feliciter commutasset, quem quidem Turretinus multis deflevit lachrymis, ob intimam, quæ ipsi cum illo intercedebat, consuetudinem ac familiaritatem; in defuncti locum a Venerando Cœtu suffectus, *Professionem Theologicam* suscepit, quam per triginta & duos annos exercuit; qua doctrina atque industria, quo successu, nemo ignorat nisi qui de Academia Genevensi ne verbum quidem audivit. Inter plurimos egregios, quos instituit, discipulos, emittit dulcissimæ recordationis *SAMUEL TURRETINUS*, omnibus iis dotibus præditus ac virtutibus, quæ Theologum eximium constituunt. Illum jam a teneris annis velut in sinu suo Noster foverat, formaverat, & ita impense diligebat, ut omnium consiliorum suorum faceret conscium; eo quoque felicitatis pervenerat, ut hunc haberet Collegam & quidem dignissimum. At oh! vita hominum quam est incerta, quam fragilis & caduca! Jubar istud per paucos annos Academiæ & Ecclesiæ nostræ concessum, in medio suo cursu extinguitur, sicque Nostro dimidia pars animæ suæ eripitur; hunc gravem ac fatalem casum quam vivide senserit, vix dici potest. Inde non parum increvit illud tædium vitæ, illud æternæ quietis desiderium, quo jam a longo tempore tenebatur, ob valetudinem fractam tot frequentibus asthmatis quo laborabat *παροξυσμοῖς* seu accessibus, qui sæpe illum in mortis periculum adducere visi sunt. Pia ejus anima, divinum quid spirans, cœlum anhelabat votisque assiduis anticipabat, hæc aut talia volvens.

(s.) 8. Sept.

vens : (t.) „ Quid habet vita commodi ? quid non
 „ potius laboris ? sed habeat sane ; habet certe tamen
 „ aut satietatem aut modum ; Non me vixisse
 „ pœniter, quoniam ita vixi, ut non frustra me na-
 „ tum existimem, & ex vita discedo tanquam ex ho-
 „ spitio, non tanquam ex domo ; commorandi enim
 „ natura diversorium nobis, non habitandi, dedit. O
 „ præclarum diem, cum ad illud divinarum animo-
 „ rum concilium cœtumque proficiscar, cumque ex
 „ hac turba & colluvione discedam ! Vota Deus ex-
 „ audit ; lenem aliquot dierum febrim Turretino im-
 „ misit, quæ (u.) infirmi corpusculi compaginem faci-
 „ le solvens egregiam ejus Animam in eam, quæ sola
 „ vera est, libertatem vindicavit, eaque felici donavit
 „ immortalitate, quam ille una ante morbum hebdo-
 „ made publice, & quidem, ut solebat, validissime as-
 „ seruerat ac defenderat, quasi his in cogitationibus ac
 „ meditationibus occupatus a morte deprehendi voluif-
 „ set, secreto quodam eventus futuri præfagio admoni-
 „ tus. Sic nobis periit Magnus *TURRETTINUS*,
 „ ætatis annum agens 66. Viduam relinquens, generis
 „ nobilitate ac virtutibus commendatissimam, quæ sua-
 „ vissimo adjumento constanter ad extremum usque
 „ halitum ipsi fuit, & Filium, in quo hi optimi demon-
 „ strantur animi habitus, hi lenes atque commodi mo-
 „ res, qui eum maxime amabilem & ad Civilem Socie-
 „ tatem aptissimum reddunt,

Quæ ad *TURRETTINI* vitam spectant histo-
 rica, breviter perstrinxi, pluribus scienter prætermis-
 sis. Nunc summum illum *Theologum* attentius con-
 templari & tenui Minerva delineare animus est.

Ut ab eo exordiar, quod est fundamentum, quo
 male posito nemo vir præstans evasit ; *TURRET-*
 R 2 *TINUS*

(t.) *CICERO* de Senectute. Vol. 10. pag. 3757. Edit.
 Verburg. (u.) Mortuus die 1, Maji, anno 1737.

TINUS omnis generis eruditione ac scientia erat instructissimus, sic ut eo respectu pauci cum ipso possint comparari; ad quod multum contulit prospera, qua fruebatur, fortuna, quæ Bibliothecam egregiam a Patre acceptam augendi, complendi, potestatem ipsi fecit. Hæc liberalium artium ac disciplinarum instrumenta non erant, ut fere assolet, ad ostentationem; peritissimus artifex iis uti sciebat incredibili cum diligentia atque industria; adeo ut præter plures, quas callebat, linguas, & præsertim Latinam, in cujus elegantis erat versatissimus, nihil esset, saltem alicujus momenti, tum in Philologicis, tum in Historicis tum in Philosophicis, tum speciatim in Theologicis rebus, quod eum fugeret. Sunt qui magnam quidem eruditionis copiam congesserunt, at indigestam & inordinatam molem, quæ Cahos rectius quam scientia dici mereatur, quæque memoriam oneret non ornet, mentisque facultatibus officiat potius quam inserviat: hæc vero copiosissima, quæ Nostrum decorabat, eruditio, ab illa vanissima quam longissime distabat; quippe quicquid legisset, quicquid meditatus esset, id ita bene concoxerat, digesserat, & eo acri quo erat judicio, apud se ita ordine posuerat, ut de omnibus nitidissimas ac promptissimas haberet notiones, sicque, cum daretur occasio, de quacumque re proposita scite admodum, apposite, eleganter, verba faceret, magna cum voluptate ac utilitate audientium.

Verum ad nostrum propositum propius accedamus; Quis Theologus extitit, in quo magis eminnerunt ii characteres, ii animi habitus, quos Paulum a Doctore Christiano exigere ostendimus? Mihi illum audire videor eadem monentem, quæ olim *PAULUS* suum Timotheum; *Stultas atque ineruditæ quæstiones fuge, sis in docendo didacticus, sis erga dissentientes placidus, tolerans, eos cum lenitate erudiens.*

Si primo delectum attendamus eorum quæ in Theologia vulgo tractantur, nescio an quisquam fuerit qui unicuique dogmati suum pretium, unicuique quæstioni suum momentum assignare melius noverit, qui salubris Doctrinæ fundamentalia capita a non fundamentalibus, germana ejus placita a spuris vel dubiis, aurum & argentum a fœno ac stipula sapientius, accuratius se creverit, (x.) *Omnia explorans, & quod bonum est id solum retinens*, prout præcipit Paulus. Ut verbo dicam, nescio an quisquam fuerit, qui res divinas nobiliore, diviniore modo perceperit, attigerit; in eo autem amplificationis culpam non timeo, qui dicam apud vos, Reverendi in Christo Patres ac Fratres, quibus Noster erat notissimus; si vero quis malevolus de eo me vocaret in causam, eum ad Viri scripta simpliciter amandarem.

Ut in rebus Theologicis peritissimus erat ac sagacissimus, sic etiam maxime διδασκλικός, ad cœlestem Disciplinam mentibus infundendam aptissimus, quæ ars longe difficilior, longe rarior est, quam vulgo putatur. Optima qua utebatur methodo, omnia quæ tractabat, quantumvis per se ardua, sublimia, quantumvis culpa hominum intricata, ita fiebant perspicua, ut vel lusi & lippi ea cernere cogerentur; Quæ ad veritatem firmandam adhibebat testimonia & argumenta, ita consulte eligebat, ita plene urgebat, ita industrie inter se disponebat, connectebat, ut inde completa & fere irresistibilis demonstratio emergeret. Cum aliquem S. Scripturæ Librum vel Locum susciperet explanandum, ipsissimum Authorem S. putasses te audire loquentem, dubia tua enodantem, quæ tibi erant obscura elucidantem; adeo recte scopum authoris habebat perspectum, & ad intimum ejus sensum penetrabat. Hanc exquisitam res Theologi-

R 3

cas

(x.) 1. ad Thessal. 5: 21.

cas tractandi methodum comitabatur. Stilus maxime didacticus, simplex, purus, ab omni barbarie ac præsertim ab horridis & sensu vacuis Scholæ vocabulis ac formulis quam maxime expurgatus, suaviter fluens, ut rivus cujus aquæ limpidæ super argenteam arenam lente & quasi numeroso pede volvuntur. Eo utebatur stylo didactico suis in Prælectionibus. Verum cum in diebus Solemnibus, velut in nostris Academicis, Oratio ipsi esset habenda, tunc nobile, grande, splendidum, adhibebat dicendi genus, quo Auditorum animos percellebat, accendebat & extra se ipsos veluti rapiebat, ita bene noverat stylum suum rebus & circumstantiis adaptare, quod sane Eloquentiæ caput est. Apud populum identidem concionabatur, raro, si Ecclesiæ desiderium, satis frequenter, si infirmam ac ægram spectes valetudinem; cum autem ad istud publicum Doctoris Christiani munus accedebat, quam digne, quam potenter eo fungeretur; vos omnes testes appello; Auditores Præstantissimi. Non illi erat eruditionis fastus; non ingenii ostentatio, non ea sermonis lenocinia, quæ mundum, non Deum sapiunt, quæque a *Φιλανθρίᾳ*, non a sincero veritatis ac pietatis studio procedunt. Hæc omnia summo opere aspernabatur Noster; & indignabundus respuebat; Existimabat enim, ea quæ Religio præcipit credenda & facienda, vano illo præsidio non indigere, utpote quæ satis per se ponderis, sat efficaciam habeant, ad homines excitandos, movendos, dummodo ea, prout sunt, ipsis candide proponantur: Id ergo potissimum intendebat, ut, quod dicebat, ad caput uniuscujusque esset accommodatum, sicque vel ab infantibus intelligeretur; simul & sermonem ita temperabat, & tametsi parce, ita ornabat, ut auribus delicatioribus maxime placeret; ipsam dixisses Veritatem ac Virtutem de suggesto loqui, & ut ad se accederent seque amplecterentur, homines dulce invi-

invitare. Huic potissimum acceptum referre debemus gravem illum & accuratum concionandi modum, qui apud nos in usu est, & ab Exteris laudatur; de quo caveamus, ne paulatim obsolescat, & in ejus locum comta, fucata, secularis eloquentia sensim subrepat.

Ea autem circa Religionis controversias tolerantia, illud concordiae inter Christianos, quantum salvo Evangelii fundamento salvaque hominum salute fieri potest, instituendae studium, quas virtutes Doctori Theologo Paulus impense commendat, hæ in intimis Turretini præcordiis insidebatur. Veri amantissimus, & a quocumque quomodocumque offerretur, illud amplecti paratissimus, modestissime de se ipso sentiens, *varia esse hominum ingenia*, magnamque in ea vim educationis atque authoritatis probe pensitans, ab omni partium studio abhorrebat, dissentientibus facilem præbebat aurem, cum iis agebat leniter, amice, ita tamen ut veritas, salubris Doctrina, nihil inde pateretur detrimenti. Hæc aurea axiomata continuo cum in sermonibus tum in scriptis iterabat, urgebat, ita ut ea semper animo præsentia habere videretur. (y.) *Dogmatum Theologicorum momenta ac pondera sedulo expendenda esse, ne musca in elephantem convertatur*; (z.) *Christianismum non in obscuris quibusdam notionibus, non in scholasticis argutiis, sed in Nova Creatura, hoc est, in vera pietate & probitate situm esse.* (a.) *Controversias non multiplicare, sed quantum fieri potest, minuire, viri Christiani officium esse*; (b.) *Eos nescire quid sit credere, qui a se dissentientibus irascuntur*; *Misereri errantium, non eos odisse Christianum decere.* His sapientissimis ac vere divinis principiis nixus, ab una parte Religionis Christianæ causam adversus Incredulorum conatus suscepit,

R 4

&

(y.) Nub. Testium Præf. in init. pag. 9. (z.) Diss. de Artic. Fundam. cap. 10. art. 1. pag. 55. (a.) Cogit. de Controv. &c. art. 7. (b.) ibid. art. 11.

& tanta cum vi ac evidentia defendit, ut nullum iis effugii locum reliquerit, in illo, quem publici juris fecit, *Tractatu de Veritate Religionis Christianæ*, nuper a disertissimo hujusce Urbis Pastore (c.) pereleganter, cum additamentis, in linguam Gallicam translato, quo immortalis opere Noster Christiani orbis, imo & Gentium omnium Doctor evasit. Ab altera parte nihil non tentavit, nihil non movit, ut Protestantium dissidiis compositis fraterna inter eos institueretur concordia; quod scilicet de levibus vel non necessariis inter eos controverti probe animadverteret; & quidem splendida de eo monumenta reliquit cuius obvia. (d.)

Hac ratione, Auditores, hanc Turretinus perennem sibi famam fecit, longe lateque per omnes oras Christianas sparsam, quæ ad Academiæ ac Ecclesiæ decus plurimum contulit. Magnum illum Virum quanti facerent, Potentissimi Principes, Florentissimæ Respublicæ, ipsi frequenter significarunt, tum litteris, tum numismatibus dono datis, ex quibus unum lubet indicare, quod scilicet a Serenissimæ Anglorum Reginæ munificentia non ita pridem acceperat. Eo amisso quantam fecerimus jacturam, etsi nos lateret, docerent sane Epistolæ ab Ecclesiis Helveticis ad Coetum nostrum nuper missæ, in quibus nostrum dolorem vivide dolent & defunctum maximis extollunt laudibus.

Hactenus *TURRETTINUM* tantummodo ut *Theologum* sumus contemplati; Quid autem, si ceteris respectibus eum vellemus conspiciere? quam multa notatu dignissima, quæ ob temporis angustias silentio premere cogimur? Quid diceremus de singulari

(c.) D. *VERNET*. (d.) Præcipua sunt, Oratio de Pace Protestantium &c. Habita ann. 1707. & Nubes Testium, edita ann. 1719.

gulari ejus in rebus Ecclesiasticis prudentia? Quid de urbanissima ejus erga omnes comitate, facilitate? Quid de constantissima ejus fide erga eos quibuscum amicitiam connexerat? Quam (e.) *qui e vita tollit, solem e mundo tollere videtur*, quaque a Deo immortali nihil melius habemus, nihil jucundius: nemo sane illius jura & officia melius novit, sanctius scrupavit, religioni magis habuit, sic ut eam ad amicorum suorum posteros extenderet, quod ego quidem immeritus ab infantia mea usque ad ejus obitum indefinenter expertus fui.

Quid de rara ejus circa res Politicas intelligentia, sapientia, quam quavis data occasione, & speciatim cum coram Ampliss. Senatu vel in Populi Comitibus ipsi dicendum esset, mire demonstravit. Denique quid de ardenti suo in carissimam Patriam studio, cujus commodis semper pro virili & quidem valde utiliter inserviit; cujus periculosa, quæ a civilibus dissensionibus nuper accepit, vulnera lacerato corde fufisque lachrymis deploravit, cujus sanationem, salutem, pacem, eo vehementi affectu exoptabat, ut omnia sua, vitam ipsam, pro ea impendere fuisset paratus; quod norunt, qui eo familiariter utebantur, & de his colloquia cum eo habuerunt.

Ad Sermonis exitum celeriter propero, Auditores Præstantiss. & quidem verèor, ne vos plus æquo detinuerim, vestramque exhauserim patientiam: At me habeatis excusatum rogo; Magni *TURRETTI-ANI* commemorationem paucioribus verbis absolvere quam difficile, quam impossibile fuerit, vos ipsos sumo iudices. Hoc superest, ut me totum vobis committam, vestram implorans benignitatem, quam si denegatis, quo refugiam nescio, & animum despondere necesse habeo: Quippe meæ tenuitatis conscius,

R 5.

(e.) *CICERO* de amicitia.

icius, quot quantaque mihi desint ad provinciam demandatam non indignè obcundam, tremebundus circumspicio; immensumque video inter Decessorem & Successorem discrimen, nulla arte superandum. At *τῷ Μαρτυρῷ* vestigia citato, quantum poterō, gressu premam; At quod deest, id quadantenus supplere conabor sedula ea diligentia, eo assiduo ac indefesso labore, quo nihil non perficitur, nullam non obstaculum vincitur; At tandem fervidas ad Patrem luminum fundam preces, ut infirmitates meas virtute sua sublevet.

Singulares vobis debeo gratias, Amplissimi Proceres, quod tot gravibus negotiis, Reipublicæ causa, implicati Auditorium nostrum præsentia vestra condecorare, mihi que dicenti benevolas aures præbere dignati sitis. Magni *TURRETTINI*, quem una cum nobis lugetis, obitu, non modo Ecclesia & Academia splendidum amisit lumen, sed & Respublica optimum, si ullus unquam fuit, civem, Patriæ eximioque illi Regimini, quod a Majoribus accepistis, devotissimum, pacis ac tranquillitatis cum publicæ tum privatæ cultorem summe assiduum: In his, cum in cæteris omnino non possim, in his saltem me magni illius Viri æmulum profiteri, & cum eo de his contendere audebo. Hæc a Parentibus meis, una cum vita, velut transfusa imis hærent medullis, & hærebunt, quamdiu *spiritus hos reget artus*. Eo quidem respectu, si non alio, apud vos, Patriæ Patres, aliquantulum in gratia esse merebor; hac ergo vestra humanitate, quam multoties expertus sum, me prosequi pergatis, oro: Ut & vobis veritatis ac fidelitatis vindicibus publicis sancte polliceor, me totum fore in eo, ut munus concreditum aliquo cum fructu adimpleam, & ideo nec operæ, nec vigiliis, nec, ut verbo dicam, iis omnibus, quæ in mea potestate posita erunt, parciturum.

Ad

Ad vos quoque me converto, Patres ac Fratres in Christo plurimum Reverendi atque Colendi, ut meum in vos gratissimum animum publice tester, pro innumeris vestris in me collatis beneficiis, quibus veluti culmen nuperrime posuistis hoc momentoso munere, quod suffragiis vestris mihi delatum est. Quem a primis studiis ad hunc usque diem fovistis, sustentastis, cui facilem ac fraternum vobiscum convictum permittitis, hujus tenuitas, imperitia, vos non latet. Sane, cum apud me perpendo, quid ad singularem illam erga me benevolentiam vos impulerit, facile agnosco, me illam potissimum debere Majoribus, Proavo & Avo meo, qui eandem olim Cathedram Theologicam per multos annos, non sine laude, ut fertur, occuparunt, & quorum piæ memoriæ hoc, si ita loqui liceat, tributi genus pendere voluistis: tum etiam sperastis, me illorum exemplo domestico extimulatum, omnia tentaturum & conaturum, ne in eadem statione positus, ab eorum virtute atque existimatione, si quæ fuerunt, admodum degenerare viderer. Quicquid sit, Viri Reverendi, in id totus incumbam, ut expectationi vestræ respondeam; me Deus amet, ut id sincere. & ex animo apud me statuo: At vos in onere portando mihi succurrere, vos monitis, consiliis, me adjuvare, adhortationibus excitare ne recusetis; has novas vestræ erga me totum vobis mancipatum benevolentia notas a vobis etiam atque etiam efflagito. Addam, & hoc esse officium, quod vobis imponit ea Ecclesiæ & Academiae cura quam geritis, ea Dei gloria, ea hominum salus, quibus adeo gnayiter invigilatis.

Vos vero, Ornatissimi Theologiæ Candidati, vos moestissimo Turretini desiderio moveri quam maxime decet, qui Doctore illo incomparabili sitis orbat. Equidem dulcia vobis præbent solatia Veneran-

nerandi Collegæ, Præstantissimi Theologiæ Professo-
res, & Vir Spectatissimus atque eruditissimus, qui
Ecclesiasticæ Historiæ docendæ partes suscepit: Ve-
rum quis ego sum, ut ad luctum vestrum levandum
quoquomodo conferre queam? hoc unum asserere
possum, me fore studiorum vestrorum fidem comi-
tem, adiutorem, instigatorem, qui ceteris omnibus
posthabitis, utilitati vestræ indefinenter, publice, pri-
vatim, inserviam: A vobis vicissim postulo, ut me
in amicitiae partem admittatis, utque vestra in studiis
sedulitate, assiduitate, industriam meam adjuvetis,
mihique animos adjiciatis.

* * * * *

JOH. ALPHONSI TURRETTINI

In Ecclesia & Academia Genevensi *Pastoris*,

* S. Theologiæ & Historiæ Ecclesiasticæ
Professoris,

O P E R A,

Quæ diversis temporibus * lucem adspexerunt, &
paulo ante Ejus mortem An. 1737. *tribus Voluminibus*
in Forma, quam vocant, Quarta majuscula junctim
typis Barillot & Fil. Genevæ edita sunt.

Volumen Unum Paginis 360. continet

ORATIONES ACADEMICAS.

Quarum sunt duæ *Inaugurales*:

- I. De Sacrarum Antiquitatum Usu multiplici atque
Præstantia. An. 1697. II. De

* Vid. Scheuchzeri Nova Liter. Helvet. singulis annis. it. Bi-
blioth. Brem. Cl. IV. p. 305. sq. & al.

II. De Theologo Veritatis & Pietatis studiofo. A. 1706

Decem Rectorales :

I. Panegyrica, in obitum GULIELMI III. Magnæ Britanniæ Regis. An. 1702.

II. De Seculo XVII. Erudito, & hodiernis Literarum periculis. An. 1703.

III. De Studiis emendandis & promovendis. A. 1704.

IV. De Scientiarum Vanitate & Præstantia. A. 1705.

V. De Eruditionis & Pietatis Nexu. A. 1706.

VI. De componendis Protestantium Dissidiis ; *Accedunt* De Pace Protestantium Ecclesiastica 1. Epistola Pastorum & Professorum Genevensium ad Seren. Borussiæ Regem. 2. Ser. Borussiæ Regis ad illam Epistolam Responsum. 3. Illustr. Comit. à Metternich Epistola ad Pastores & Professores Genevenses, cum Responsum regium ad ipsos transmitteret. A. 1707.

VII. De Variis Christianæ Doctrinæ Fatis. A. 1708.

VIII. De Affectibus a Veri studio abducentibus. A. 1709.

IX. Votum pro Pace Europæ. A. 1710.

X. De adulterati Christianismi Causis & Remediis. A. 1711.

Alia Volumina Duo habent

COGITATIONES

Et

DISSERTATIONES.

Et Primum quidem pagg. 350.

COGITATIONES De variis Theologiæ Capitibus. *Extant etiam in Bibl. Brem. Cl. I. p. 207-294.*

De

- - - De Religione.
- - - De Controversiis, sensu communi, &c.
- SOLUTIO *Quæstionis*, Utrum *arūsala*, seu Contradictoria credi possint? *Inserta hæc fuit Gundlingianis, impressis Hala, T. XIV. p. 340.*
- DISSERTATIONES De Theologia Naturali XII.
Alterum vero Volumen pagg. 524. sistit
- DISSERTATIONES De Veritate Religionis Judaicæ & Christianæ XVI. *Quæ in Gallicum idioma a D. Vernetto translate sunt. Tit. Traité de la Vérité de la Religion Chrétienne. 8. Geneve 1733. &c.*
- - - De Christo audiendo.
- - - De Articulis Fundamentalibus; *quæ præmissa fuit Nubi Testium, vid. p. post.*
- - - De Pyrrhonismo Pontificio.
- - - De commodis temporalibus Pietatis.

Seorsim edita:

De Ludis Secularibus Academicæ Quæstiones. Genevæ Typ. Societatis 1701. 4. pl. 10. *Recusæ in Opusculis Cl. TURRETTINI varii generis. T. II. Brunsv. 1726. 8.*

Nubes Testium pro Moderato & Pacifico de Rebus Theologicis Judicio, & instituenda inter Protestantes Concordia. Cum præmissa Disquisitione De Articulis Fundamentalibus. Genev. apud Fabri & Barrillot. 1719. 4. pl. 34. *altera Editio Francof. & Lips. 1720. ibid. Germanice prodiit. 1720.*

Defense de la Dissert. sur les articles Fondamentaux, contre Mr. de Bionens.

Der größte Gewinn eines frommen Christen, aus
1. Tim. 6: 5. Vorge stellt in einer Predig, 2c.
ins Deutsche übersezt von H. G. Zürich, bey Joh.
Rud. Simler, 1696. 4. Bogen 4.

SERMON sur la charité. 1696.

- - - Sur le Jubilé de la Reformation de Zurich.
(sur S. Jean. 12: 35, 36.) Geneve, chez Fabri &
B. 1719. *Editus etiam est Tiguri germanice eod. anno.*
- - - Sur les inconveniens du Jeu. (sur Philipp.
4: 8, 9.) *ibid.* 1727. 4.
- - - Sur le Jubilé de la Reformation de Berne.
(sur Psea. 102: 19-23.) *ibid.* 1728. 4.
- - - Sur la Loy de Liberté. (sur Jaq. 2: 12.) pro-
noncé en Presence des Seigneurs Representans
des Louables Cantons de Zürich & de Berne. *ib.*
1734. 4.
- - - Sur le Jubilé de la Reformation de Geneve.
(sur Apoc. 3: 11.) *ibid.* 1735. 4. *idem Tiguri in*
Germ. Linguam conversus prodiit.

Historiæ Ecclesiasticæ Compendium a Christo Nato
usque ad annum M D C C. 8. Genev. 1734. Edi-
tio altera. *ibid.* 1736.

Quelques Lettres ou Pièces publiées dans les Jour-
naux.

JACO.

IV.

JACOBI BRUCKERI

Dissertatio Epistolaris

Ad

*Virum Venerandum atque Cla-
rissimum*JOANNEM JACOBUM
ZIMMERMANNUM,Canonicum & Theologiæ Professore
Tigurinum,

DE

STOICIS SUBDOLIS CHRISTIA-
NORUM IMITATORIBUS.*Conspectus Dissertationis.*

§. I. Gratulabundæ de suscepto Theologiam docendi munere preces ad Ven. & Cl. ZIMMERMANNUM. §. II. Argumentum & momentum Dissertationis. Causæ, cur ejusmodi imitationes gentiles instituere: Damnum rei sacræ inde illatum. Illustratum id ex historia philosophica. Eclectici & Pythagorei ejus studiosi, non item Aristotelici & Epicu.

Epicurei. §. III. Imprimis vero *Stoici* ; quos ad id impulit Christianæ religionis præstantia publice laudata , & emendandum vel incrustandum potius philosophiæ suæ ædificium , ruinæ proximum. Inde multi Virorum eruditorum in comparatione philosophiæ Stoicæ cum Christiana religione lapsus.

§. IV. Demonstrata imitatio ex *formulis loquendi* a Christianis mutuam sumtis. *χαρις Θεῷ, πολις Θεοῦ ἀνωιάτη*, homines *πολίται Θεοῦ, υἱοὶ Θεοῦ* ; mundus pro malorum grege sumtus, homines templum sacri spiritus, Deus in homine habitans ; ex Deo , in Deo , ad Deum omnia ; Sol malis oriens ; homines membra unius corporis , ramus arbori avulsus & iterum inferendus ; alia. §. V. Ipsa *dogmata* Christianorum imitati Stoici. Doctrina de Deo a *πολυθεϊσμός* revocata. DEUS bonus , justus , omnipræsens , beneficus. Providentia DEI contra mores veteris Porticus asserta. Allusio facta ad S. Trinitatis dogma : de angelis splendide dicta : De homine imagine Dei ; corruptio mentis agnita , postulata conversio , pugna , cordis evulsio. Cynicus ad ideam ministri Ecclesiæ *Epiḗcteto* effectus. Ultima hominis Christianorum more depicta : vitæ cogitatio mortis ; sperata æterna beatitas ; Resurrectio promissa , mundi incendium. §. VI. Imitati Christianos Stoici in *Philosophia morali* emendanda. Officia erga Deum , se , & homines morè Christiano injuncta. Sanctitatis laus affectata Stoicis. §. VII. Doli in ista imitatione latentes. Dissidentientes Viri docti , sed frustra ; totius Systematis Stoici ratio cognoscenda. §. VIII. Fundamentales doctrinæ philosophiæ Stoicæ , & germanissima principia , decade Thesium Stoicarum expressa. §. IX. Ostensus impius & abominabilis sensus formularum & doctrinarum supra allatarum : *Stoici* a *Spinozæ* impietate non procul remoti. DEUS universum , mundus DEUS , pæ-

Tom. III. S tria ,

tria, homines membra & cives, etiam mali, & sine pœna. Chrysippus apertior, ante Christianos imitatione expressos, testis. Mens particula animæ mundi; Pelagianismus Stoicorum ante Pelagium; omnia ex essentia una & in unam: inde restitutio & conversio; omnes mundi partes Dii; providentia Stoicorum maxime impia, fatalis & sine liberate. Trinitas Senecæ abominanda. Dæmones effluvia ex anima mundi, partes vel etiam modificationes, flagrationi obnoxii; mens hominis divina & tamen mortalis. DEUS corporeus. §. X. Corruptio mentis materiæ adscripta; ea insita virtute divina vitanda, integra & sine labe servanda: materia DEO inobsequens. Cynicus minister universi, mundi, naturæ, Dei, sine affectu, totus atheus. Spes futuræ sortis melioris inanis & incerta, solatium cruce dignum: conflagratio mundi periodica, omnia in Deum reditura. §. XI. Iisdem impietatis principis moralis philosophia Stoicorum inædificata. Fatalis necessitas omnia præcepta enervans. §. XII. Mala inde in Ecclesiam redundantia. Stoici errores pro Christianis doctrinis admissi, doctrina moralis *μετεωρίζουσα*. Cautio inde in rebus veterum cognoscendis adhibenda.

§. I.

Etsi semper orbi literato de Te gratulatus sum, Venerande ZIMMERMANNE, qui in Te virum nactus est, non eruditionis tantum radiis elegantissimam disciplinis melioribus lucem inferentem, sed & insolita animi dexteritate sine præjudiciorum nebula, qua doctissimos sæpe viros in devia abripi & in errores duci videmus, veritati litantem: etsi, quod lætus addo, talem in Te candorem & amorem semper colui, qualem rarius inter eruditos depre-

deprehendimus : nunc tamen, cum Te in patrio Athenæo divinis literis docendis admotum totus cum Tiguro vestro amicorum Tuorum chorus lætetur, novam & literariæ reipublicæ, & sanctioribus disciplinis de Te gratulandi occasionem percipio. Satis enim, & multorum annorum experientia doctus novi, talem Te in gravissimo Te munere præstiturum, qualem non vanis auguriis in elegantissima, quam sub auspiciis novi muneris dedisti, oratione Te fore promissisti, Theologum veritatis in amore & pace studiosum. Quam insignem animi dexteritatem cum magno iudicii acumine & proluxa eruditione ornes atque adaugeas, qui possim aliter, quam ut Ecclesiæ, orbi erudito, patriæ Tuæ, & doctæ juventuti, cui Doctor præfectus es, optima & jucundissima quæque de Te pollicear ? Mihi vero, ut Tua amicitia nihil est jucundius atque dulcius, ita preces quoque pro Te atque votiva verba amor in Te meus, isque candidissimus postulat. Unde scriptionis hujus occasionem nactus, ut & ego inter amicorum Tuorum plausus animum optime Tibi cupientem probem, toto pectore candidas pro omnigena felicitate & exoptatissimis in munere suscepto fatis preces persolvo, & uberrima animi ex divina Spiritus S. unctione dona, robur & fortitudinem, cum amore & pacis studio in veritate certantem, victorias de vitiis & erroribus plurimas, quæque alia Theologo necessaria atque jucunda sunt *χαρίσματα*, ex abundantissimo patris luminum gremio in Te redundatura, totus precor.

§. II.

Ne vero vel Te solidis meditationibus assuetum vel lectorem quoque nuda offendat gratulatio, pietasque in Te mea privato tantum argumento molesta sit, placuit pauca Tecum de *subdolo Stoicorum philosophorum post N. G. studio Christianos imitandi* confabulari.

lari; ratus, neque Tibi in ejusmodi materiis hæc-
 nus felicissime versato, & ad talia argumentorum ge-
 nera excutienda nato atque vocato, injucundam,
 neque prudenti lectori ingratham, nec a mea voca-
 tione & munere nimis alienam fore tractationem.
 Nosti enim egregie, Optime ZIMMERMANNE,
 qui historiæ sanctioris & philosophicæ forulos toties
 excussisti, quam mire se in omnes partes gyrosque con-
 verterit & torserit coluber infernalis, ex quo divinus
 victor Jesus caput ejus conculcavit, & divinæ lucis ra-
 diis animis illuxit, ut sanctissimis Christianæ religio-
 nis doctrinis nocere, earumque incrementis obicem
 ponere valeret. Hoc cum persecutionibus, odiis,
 calumniis, contemtuque efficere satis se non posse
 perspiceret, & sanctitatem pariter atque soliditatem
 cœlestis doctrinæ, omnem superstitionem pessundare
 atque evertere cerneret, alia via rei medicinam af-
 ferre ratus, eo compulit gentilis doctrinæ & crudi-
 tionis antistites, ut sanctissimam, totique fere orbi
 jam probatam Christianorum doctrinam imitarentur,
 & inprimis, quæ ad mores formandos & emendan-
 dos a vitiorum squalore animos faciunt, juxta disci-
 plinam Christianorum, tantopere in eo effulgentem,
 se componerent. Ita enim sperabat fore hostis calli-
 dissimus, ut & illi, qui doctrinas gentiles tanquam
 impias, vanas & animorum felicitati non pares respi-
 ciebant, auremque Christianis doctoribus præbere in-
 cipiebant, ad avitam religionem saniori habitu exor-
 natam revocarentur, & Doctoribus Christianis, pro-
 pudiosam gentilis superstitionis faciem toties expro-
 brantibus, os obstrueretur. Quod tamen, ut in do-
 lis struendis plane est *μυρίοις*, ita instituit, ut salva
 omni verborum & dogmatum Christianorum imita-
 tione pessimarum tamen doctrinarum sanies conser-
 varetur, quo scilicet animi ad veritatem cœlestem
 oculos aperire desinerent, & sub fallaci doctrinarum
 caltio-

castiorem faciem præ se ferentium larva ipsa cœlestis doctrinæ puritas et integritas corrumpetur. In quo, cheu ! rem suam mire auxit infernalis genius ; historia sacra haud uno exemplo testante, non tantum prudentiorem hanc gentilium religionem multos ab amplectendis Christianæ religionis regulis arcuisse, sed & introductam esse inter gregem Dei pessimam errorum congeriem. Id quod nemo negaverit, qui ea, quæ in Ecclesia Dei post N. C. gesta sunt, attentus ad causas rerum atque eventus, recte ponderaverit. Possem hic esse, si id agerem, prolixissimus, & ex sectæ *Ecclesiæ* studio, Christianam religionem cum gentilium placitis conciliandi, illiusque verba & dogmata imitandi, quod *Ammonio Sacca* auctore instituit, id latissime demonstrare, nisi id a præsentis scriptiois limitibus paulum esset remotius, & occupasset argumentum magnus nostræ ætatis Polyhistor & Ecclesiæ ornamentum, summe Rev. JO. LAURENTIUS MOSHEMIUS (a.); quin & ipse

S 3

ego,

(a.) Primus, qui *Ecclesiorum* sectam practica ratione consideraverit, quæ vix facie prius nota erat, fuit B. GODOFREDUS OLEARIUS in *Diss. de Secta Ecclesiastica*, quam Latinæ Versioni *Hist. Philos. STANLEII* adjecit ; cum vero is primas tantum lineas duxisset, accuratius in ejus circumstantias inquisivit Cel. MOSHEMIUS, cujus longe eruditissimam de turbata per recentiores *Platonicos Ecclesia* Dissertationem multis accessionibus auctam legimus ad calcem *Syst. Intell. CUDWORTHII* & in *Sylloge Dissert. Hist. Eccles. illustrantium* p. 89. sqq. qui, cum potiora omnia, quæ ad hanc Sectam intime noscendam pertinent, attulerit, merito Lectorem ad hos fontes remittimus. Conferendæ vero EJUSD. *Institut. Histor. Christianæ antiquioris, Sect. II. P. II. c. 1. §. 5. sqq.* & Doctissimus HUETIUS de la foiblesse de l'Esprit humain, L. II. c. 2. p. 217. sqq.

ego, quæ ad rei summam atque nervum pertinent, alibi (b.) satis jam enarrassem. Argumento itaque nobilissimo lucem aliquam allaturus, de *STOICORUM* tantum *subdolo Christianos imitandi studio* quædam dicam. Ea enim secta ante exortos *Eclecticis* (quo nomine *Alexandrini* illi philosophastri & malefani doctrinarum toto cœlo inter se dissentientium conciliatores & Syncretistæ superbiebant;) in hoc studio diligens fuit, cum reliquæ sectæ, si unam *Pythagoreorum* in vitam revocari tentatam, sed in ipsis nascendi initiis iterum expirantem, (c.) excipias, (d.) in hanc curam incubuisse non legantur, (e.) quod Systematum suorum ratio longius ab ista accommodatione, ut ita dicam, & dolosis mendaciis abhorrerit: nec eorum tanta fuit auctoritas, quam *Stoicorum*, quæ secta post C. N. magnum splendorem nacta est. (f.)

§. III.

Quemadmodum vero in *Eclectica Secta, Alexandrinam Philosophiam* professi gentiles ita imitati sunt
Chri-

(b.) *Hist. Philos. T. III. p. 427. seqq.*

(c.) Vid. *ib. p. 190. seqq.*

(d.) Fum enim in hac imitatione sedulum fuisse, nobile exemplum est *Apollonius Tyaneus*, vid. *ib. p. 301. seqq.*

(e.) *EPICUREI*, ut severius Religionis studium omne tanquam inania superstitionis somnia ridebant, ita nec Christianis magnum pretium statuebant, sed eos vel ut impostores vel ut stultos & insanos falli suetos traducebant, Christumque Apollonio, Apulejo, Alexandro, Peregrino, hisque similibus parem putabant, quod vel *LUCIANI Peregrinum* vel *ORIGENIS* libros contra *Celsum* legenti ad oculum patebit; *Peripateticorum* vero rationes, cum magnopere a R. C. placitis dissentiant, ideo assimilationem non patiebantur.

(f.) Vid. *Hist. Philos. T. III. p. 1054. seqq.*

Christianos, ut verba non tantum & formulas Christianorum, quæ ex re sua erant, exprimerent, sed & dogmata quædam imitarentur, suæque ad externum eorum habitum accommodarent, & imprimis doctrinam moralem sanctiorem expilarent, transumptis iis, quæ cum suo systemate convenire putabant, (g.) ita quoque cum *STOICIS* evenit. Etsi enim hi in ejusmodi Syncretismum non juraverunt, qualis Alexandrinis Philosophis placuit, non abhorruerunt tamen a recipiendis alienis formulis & dogmatibus, ubi sibi cum iis convenire posse putabant. (b.) Ma-

S 4

xime

(g.) Demonstratum id est pluribus in Doctissima Dissertatione *de studio gentilium Christianos imitandi*, quam ductis a Celeberrimo MOSHEMIO vestigiis insistens exhibuit Cl. JO. HENR. WEDDERKAMP, quamque Vir ille incomparabilis inter *Dissert. ad H. E. pertinentes*, p. 330. seqq. extare voluit. Etsi enim argumenti nobilissimi primæ magis lineæ ductæ sunt, quam accurata & proluxa instituta tractatio, ubique tamen lumina Moshemiana argumentum mira luce perfundunt; unde merito optamus, tantum temporis & otii suppetere Venerabili Abbati, ut auctiorem nobis suoque calamo institutam tractationem dare queat. Neminem enim accuratius horum hominum arcana inspexisse, multis speciminibus prodidit.

(b.) Hoc Stoicæ Philosophiæ historiam perlustranti obscurum esse nequit. Præivit exemplo suo ipse sectæ conditor ZENO, quem Systema suum ex Academia, Cynosarge & a Dialecticis consuisse, notavi *Hist. Philos. T. I. p. 992. 995. seqq.* Post Redemptoris vero in carne apparitionem varias sectas majore libertate expilavit Stoica, indeque arva sua alienis rivis inundavit. Testes Stoicos celeberrimos, SENECA & ANTONINUM, quorum ille de *vita beata*, c. 3. ait: *non alligo me ad unum aliquem ex Stoicis proceribus; est & mihi censendi jus;*

xime vero id sibi incumbere credidit hæc secta, ut pietatis & purioris disciplinæ laudem, quam ab ipsis Porticus iniuís sibi acquisiverat, (i.) tueretur. Cum vero Christianæ religionis puritas & doctrinæ in ea moralis præstantia omnium oculos perstringeret, Stoicorum vero hypocriticam & impiam Philosophiam prudentioribus diu suspectam (k.) manifestaret, (l.) sponte sua eo ducebantur, ut & disciplinæ Christianæ formulas atque loquendi modos imitarentur, & dogmata quædam propius sequerentur, & rem suam moralem ad sanctissimæ religionis nostræ præcepta emendarent. Unde error jocularis ortus est, quo crediderunt nonnulli, trigam Stoicorum Philosophorum post C. N. celeberrimam, SENECA, ANTONINUM Imperatorem & EPICTETUM, ad Christiania-

itaque aliquem sequar, aliquem jubebo sententiam dividere: Et reapse illud præstitit, cui non tantum Stoici nostri audiunt, ep. 117. sed & Epicurus noster, ep. 107. unde SENECA etiam inter Syncretistas locum obtinere, jam monui in Hist. Philos. T. III. p. 1109. ANTONINUS vero per omnes lectas magistros nactus, ab omnibus multum doctrina & moribus se profecisse fatetur, de se ipso, L. I. §. 7. sqq.

(i.) Videnda quæ prolixè dixi *Hist. Phil. T. I. p. 1001. sqq.* & conferendus LIPSIUS *Manud. ad Philos. Stoic. l. I. Diss. XIV. p. m. 84.*

(k.) Vide dicta *Hist. Philos. l. c. & T. III. p. 1061. sqq.*

(l.) Vid. JUSTINUS MARTYR *Dial. cum Tryph. p. m. 219. seqq.* & quæ *Hist. Phil. T. IV. p. 1168.* ad h. l. dicta sunt. Ipse CLEMENS ALEXANDRINUS, magnus alias Porticus admirator Stoicos atheos facit, *Strom. L. VII. p. 753.* Conf. ORIGEN. *contra Cels. L. III. p. m. 162.* Ed. Hoesch. & imprimis EPIPIAN. *adv. hæ. L. I. hæ. V. T. I. p. 12.* ut reliquos Apologetas R. C. taceam.

ftianam religionem clanculum accessisse, saltem ei ex parte addictos fuisse; (*m.*) facile eum evitaturum, si ad hoc imitandi Christianos studium attendissent, & subdolum in eo modum observatum recte annotassent. Et hæc vera quoque causa est, cur in comparatione Philosophiæ Stoicæ cum religionis Christianæ præceptis tot eruditi viri lapsi sint; Christianis esse consentanea putantes, quæ externam speciem egregie mentiuntur. Qua ratione STEUCHUM, MUTIUM PANSAM, magnosque viros LIPSIUM & HUETIUM, imo & recentissima ætate nostrâ quosdam viros doctos, lapsos esse, alibi (*n.*) ostensum est. Facile enim incautis, & ad dolosum scopum Philosophorum non attentis, externa species & habitus imponit: quem Christiano colore externe nitere, jam prolixius demonstrabo.

§. IV.

Et primo quidem luculenter probant hanc Christianorum imitationem, quam STOICI Philosophi C. N. posteriores susceperunt, *loquendi formulæ a Christianis transumptæ*. Hospes sit oportet in Stoicorum scriptis, SENECAE potissimum, EPICTETI & ANTONINI quæ nobis integra servata sunt a temporis injuria, qui non observaverit, ejusmodi locutiones & dicendi formas occurrere, quæ vel ipso or-

S 5

tu

(*m.*) Dictum quoque hac de re, quantum satis, in *Hist. Philos. T. III.* & quidem de EPICTETO p. 1163. 1220. de SENECA p. 1125. 1137. *seqq.* ubi etiam de fictis inter Apostolum Paulum & Senecam Epistolis actum; de ANTONINO vero p. 1233. 1242. *seq.* conf. *Otium Vindel.* p. 99.

(*n.*) In *Otium Vindel. Mel. I. & II.*

(*o.*) Ex ejus enim Dissertationibus sua compilavit ARIANUS.

tu suo Hellenisticam dicendi rationem sapiunt, vel a sacris Scriptoribus potissimum adhibitæ, & in usum introductæ sunt sacrum, gentilibus antea non adhibitum, a Stoicis vero, ut magis pie loquerentur, transfusum. Hoc exemplis, nisi fallor, luculentis adstruere licet. Frequens sacris scriptoribus vox, *χάρις Θεῷ*, ad significandam gratiarum actionem, ex. gr. *1. Cor. X. 30. (p.) XV. 57. Luc. VI. 32.* Verum non eodem tantum sensu, sed & eodem dicendi modo & usu, & iisdem prorsus verbis Judaicam & Christianam formulam adhibuit EPICTETUS; ait enim: *(q.) τότε καὶ ἐγὼ ἡμαρτανον, νῦν δὲ οὐκέτι, χάρις τῷ Θεῷ, tunc & ego peccabam, nunc vero non item, gratia sit Deo. Cœlestis, apud Paulum, mansio beatorum vocatur πόλις Θεοῦ ἐπουράνιος, civitas DEI cœlestis; ἡ ἀνω Ἱερουσαλὴμ, superna Hierosolyma; (r.) Quam locutionem ab Hebræis desumptam esse, dudum Viri docti monuerunt. (s.) Eandem vero dicendi rationem, sensu licet Stoico, adhibuit ANTONINUS, qui non tantum, Διὸς πόλιν memorat, *Dei civitatem (t.)* sed & ἀνθρώπους εἶναι πολίτας πόλεως τῆς ἀνωτάτης, *homines cives esse civitatis supernæ*, asserit, *(u.)* unde & sacra vox, quæ homines cives Dei nominat, Stoicis tantopere adamata est, quod prolixius ostendi posset, nisi otia nobis fecisset GATAKERUS, qui videndus. *(x.)* Nihil sacris scriptoribus frequentius, quam hominem divi-*

(p.) Vid. Ven. WOLFIUS *Cur. Phil. ad 1. Cor. X. 30.*
Doctissimi Interpp. Galli Berol. ad h.l.

(q.) L. IV. c. 4. *Dissertationum* ab ARRIANO excerptarum calamo.

(r.) Ebr. XII. 22. Gal. IV. 26.

(s.) Vid. LIGHTFOOT. *Opp. T. I. p. 355.* Ven. WOLFIUS ad h.l. & quos porro laudat.

(t.) L. IV. §. 3. *(u.)* L. III. §. 11.

(x.) Ad Antonin. L. II. §. 16.

divina sapientia emendatum & gratiosum apud Deum, vocare *filium Dei*, quod is divinam mentem rationemque adeptus sit, & cognatione spiritali Deum attingat. Eadem vero vox EPICTETI quoque, qui eleganter (γ.): κοινωνεῖν μόνον ταῦτα (λογικά) πέφυκε τῷ Θεῷ τῆς συναστροφῆς κατὰ τὸν λόγον ἐπιπλεγμένα, διατί μὴ εἴπῃ τις αὐτὸν κόσμιον; διατί μὴ οὖν τοῦ Θεοῦ; eo quod *natura ita fert, ut rationalia divina consuetudinis societatem ratione & mente sint adepta, cur te nolis dicere mundanum? cur non Dei filium?* Sacram vocem quilibet agnoscit, *mundum* accipientem pro grege hominum malorum; sed eadem placuit ANTONINO, (z.) qui non tantum mundum malos ferentem sua natura inducit, sed & illo ipso simili, eodemque illationis modo probat, quo usi sunt ipse Salvator (a.) & Apostolus JACOBUS. (b.) Ita enim: μέμνησο ὅτι ὥσπερ αἰσχρὸν, ξενοῦναι, εἰ ἡ συχὴ σῦκα φέρει, οὕτως εἰ ὁ κόσμος ταδε τινα φέρει ὧν ἐστὶ Φοβός. *Memineris, aequè turpe esse, mirari quenquam, quod ficus ficum ferat, quam quod mundus sit ferax eorum, quæ profert.* Dixerat vero in antecedentibus de hominibus examinandis, num mali vel boni sint; & monuerat, non mirandum, si consentanea decretis naturæ feceris; unde infert, nec mirandum esse, si contraria in aliquo deprehendimus, cum & ea mundi naturæ convenientia sint, ut febris & adversus ventus, a medico vel gubernatore navis non mirandi. Unde patet, *mundum* ab Imperatore adhibitum eo sensu, quo malos significat, qui id sunt in humano genere, quod febris & adversus ventus in naturalibus, sensu prorsus Ebræo & sacris tantum scriptoribus familiari. Non vero solitariae tantum voces ex sacris a Stoicis desumptæ sunt, quarum plures facile adduci possunt.

- (γ.) L. I. c. 9. (z.) De se ipso, L. VIII. §. 15.
 (a.) MATTH. VII. 26. (b.) Epist. III. 12.

possent, (c.) nisi brevitati litandum esset, sed phra-
ses quoque integræ ex sacris imitatione expressæ. No-
bilis sententia Divi PAULI est, (d.) monentis: *tem-
plum DEI nos esse, & spiritum DEI habitare in nobis*; en-
vero subdolum imitatore *SENECAM*: (e.) *Pro-
pe a te Deus est, tecum est, intus est; ita dico, Lucili, sacer
inter nos spiritus sedet, malorum bonorumque nostrorum ob-
servator & custos*. Eundem in modum, quod sanctis-
simus Salvator promisit, (f.) *venturum se ad homines,
& in hominum mentes*, ille ipse nefanda κακοζηλια ita ex-
pressit: (g.) *Miraris, homines ad Deos ire? Deus ad homi-
nes venit, immo, quod propius est, in homines*. Quibus pa-
ria habet EPICLETUS, qui inter alia: (h.) αὐτοῦ
τοῦ Θεοῦ παρόντος ἔσωθεν, καὶ ἐφορώλης πάντα καὶ ἐπακούον-
τος, οὐκ αἰσχύνη τὰυτα ἐνδυμύμενος καὶ ποιῶν; *Ipsa Deo in-
trinssecus præsente, & omnia tum intuentem tum audiente, non
verecundaris eadem cogitare & facere? Ubi & reliqua le-
genda sunt, ad hoc unum collineantia omnia*. Quæ
vero Apostolus (i.) de Trino Deo ait: ἐξ αὐτοῦ, καὶ δι'
αὐτοῦ, καὶ εἰς αὐτὸν πάντα, ANTONINUS de Stoi-
co Deo fidenter adhibuit, scribit enim: (k.) ὡ φύσις,
ἐκ σοῦ

- (c.) Tales sunt: Deo se ἐξ ὅλης τῆς ψυχῆς, ex tota anima
permittere, apud ANTONINUM. L. IV. §. 31. coll.
L. III. §. 4. hominem ἀληθινῶς, ex veritate diligere, L.
VI. §. 39. Vita peregrinatio, apud SENECA in ex-
cerptis, & ANTONIN. L. II. §. 17. Mors ἀπόλυσις
πρὸς τὸν Θεόν, dimissio ad Deum, apud EPICLET. L.
I. c. 9. pius & bonus ἱερεὺς τις καὶ ὑπουργὸς τῶν Θεῶν,
Sacerdos ac minister Deorum, ANTONIN. L. III.
§. 4. ἀθλητὴς ἀθλου μεγίστου, luctator certaminis maxi-
mi, ib. τοῦ Θεοῦ μάρτυρ καὶ Διάκονος, Dei testis atque
Minister, apud EPICLET. L. III, c. 26. & his similes.
(d.) 1. Cor. III. 16. (e.) Epist. 41. (f.) JOAN.
XIV. 23. (g.) Epist. 73. (h.) L. II. c. 8.
(i.) Rom. XI. 36. (k.) L. IV. §. 23.

ἐκ σοῦ πάντα, ἐν σοὶ πάντα, εἰς σὲ πάντα, *O natura, ex te omnia, in te omnia, ad te omnia*; manifesta verborum cum Apostoli sententia συμφωνία. Immo nec ab ipsius Servatoris nostri verbis abhorrent Stoici, qui cum sanctissimo & divino hoc doctore (l.) ad ferendos malos iisque benefaciendum, non tantum exemplo DEI excitant, (m.) sed & eadem verba adhibent. Audi SENECA M, præcipientem: *Propositum est nobis, secundum rerum naturam vivere, & Deorum exemplum sequi*; (n.) *si Deos imitaris, da & ingratis beneficia, nam & sceleratis sol oritur, & piratis patent maria*. Et quemadmodum ad exequendas pacis, concordiae & mutuum officiorum partes S. Paulus inde argumentum sumit, quod *unum corpus, unus spiritus sumus, membraque unius corporis*, in quo nec manus pedibus, nec pedes manibus nocent, sed inserviunt: (o.) Ita non minus Stoicis, phrasibus sanctissimis, etsi sensu Stoico, membra sumus unius corporis; πρὸς μίαν τινὰ συνέργειαν κατεσκευασμένα, (p.) *ad mutuam eandemque cooperationem producta & efficta*; unde eleganter SENECA: (q.) *Quod si nocere velint manus pedibus? manibus oculi? ut omnia inter se membra consentiant, quia singula servari, totius interest: ita homines singulis parcent, quia ad cætum geniti sumus. Salva autem societas esse, nisi amore & custodia partium, non potest*. Et ex eodem fonte illud ipsum simile de ramo avulso, quo usus est D. PAULUS, ita in usus suos convertit ANTONINUS, (r.) ut fere Paulina servet verba. Ait enim: Κλάδος τοῦ προσεχοῦς κλάδου ἀποκοπεῖς οὐ δύνασαι μὴ καὶ τοῦ ὅλου φυλοῦ ἀποκε-

(l.) MATTH. V. 45. LUC. VI. 35. (m.) Vid. ANTONIN. L. III. §. 70. SENECA de benefic. L. I. c. 1. L. VII. c. 31. (n.) ib. L. III. c. 25. (o.) Eph. IV. 4. Rom. XII. 4. 1. Cor. XII. 12. (p.) ANTONIN. L. VII. §. 13. (q.) de ira. L. II. c. 31. (r.) L. XI. §. 8.

ἀποκέκοφθαι, οὕτω καὶ ἄνθρωπος ἐνὸς ἀνθρώπου ἀποσχισθεὶς ὅλης τῆς κοινωνίας ἀποπέπλωκε, - ἔξεισι γὰρ καὶ πάλιν τοῦ ὅλου συμπληρωτικοῖς γίνεσθαι. *Ramus a coherente ramo abscissus, non potest non a tota stirpe abscindi : Sic & homo ab alio homine abscissus, communitate tota excidit : - licet ei de novo coalescere, cui prius adhaeserat, & ad universi complementum locum recuperare suum. Quæ exempla luculenter nos convincunt, Stoicos; etli tenui magnopere a sacris doctrinis abeuntes, verbis tamen & dicendi modis Christianos scriptores quam maxime fuisse imitatos.*

§. V.

Largiore tamen hæc omnia radiabunt luce, si quoque ostenderim, non verba tantum, sed & ipsa *dogmata* externo habitu accommodasse Christianorum doctrinis STOICOS, & ita systematis sui rationes cautissime incrustasse, ut propius a Christianis abesse viderentur. Non excitabo totum Systema Stoicum, externa facie ita splendens, ut & veterum atque recentiorum Theologorum plurimis, ad latens venenum non satis attentis, in Christianorum castris militasse visi sint; id enim a præsentis scriptionis angustia longius recedit: ostendam tamen, putidissima & maxime impia dogmata, qualia Stoicorum fundamentales doctrinas esse in fine videbimus, ita exornalle, ut Christianis quam maxime accederent veritatibus. In his doctrina de DEO est, quæ per gentilium Theogonias & Mythologias saniorum risu exposita, & probris Christianorum objecta, a Stoicis maxime ad saniores modum emendata, & allegoriæ beneficio, sensu magis Philosophico exornata est; vestigia Stoicorum postea legentibus Platonicis recentioribus, quia Stoica placita inter sua ex parte receperunt. Testes volo Philosophos non incelebres, PHURNUTUM & SALLUSTIUM, quorum
ille

ille in libello *de natura Deorum*, hic in scripto *de Diis & mundo*, (s.) omnes ingenii nervos adhibuerunt, ut Philosophicam & sanio-rem fabulis sacris significationem esse ostenderent. Hinc unus tantum *Deus pater omnium, creator universi*, (t.) *causa rerum prima & unica, ex qua & ad quam omnia*, magnis vocibus deprædicatus est. (u.) *Ille summe bonus*, (x.) *etiam in asperis & pœnia immissis*; (y.) *mens incorporea*, (z.) *præsens etiam intra clausas fœres*, (a.) *cordium & cogitationum scrutator*; (b.) *qui nudas mentes inspicit*, (c.) *summe benevolus, qui & malis beneficia præstat*, (d.) *patiensque est, justus etiam in omnibus actionibus*. (e.) Non patitur limitum, quos mihi constitui, angustia, magnifica Stoicorum verba hic lectori legenda propinare, verum curiosum laboris non poenitebit, qui adjecta paginæ loca evolverit; miraturus, quam caste, quam magnifice, quam temperanter de DEO loqui videantur. Nihil vero magis istam accommodationem Stoicam prodit, quam confidentissima assertio PROVIDENTIÆ DIVINÆ, quæ non omni tantum mundo, sed & singulis in

- (s.) Utèrque libellus extat inter TH. GALEI *Opuscula Mythologica*, p. 139. sqq. 243. sqq.
 (t.) SENECA *Quæst. nat. L. III. c. 30.*
 (u.) Vid. IDEM *de Benef. L. IV. c. 7.* ANTONIN. *L. IV. §. 23.*
 (x.) IDEM *L. VI. §. 1.* SENECA. *Epist. 95.*
 (y.) SENECA *l. c.* (z.) ANTONINI *L. IV. §. 40.* conf. GATAKER. *ad h. l. & quæ ex instituto dicta sunt Hist. Philos. T. II. p. 1023. sq. 1040.*
 (a) EPICET. *L. I. c. 14.* conf. GATAKER. *l. c. p. m. 119.* (b.) ANTONIN. *L. XII. §. 2.* conf. GATAKER. *l. c. p. 418.*
 (c.) *Ibid.* (d.) SENECA *de beneficiis passim. L. I. r. III. 25. VII. 31.* ANTON. *L. VII. §. 70.*
 (e.) Id. *L. XII. §. 5.*

in illo rebus, maximis, minimis, benevola & prudentissima ratione prospicit. Apertius ante C. N. casui fortuito ab Epicurea Schola asserto opponebat Porticus aeternam fati legem & indeclinabilem rerum seriem & catenam, volventem semet ipsam, seseque implicantem, per aeternos consequentiae ordines, ex quibus apta connexaque est. (f.) Hujus fati legibus Deum subjicere non crubescibat. Non dimitti quidem hæc poterant, quæ intimum Systematis Stoici nexum tangunt; vexata tamen & oppugnata merito a Christianis doctoribus, emollienda & veritati Christianæ propius accommodanda erant. (g.) Hinc providentia Deo adscripta, hinc provida Dei lex in omnes creaturas asserta, & attentissimus ad omnia oculus divinus, qui nec in minimo fallitur. (h.) Actum agerem, si hæc latius adductis Stoicorum dissertationibus de providentia divina (inter quos EPICTETUS omnium elegantissime locutus est;) probarem, cum ea prolixè enarraverint LIPSIUS (i.) & BUDDEUS. (k.) Nemo vero vel melius vel elegantius quoque hanc providentiam Stoicam ornaverit, quam Tu, Doctissime ZIMMERMANNE; (l.) & recte quoque, si quid judico, si id de ista accommodatione & imitatione Christianorum intelligatur, quam salvis hypothesibus

(f.) Hæc CHRYSIPPI, celeberrimi Zenonis discipuli, definitio fati est apud GELLIUM L. VI. c. 2. quam erudite illustrat J. THOMASIUS de exult. mundi Stoica, Diss. XIII. p. 166. seqq.

(g.) Agnovit hoc jam FR. BALTUS judgement des SS. Peres sur la morale de la Phil. payenne. p. 70. seq.

(h.) EPICT. L. I. c. 12.

(i.) Physiol. Stoic. L. I. Diss. XI. p. m. 51. seqq.

(k.) Introd. in Phil. mor. Stoicorum ex mente Antonini, ejus libris de se ipso præmissa. (l.) In Museo Hist. Theol. Phil. Bremæ edito. Vol. I. P. I. p. 1. seqq.

bus suis afferebant Seneca, Antoninus, Epictetus, & his similes. Imo nec invitus concesserim ei, qui cum illustri H U E T I O, (m.) etsi mire sensus Stoicos perverterit, ad Christianorum sanctissimum de *Trinitate* dogma alluisse, eique nugas suas Stoicas accommodasse SENECA M, existimaverit, scribentem: (n.) *Quisquis formator universi fuit, sive ille Deus est potens omnium, sive incorporealis ratio ingentium operum artifex, sive divinus spiritus, per omnia maxima minima aequali intentione diffusus; modo hæc Stoico sensu dicta esse, & dolosa verba nectere, impio fundamento substrato, cogitemus.* Post Deum nec divinos spiritus, quos *Angelos* Deique legatos Christiana doctrina, post Judæos, ipsis gentilibus non invitis (o.) nominat, quosque *dæmonas* & Stoicos *genios* vocasse gentiles, notius est, quam ut moneri necesse sit, intactos dimisere Stoici, quominus & de iis præcepta sua Christianorum traditis assimilarent. Auctor enim est L A C T A N T I U S, (p.) dixisse in *exhortationibus* SENECA M: *Genuisse regni sui ministros Deum.* Illi vero non Dei tantum ministri, sed hominum quoque custodes; cuilibet enim internum genium præsidere monebant, divinitatis participem, quem τὸν ἡμέτερον δαίμονα vocat E P I C T E T U S, (q.) & toties animum advertendum ad eum esse, urget A N T O N I N U S. De his vero argute, & prope ad Christianorum mentem, si externum verborum corticem respicias, SENECA: (r.) *Ego amicis jucundus, inimicis mitis & facilis exorabor, antequam roger, honestis precibus occurram, patriam meam mundum esse sciam, & præsides Deos supra me circaque me*
Tom. III. T stare,

- (m.) *Quæst. Alnet. L. II. c. 3. p. m. 95.* (n.) *Consolat. ad Helviam. c. 8.* (o.) *Vid. Oraculum apud L A C T A N T. Instit. L. I. c. 7.* (p.) *l. c. & c. 4.*
(q.) *L. I. c. 14.* Qui locus imprimis legi meretur.
(r.) *De vita beata. c. 20.*

stare, factorum dictorumque censores. Post angelos de homine quoque præter modum magnifice loquebantur Stoici; hunc divinæ naturæ participem, hunc Jovis filium & cognatum fatebantur, (s.) hunc ex luto factum, (t.) & ex uno sanguine per omnem humani generis cognationem dispersum esse, (u.) ratione vero animi

Exemplumque DEI quemque esse in imagine parva; (x.)

hunc tribus partibus, mente, anima & corpore, constare asserebant. (y.) Quid in his omnibus est, quod non Christianam de homine, Dei imagine, doctrinam verbis saltem & externa specie referat; & quis istius modi locutionum fontem inter Christianos scriptores non facile quærat? Quin non humanæ tantum mentis præstantiam more Christiano exprimere, sed & corruptionem ejus deplorare vocibus sacris didicerunt. Unde enim ita SENECA? (z.) Duo sunt, propter quæ deliquimus, aut inest animo pravis opinionibus malitia contracta, aut etiam, si non falsis est occupatus, ad falsa proclivis est, & cito specie, quo non oportet, trahente corrumpitur. (a.) Ex hac humani animi corruptione necessari-

(s.) ANTONINUS passim, vid. L. II. §. I. & GATAKER ad h. l. p. 48. SENECA passim, vid. ep. 92.

(t.) Hinc corpus *Φύεαμα* vocat ANTONINUS L. VII. §. 68. id est coalitum luto, ex quo vasa fictilia conficiuntur, quam ipsam vocem PAULUS Rom. IX. 21. adhibuit. conf. EPICTETUS L. I. c. 1.

(u.) ANTONIN. L. XII. §. 26. L. II. §. 1.

(x.) MANILIUS L. IV. his similibusque vocibus rapitur fere extra se LIPSIUS *Physiol. Stoic. L. III. Diss. II. p. m. 274. sqq.* (y.) ANTONIN. L. II. §. 2. L. III. §. 16. L. XII. §. 3. (z.) Ep. 94.

(a.) Fusè hanc hominis corruptionem explicat SIMPLICIUS Comm. in *Epiët. Enchir. p. m. 121.* etsi funda-

cessitatem *conversionis* & mutationis urgebant Christiani doctores ; hic poenitentiam injungebant, & peccatum agnoscere, & corruptum animum mutare, & cum inhabitante peccato pugnam exercere, & cor atque membra ipsa rescindere jubebant. Quid ad hæc STOICI? Et hic simias Christianorum agnosce. Urgebant (b.) τὴν μεταστροφὴν τὴν ἐπὶ τὰ θεῖα γενόμενὴν ἐκ μεταβολῆς, μεταβαλούσης τῆς ψυχῆς εἰς σοφίαν, *conversionem ad divina quæ fit ex mutatione, mutata anima ad sapientiam.* Hinc animum mutandum esse, urget SENECA, (c.) & initium salutis esse notitiam peccati prudenter monet. Inde μέλαινιαν ἐπίληψιν τινὰ ἑαυτοῦ ὡς χρησίμωντι παραεικότος, *reprehensionem sui ipsius, ut qui utile quid omiserit, definit* ANTONINUS (d.) SENECA vero: (e.) *Militandum esse, & quidem genere militia, quo nunquam quies, nunquam otium datur; projicienda, quæ cor laniant, quæ si aliter extrahi nequirent, cor ipsum cum illis revellendum.* His, quæ præcipua Christianorum dogmata attingunt, alia quoque possunt adjici, in quibus ad Christianorum placita externa specie accedere propius Stoici tentasse visi sunt. In his nihil magis imitationem Christianorum prodit, quam descriptio Cynici veri, quæ apud ARRIANUM in Dissertationibus Epicteteis reperitur: (f.) ea enim ita comparata est, ut severus ille morum magister potissimum

T 2

ad

menta magis Platonica quam Stoica supponat. Eleganter vero ANTONINUS L. XI. §. 18. εἰ δὲ τῶν ἀμαρτημάτων ἀπέχη αἰετὰ τὴν γὰρ ἔξιν ποιητικὴν ἔξεις, εἰ καὶ διὰ δειλίαν, ἢ δοξοκοπίαν ἢ τοιοῦτο ἴδι κακὸν ἀπέχη τῶν ὁμοίων ἀμαρτημάτων. Si a quibusdam peccatis abstines, habebis tamen intra te proclivitatem habitumque talia perpetrandi, licet vel ignavia, vel famæ, vel alterius rei causa a similibus peccatis abstineas. (b.) Apud CLEM. ALEX. Strom. L. VI. p. m. 485. (c.) Ep. 28. (d.) L. VIII. §. 10. (e.) Ep. 51. (f.) L. III. c. 22.

ad eam ministri divini ideam respexisse censendus sit, quam sacrae paginae voluntatis divinae nuntiis praescribunt. Illis enim praescribentibus, divini coetus pastor & inspector gregis & nuntius DEI atque praeco, qui debet esse irreprehensibilis, vigilare pro gregis salute, demonstrare salutis viam, & ipsa praxi pietatis gregi esse exemplo. Ecce vero, quam mire ad hanc imaginem Cynicum suum formet Epictetus, cujus verba brevitatis causa tantum Latina do: Scilicet, *non sine Deo tantam rem aggrediendam; qui gubernator hominum fieri velit, in rebus suis non amplius similem esse sui oportere, non iracundum esse, non invidum, si paedagogus publicus esse cupiat; esse Dei legatum, (ἄγγελον) ut hominibus, quae bona quae mala sint nuntiet, ut quantis in erroribus versentur, demonstret, utque alio in loco bonorum malorumque naturam, quam ubi sunt, quarant, ubi vero non sint, cogitent. Esse exploratorem, qui ubi accurate vera indagarit, renuntiet, metu non percussus; suo id exemplo demonstrandum, mentem ejus puriorem sole esse debere; illum pro aliorum salute vigilare, armorum & satellitum loco conscientiam habere, & si diis ita placet, fiat, non alienis rebus supervacaneis occupatum esse, sed in sua curiosum, tanta tolerantia, ut sensus expers videatur, &c.* Verum elegantissima dissertatio tota legenda est, quae si reliqua omnia abessent, sola mihi satis apta videtur, ad convincendos nos, EPICTETUM Christianorum instituta, mores, doctrinam, in oculis habuisse. Et sic in aliis quoque sanctissimae religionis nostrae capitibus liceret hanc Stoicam Christianorum imitationem ostendere, quae tamen brevitati litaturus praetermitto; unum tamen omittere nequeo, in *ultimis hominum* describendis multum Christianorum vestigiis insistere Stoicos. Expendant curiosi rei hujus indagatores, quibus magistris didicerit SENECA (g.) *Nihil aequae prodesse ad temperantiam omnium rerum, quam frequentem cogitationem brevis aevi hujus*

(g.) Ep. 14.

& incerti ; quicquid faciendum , respiciendum ad mortem. Et alibi : (*b.*) *Fugere , non abire dies , vigilandum itaque esse , nisi properamus , relinqui nos . Non deſcendum (i.) eum , qui anteceſſit , & ſequi nos eos , quos amiſimus ; & quæ aliæ hujusmodi voces ſunt in conſolationibus ad Marciam , Helviam & Polybium occurrentes . Ex quibus vel unum decerpere locum juvat , ut luculento exemplo pateat , quam preſſe Chriſtianorum dicta imitatus fuerit SENECA . Is ita ad Marciam : (*k.*) *Exceſſit filius tuus terminos , intra quos ſervit , excepit illum magna & æterna pax , non paupertatis metu , non divitiarum cura angitur ; - tandem ibi conſtitit , unde eum nihil pellat , nihil terreat . Et hæc ſpes illa magna eſt , quam ex parte a Chriſtianis mutuo ſumtam , non ſine metu tamen contrarii , toti ſuæ Philoſophiæ tanquam vinculum quoddam adjungere Stoici , quos inde verifiſimiliter Elpiſticos dictos fuiſſe , alio loco expoſui . (*l.*) Inde magna illa & jactabunda verba , quæ παλιγγενεſίαν Chriſtianam fallaci ratione imitantur : (*m.*) *Mors , quam pertimeſcimus , intermittit vitam , non eripit ; veniet iterum , qui nos in lucem reponat , dies . (n.)* Imo ipſa conflagratio mundi , Stoicis tantopere jactata , Chriſtianorum de ea placita quam maxime commendabat , de qua cum alibi dixerim , hic prolixus eſſe nolo . Tot igitur exempla cum præſto ſint doctrinarum Stoicarum , de quibus Chriſtianorum veſtigia preſſiſſe Stoicos , apertum eſt , quis de imitatione hac ulterius dubitabit ?**

§. VI.

Quod hanc Chriſtianorum imitationem a Stoicis ſuſceptam in meridiana quaſi luce collocat , eſt

T 3

emen-

- (*b.*) *De Brev. vite , c. 9. conf. ANTONIN. L. II. §. 4. (i.) Ep. 99. (k.) c. 19. (l.) Diſſ. de Secta Elpiſtica Miſcell. Berolinens. T. V. p. 222. ſeqq. (m.) Conf. GATAK. p. 385. (n.) SENECA Ep. 31. conf. LIPSIUS Phyſiol. Stoic. L. II. Diſſ. 22.*

emendatio *Philosophiæ moralis* ad præcepta Christianorum facta, quæ & sententiarum pondere & verborum gravitate atque splendore ita Christianam Scholam redolet, ut facile ignoscendum putem viris doctis, qui doli Stoici ignari Philosophos hos in Christianorum castris ex parte militavisse, sibi persuaserunt. Id ut demonstraretur, sanctioris, quæ ad mores hominum spectat, disciplinæ peritum, ad ea tantum intuenda & expendenda incitandum puto, quæ in Stoicorum *Ethica* de officiis hominum erga Deum erga seipsum & erga alios homines dicta sunt. Quæ notabilibus Stoicorum phrasibus omnia recitarem, nisi prolixitatis metus obicem poneret, & verba ipsa lectorem apud Stoicorum trigam supra laudatam quærere juberet. Præcipiunt vero **STOICI**: *Summam officiorum*, quæ **DEO** debent homines, esse, *Deum sequi, eidemque sine exceptione, & beneplacito ejus sine murmure obtemperare*; (o.) Quæ proximo debentur, esse, *eundem tanquam se ipsum, tanquam consanguineum, tanquam membrum unius corporis diligere*, (p.) *amorem hunc extendendum esse etiam ad inimicos*, (q.) *quos beneficiis vincere divina virtus sit*. (r.) Ad hæc duo capita omnia referebant. (s.) Hinc poscebant, ut officio hominis facturus satis, *Deum in omnibus cogitet, in omni negotio eum invocet*, (t.) *pro omnibus gratias agat*, (u.) *& imprimis in laudando & hymnis quoque prædicando Deo omne studium ponat*; quæ ita **EPICLETUS** præcipua exprimit,

- (o.) **ANTONIN. L. V. §. 19. L. VII. §. 22. conf. LIPSIUS Manud. ad Philos. Stoic. L. II. Diss. 19. p. 200.** (p.) **ANTONIN. L. VII. §. 13. 31.** (q.) **SENECA de Benefic. L. VII. c. 31.** (r.) **ANTONIN. L. VII. §. 3.** (s.) **Ibid. §. 31.** (t.) **IDEM. L. VI. §. 23.** (u.) **EPICLET. L. I. c. 7. conf. GATAK. ad Ant. p. 12. STOBÆUS Ecl. Eth. L. I. c. 4.**

mit, (x.) & injungit, ut quos auctores sibi imitandos proposuerit, manibus quasi palpare liceat. Monebant porro, ad *Deum*, omnes nostras cogitationes & interiora nudamque mentem respicientem, in omni actione attendendum, (y.) eumque in omnibus imitandum. Animi porro postulabant culturam omnibus aliis negotiis præferendam, (z.) mutandum ex stultitia animum in sapientiam, nec circa hanc conversionem ad sannas & dicteria stultorum attendendum, (a.) excolendumque ita animum, ut sacer in eo spiritus habitare queat : (b.) hinc cupiditates corque ipsum revellendum. (c.) Amandum proximum non verbo tantum, sed & veritate, tanquam non sibi soli genito, sed in commune bonum nato, (d.) nunquam benefaciendo cessandum, (e.) sed bonam conscientiam ad vitæ usque halitum servandam, bonumque certamen certandum, (f.) & magnam spem alendam, post

T 4

hanc

(x.) Lege elegantissimam Dissertationem *L. I. c. 16.* unde brevitatæ causa hæc tantum Latina do : Nam si sapiamus, quid nobis aliud erat agendum, & publice & privatim, quam Numen celebrandum & laudandum, & grates persolvendæ ? nonne inter fodiendum & arandum & edendum, qui nobis instrumenta præbuerit, has qui manus dederit, qui deglutiendi vim, - - hæc singulis in rebus cantanda erant, & hymnus maximus & divinissimus resonandus, quod facultatem dederit harum rerum intelligentem. Sed & reliqua legenda sunt, mira suavitate se commendantia, & frigora nostri temporis in ruborem dare apta.

(y) EPICETUS *L. I. c. 14.* (z.) conf. BUDDEUS *Isag. in Phil. Mor. Stoicorum ex mente Antonini*. LIPSIUS *Manuduct. ad Phil. Stoic. L. II. Disf. 18. p. 195.* GATAKER. *Præloq. ad Anton. p. 12. Histor. Philos. T. I. p. 1073. 1074.*

(a.) EPICET. *Enchir. c. 18. 29.* (b.) SENECA *Ep. 41.* (c.) IDEM *Ep. 41.* (d.) ANTONIN. *L. VII. §. 55. conf. GATAKER. L. II. §. 3. p. 53.* (e.) SENECA *de beneficiis passim.* (f.) ANTO-

hanc vitam æternam pacem & gaudia in societate Deorum sequutura. (g.) Nihil hic recito, quod non expressis Stoicorum verbis & sententiis toties inculcatum legimus: nihil postulatum audimus, quod non supra gentilia lumina videri queat, quæque Stoicorum Philosophiam moralem ante C. N. magnifica oratione longe superabant. (h.) Annon inde iuste infero, spolia hæc esse Christianis detracta, vel imitatione potius, ad sanctissima morum præcepta Christianorum ita accommodata, ut inde perfectioris & sanctioris Philosophiæ laus, publice Christianis concessa, ad Stoicorum cathedras derivaretur. (i.)

§. VII.

Nihil tamen in his omnibus accessit divinæ veritati propius gens impia, immo quantum in se fuit, subdola ratione veritatem prodidit, certe iu iniuria, quæ Pauli vox est, detinuit. Externo enim doctrinarum, imprimis moralium, splendore & sanctitate Christianis laudem fecisse dubiam contenta, abominandorum errorum nexui pessimoque fundamento totum istud elegantissimum Philosophiæ, Christianam doctrinam imitantis, systema inædificavit. Non ignoro, esse Viros Doctos, qui hæc gratis dici existimant, nec adeo male de fortiori & emendationi Philosophia meritos esse Stoicos autumant, inter quos post LIPSIUM (k.) HUETIUS (l.) GATAKERUS (m.) DACIERIUS (n.) COQUELINUS

NIN. L. III. §. 4. SENECA de vita beata c. 20.

IDEM Ep. 10. (g.) Vide Diss. de Secta Elpistica.

(h.) Observavit hoc QUINTILIANUS Instir. L. X.

(i.) Inde Stoicam Sectam fortissimam & sanctissimam vocat SENeca Ep. 83. (k.) In Manud. ad Phil. Stoicam & Diss. de Physiolog. Stoica passim. (l.) in Quest.

Alnetanis. (m.) In Præloquio ad Antoninum. (n.) In Annotationibus ad Antonin.

LINUS (o.) & alii. (p.) Sed, quod pace Virorum eruditissimorum dixerim, ad ipsum Systema Stoicum non satis attenderunt, & subdolan Christianos externe imitandi rationem non caute satis expendunt. Quod ut planum faciam atque demonstrem, ipsa potissimum Systematis physiologici & moralis, quale in Scholis Stoicorum traditum est, fundamenta adducenda sunt, etsi post virorum doctissimorum (q.) & meum quoque aliqualem laborem (r.) summa tantum capita attingenda sunt; quippe quæ sufficiunt ad demonstrandum, dolosa prorsus ratione Stoicos Christianos fuisse imitatos, & sub emendicatis verbis perversissimum noxiumque occultasse venenum, eo magis fortiusque lædens, quo blandiori & dulciori specie decipit.

§. VIII.

Sunt vero indubia & omnium consensu germanissima Stoæ principia hæc. I. Totum hoc, in quo continemur, & unum esse, & universum, & quæcunque in eo sunt, esse ejusdem essentielles partes, decerptas particulas & membra. (s.) II. Totum illud & subtilius aliquod in se continere principium igneum, activum, & crassius atque passivum, illud esse Deum, hoc materiam. (t.) III. Utrumque principium cum simul unum totum sit, arctissimo ita inter se uniri nexu atque vinculo, ut non nisi utrumque

T 5

ad

- (o.) *Manuel d'Epictete avec des reflexions tirées de la Morale de l'Evangile.* (p.) conf. *Hist. Phil. T. I. p. 1033.*
 (q.) B. JAC. THOMASII de *Exussione Mundi Stoica.* B. J. FRANC. BUDDEI *Dissert. de erroribus Stoicorum*, quæ extant in *Analectis Hist. Phil.* (r.) In *Otio & in del. Mel. II. & in Hist. Philos. T. I. p. 1063. sqq.* (s.) SENECA *Ep. 97.* ANTONIN. *L. IV. §. 40.* GATAKER *ad b. l.* (t.) SENECA *Ep. 65.* ANTONIN. *L. II. §. 2. L. IV. §. 21.*

ad leges & rationes totius vel agere vel pati queat.

(u.) IV. Permeare vero istum ignem, sive Deum Stoicum, totam materiam, eamque informare, vivificare, ejusdemque partibus essentialiter ubique adesse.

(x.) V. Nec hanc Stoici Dei activitatem aliam esse posse, quam quæ leges & rationes totius, cujus pars ille est, postulant, unde & ipse illis legibus subjectus est.

(y.) VI. Inde fatum hoc absolutissimum, & concatenatum causarum & eventuum nexum esse, quo omnia ita eveniunt, ut evenire necesse fuit, cum hoc sacro nodo omnia in universo tanquam in uno artissime invicem implicentur.

(z.) VII. Quoniam vero hæc rerum universitatis series ejus partibus adæquate respondet, & ad illud conservandum facit, inde maxime rationalem esse.

(a.) VIII. Ex isto Deo sive anima mundi decerptos esse & genios (b.) & hominum mentes, quæ ἀποσπασμάτια, portionem divinæ essentiae in se contineant.

(c.) IX. Materiam vero istam crassiores per ignem illum divinum in aspectabilem mundi formam coaluisse, & post certas periodos ad pristinam chaos primævi confusionem per incendium redituram, sicque & partes animæ mundanæ in eam reductum iri, novumque inde ex naturæ universi necessitate mundum pristino in omnibus similem restitutum

(u.) ANTONIN. L. VII. §. 9. conf. BUDDEUS

Supplem. Isagog. in Hist. Theol. Liter. p. 37. & quæ dixi Amœnitat. Liter. T. VIII. de providentia Stoica. (x.)

SENECA *Præf. Quæst. natur.* ANTONIN. L. IV.

§. 40. L. VII. §. 75. (y.) SENECA l. c. (z.)

ANTONIN. L. VI. §. 28. (a.) Vid. LIPSIUS

Phys. Stoic. L. II. Diss. 11. p. 51. sq. GATAKER

Præl. ad Antonin. p. 11. (b.) conf. LIPS. l. c. Diss. 20.

p. 113. (c.) ANTON. L. IX. §. 8. L. II. §. 4.

ÉPICTET. L. III. c. 24. & frequenter SENECA.

tutum iri, (d.) X. Ad hanc universi constitutionem efformare se, sicque partem divinam in nobis habitantem ad felicitatem suam excitare, hoc potissimum Philosophiæ munus esse, abjectis iis, quæ hunc scopum impediunt. (e.) Plura sunt, quæ ex his consequuntur, nobilissima Porticus decreta & præcepta; sed ea hic, ubi brevitatis sectanda est, quærenda non sunt, & decas ista principiorum Stoicorum veritatis studioso sufficit ad detrahendam Stoicis Christianorum simiis larvam. Nam his ipsis principiis pessimam impietatem contineri, eaque ab atheismi abominabili labe prope abesse facile evinci potest, dudumque Viris doctis evictum est. (f.)

§. IX.

His jam positis, & pro interprete decretorum & præceptorum Stoicorum assumtis, facile ostendi potest, quam subdole & maligna ratione infernalis genius piarum doctrinarum βδελύγματα sub larva Christianæ pietatis occultaverit, & quam longe magnifica illa verba & dogmata Stoicorum, quæ supra recensuimus, a veritate illa absint, quam divinos doctores Spiritus S. docuit; quicquid enim Stoa jactavit, quicquid Christianorum verbis interceptis jactantius injunxit, illud omne ita comparatum est, ut salva impia hypothese dicere quoque possit genuinus Spinozæ assecla, verbis Christianorum impietatis suæ virus cautius tegens & occultans. Quod ut faciam manifestum, & subdolum imitationis Stoicæ rationem in aprium producam, bona Tua pace, Venerande ZIMMERMANNE, & verba & sententias memo-

(d.) Hæc frequentissime Stoici crepant: vid. SENECA *conf. ad Mart. c. ult. Quæst. nat. L. III. c. 27.* ANTONIN. *L. V. §. 21.* (e.) ANTONIN. *L. II. §. 3.* quo loco ea fere omnia, quæ hic per partes dicta sunt, collecta legimus. (f.) *conf. Supplem. ad Hist. Philos. p. 182.*

memoria recolam, quibus supra Stoicos Christianorum simias fuisse, ostensum est. Gratias agebat Epictetus Deo; sed cui? universo, sive opificio, ut ait *maximo & summo, quod in se continet omnia, quod ex hominibus & Deo & reliquis creaturis constat, a quo semina delapsa sunt in universa, quæ generantur & nascuntur in terris, tum vero in ea, quæ ratione sunt prædita; quemadmodum ita germanissimam Stoicorum sententiam alibi (g.) exprimit. Hinc Dei filium in sequentibus hominem vocat, id est, cum, qui ab ipso universo productus sit. Dei civitatem Epictetus & Antoninus memorabant, sed cave, spiritualement Christianorum vel cœlestem intelligas; mundana est, ubi omnes homines pii pariter atque mali membra sunt atque partes, (h.) cui universa & necessaria lex imperat, unde necessarium fuit obsequium, futilis illa Stoicorum virtus. Id si phrasibus Stoicis ante C. N. familiaribus expressum fuisset, longius a Christianorum sententia abiisset, & venenum impium apertius prodidisset. Ita enim de eodem argumento CHRYSIPPUS (i.) apud LAERTIUM, (k.) ἴσον ἐστὶ τὸ κατ' ἀρετὴν ζῆν τῷ κατ' ἐμπειρίαν τῶν φύσει συμβαινόντων ζῆν, μέρος γὰρ εἰσιν αἱ ἡμετέραι φύσεις τῆς τοῦ ὅλου, secundum virtutem vivere idem est, ac juxta eandem rationem vivere, ut in mundo quotidie fieri & accidere experientia novimus. Sunt enim naturæ nostræ partes universi. Sed splendidius, sanctius & castius loquendum erat, hinc surreptæ Christianis vculæ, ut imperitis imponeretur. Cur templum Dei Seneca supra dictus sit homo, ipse mox prodidit, scilicet (l.) quia mens particula est ex cœlesti anima, ex ipsa Dei essentia decerpta, ut radius a sole demissus in corpus, ita ut inhaereat origini suæ. Inde mens familiariter ANTONINO dæmon, immo Deus inhabitans, θεῖα ἀπομόρξα, καὶ*

(g.) L. I. c. 9. (h.) Vid. ANTONIN. L. XII. §. 36. EPICTET. L. I. c. 12. L. III. c. 24. (i.) De finibus. (k.) L. VII. §. 87. (l.) Ep. 41.

καὶ ἀπόρροια τοῦ τὸν κόσμον διοικοῦντος, (m.) *portiuncula & emanatio ex direttore mundi* EPICTETO (n.) τοῦ Διὸς μέρος, *Jovis pars*, SENECAE (o.) *divini spiritus pars ac velut scintilla quædam*. Vides Deum & hominis mentem essentia idem esse, eandemque originis & naturæ servare rationem. Hinc Pelagianismus Stoicorum ante Pelagium, viribus hominis omnia in virtutis & sapientiæ studio adscripta; quod hic ideo notandum est, ut splendenti Philosophiæ, virtutem a Deo expectanti, larva detrahatur. Audi quæso impudentem Senecæ vocem: (p.) *Turpe est etiamnum Deos fatigare; quid votis opus est? facite ipsum felicem*. Sed & reliqua lege & detestare impietatem & superbiam pessimorum Philosophorum. Maxime vero impiam imitationem prodidit Imperator, dum ex natura omnia, in natura omnia, ad naturam omnia supra exclamavit. Qui enim potuit melius Spinozæ impietati præludere? qui potuit significantius unam illam naturæ substantiam, ex qua, in qua, ad quam omnia referuntur, exprimere? qua scilicet in Porticu ex universo ejusque variis per Deum & materiam, si non modificationibus, certe partibus & emanationibus omnia oriuntur, sunt & sic quoque omnia in Jovis unam essentiam iterum redeunt. Habeo inde rationem, cur similitudinem membrorum in uno corpore Christianis suffurati sint, quia scilicet ejusdem universi omnes omnino homines partes & mentes omnes ejusdem animæ mundanæ particulæ & scintillæ sunt; ex hoc ipso fundamento disiectum ramum universitati, cujus pars fuit & membrum, sed mentis stupore in rationali parte excidit, inseri iterum posse Antoninus monuit. Hac sententia de Deo, anima mundi per universum ejusque partes diffusa, semel suscepta

(m.) L. II. §. 1. 4. conf. GATAKER. ad bb. ll. (n.) L. I. c. 1. (o.) Ep. 92. & de otio Sapient. (p.) Ep. 31. conf. GATAKER. ad Anton. L. II. §. 11. p. 65.

scepta, facile erat, divinissimam de unitate Dei doctrinam cum πολυθεότητι gentili nefando ausu conciliare, sicque inter tenebras & lucem pacisci. Etsi enim unus ita Deus est, isque & omnipotens & omnipræsens & creator atque conservator universi, cum anima mundi principium mundi activum sit, omnibus ejus partibus præsens, & eas permeans atque animans, id quod non ineleganter explicat PHURNUTUS, (q.) omnes tamen mundi partes Dii sunt, quibus scilicet pars divinæ animæ adhæret. (r.) Nec saniora sunt, si dimisso cortice ad nucleum Philosophiæ Stoicæ attendimus, quæ de providentia garriunt. Fateor, minimorum quoque providentiam asserere Epictetum; concedo, libertatem animi cum ista providentia conjungere Senem severissimum; laudo, negantes providentiam Epicureos a Stoicis fortiter refelli; nihil hoc ad sananda putria Stoicorum efficit vulnera: Nam providentia illa nihil aliud est, quam motus ille ignis subtilissimi, qui materiæ inest, sive mundanæ animæ, naturæ, Dei, (omnia enim ista unum idemque sunt) activitas, ad leges universi ita adstricta, ut fato huic ipse Deus pareat, qui etsi necessariæ & fatali connexioni rerum inevitabiliter subiectus sit, quia tamen solus est omnis actionis causa, libertimus dicitur; unde mens, quæ patticula Dei est, libera non esse non potest; est sensu Stoico, dum scilicet sequitur impetum naturæ suæ, & facit, quod natura sua evitare nequit. En egregiam Philosophiam! SENECA vero reipsa ad S. Trinitatis mysterium præter verba propius accessisse, mire sibi & aliis imponit HUETIUS; ille enim & genitor universi, & incorporalis ratio & divinus spiritus unum idemque sunt deaster suus, mundus, natura, anima mundi, totum. Ex eodem fonte doctrinā Stoica de dæmoni-

(q.) *De Nat. Deor. c. 2. p. 141.* (r.) SALLUSTIUS
de Diis & mundo. c. 5. p. 252. sqq.

monibus orta est, quippe qui, ejusdem cum mente humana sortis, ex anima mundana effluxere: miseri tamen dii, qui mortales sunt, & in exustione mundi conflagrandi, & ita in *Jovem unum reducendi* (s.) & in *unum confundendi*. (t.) Et ex horum sorte de mente humana judicandum, quam post jactatam divinam originem tandem mortalem faciunt; (u.) & quod apud quosdam videas, etsi Stoicis principiis consentaneum, undis extinguendam; (x.) certe in universale seminarium resolvendam, confundendamque. (y.) Unde merito spes illa Stoicorum de futura felicitate post superbam jactantiam in fenum abitura derisa fuit. En egregiam Dei imaginem, qui animas & se absorbens cum revera corporeus sit, (z.) & ignis subtilissimus, aliam & meliorem imaginem, qualem Christiana religio docet, homini largiri nequit.

§. X.

De *corruptione* humani animi, fateor, egregia quædam monent STOICI, & mutandi ejus necessitatem urgent, ut furtum facile subolere liceat; intimius tamen si dicta respicias, non minores vel leviores errores latent. Non enim hæc corruptio in mente residet, sed in ea *materiæ portione, cui immersa est; inde in animam sensusque cupiditates irruunt, & his divina illa & cælestis particula mens captiva tenetur. Hæc virtute sua divina liberanda, suoque asserenda principio, ut redeat, unde descendit.* Nihil recito, quod non germanis Stoicorum decretis contineatur, eorumque effatis confirmetur.

Im-

(s.) Eleganter hoc demonstravit THOMASIVS de *exist. mundi Stoica, Diss. VII. p. 75. seqq.* (t.) SENECA Ep. 6. (u.) THOMAS. l. c. *Diss. XV. p. 227. conf. SENECA Ep. 63. MENAG. ad Laert. L. VII. §. 147.* (x.) conf. *Hist. Philos. T. I. p. 1061. sqq.* (y.) ANTONIN. L. IV. §. 3. (z.) Evidentum hoc in *Otio Vind. Mel. II. & in Hist. Phil. T. I. p. 1093.*

Imprimis luculentus est ANTONINUS, qui de hac re ita, (a.) λογικῆς καὶ νοεῶς κινήσεως ἴδιον περιορίζειν ἐαυτὴν, καὶ μήποτε ἡττᾶσθαι μήτε αἰσθητικῆς μήτε ὀρμητικῆς κινήσεως· ζωῶδεις γὰρ ἐκώτεραι, ἡ δὲ νοεῶς ἐθέλει πρωτοκτενεῖν καὶ μὴ κατακρατεῖσθαι ὑπ' ἐκείνων· δικαίωςγε, πέφυκε γὰρ χρησικὴ πᾶσιν ἐκείνοις, τρίτον ἐν τῇ λογικῇ καλίσκευῃ τὸ ἀναποπτῶτον καὶ ἀνεξάπαττον. τούτων δ' ἐχόμενον τὸ ἡγεμονικὸν εὐθέα πηραίνεται καὶ ἔχει τὰ ἑαυτοῦ. *Est hoc motus rationalis atque intellectus proprium, circumscribere semet, nec sensus nec affectus motibus unquam superari, animalis enim uterque est; vis autem intellectualis principatum sibi vendicat, nec ab eis in ordinem redigi patitur, jure quidem, etenim intellectus natus est, eis omnibus uti; tertium in natura rationali est, lapsu & seductione immunem esse; his igitur mens adhaerens, recta procedat, habetque quicquid suum est.* Paria habet & alibi. (b.) Clarum inde est, omnē malum a corpore, vel anima etiam, quæ & ipsa elementaris est, in mentem; illam divinam scintillam derivari, quæ in divinis virtutis actionibus corpore non magis impeditur, quam Deus a materia non in omnibus obsequente. Luculenter SENECA (c.): *Quem in hoc mundo locum Deus obtinet, hunc in homine animus; quod est illi materia, id nobis corpus est, serviant itaque deteriora melioribus.* Hinc tota illa meteorologia Stoica, quæ, supponens, (d.) omnia corporis, fluvium, animæ somnium & fumum, vitam militiam, & hospitis in peregrino moram esse, eo tendit, ut genium quis suum interim conservet integrum, contumelia ac lésione omni immunem, voluptate ac dolore omni superiorem, nihil temere aut fictē agentem, sibi sufficientem, porro quæcunque sibi eveniunt, ita excipientem, tamquam inde obvenientia, unde ipse venerit. Quæ cum materiam a Deo independentem, eamque arti divinæ inobsequentem, adeoque suo modo malam supponant

(a.) L. VII. §. 55. (b.) L. II. §. 3. 16. L. III. §. 3.
(c.) Ep. 65. (d.) Verbis hæc ANTONINI recitantur L. II. §. 17.

nant (e.) & in fluxis atque corporeis tantum corruptionis sedem collocent, quam longe a vera sapientia aberraverint, etsi verbis saniora professi, in propatulo est. CYNICI descriptionem Epicteteam facile Christianis imitatione surreptam fateor, ad ideam veram ministri J. C. formare Cynicum nego. Deus enim ille, a quo missus est, ad cujusque normam se & alios componit, summum illud bonum, quod aliis laudat, est in se ipso, scilicet Deus ille Stoicus, cujus essentialis pars est animus. Ait enim: (f.) εἰ ἠθέλητε, εὗρετε αὐτὸ ἐν ὑμῖν ὃν οὐδ' ἀνέξω ἐπλάσσεσθε, οὐδ' ἀνέζητε τὰ ἀπώτριά, ὡς ἰδία, ἐπιστρέψατε αὐτοὶ ἐφ' ἑαυτοῖς. κ. τ. λ. Si querere velletis; invenissetis illud (summum bonum) in vobis existens, neque foris oberraretis, neque quereretur aliena, tanquam propria: redite itaque in vos ipsos, &c. Hinc Cynicum suum vere ἀπάθη vult, regemque & dominum aliorum se venditantem. Quæ, ut a Christianorum genio multum abeunt, ita longe aliud sibi voluisse EPICTETUM, quam Christiani, satis produnt. Ex his omnibus, quæ larga manu propinavi, iudicium quoque fieri debet de iis, quæ de morte hominis, felicitate ejus post hanc vitam, mundi conflagratione, & reditu mortalium ad vitam, speciose adque Christianorum placita convenienter dicta videntur. Spes enim illa verbis tantum jactata, & ad unum animorum in animam mundi reditum, (g.) corporumque in elementorum resolutionem reducta (h.) timore & angore ejiciebatur, ita ut mirum non sit, post splendidam jactantiam fluctuasse SENE- CAM, (i.) & ANTONINUM; (k.) vel iis se solatiis crexisse, quæ ad crucem actum furem solari apta sunt, necessitati esse parendum, exeundum, fore nos,

Tom. III.

U

quod

(e.) SENECA *præf. Quæst. nat.* (f.) L. III. c. 12.
(g.) ANTONIN. L. IV. §. 23. (h.) ib. L. II.
§. 17. (i.) Ep. 63. (k.) ANTON. l. c.

quod ante nativitatem fuimus, nempe in chaos pristinum confusi, & quoad mentem igni supremo & cælesti, quem DEUM, Deique sedem somniabant, juncti. Cumque conflagratio mundi periodica sit, & ex natura universi certis temporum intervallis semper recursuris oriatur, cum omnia in Jovem, id est, in ignem illum naturalem reducantur, & ex isto Jove omnia illa, necessitatis sive fati lege ad pristinam vitam redeant, quæ Stoicorum metempsychosis & resurrectio est, (l.) quis nefandos errores cum divinis de futura resurrectione & vita doctrinis conciliabit?

§. XI.

Tantum detrahendæ subdolæ STOICORUM Philosophiæ temporis infumsi, ut timeam merito, Optime ZIMMERMANN, ne vel Tua, vel lectoris patientia abutar, si in indicandis Philosophiæ moralis Christianorum sapientiam imitantis dolis æque prolixus fuero. Verbo itaque moneo, eandem prorsus impietatem latere, cum *sequi Deum*, *amare hominem*, & quæcunque inde officia resultant, hoc fundamento nitantur: Omnia constare uno toto, cujus partes essentielles sumus atque membra, cum & animus noster ex divina anima decerptus, & corpus ejusdem elementi particeps factum, unum cum omnibus mundum constituat. Hinc ille cultus præsentis Dei, qui ipse animus est; hinc illæ laudes, sibi ipsi dæmonique suo decantandæ; hinc illa caritas proximo tanquam civi mundi & consanguineo suo exhibenda; hinc inimicorum dilectio, quippe qui & ipsi pars mundi, id est, DEI sunt, qui ad universi integritatem pertinent, quibus necessitate fati & legum universi Dii benefaciunt, & de quorum in Jovem olim reductorum pœnis post hanc vitam nihil novit Stoica

ca

(l.) Conf. omn. THOMASIIUS l. c. Diss. X. XI.
p. 156. sqq.

ca Philosophia. Quæ tam impia & detestanda sunt, quam egregie prima facie nitent, & purioris sapientiæ faciem ementiuntur.

§. XII.

Luculenter ita, nisi me omnia fallunt, evictum est, STOICOS fraudulenta prorsus ratione Christianos fuisse imitatos, & dum externa dictione & sententiarum accommodatione puriori doctrinæ visi sunt accessisse, incautis venenum propinavisse. Quod utinam mature animadversum fuisset; ita enim Stoicorum doctrinam cum Christianis placitis non toties infelicitè fuisset comparata, & errores Stoici varii in Ecclesiam non irrepsissent. (m.) Certe Philosophia moralis sanctior, ad inanes meteorologias Stoicorum non fuisset efficta, (n.) & ita virtuti Christianæ damnum haud unum illatum fuisset. Unde tandem omnibus, de quibus dictum est, rationibus subductis patet, quanta cautione in veteris ævi rebus cognoscendis & judicandis opus sit; & quam accurate ad ea omnia sit attendendum, quæ in res Christianorum veterum influxum habent; & quam necessariis critica Philosophiæ historiæ oculus sit in historia Christianorum. De quibus & aliis, quæ huc referuntur, cum Te diutius dicendo detinere nefas sit, rivulos claudio, Teque valere jubeo.

(m.) Vid. *Hist. Phil. T. IV. p. 1016.* (n.) Videndus Elegantissimus BARBAYRACIUS libro de *Theologia morali* PP. add. *Hist. Phil. l. c. p. 1148.* THOMAS. de *exist. mundi Stoica Diss. XXII. p. 239. seqq.*

* * * * *

V.

JAC. CHRISTOPHORI BECKII,

Histor. in Acad. Basil. Prof. P. *

Specimen Observationum HISTORICARUM.

Argumentum.

Assirii Reges, *Phul*, *Tiglath Pillefer*, *Salmanasser*, *Sennacherib*, post *Sardanapalum* demum vixisse, ex rationibus Chronologicis, probantur. §. I. Removen-
tur difficultates contra eam sententiam ex locis 2.
Reg. 17. v. 6. & 24. ortæ. §. II. & III. De *Nebucad-
nezare*, in *Judithæ* libro memorato, frustra disputa-
tur, cum is liber, post Captivitatem Babylonicam
demum scriptus, fide historica destituatur. §. IV.
Nimrodus cum *Belo* idem est, & ab eo ad defectio-
nem Medorum 1300. anni recte numerantur. §. V.

Ninus

* Virum hunc Clarissimum, nobisque amicissimum, post edita luculenta eruditionis Specimina novissime vocatum fuisse ad Cathedram Historiarum, supra pag. 159. jam diximus. J. G. A.

Ninus longe est recentior, annis forte 720. & ab eo calculum 520. annorum, quos *Herodotus* Regno Assyri. tribuit, ducendum esse conjicitur. *Ctesias* falsus est. §. VI. Vetustas Regni Assyri. a *Ctesia* prodita, refellitur ex Historiæ silentio. *Plato* rejicitur, *Nini* data ætas adstruitur. §. VII. *FRANCORUM* nomen pluribus Germaniæ nationibus quondam commune; ejus significatio, conciliatis vel rejectis aliorum opinionibus, docetur. §. VIII. Prima eorum mentio apud *Vopiscum*, quo tamen antiquiores sunt. Sub *Valentiniano III.* primum in Gallia sedes fixerunt. §. IX. Coloniarum primis Seculis deductio memorabilis est, & religioni firmandæ proficua. §. X. Religio a multis pro fræno populi adhibita & Statui Politico nimium accommodata fuit. §. XI.

§. I.

A Ssyrii Reges, *Phul*, *Tiglath Pillefer*, *Salmanasser*, *Sennacherib*, quorum in sacris Regum & Chronicorum Libris mentio fit, non possunt credi ante Sardanapalum & defectionem Medorum vixisse; neque adeo *Affarrhaddon*, Sennacheribi filius, pro Sardanapalo isto haberi salvis Chronologiæ rationibus potest. Quod quidem hoc modo demonstratur. D. PETAVIUS (a.) ex DIODORO SICULO Lib. 2. probat, Medos post defectionem ab Assyriis, id est, a Sardanapali interitu ad Astyagem a Cyro victum, annis 317. regnasse. Atqui a *Sennacheribo*, vel potius *Affarrhaddone*, qui patrem interfectum secutus est, quo tempore Hiskias Judæis præerat, (b.) ad

U 3

Baby-

(a.) *Ration. Temp. P. II. L. II. c. 14.*

(b.) *2. Reg. XIX. 37.*

Babylonem a Cyro captam anni tantum 184. elapsi sunt. Nam *Sennacherib* Hierosolymam obsessum venit circa Hiskiae annum 14. a qua obsidione divinitus pulsus, domumque reversus, a filiis interfectus est. Inde Hiskias regnavit per años 15. nam 29. demum regni anno mortuus dicitur. (c.) Successit Manasses per a. 55. Amon per a. 2. Josias 31. Joahasum omitto, quia tres modo menses in regno exegit. Inde Jojakim per a. 11. Ab hoc tempore in captivitatem abierunt Judæi quæ, ut notum, 70. annorum fuit, a Cyro soluta. Si hos annos conjungas, non invenies plures ab *Affarrhaddonis* initio ad Babylonem a Cyro captam, quam 184. quibus si detrahas 22. años, qui præterierunt ab eo tempore, quo *Astyages* victus fuit, residui erunt 162. Atqui *Sardanapalus*, secundum hypothesein nostram, annis 317. ante *Astyagis* casum periit. Ergo *Affarrhaddon Sardanapalus* non est: & per consequens, qui Reges Assyriorum ante illum vixerunt, dici non debent etiam ante hunc vixisse.

§. II.

Si hoc ita est, qui fieri potuit, ut Assyriorum isti Reges in Medorum urbes captivos Israëlitas abducerent, quod dierte dicitur 2. Reg. XVII. 6. ? Viderunt hanc difficultatem plures ex Eruditis. Medi enim tum peculiarem constituerunt Remp., neque amplius in ditioe fuerunt Assyriorum. (d.) *CHRISTIANUS SCHOTANUS* hac ratione potissimum ductus, omnes istos Reges, qui ante *Affarrhaddonem* memorantur vixisse, ante *Sardanapalum* collocat, quem cum *Affarrhaddone* eundem esse credit. (e.) *CHR. CELLARIUS* in Hist. Univers. valde dubitat, quid sit statuendum. Mihi nihil certius videtur ea demonstratione, quam superiori observatione pro-

(c.) 2. Reg. XVIII. 2. (d.) *Biblioth. Hist. Sacra. Part. II.*

(e.) *Hist. Ant. p. 5.*

proposui. Quapropter non vereor affirmare, eas *urbes Mediae*, quæ heic innuuntur, vi ab Assyriis domitas atque imperio suo adjectas, cum interim Medi tamen iis in universum subiecti non essent. (f.) Quod eo facilius credi potest, quia Medorum Imperium post hæc demum tempora ad insigne aliquod potentiae fastigium pervenit. Nam etiam Ninum deinde ipsam, caput Imperii Assyriaci, cum omni fere imperio, sibi subjecerunt. Quapropter mirum non est, quasdam ejus partes ab Assyriis nonnunquam decerptas, dum infirmum erat. Quod si *HERODOTO* in omnibus credendum, Chronologia docet, id tempus, quo Assyrii in Medorum urbes Israëlitas ablegarunt, incidere in ipsam Medorum *Ἀναρχίαν*, seu *Ἀυτονομίαν*, quam Libro I. 96. memorat, (g.) quo tempore dubio procul infirmiores erant, ut sunt gentes, quæ caput non habent. Sed cum *Herodoti* narratio de *αὐτονομία* Medorum iis difficultatibus laboret, quibus facile responderi non potest: *CTESIAM* sequi malim hac quidem in re, quamvis in aliis multis *HERODOTI* auctoritatem præferam.

§. III.

Etiam illud scrupulum injicit, quod 2. Reg. XVII. 24. dicitur, Assyrium Regem ex *Babel*, *Cutha*, *Ava*, &c. traduxisse eos, qui Israëlitarum relictas sedes occuparent. Verum quid si credamus, quos ex *Babele* abduxit iste, fuisse Babylonios bello captos? quod quidem mihi certe verisimile videtur. Namque *Nabonassar*, qui idem cum *Baladan* esse existimatur, primordium regni Babylonici cepit A. P. J. 3967. quo tempore *Phul*, aut *Tiglath Pileser* Assyriis imperabat, unde ab eo anno Per. Jul. Aera Nabonassaris incipit, ante Christum an. 747. Tum deinde *Affarrhaddon*, qui

U 4

&

(f.) Videfis *Herodot. L. I. c. 102. & seqq.* (g.) *V. Usser. A. M. 3283.*

& *Affaradinns* vocatur, Assyriorum Rex, creditur Assyrium Babylonicumque regnum conjunxisse : quod postea Babylonem potissimum sedem habuit. Et profecto Nebucadnezaris demum tempore Babylonicum Regnum ad summam amplitudinem adductum est, quod vel ex solo *Daniele* patet C. II. 37. 38.

§. IV.

Nebucadnezar ille, qui in *Judithæ* Libro Apocrypho dicitur Assyriorum Rex, ab USSERIO ad A. M. 3356. & seq. *Saosduchinus* vocatur, crediturque Affarrhaddonem successisse. In eadem sententia est PETAVIUS. (h.) Sed mirum mihi videtur, Viros Eruditos hanc *Judithæ* fabulam aliquo numero habuisse. Non jam profero, quæ Theologi jam pridem istius rei causa demonstrarunt. Unum istud nunc urgeo, Librum scriptum prius non fuisse, quam ex captivitate Babylonica Judæi redierint. Id autem patet cum aliis, tum ex ipsis ejus Scriptoris verbis, quæ exstant Cap. V. 18. 19. secundum Textum græcum. Ibi *Arioch*, Ammonitarum Princeps, ab Olopherne interrogatus de Judæorum statu, cum plura eum edocuisset, addit & hoc : *Populum modo ex τῆς διασπορᾶς, in quam bello capti, post dirutum templum & urbes ab hostibus subactas, concesserunt, rediisse.* Quid clarius dici posset ? Si autem Liber post reditum ex captivitate scriptus, ubi inveniemus *Nebucadnezarem* Assyriorum Regem, aut *Arphaxadum*, id est, Dejocem, ut ait USSERIUS, huic cœvum ? qui propemodum CL. annis ante captivitatem Babylonicam solutam vixit. Immo quid opus ; ut hos quæramus ? Non mereri videtur omnis hæc fabula, ut personas ejus, quasi veras, in historiarum Monumentis investigemus.

§. V.

Non difficilis ero in admittenda sententia eorum, qui NIMRODUM à profanis Scriptoribus *Beli nomine* (h.) *Rat. T. L. 2. c. 6.* mine

mine designari censent. Rationes ejus rei non sunt contemnendæ, quæ apud C. S. SCHURTZFLEI-
SCHIUM in Diss. de Primordiis Assyrio-Chaldaorum,
§. 18. &c. videri possunt. Addo etiam istud; mihi
videri, annos illos 1300. qui a principio istius Impe-
rii ad Medorum defectionem ponuntur, inde a Nim-
rodo vel Belo esse numerandos. Quod sic demon-
stro. Vixit Nimrodus circa A. M. 1809. Medi defe-
cere circa A. M. 3108. Interea anni 1299. sunt elapsi.
Quantum huic summæ deest, ad numerum 1300.
complendum?

§. VI.

Nimrodo seu Belo non successit immediate NI-
NUS. Nam aut falsa sunt pleraque omnia, quæ de
eo in historiis traduntur, aut longe est recentior,
quam ut Belo subjungi statim possit. Prius non ita
facile concesserim. Quamvis enim non credam, in
ista antiquitate nihil tradi fabulose; nolim tamen
omnem plane fidem Scriptoribus illis vetustissimis
abrogare. (i.) Malim igitur HERODOTO as-
sentire, qui 520. annos Assyriorum Imperio usque ad
Medorum defectionem tribuit. Quid si statuamus,
ejus temporis primordium ab Nino capiendum? hoc
est A. M. 2589. ante Chr. 1394. post Beli excessum,
qui EUSEBIO dicitur LX. annis regnasse, anno
DCCXX. ? Ita aliquo modo cum Herodoto, cui as-
sentire videtur etiam APPIANUS ALEXAN-
DRINUS in principio Historiæ, conciliarentur ce-
teri Scriptores: Neque opus erat profecto, ut CTE-
SIAS GNIDIUS, antiquitatem Nini tantam con-
firmaturus, tot Regum a Ninya ad Sardanapalum
seriem excogitaret. Poterat enim paucioribus esse
contentus, iis nimirum, quos 520. anni à Nino ad
Medorum defectionem caperent. Venit mihi non-
nunquam in mentem, CTESIÆ accidisse id, quod
(i.) L. I. c. 95. U; rerum

rerum Ægyptiacarum Scriptoribus in Dynastiis istis quatuor, quæ eodem tempore in Ægypto floruerunt. Credebant enim Veteres, has sese invicem excepisse, regesque illarum una serie continua collocandos. Quos secutus JOSEPHUS SCALIGER in Can. Isag. L. II. causam dedit D. PETAVIO, quidquid de istis Dynastiis proditur, in fabulis ponendi. MARSHAMUS vero in *Can. Chron.* istud optime expedit, & immensam illam Ægyptiorum antiquitatem explofit, ab uno *Mene* docens, IV. diversis in locis dynastias eodem tempore exortas. Forte etiam CTESIÆ reges, qui uno tempore regnarunt in diversis Orientis partibus, sibi successisse existimavit, seu antiquitatis studio seu errore ductus. Sed hæc altioris sunt indaginis, & otii melioris.

§. VII.

Qui reliqua argumenta videre cupit, quibus CTESIÆ de vetustate Assyriaci Imperii convellitur figmentum, ad *Chr. CELLARII*, V. C. *Dissertationem de Principio Regnorum & Rerump.* adeat. Ego præcipue huic rationi confido, quam mihi suppeditat vetustissimorum Scriptorum, qui hujus Imperii poterant & debebant injicere mentionem, si tam vetustum simulque tam amplum fuisset, silentium. Quomodo nec Moses, ut a Sacris Scriptoribus initium capiam, nec Scriptores Librorum Josuæ & Judicum per tot secula, quibus jam dudum florebant Assyriorum res secundum *Ctesiam*, ne verbo quidem earum meminerunt? Unica mihi in mentem venit ignavia & ἀνειαλία istorum Regum, qui a *Ninya* ad *Sardanapalum* imperasse dicuntur. Hæc fortassis in causâ fuit, cur non valde se jactarent, neque multum rebus tum gestis interessent. Sed cur non Regum modo, sed nec Imperii Assyriorum exstat vestigium? Sic quoque HOMERUS dici non potest, cur in enumeratione
tot

tot gentium, qui ad Trojam vel delendam vel tutandam ex omni propemodum terrarum Orbe confluerunt, Assyrios omittat. si tum aliquo numero fuerunt. Certius nihil est, quam circa ea tempora, quibus Trojanum bellum est gestum, nondum apud Græcos innotuisse Assyriorum Imperium, etsi plus CC. annis ante initium habuerit. Quam ob causam miror, L. 3. de Leg. PLATONEM, qui Artaxerxis Longimani ætate floruit, asserere, Trojanos *πισευοντας τῇ τῶν Ἀσσυρίων δυνάμει τῇ περὶ Νίνου γενομένη* bellum confidentius gessisse cum Græcis. Quid enim est Ἀσσυρίων δυνάμει ἢ περὶ Νίνου γενομένη aliud, quam, *Assyriorum potentia, qua Ninus tum temporis pollebat?* Atqui PETAVIUS demonstrat, Excidium Trojanum incidisse in A. P. J. 3530. qui est A. M. 2800. Certum autem est, A. M. 2589. primordia Nini collocanda esse, quod sic probatum erit. Medorum Imperio finem attulit Cyrus A. P. J. 4155. id est, A. M. 3425. deme his annos 317. quibus illud Imperium stetit, habebis A. 3108. quo Medi ab Assyriis defecere; Deme rursus 520. quos Assyriis HERODOTUS tribuit, habebis A. M. 2588. Ergo Ninus A. M. 2589. recte collocatur. Q. E. D.

S. VIII.

Multum apud eruditos disputatur de Origine nominis gentisque *FRANCORUM*. Ego de hac re sic sentio. *Francorum* nomen habuerunt plures Germanorum Nationes, quæ trans Rhenum, in finibus Batavorum, ad Oceanum, Rhenum inter & Visurgim, incolabant. Patet hoc cum ex eo, quod apud fide dignos Scriptores ex verustioribus nihil de istius gentis adventu in hæc loca inveniatur: tum & inde, quod istarum Nationum nomina vetusta etiam tum apud Auctores commemorantur, cum jam longe lateque invaluisset *Francorum* appellatio. Sic *JULIANUS*

NUS Imperator, qui *Apostata* ob defectionem a Christianis ad Ethnicorum sacra dicitur, in Oratione ad Senatum populumque Atheniensem commemorat, sese *Salios Chamavosque* vicisse. Sic *AMM. MARCELLINUS* de ipso Juliano ait: *Francos* eos, quos consuetudo *Salios appellavit*, *ansos* apud *Toxiandriam* in Romano solo habitacula figere, in deditionem accepit: *Chamavos* itidem *ansos* similia adortus, eadem celeritate partim cecidit, partim cepit. Idem alio loco asserit: *Julianum Francos*, quos *Attuarios* vocant, vicisse. *ZOSIMUS* L. III. C. 6. etiam *Saliorum* gentis meminit, quam dicit *φραγχων απόμοισον*, partem *Francorum*. Alibi adduntur & *Bructeri*, aliique. Istæ gentes commune habuerunt *Francorum* nomen, quod *liberos* denotat. Appellationi fortassis non *Libertas* solum causam dedit, verum & usus ejus ad licentiam projectus. Exercebant enim communiter latrocinia, atque enim piraticam, quatenus mari adjacebant. Ita concidunt omnes aliorum conjecturæ. Non enim opus est, ut peculiarem manum *Trojanorum* in has regiones duce *Francione* delatam credamus. Quid stultius, quam omnium prope Gentium Occidentalium originem a famoso isto *Trojæ* excidio repetere? Et unde *Trojanis* tantæ civium copię, ut in tot regiones, tam longinquas, decenni bello attriti, colonorum tantum numerum mitterent? Absurdus multo *SIGEBERTI GEMBL.* assertum, *Francos* *Attica* seu *Græca* lingua dictos, quasi *feroces*. Hæc enim vox *Græca* non est, sed *Germanica*, ut notum. Transeuntibus autem in *Galliam* istis nationibus, & ibi frequentatum est, ut *franc* pro libero dicatur: quod hodieque usitatum vocabuli genus est, cum derivatis suis. Quod si hæc ita sunt, concidit etiam illud, quod ex veteri *Chronographia VALESIIUS* *Notit. Gall. p. 209.* profert, *Francos* vocatos esse ab immunitate à tributis, quam iis *Valentinianus I.* concesserit, quamque ipsi postea dimittere noluerint. Nam hoc nominis diu ante in usu fuisse constat.

§. IX.

Invenio autem primam *Francorum* mentionem apud *VOPISCUM* in *Aureliano*, (k.) quo loco scribit, cum esset *Tribunus Legionis VI. Francos per Galliam prædandi causa vagantes apud Moguntiacum cecidisse*, hincque ortam esse cantilenam militarem: *Mille Francos, mille Sarmatas &c. mille Persas querimus*. Ex hac narratione licet colligere, satis diu ante *Aurelianium Imperatorem Francorum* nomen celebre fuisse. Nam heic non commemoratur, ut novum & recens ortum. Non videtur tamen *Julii Cæsaris* ætatem attingere: Apud hunc nullum ejus vestigium. Fuit tamen *Aurelianus Tribunus militum, Gordiani vel etiam Alexandri Severi temporibus*, (l.) Nam sub *Valeriano* jam dux exercituum, etiam *Vicarius* datus *Ulpio Crinito* in *Thracia*, demumque *Consul*. Eo igitur jam tempore in *Gallias* transire tentabant, sed clade accepta sedes suas repetierunt. *IncurSIONIBUS* sæpe repetitis, non potuerunt tamen constantes in ea sedes figere, usque ad *Valentini III.* tempora, quibus multæ calamitates premere cœperunt *Occidentis Imperium*. Id accidit circa a. C. 428. quo tempore *Clodio, Pharamundi* successor, barbaræ genti imperitabat. Hic per *Galliam Belgicam* ingressus *Tornacum, Cameracum, &c.* sibi subjecit, sedemque regni iis in locis cepit. Sunt, qui tradant, (m.) *Aetium*, *Valentiniani exercituum Ducem*, cum hoc congressum non vicisse modo, sed & *Gallia eum expulisse*. Sed cum scriptorum verba considero, non video, qua ratione aliud ex iis colligatur, quam *Francos victos ab Aetio & in fœdus receptos, ceterum in iis locis relictos*. Verba *IDATII* in *Chron.* ad A. 2448. sunt hæc: *Superatis per Aetium in certamine Francis, & in pace susceptis, Censorius Comes Legatus mittitur ad Suevos &c.* Quid clarius esse poterat? Nec *PROSPER AQUITA-*
NUS,

(k.) *Vopisc. Aur. c. III.* (l.) *Vide Vopisc. Aurel.*

NUS, cum ait: *Pars Galliarum propinqua Rheno, quam Franci possidendam occupaverant, Aetii Comitibus armis recepta; aliter est accipiendus. Nam foedere junctis Francis, qui antea hostes fuerant, dici potest, eam Provinciam, quam sibi subjecerant, ab Romanis receptam, licet illi eam retinerent. GREGORIUS TURONENSIS* unica mutata littera Clogionem istum Regem appellat, quem scribit *missis exploratoribus ad urbem Camaracum, perlustrata omnia secutum, Romanos protrivisse, civitatem apprehendisse: in qua, inquit, paucum tempus residens usque Suminam (al. Summam, la Somme,) fluvium occupavit. Ceterum de eo rursus expulso verbum nullum addit, quod indicio haud obscuro est, GREGORIUM existimasse idem, quod nos asseruimus; ab eo scilicet tempore in Gallia substituisse Francos. Et sane non contemnenda est ea pars Galliae a Rheno ad Somonam, cui Flumini Ambianum adjacet. Sed sub Meroveo demum Francorum res ita invaluit, ut paullatim Galliam omnem pervaderet, & ex tempore illo ad Pipinum perpetuos ex hac stirpe Reges haberet. Ab hoc enim Carolingorum progenies, quæ in Ludovico V. desinit, exorta est.*

§. X.

In vetustiorum temporum Historia valde memorabilis haberi debet COLONIARUM deductio. Hæc enim non modo primas singularum gentium Origines docet; verum & confirmat id, quod sacri Scriptores tradunt: Omnes nimirum, qui nunc per terrarum Orbem sunt, populos ab una stirpe deductos esse; seu, ut Apostoli verbis utar: (n.) *Deum effecisse, ut ex uno sanguine orta hominum natio omnes terras occuparet, præfinitis temporibus & habitationum finibus. Observamus non obscure, genus humanum in Oriente*

(m.) C. Sigon. de Imp. Occid. Lib. XII. p. 196. Le Sueur ad An. 428. (n.) Act. XVII. 26.

te prius viguisse ; inde nonnullas ejus partes vel nimia sua multitudine , quam nec habitationum angustia caperet , nec terra aleret , vel calamitate aliqua compulsas , sedes alias quæsisivisse. Occuparunt autem hi coloni primum eas terrarum regiones , quæ non modo propinquiores suæ patriæ erant , verum & in quas ex hac pedestri itinere poterant transire. Ita Ægyptum , ita Asiam Superiorem , ita Asiæ Minoris mediterranea , vetustissima ætate habitata scimus. Tum deinde navibus etiam maria transire cœperunt. Ita Occidentis hujus nostri pleræque partes accepere suos incolas. Quod ad Americam attinet , non puto , certi quid de earum gentium Origine tradi posse. Idque mirum non est , cum in iis non exstiterint , qui res vetustis temporibus gestas tradiderint. Potuere tamen variis modis eas regiones occupare , transitu ex Asia sive terra , sive glacie , quæ iis locis mare tegit , sive denique navibus facto. Cæterum , quæ regiones interventu navigationis colonos accepere , eæ primum in maritimis cultæ sunt : tum deinde paulatim interiora adiri cœpta. Qua in re etiam istud memoratu dignissimum est , hanc Orbis amplitudinem brevissimo temporis spatio , in omnibus propemodum locis , hominibus completam. Quod singulari Dei providentia factum est. Nam is cum propter alias causas , tum propter hanc inprimis , tam longum concessit priscis hominibus vigorem , ut genus eo magis propagaretur. Et observamus , veteres prolis longe fuisse cupidiores , etiamque plerumque numerosiorem generasse , quam hodie fieri solet. Unde iis temporibus toties migratione opus erat ; cum nunc a compluribus sæculis æqualis propemodum nascentium morientiumque numerus sit , qui si maxime uno alterove anno in hanc vel illam partem augetur , sequentibus tamen temporibus ad æqualitatem redit. Hæc cum ita sint , haud dubito asserere : quemadmo-

admodum recentior Historiā ad prudentiam civilem multum confert, ita vetustiorē præcipue ad confirmationem Religionis veræ, cognoscendamque Dei O. M. Providentiam, singula sapientissime temporibus dividentem, multo plus prodesse.

§. XI.

RELIGIO, ut & hoc addam, quod observarunt multi, sed non eo modo acceperunt, quo jus fasque erat; Religio, inquam, multis mortalium eum in finem adhibita est, ut populum ferocem in officio contineret. Sic notum est, quod de *Numa cum Ægeria Nympha congressibus & institutis religiosis traditur*. Hic omnium primum *rem ad multitudinem imperitam, & illis sæculis rudem, efficacissimam, Deorum metum injiciendum ratus est*: ut *LIVIVS Lib. 1. Hist.* docet. Institutis deinde suis auctoritatem facta Ægeriæ religione conciliavit. Idem fecisse constat aliarum gentium Legislatores. Quid non deinde Romæ auspiorum aliarumque cæremoniarum prætextu factum est? Sed numquid ideo pro *Invento Politicorum* habenda est Religio? id est, numquid credendum, a Principibus gentium excogitatam esse; quemadmodum & alia excogitarunt, quibus sibi subiectorum animos compescerent, ejusmodi sunt omnia illa, quæ ad reverentiam atque metum imperantium injiciendum valent? Non puto certe. Nam qui potuissent illi mortalium animis Deorum injicere metum, nisi jam ante persuasi fuissent isti ipsi mortales, DEOS esse, eosque rerum humanarum conscios, & præmiis affecturos, quæ bene, pœnis, quæ male gesta essent? Oportet primo alte mentibus infixam fuisse hanc veritatem, de Ente summo, quod rebus omnibus præesset. Ita hi homines nihil aliud egerunt, quam ut hanc de Deo opinionem eo converterent, quo ipsorum commodum atque Reipublicæ
salus

salus postulabat. Huc pertinet, quod apud Norvegicos olim, quibus belli gloria in pretio erat, hæc invaluit opinio, ut crederent, eos qui in prælio caderent, post mortem in *Odini*, qui pro Deo apud ipsos habebatur, & bello, ut apud alias gentes Mars, præerat, transiuros (s.) palatium, ibique ex craniis hostium suorum potaturos esse vinum; cum e contra, qui domi otiosi desidentes vel morbo vel senio consumerentur, detrudantur in nescio quæ baratra, vel loca sub terram depressa, ubi anguium aliorumve insectorum vi misere divexentur. Possent & alia, eaque recentiora etiam, exempla afferri, quæ doceant, persuasionem istam, quæ de Numine aliquo mentibus inhæsit, adhibitam sæpe esse ad homines in officio continendos, aut ad bellicam fortitudinem excitandos. Sed ea notâ sunt.

(s.) *Vid. W. Temple Misc. part. II. p. 232.*



VI.

SAMUELIS KOENIGII,

Prof. P. Extraord. Bernensis,

MEDITATIONES

DE

Myſterio Vaticaniorum

JESAJÆ & MICHÆ

Citatorum Matthæi Cap. I. & II.

De

Nativitate D. N. J. Christi.

Argumentum.

§. I. Citatio Matthæi I. 22, 23. ex *Jesaj. VII. 14.* §. II. Vindiciæ ejus adversus Abarbanelem. §. III. Speciatim ex occasione Vaticanii Jesajæ. §. IV. Per *Signum* Ahaso promissum intelligendum miraculum stupendum. §. V. VI. Per *מלך* necessario intelligenda *virgo intacta*. §. VII. Sensus loci *Prov. XXX. 19, 20.* §. VIII. Etymon vocis. §. IX. Conclusio. §. X. Responsio ad Objectiones. XI. Collatio versuum seqq. §. XII. Rejectio Jesu Christi a Judæis, probat, eum esse Messiam. §. XIII. XIV. Vindiciæ vaticanii *Jesaj. IX. 6, 7.* a Judæorum detorsione. §. XV. Allocutio ad Judæos. §. XVI. Altera citatio Matthæi II. 3, 6. ex *Mich. V. 1.* ejusque vindiciæ. §. XVII. Sensus versus sequentis *Mich. V. 2.* §. XVIII. Meditationes practicæ.

§. I. Post.

* * * * *

§. I.

Postquam S. Matthæus nobis exposuisset nuncium Angelicum de Maria Spiritu Sancto imprægnata, & paritura filium, vocandum nomine JESU; addita ratione: *Ipse enim servabit populum suum a peccatis suis.* Continuo subjungit: *Totum vero hoc factum est, ut impleretur, quod dictum est ab ipso Domino per prophetam, dicentem: Ecce Virgo utero concipiet, parietque filium, vocabuntque nomen ejus EMMANUEL, quod est interpretatione redditum, Nobiscum est Deus.* Sive hæc sint verba Angeli Josepho loquentis, sive ipsius Evangelistæ, perinde est. Certum saltem est, respectu ad vaticinium JESAJÆ c. 7: 14. *Propterea dabit Dominus ipse vobis signum: Ecce Virgo gravida est, paritque filium, vocabitque nomen ejus IMMANUEL.* Adsis mihi, Domine Jesu, ad hoc tam illustre dictum nonnulla commentaturo!

§. II.

Taxat ABARBANEL (ea est enim ejus impudentia) Evangelistam nostrum, quod hoc illustre dictum ad conceptionem MARIE Virginis, & nativitatem JESU Christi ex ea, retulerit, vultque intelligendum de alia Virgine vel juvencula de domo Ahasi Regis, quæ tunc filium quendam, Immanuel dictum, modo naturæ suæ in lucem ediderit. Ad quod respondeo: si historia de Maria Virgine, ex Spiritu S. gravida, filiumque Jesum enixa, vera est, procul dubio de ea exaudiendum est dictum Jesajæ. Atqui nobis plena fides facta est, hanc historiam verissimam esse; Ergo de ea hoc dictum exaudiendum. Quod vero Abarbanel cum ceteris verpulis, scotomate Sodomitarum percussis, historiæ Matthæi fidem derogat, id fidem Dei non tollit. *Τί γὰρ, ἐν ἡπίστευαί τινος;*

Μὴ ἡ ἀπιστία αὐτῶν τὴν πίσιν τῷ Θεῷ καταργήσῃ. Rom. 3: 3. Nam neque rex Achas verbis Jesajæ fidem præbuit. Hinc Propheta ad eum: **אֵין תִּאֲמִינוּ כִּי לֹא תֵאֲמַנוּ** *Si non credideritis, ideo firmi non eritis.* v. 9. Ea scil. est durities cordis Judæorum. c. 6: 10. Mendaciis futilissimis, qualia plurima sunt in infami libro *Toldos Jesu*, fidem adhibet Judæus, quia contra Christum effutuntur; sed veritati cœlesti fidem denegat cor ejus incurciosum. Tanta scil. est eorum a vero Deo, h. e. a JEHOVA JUSTITIA NOSTRA, aversio. Veniet vero tempus, quo revertentur ad eum, requiruntque Jehovam Deum suum, & Davidem regem suum, pavebuntque ad Jehovam & ad bonitatem ejus, ultimis diebus. HOS. 3: 5. Quam felicitatem ipsis minime invenimus, potius vovemus, atque exoptamus.

§. III.

Sed ne eminus tantum, & non *συσάδην*, cum Judæo pugnasse videamur, euge, propius ad verba JESAJÆ accedamus. Hierosolyma dura obsidione pressa a Rege Syriæ & Israelis, qui de extirpanda familia Davidica & constituendo alio rege stolidi agitaverant consilia, trepidavit Achasus cum civibus suis. Animum vero ei addit sacer vates Jesajas, edicens, consilium horum regum irritum fore, ipsis potius imminere excidium. Impius vero Achasus tantum abfuit ut hisce verbis fidem adhiberet, fiduciamque in Deo Israelis collocaret, ut potius legatos cum muneribus ad Regem Assyriæ miserit, opem ab eo contra hostes suos poscens. Vide 2. Reg. 16: 7, 8. Quare, quæ est divina bonitas, novo eum oraculo Deus per Jesajam dignatur, dicentem: *Pete tibi signum a Jehova Deo tuo, sive descendendo in profundum, sive ascendendo in sublime.* h. c. v. 11. Recusante vero & hoc impio Achaso, dixit ei Propheta nomine Domini: *Quare dabit Jehova ipse vobis signum &c.*

§. IV. L.

§. IV.

Liquet hinc , per SIGNUM אִמּוֹת hic intelligendum esse *miraculum*, sive portentum, vel prodigium aliquod stupendum, viresque naturæ quam maxime excedens, non vero signum aliquod naturale vel artificiale. Ob hæc rationes, 1. quia ad confirmandam promissi divini fidem edendum erat, qualia & sunt signa & prodigia per Moysen edita, ad confirmandam fidem missionis suæ divinæ. 2. Quia optio data fuit Achaio poscendi signum *vel caeleste, vel subterrestre*, quare hic de signo vulgari cogitandum non est. 3. Quia in textu dicitur : *Ipse JEHOVA daturus est vobis signum.* Quando vero potentissimum Dei brachium se exerit ad signa edenda, certe nil humile neque vulgare edit, sed prodigia & miracula maxima, qualia sunt, quæ per Moysen & Christum edidit. Quæ cum occæcati Judæi negare non possent, maluerunt ea, per blasphemiam abominandam, principi diabolorum adscribere. Quare prolixus ille discursus A-BARBANELIS frustraneus est, quo vult, signum etiam vulgare & naturale hic intelligi posse, de adolescentula quadam a viro imprægnata, & Immanuel enitente. Quare tu Abarbanel הַבַּל תַּפְצָה פֶּיךָ בְּבָלִי ex Jobi c. 35 : 16. Et verba tua sunt תַּחֲשִׁיעַ דְּבָרֶיךָ meræ fallaciæ atque errores, non vero explicatio Christianorum, uti tu cavillaris.

§. V.

Pergit vero ineptire noster A-BARBANEL, textuique vim inferre, asserens, per עַלְמָה non necessario intelligendam esse VIRGINEM *innuptam, a viro non tactam*, sed adolescentulam, etiam viro nuptam. At vero, mi homuncio, qualis adolescentula erat Rebëcca, antequam Isaac nupsisset, quæ tamen עַלְמָה dicitur, Gen: 24 : 43. ut & נַעֲרָה *puella*, nec non עַרְוָה *virgo virum nunquam passa.* v. 16.

Porro qualis erat Mirjam, matrem Moſis ad filiam Pharaonis vocans? Exod. 2: 8. Eratne a viro tacta, nec ne? מלחא enim ibi dicitur.

§. VI.

Sed dicis : dantur forte alia loca, ubi vox מלחא ſignificat adoleſcentulam nuptam, a viro tactam. Reſpondeo : 1. Poſito, ſed minime conſeſſo, dari talem aliquem locum, (præter unum enim non habes;) tamen in hoc dicto prophetico, ubi ipſe *JEHOVA ſignum ſe editurum* promittit fulciendæ fidei noſtræ, non poteſt non intelligi virgo caſta, innupta, intacta, quæ proinde ſi concipit & parit, extraordinaria virtute Spiritus ſancti concepiſſe atque peperiſſe dicenda eſt. Atque hoc ipſum eſt magnum illud SIGNUM, quod hic Jehova a ſe edendum promittit. Quid, mi homo? ἀπίστον κελίεται παρὰ σοι, *MESSIAM ex Virgine caſta naſci*, Meſſiam peccata noſtra delentem atque auferentem? Num impurus tollet peccata impurorum, quales ſunt omnes, quotquot ex muliere via ordinaria nati ſunt. Job. 14: 1, 4. Sed vos miſeri antiquam Patrum fidem plane dedidiciſtis, & tam exiliter atque tenuiter de MESSIA ſapitis, ut nil niſi liberationem a jugo gentium & reductionem in Cananitidem ab eo ſperetis. Cetera Meſſiæ beneficia negatis, vel adeo atteritis, ut vix Moſi par eſſe, nedum ultra Moſen eminere queat. Maxime vero juſtitiam illam æternam a Meſſia afferendam, quam cum vix ac ne vix quidem pauciſſimi inter vos admittant, mirum non eſt, vos eum in ordinem peccatorum, & impurorum, ex impuris genitorum, detrudere.

§. VII.

Sed 2. Quisnam eſt ille locus, ubi מלחא ſignificat *puellam nuptam, virum paſſam*? provocas ad locum PROV. 30: 19. Ubi inter quatuor illa, Aguris cognitio-

gnitionem superantia, recensetur **וְרַךְ גִּבּוֹר בְּעַלְמָה** *via viri in ADOLESCENTULA*. Sed quid magis adolescentibus cognitum, quam via sive ratio puellas ad amores, quin ad coitum pelliciendi, & cum iis coeundi? Quis adolescentum hæc ignorat? Sed via & ratio, qua VIRGO Casta, innupta, a Viro non tacta, tamen VIRUM, maximum Virum, ipsum Dei Filium, de quo Agur h. c. v. 4. enititur, ea, inquam, mentes, naturæque vires superat omnes. Atque hoc volebat Agur. Vides igitur, quam misere te tuosque decipias. Sed quid sunt reliqua tria adeo sublimia, ut Aguris scientiam superent? *Via aquilæ in Cælo*, est Via Christi & sanctorum, quorum **πολίτευμα** in cælis est, & non nisi cœlestia sapiunt. Phil. 3: 20. Col. 3: 1. *Via serpentis rupem scandentis*, sunt viæ diaboli, Christum & sancta ejus membra tentantis. *Via denique navis mare sulcantis*, est patientia Ecclesiæ, in maximis afflictionibus Christo suo adhærescentis, & sic feliciter ex miseriarum pelago ad vitam æternam emergentis. Hæc tria nemo satis novit, nisi Spiritus Christi; experiuntur autem ex parte, qui a Spiritu Christi edocti sunt. Tu vero, qui non nisi de rebus naturalibus hic agi cogitas, quæ dixi, difficulter digeres, licet sint certissima; Via vero aquilæ in Cælo, serpentis in rupe, navisque in mari, cognitionem humanam minime excedit. Sed oggannis: v. 20. additur, de *Via adulteræ* &c. Ergo **עַלְמָה** non est virgo casta & innupta. Resp. Nihil dicis. *Adultera* illa, sive per eam adulteram sensu communi, sive sensu mystico intelligas, vult videri **עַלְמָה** *virgo casta*, additur enim: *Illa edit, abstergitque os suum, dicitque nil iniqui feci*. Sed **עַלְמָה** v. 19. & in textu Jesajæ, vere *Virgo* est.

§. VIII.

Confirmat hoc ipsum Etymon vocis **עַלְמָה** descendit enim a Rad. **לָחַץ** *textit, occultavit*. Ergo **עַלְמָה**

est *adolescentula domi tecta*, velo velata, a viro non agnita, cujusque vulva a viro resecta non est, adeoque quæ vere Virgo est, vere בתולה.

§. IX.

Prævidit ergo Propheta in Spiritu S. Virginem parituram, & Messiam ipsum in lucem emissuram. Nonne hoc maximum signum est, verèque παρακλητικόν, sive consolatorium?

§. X.

Objicis. Sed agebatur hic de signo ad consolandum *Achasum* Hierosolymis obsessum, vel mox obsidendum. Quomodo vero nativitas Messiae post tot secula nascituri signi vice poterat esse Achaso?

Respond. o. 1. Consultabant inter se Rex Syriæ & Israelis de extirpanda domo Davidica, regnoque ad peregrinum deferendo. Sed ne expavesce, Achase, consilium hoc irritum est; etenim ex familia Davidica nasceretur Immanuel, Deus nobiscum, non vero ex peregrinis, neque ex Syris, neque ex Israelitis. Ergo illi regnum Davidicum non occupabunt, neque sedem regni, Hierosolymam.

2. Præterea promissio Messiae venturi tanti est momenti, ut vel in antecessum salutem & liberationem conferat credentibus. Quin fide in Messiam venturum servati sunt, quotquot servati sunt. Quod si ea fides Hierosolymæ, & in ipsa domo regia firmas egisset radices, nunquam tantum passa esset excidium, quale per Chaldæos passa est. Sed eheu! *Fides perierat*, Jer. 7:28, ejusque loco succreverat fiducia in vicinos Reges, eorumque deastros. Quare duriter castiganda erat. Quia tamen reliquiae seminis sancti (c. 1:9.) inter eos erant, urbs debebat restaurari, & ad adventum usque Messiae conservari. Hinc Propheta: *Antequam sciat puer aliquis reprobare malum & eligere*

eligere bonum , deseretur terra , quam tu fastidis , a duobus hisce regibus. Sed tamen adducet Jehova super te , super populum tuum domumque paternam , dies , quales non venerint , ex quo Ephraim a Juda secessit , scil. Regem Assyria. v. 16, 17. adde v. 18, 19.

§. XI.

Objicis porro. Ex Textu Jesajæ colligere est, puerum Immanuelem natum esse tempore ipsius Achasi, nam v. 15. & 16. dicitur : *Butyrum & mel comedet , ut sciat reprobare malum , & eligere bonum. Nam antequam puer sciat reprobare malum , & eligere bonum , deseretur terra , quam tu fastidis , a duobus Regibus hisce.*

Resp. 1. Debebat omnino puer Immanuel butyro & melle vesci in terra patria, Deus enim Judæos ex Babylonia reduces, propter ipsum Messiam amplis cumulaturus erat benedictionibus. Docet hoc ipse Propheta v. 21, 22. *Eritque eo die , (quo scil. Judæi ex Babylonia reduces in terra sua agebant , Messiamque mox venturum expectare castigati didicerant ;) alet quis vitulam , duasque oviculas , & præ lactis copia comedet butyrum. Quin butyrum & mel comedet omnis residuus in terra.*

2. Nego vero, voce נער indigitari PUERUM IMMANUELEM. Ea enim vox, descendens a Rad. נער excussit, significat puerum, jugum præceptorum & disciplinæ paternæ excutientem, h. e. peccato originis infectum. Hinc ipse Deus : *Figmentum , inquit , cordis humani malum est מנערי a pueritia. Gen. 8 : 21. Neque unquam vox נער de Messia prædicatur , uti quidem בן filius , ילד natus , adolescens. Jes. 9 : 5. חטך virga , נצר furculus. c. 11 : 1. Quare v. 16. sic reddo : Nam antequam sciat puer aliquis spernere malum , & eligere bonum , deseretur terra , cujus te jam tenet fastidium , a duobus Regibus suis.*

§. XII.

Potuisset igitur atque debuisset Achafus dulcissimis hisce consolationibus in spem se & fiduciam erigere. Sed hoc ab incredulo Achaso erat quam alienissimum. Quin ab omnibus retro seculis verba Dei vivi minus fuere a Judæis credita, atque verba hominis vel Regis alicujus. Hinc non mirum, Messiam ipsum præsentem ab iis minime agnitum sed rejectum fuisse, juxta testimonium Psalmi 118 : 22. *Lapis, quem reprobarunt adificantes, factus est caput anguli.* Quare optime se habet Syllogismus, qui sic concludit :

MESSIAS a Judæis rejectus, est verus Messias.
Atqui Jesus Christus est a Judæis rejectus,
Ergo est verus Messias.

Et e contrario :

MESSIAS a Judæis agnitus est pseudo-Messias.
Atqui Barcocha, Moses Cretenfis, Sabbatai Sevi,
fuere Messiaë a Judæis agniti;
Ergo sunt pseudo-Messiaë.

Certe sic ipse Christus Dominus arguit : *Ego veni in nomine Patris mei, & non recipitis me, quod si alius venerit in suo ipsius nomine, hunc recipietis.* Joh. 5 : 43. Hinc præstantissima hæc salus Dei tandem ad gentes missa est, quæ crediderunt & obediverunt. Act. 28 : 28. Judæi vero repudiati sunt, ceu increduli, obstinati, & incorrigibiles.

§. XIII.

Sed haud minus cæcutiunt atque insaniunt Judæi, ABARBANEL, JARCHIUS, KIMCHIUS, in exponendo cap. 9. *Jesaja*, in quo juxta ipsos nec vola nec vestigium est MESSIAË, cujus magnifica prædicata ad HISKIAM detorquent. Is est lux illa magna,

gna, quæ sedentibus in tenebris & umbra mortis afful-
sit, prostrato scil. exercitu Sanheribi. Deus bone,
quanta cæcitas ad tantam lucem ! sed heus boni Vi-
ri, expedite hanc difficultatem, quomodo & quo sen-
su HISKIAS fuit *lux Galilææ*, de qua v. ult. cap. 8.
Nonne potius atra horrendissimi excidii caligo Gali-
læam occupavit, regnante HISKIA ? porro HIS-
KIAS est, de quo v. 6. dicitur : *Nam puer natus est*
nobis, Filius datus est nobis, fuitque dominatio super humeris
ejus, Vocavitque (scil. Dominus) nomen ejus (scil. HIS-
KIÆ,) Mirabilis, Consiliarii, Dei fortis, Patris æternita-
tis, (vel, juxta ipsos, Patris Spolii) Principis Pacis. Tæ-
det me hisce levissimis paleis atque quisquiliis ever-
rendis tempus terere. Quis enim non videt, hæc
magnifica esse MESSIÆ nomina sive prædicata-
Hinc & ABARBANEL, ceu eques desultorius, ea
modo ad HISKIAM refert, argumentis vero con-
trariis pressus, ad ipsum Deum ; sed perperam, cum
Deus ipse sit, qui hisce magnificis titulis alium quen-
dam ornat, non seipsum. Nam post מָלֵךְ sequente
וְשֵׁם semper sequitur nomen nominati, non nominan-
tis. Exemplum vide Jes. 7 : 14. Gen. 29 : 32-35.

§. XIV.

Sed heus tu Hispane ! ego latus tuum sic fodi-
co : Magnifica hæc prædicata, si in ipsum J E H O-
VAM quadrant, certe non quadrabunt in Hiski-
am. Et si in HISKIAM quadrant, quomodo in
Deum optimum maximum quadrabunt ? Nisi susti-
neas dicere, Hiskiam esse יְהוֹשֻׁעַ בֶּן-נֵחֶמְיָא. Ergo in neu-
trum quadrant, sed in Regem MESSIAM, Imma-
nuelem nostrum, Jehovam justitiam nostram. Is est
ea *lux mundi*, quæ primum Galilææ affulsit, deinceps
vero splendore suo Judæam, Samariam, Syriam, to-
tumque Gentilismum collustravit. Matth. 4 : 15, 16.
conf. Jes. 42 : 6. c. 49 : 6. c. 60 : 1, 2, 3. Act. 13 : 47.

In

In hunc magnifica hæcce prædicata plenissime atque eminentissime quadrant, quibus ipsum os Jehovæ ipsum compellavit, insignivit, designavit, obsignavit, atque hisce sacratissimis nominibus a fidelibus est agnoscendus, amplectendus, venerandus, adorandus; scil. ceu **DEUS NOBISCUM**, Deus & Frater, Deus noster & caro nostra, Deus Goel atque mediator noster, Deus pro nobis, cum nobis, in nobis; Deus cujus est terra sancta. *Jes. 8: 8. Hos. 9: 3. Lev. 25: 23.* ceu *lux magna*, lux vivifica, salutifera, gaudii atque consolationis plenissima, lux omnes illuminans, fideles suos filios lucis reddens. *Gaudium nostrum*, ex v. 2. *gaudium maximum*, non ob prolem vel opes auctas, sed ob bona Novi Fœderis ab ipso parta, *gaudium de expleto legis δικαιοματι*, extinctisque ejus fulminibus, de prostrata diaboli potentia, exarmatoque orco, de pretiosissima libertate atque vindicatione a jugo legis, peccati, diaboli, Antichristi, de acquisita nobis salutifera gratia, redditaque pace, de reclusa in intimum Dei adytum via, reseratisque cœli portis. Ceu *puer nobis natus*, ceu *Filius Dei nobis datus*, ut viveret in nobis, nosque in ipso. Ceu *admirabilis*, ex quacunque eum spectes parte. *Admirabilis* ceu *Immanuel noster* θεανθρωπος, ceu summus dominus, pro imis vilissimisque servis tantopere humiliatus, ceu infimus servus ad tantum gloriæ fastigium evectus. *Admirabilis* denique gratia & veritate. Ceu *Consiliarius* doctorque noster sapientissimus, qui nobis consilium patris recludit, arcanamque ejus voluntatem palam exponit, quique nobis optima suggerit consilia, de spernendis mundi deliciis, voluptatumque illecebris, de coëmendo auro fidei & charitatis, vestibibus candidis justitiæ atque sanctimonix ejus, collyrioque cœlesti inungendis oculis ad pervidenda mysteria regni cœlorum. *Quin* ceu *Deus fortis*, Deus heros, Deus in carne manifestatus, Deus

Deus in præsepi jacens, in cunis vagiens, cujus dextra tanta patrat miracula, tantam edit hostium infernallium stragem, cujus potentia tutò nitimur. Ceu *Pater æternitatis*, in quo sunt omnes æones, & per quem panduntur, qui fuit ante mundum conditum Pater æternitatis, & simul filius hominis in tempore natus, qui & nobis vitam dat æternam; quin & Pater spoli, qui opima ab hostibus reportat nobisque distribuit spolia. Denique ceu *princeps pacis*, ceu princeps summus, cœli terræque molem humeris suis ferens, princeps regni cœlorum, sed princeps pacis, qui non bellum sed pacem conciliat, pacem cum Deo, cum conscientia, cum creaturis quotquot sunt omnibus.

§. XV.

Audite igitur Judæi, audite filiæ Jerusalem: Talis est dilectus meus, talis amicus & sponsus meus, hic ipse JESUS NAZARENUS, a vobis rejectus & crucifixus, talis est; estque is ipsissimus, de quo sacer vates JESAIAS tam magnifica fudit oracula. Is ipsissimus est *via* ad patrem cœlestem, *veritas* & medulla sacrarum scripturarum, *vita* denique ipsa, vita sanctissima, beatissima, & vere æterna. Qui gloriatur, in domino nostro Jesu Christo gloriatur. Is est Rex gloriæ, pater æternitatis, fons omnis salutis. Vos miseri eum dedignamini, despuitis, milleque convitiis confoditis, nobis vero in Evangelio revelatus, est potentia atque sapientia Dei, quam fidei amorisque ulnis excipimus, amplectimur, veneramur. Sentimus vero, o miseri, quæ dicimus, novimusque nos verissima loqui. Novimus, nos ex morte in vitam transisse, quia Christo credimus, fidem tenemus, spem fovemus, fratresque amamus. Quisquis vero hunc non novit, cæcus est; qui hunc non habet, pauper & miser est; qui in hunc non credit, injustus atque condemnatus est. Utinam ergo tandem aliquan-

quando saperetis, reclusisque fidei oculis adspicere-
tis, quem tamdiu confodistis! Zach. 12: 10.

§. XVI.

Sed ut ad *secundum Evangelistæ Matthæi caput* per-
gam, citatur *versu ejus sexto illustris locus MICHÆ*
c. 5: 1. & quidem ex ore totius Synedrii Judaici. Et
bene habet, etiam hodiernos Judæos dictum hoc ad
MESSIAM referre. Sed ad duo non satis attendunt
Judæi hodierni, *Jarchius, Kimchi, Abarbanel*:

1. Messiam nasci debere *Bethlehemi*, vel *Ephratæ*;
Non sufficit dicere, Messiam ex familia Davidica ori-
turum, sed eum Bethlehemi sive Ephratæ, parvo il-
lo oppido, quale tunc fuit, nasciturum. Sed jam pe-
riit Hierosolyma, periit Bethlehem, eorumque nec
vola nec vestigium superest. Ergo Messias jam natus
est, natus est inquam Bethlehemi, quod historia no-
stra Evangelica adeo docet, ut fidem nobis faciat ma-
ximam atque certissimam.

2. Messiam in tempore exeuntem, h. e. nascentem,
(nam *נָסַח* *exire* est nasci; habere suos exitus ante
dies seculares, sive ante dies mundi, esse æternum Dei
Filium a patre ante secula genitum, sinuque amoris
fotum. Vos vero cæcissimæ talpæ, negatis Deo ta-
lem Filium esse, contra h. l. & Psal. 2: 7. 72: 17. &
Prov. 30: 4.

§. XVII.

Sed & notabilis est versus secundus: *propterea tra-*
det eos, (populum incredulum tradet in manus hosti-
um) *usque quo pariens peperit, tunc igitur reliquiæ fratrum*
ejus (Judæorum) *revertentur una cum filiis Israel.* Con-
feratur hic egregius locus cum Hof. 3: 5. Audiatur
que ἐπίλυσις Apostolica: ὅτι πάρωσις ἀπὸ μέρης τῷ Ἰσραὴλ
γέγονεν, ἄχρις ἢ τὸ πλήρωμα τῶν ἱθύνων εἰσέλθῃ. Καὶ ἔτι πάντες
Ἰσραὴλ σωθήσονται. Rom. 11: 25, 26. PARIENS ea est
Eccle-

Ecclesia gentium, filios Christo gignens quam plurimos; pedetentim vero effoeta hæc mater filios gignere cessat, vel, quos enititur, sunt spurii, ἑμπαίκται, Ismaeles, Esavi, verorum Christi filiorum, ex spiritu ejus genitorum hostes atque illusores. Jes. 66: 5. Hoc ubi apparet, characteris vice est, haud procul abesse tempora reassumendi Israelis.

Discamus interim *ὡς ἐν παρόδῳ*, triplici Christum gaudere nativitate. 1. Quidem æterna, & in comprehensibili ex patre מוצאותיו מקדם מימי עולם. Vi ejus Christus est ἀπαύγασμα τῆς δόξης, καὶ χαρακὴς τῆς ὑποστάσεως αὐτοῦ. Hebr. 1: 3. 2. Nativitate ex Virgine Bethlehemitica, qua fit filius Davidis, qui est Filius Dei, verbumque Patris æternum, σαρεξ caro fit. 3. Nativitate mystica & spirituali in cordibus fidelium, tam ex Judæis quam gentibus, de qua Joh. 3: 3, 5. Gal. 4: 19, 26, 27.

§. XVIII.

Ad vos igitur, Christiani, Fratres, mea se jam convertit oratio. Neque enim amplius cum Judæis rem mihi esse volo. Vos, inquam, amice compello, Christiani, Fratres, vobis jam divina serit bonitas, vobis offertur salus; utinam eo, quo oportet, ardore & candore eam amplecteremini, & Christum ejusque φρόνημα in cordibus vestris eniteremini. Concipitis, paritis, sed quid? plerumque verba sine spiritu, sine vita Christi. Videri vultis amare Christum, sed veros ejus filios acerbo prosequimini odio, ab affectibus atque passionibus vestris, cum Christo in crucem agendis, estis alieni. Lingua profitemini Christum, sed operibus negatis, mundi quippe avidi, favoreque magnatum adjuti bona atque honores hujus seculi ambitis. Concipitis, inquam, atque paritis. Sed quid? Audite ex Jesaja: *Concipitis quisquilias, paritis stipulam, ignis vos spiritumque vestrum absumet.* Jes.

33: 11. *Concipitis ærumnam paritisque iniquitatem.* c. 59: 4
 Certe Ecclesiam Christianam mors & defectio manet, a genuina veritate, a pristino zelo, ab ardore Regnum Dei rapiendi, ut tandem in subrepidam versa Laodiceam, ex ore Christi evomatur, Israelque reassumatur. Caveamus nobis, personarum acceptor Deus non est, sed scrutator cordium & renunt. Diligit diligentes nomen suum, congaudetque nobis de salute Christi lætantibus.

Videri vultis, invenisse veram fœderis Dei arcam in Ephrata, agroque Bethlehemitico. Sed num intratis tabernacula ejus, & adoratis ad scabellum pedum ejus? an ei sedem firmam & quietam in scrinio pectoris vestri paratis? Psal. 132: 1-7. Templum quidem intratis manu facta, ubi Christus non est: Matth. 24: 23, 26. Luc. 17: 21. Act. 7: 48. 17: 24.

Utinam vero vos ipsi vera vivaque Dei Christique templa essetis, Christumque per fidem in corde habitantem nossetis, possideretis, verumque Deum in spiritu & veritate adoraretis! Vereor enim, ne divina bonitas atque patientia hypocrisis tam diuturna fatigata, parietes illos levi tectorio inductos, tempestate & grandine dejiciat atque deturbet. Quod ut ne fiat, adorandus nobis erit Deus in spiritu & veritate Christi. Rogandusque est Christus, ut spirituales mansionem vel *ναόν* in nobis erigat. Venit enim Christus, ut nos a litera ad spiritum, ab externo manuum opere ad cultum spirituales & verum provehat & promoveat. Quod ubi factum fuerit, tum demum sentiemus, quantum sit illud donum Patris, quod nobis in festo natalitiorum Christi cœlitus mittitur. Venit Christus, ut ablato peccato & maledictione, justitiam nobis reddat æternam, & benedictione Abrahamo promissa nos locupleter. Factus est quod nos sumus, miser, mortalis, ut fieremus quod ipse est, justus, sanctus, hæredes vitæ & gloriæ æternæ. Fides, hisce myste-

mysteriis imorando, ad fiduciam & gloriationem in Deo se erigit. Sed increduli, quales Ahasus & Herodes erant, lætissimo hoc nuntio non afficiuntur, sed terrentur. Quare o Domine! auge nobis omnibus fidem, spirituque tuo sancto pectora nostra imbue atque communi, propter sacro-sanctum nomen tuum, cui laus sit atque gloria in sempiterna secula, Amen!

VII.

JOH. FRID. STAPFERI,

V. D. M.

De

*Christi in terra degentis, erga Ecclesiam
Judaicam, incredulam, ipsi inimicam,
interitui autem proximam, Longa-
nimitate*

DISSERTATIO,

ad

Illustrationem Loci

MATTH. XII, 29.

Καλαμον συντέλειμμενον ὃ καλεᾷξει, καὶ λινον τυφομενον
ὃ σβεσσει, ἕως αὖν ἐκβλη εἰς νικος τὴν κρίσιν.

Summariū.

Continet Dissertatio

I. PROPOSITIONEM materiæ tractandæ, & quidem
α. *Negative*, indicando, quod non agatur in hoc di-
cto de suscipiundis infirmis fide, sed

Tom. III.

Y

β. *Affir-*

- *β. Affirmative*, de Patientia Salvatoris erga hostes Judæos, suo tempore extirpandos. §. I.

II. *FUNDAMENTUM* sententiæ allatæ, quod est tum

- *NEXUS*, æque

• *Matthæi*, §. II. ac

• *Esajæ*, §. III. tum

- *VERBORUM* sive loquutionis allegoricæ *SENSUS*, quem sententiæ huic optime favere indicatur

• *Brevi Exegesi*, ex nexu deducta. §. IV.

• *Ipsa verborum explicatione*. §. V. - - X. quæ ita se habet ut

I. Ex *PRIORI* versus parte


- a. Hæc sententia adstruatur. §. VI. - - - XVIII. ita vero verba explicantur ut

• Probetur variis argumentis, hic alludi ad Candelabrum Sanctuarii. §. VI.

• Convenientia indicetur inter allegorias & statum Judæorum. §. VII. - - - XVI. allegoria autem duplex est, altera desumitur

• *A Calamis Candelabri*. §. VII. - - X. ubi verborum significatio explicatur, tum literalis tum mystica,

• *Calami*, §. VII.

• *Vocis*  significantis *impingere*, loco movere, estque poena gravissima, jam tum temporis Judæis inflicta. §. VIII.

• *Vocis confringere*, quæ extremum Judæorum supplicium notat. §. IX.

• *Dilatio* hujus judicii indicata vocula •. §. X.

bb. *A Ly-*

bb. *A Lychnis sive Lampadibus.* §. XI. - XVI. ubi ostenditur

† *In Genere earum Mysterium.* §. XI. & XII. & quidem

* Quando lucent,

** Quando extinctæ fumigant.

†† *In Specie, quid linum fumigans hic significet.*

α. κατ' ἀπορίαν, non verbum Propheticum. §. XIII.

β. κατὰ θεοῦ, Doctores & Doctrinam Iudæorum vario modo corruptam, defectum veræ Cognitionis. §. XIV. quæ

γ. Extinctione Lampadis vespertinæ XL. ante desolationem annis fuisse significata. §. XV.

†††. *Patientia* optimi Salvatoris erga linum hoc fumigans. §. XVI.

b. *Altera Sententia destruat* variis Argumentis. §. XVII.

c. *Obiectio* contra hanc Sententiam, de incertitudine allusionis ad Candelabrum sacrum desumpta, removeatur. §. XVIII.

2. In *SECUNDA* versus parte definiatur tempus, quamdiu Salvator hostes suos perlaturus sit. §. XIX. XX. donec protulerit ad *Victoriam Iudicium*; proferre Iudicium autem significat

α. Annuntiare Doctrinam Evangelii. §. XIX.

β. Iudicium Patris demonstrare per passiones & mortem. §. XX.

γ. Sedere ad Dextram Dei, & effundere Spiritum Sanctum. §. XX.

δ. Punire Hostes refractarios. §. XX.

III. *EPILOGUM* Dissertationis. §. XXI. XXII.

* * * * *

§. I.

TAm frequens est apud Theologos hujus dicti ci-
tatio, ut nullus fere sit liber, sive dogmaticus, si-
ve practicus in quo, quando aut de fide infirma aut de
afflictorum consolatione res est, non ejus fiat men-
tio: Ut communis verbi divini Interpretum sit senten-
tia, per *calamum quassatum linumque fumigans*, fidem in-
firmam a Domino non repudiandam, hic intelligen-
dam esse. Ipsi etiam Viri Celeberrimi, magnus VI-
TRINGA & Doctus HUYSSINGA, in eruditis-
simis suis in hunc locum commentariis, rem sic ex-
plicandam esse arbitrantur. Licet autem tot virorum
illustrium in hac re consensum facile rejiciendum esse
non putem, & absit ut ipsis aliquid derogare velim,
cum scripta eorum, quibus de Ecclesia optime meriti
sunt, æternitatem laturna esse non dubitem, nec contra
ipsos lites movere animus mihi sit; tamen subinde
Nano in Gigantis humeris constituto, aut aviculæ alis
Aquilæ insidenti, paulo longius prospicere licet. Ig-
noscant ergo Lectores benevoli, si a recepta hujus lo-
ci explicatione recedam, aliamque, quæ cum scopo
æque *Esajæ* ac *Matthæi*, cum nexu antecedentium &
sequentium, cumque ipsis textus verbis, post diutur-
nam considerationem, melius convenire mihi visa est,
afferam. Celeb. GURTLERUS a reliquorum In-
terpretum turba abit, mentem vero suam verbis ex-
ponit brevissimis, *Theologiæ Profeticae Cap. XXII. Artic.*
XII. §. LXX. pag. 389. Qui mihi hac in re aliquo mo-
do præluxit, quamvis, cur non in omnibus cum ipso
consentiam, rationes mihi sint prægnantes.

Ostendere autem mihi fert animus, illustre hoc
Vaticinium non de toleratione Christi erga infirmos
fide agere, ut in libris Theologicis concionibusque
passim explicari & citari frequentissime solet: Sed po-
tius

tius *DE LONGANIMITATE* & *patientia*, qua *CHRISTUS* usus est erga *ECCLESIAM JUDAI- CAM* ipsi inimicam, *INTERITUI PROXIMAM*, ei certo Dei consilio, *POST PROLATIONEM* judicii impetratamque a Christo *Victoriam*, destinatam, ergaque eorum *DOCTRINAM* lino fumiganti simillimam, deque *Gentium*, post plenariam *Ecclesie Judaicae* rejectionem, *vocatione*. Hoc autem ut ostendam, necesse erit, ut *PRIMO* nexum ex Matthæo æque ac ex Esaja adstruam, ut inde horum verborum scopus patefiat atque probetur. *ALTERUM* quod mihi tractandum sumsi, est brevis horum verborum ex ipso *Nexu* deducta *Exegetis*. *TERTIUM*, vero est, ut, hæc ita selhabere, ex Phrasibus & versus vigesimi primi immediate sequentis summa, probem. Non autem ita præclare de me sentio, ut omnium in omnibus mihi promittam assensum; nec omnia etiam a me allata pro certis vendito: sed, uti in hujusmodi rebus fieri plerumque solet, probabilia certis miscebo; quæ tamen, nisi multum fallor, saltem occasionem aliquam altiori indagationi, ut & melioribus perspicationibusque meditationibus præbebunt.

§. II.

NEXUM nunc ut clare demonstrarem, ex ipso Sacri Scriptoris scopo ratiocinandum erit. Ita nimirum scripta est secunda Evangelii *MATTHÆI* pars, ut Muneris Christi prophetici ab ipso suscepti & executioni mandati tradat vindicias, Cap. III. - XXV. Unde sacer hujus libri Scriptor ad Judæorum calumnias, contra optimi Salvatoris Ministerii cum *Fundamentum* tum *Exercitium* motas, oculos semper intendit. Inde est, quod 1. eorum cavillationibus occurrat tum contra ejus *inaugurationem* ad hoc munus, quod privata autoritate & absque Synedrii consensu facta sit, tum contra ejus ad hoc munus *preparationem*, Cap.

III. & IV. v. 11. 2. *Exercitium* autem muneris ipsius vindicat *α.* ratione *Loci*, ubi Evangelium primo prædicavit, Cap. IV. 11 - 25. *β.* ratione *Doctrinæ*, Cap. V. VI. VII. *γ.* ratione *Miraculorum*, quæ artes magicas nequaquam fuisse ex ipsis circumstantiis patet, Cap. VIII. IX. *δ.* ratione Evangelii *successus*, Cap. X. XI. & Nunc Capite XII. Scriptor sacer Objectiones quasdam peculiare Pharisæorum contra methodum Doctrinæ Christi ita proponit, ut eas Christus ipse simul ordine refutet. Ut ergo totum hoc *CAPUT* contineat *Christi adversus cavillationes Judæorum defensionem*; quarum objurgationum *prima* fuit, quod Sabbathum duplici modo solveret: *α.* Permittendo discipulis, ut vellant spicas, *β.* Sanando ægrotum; unde divinis responsis Cavillatores ad silentium redegit, *versu 1 - 13.* Cum vero ipsius Muneris & Personæ ratio Consiliique divini immutabile institutum ita comparatum fuit, ut acriter ipsos objurgare ipsisque divinam suam in Adversarios Potentiam Personæque Majestatem demonstrare neque voluerit neque debuerit, inde est quod ipsis miracula sua contemnentibus non magno cum tumultu & clamore sese opposuit, sed multo magis ab ipsis recessit, ipsisque absentibus ægrotos sanavit, *versibus 14, 15.* atque etiam Populo interdixit, ne miracula sua propalando causæ suæ justitiam contra Judæos defenderent, *versu 16.* Idque eo præcipue fine, ut impleretur divinum apud *ESAJAM* Vaticinium, qui hancce Christi erga Hostes suos Longanimitatem atque Patientiam jamdudum prædixerat. (ut ergo, rationibus bene subductis, quod in transitu moneo, *NON* de suscipiendis & consolandis *infirmis fide*, quod extra nexum & scopum esse videtur, hic sermo sit, *SED* de tolerandis potius ab Optimo Salvatore *Hostibus Judæis* usque ad tempus exitio eorum ineluctabili Consilii divini fato præstitutum) *versu 17.* sed quid divinus Propheta de Electo Dei Servo ejus-

ejusque Patientia erga inimicos suos ait ? Nempe hoc, Gentibus JUDICIUM, hoc est, Doctrinam Evangelicam, satisfactionem Christi, severum suum erga rejectaneos Judæos Judicium &c. annuntiabit, *versu 18.* cum hostibus autem Judæis ita aget, ut non publice & magno cum Clamore atque tumultu calumniis eorum sese oppositurus sit, *versu 19.* sed potius *Ecclesiam Judaicam* exitio proximam, *calamo quassato* similem, non destruet, nec etiam *falsam* eorum *Doctrinam*, *lino fumiganti* parem, extinguet ; donec tempus aderit quo, Christus *Judicium protulerit*, deque hostibus suis triumphaverit ; tunc demum exterminabit Judæos, & loco eorum vocabit Gentes, quæ *sperabunt in Nomen ejus*, *versu 20. 21.*

§. III.

Salvo nunc Doctiorum judicio expendimus occasionem & nexum, quo vaticinium hoc *ESAJA* ab Evangelista citatum fuit ; ex quo etsi verborum scopus satis appareat, hæcque verborum connexio cum sententia nostra optime convenire videatur, nihilominus tamen etiam ad ipsum ejus fontem, unde desumptum, ascendendum putamus, videndumque, quis divini Vatis fuerit scopus, quisque hujus dicti cum reliquis ordo. Illud in divini illius Libri *CAP. XLII.* exstat *com. 3. 4.* & est pars Visionis secundæ partis quartæ ; Cujus Visionis sive Concionis ARGUMENTUM est, Repræsentatio Jesu Christi in gloriosa muneris sui prophetici administratione, solenniter ad id sanctificari & prædicare jussi ; quam Evangelii blandam annuntiationem cum Populus Israeliticus ad stuporem damnatus assumere nollet, exinde Gentibus, in locum Judæorum ad Regnum Christi vocandis, maximum lætitiæ fuit argumentum : Severissimum e contra in Populum illum rebellem judicium pronuntiatur ; quod tum potissimum ipsis in-

cubuit, quando Regnum Messiae in medio ipsorum manifestabatur, donec nefandam istam pertinaciam Reipublicae suae excidio luit. OCCASIO vero Vaticinii hujus haec est, quod Propheta fortiter contra Idololatrias disputans, ipsosque crassissimorum in Religione Errorum convincens, nunc etiam hujus Disputationis fundamentum subjungit, ipsisque apperit Mysterium de Judaeorum propter incredulitatem suam obdurationemque rejectionem, Gentiumque loco eorum substitutionem; ostendendo, quod Deo consilium sit, Gentiles, nunc quidem in crassissimis versantes tenebris, aliquando per blandam Evangelii Doctrinam ad communionem Regni sui vocare, Judaeos autem propter impoenitentiam suam, & quod excacati officium & munus Christi non rite intelligentes pertinaciter ei sese opposerent, gravissime punire eosque rejicere: Hoc autem propositum Deus O. M. ut exsequeretur, aliquando missurum esse Filium suum, Doctorem aequae Gentium ac Judaeorum. SCOPUS igitur hujus concionis est, ostendere, quod Deus olim destructa Idololatria per Filium suum, Doctorem mansuetum, Gentes ad communionem Regni sui vocaturus sit; cujus Vocationis occasio haec sit, dum existerent, qui rectam sententiam non retinentes, Christum ex praedictis non admitterent docentem, propterea in Judicium reprobationis inciderent, eoque adductioni Gentium ad Regnum Messiae viam sternerent. Haec autem eo praecipue tendere debebant, ut Judaei exemplo Gentilium, Doctrinam Evangelii maximo studio suscipientium, provocarentur ad aemulationem, atque stuporis sui convincerentur, ne salutarem Messiae Doctrinam rejicerent, ei sese opposerent, & justum propterea in se provocarent Dei judicium. SCENA autem hujus visionis ita comparata est, ut repraesentet plus quam unum actum: in *priori* actu Deus Pater Filio testimo-

nium

nium præbet missionis suæ, Eum Judæis respiciendum proponit; eodem eum, quo ad Jordanem, testimonio ornat; eumque ita describit, ut omnem ejus aptitudinem ad Munus mediatorium ostendat. In altero autem actu Pater, postquam Christum pervicacia sua rejecerant Judæi, monitumque *versu primo* contentum de respiciendo hoc Dei Servo spreverant, sermonem ad Filium suum dirigit, ipsique suum de vocandis Gentibus Consiliū apperit *versu s. seqq.*

Describitur ergo in actu *primo* hujus SCENÆ, quomodo Deus Pater Christum Servum suum Judæis respiciendum proposuerit, eumque ipsis ut omni acceptione dignum commendaverit, & quidem:

α. Ab illustribus attributis, quod Patrem habeat in munere suo Auxiliatorem & Adprobatorem, Spiritum Sanctum supra ipsum effundentem, ut adeo aptus sit ad proferendum Judicium etiam ipsis Gentibus. Quo incitari debebant Judæi, ut Gentibus, salutarem ejus Doctrinam cupide haurientibus, æmuli essent, ad præstantiam Doctrinæ ejus agnoscendam. *versu 1.*

β. Ab institutionis modo; ubi describitur

1. A mansueto ejus animo; *Non clamabit nec attollet vocem suam, nec foris vocem suam audiri faciet;* hoc est, non versaturus est in genere Doctrinæ contentiosæ & Disputatoriæ; compariturus est inter Judæos absque Pompa & fastu; traditurus est Doctrinam pacificam, idque modeste & placide; & quidem in locis institutioni publicæ dicatis, in Templo & Synagogis, & in locis a conventu hominum civili remotioribus, *versu 2.* Hunc enim versum de commoratione Christi inter Judæos agere, ejusque docendi modo, ex citatione MATTHÆI satis clare patet, & nulla ideo evidens ratio mihi apparet, quare non etiam *versus sequens* de Judæis explicandus esset, in quo describitur Messias

2. A

2. A TENERRIMO JUDÆOS SERVANDI STUDIO, *Calamum quassatum non confringet, & linum famigans non extinguet, in veritate profectus jus. versu 3.*

γ. Ab effectu & successu institutionis ejus *versus 4. part. 1.*

δ. A prædicatione Doctrinæ salutaris, post rejectionem Judæorum, inter Gentiles eam cum desiderio recipientes. *versu 4. part. 2.*

Versus ergo, quem illustrare in hac Dissertatione nobis proposuimus, exhibet mansuetum Messiae veri Doctoris erga Judæos animum, quo ea qua est Patientia Judæos propter incredulitatem suam non statim cum integra eorum Politia atque cultu destruxit, sed blande ipsos veritatis convincere studuit, ipsis tempus poenitentiae concessit, usque ad terminum illum qui plenario ipsorum exitio destinatus erat, qui fuit post prolatum a Christo judicium inque hostes suos triumphum.

§. IV.

Si igitur, nexu ex ambobus Scriptoribus sacris ostenso, ante verborum explicationem, brevem PARAPHRASIM, ex scopo Vaticinii hujus ejusque apud Matthæum allegationis, adornare velim, Evangelistam ex Propheta ita loquentem concipio. „Firmum Deo stat Consilium, tempore definito, veram ac salutarem Evangelii Doctrinam Judæis æque ac Gentibus annuntiare, eosque ad Regni sui communionem vocare. Eum in finem mittet magnum illum Prophetam, in abjecta quidem servi forma, talibus vero instructum Donis, ut obeundo huic muneri aptissimus sit; ipse dilectus Dei Filius, in quo & executione muneris ejus est omne Dei beneplacitum, ab ipso Spiritu Sancto ad hæc unctus; Hunc, qui Doctor simul Gentium erit, Deus Pater „ Ju-

„ Judæis prospiciendum proponit, idque eo fine, ut
 „ ad ipsius Doctrinam attendant atque cum veræ fidei
 „ obedientia eam amplectantur. Tali vero ipsi erga
 „ cum erunt animo, tantusque erit eorum stupor,
 „ tantaque excæcatio, ut non tantum institutionem
 „ ejus negligant, sed & ubique pertinaciter se ei op-
 „ ponant, Ille quidem, per Demonstrationem Veri-
 „ tatis ad conscientiam, Doctrinam suam ipsis proba-
 „ bit; ea vero qua est bonitate atque mansuetudine,
 „ cum Adversariis suis, ad sui ostentationem, non cla-
 „ mosâ in locis publicis inibit jurgia, sed blanda glo-
 „ citatione potius ipsos ad se allicere studebit; neque
 „ pro Longanimitate sua illos propter incredulitatem,
 „ pervicaciam & perpetuas cavillationes, statim de-
 „ struet punietque, quanquam status ipsorum ad per-
 „ niciem plenariam jam maxime vergat, sed summo
 „ conservationem eorum quæret studio. Nec etiam
 „ Doctor hic infallibilis, clarissimam afferens Doctri-
 „ nâ Evangelii lucem, luci illi fuliginosâ Dogmatum
 „ Judaicorum e diametro oppositam, statim abrogabit
 „ Legem illam Cæremonialem umbratilem, nec Do-
 „ ctrinam illam Ecclesiæ Judaicæ adhuc veritatis ali-
 „ quam speciem habentem; etsi præterea præjudiciis
 „ præconceptis, Traditionibus atque præceptis huma-
 „ nis, cupiditatibusque carnis obfuscata, Deoque pro-
 „ pterea maxime ingrata, lino fumiganti, parum lu-
 „ cis sed multum foetoris edenti, simillima, plena-
 „ riæque extinctioni propter deficientia Spiritus San-
 „ cti dona atque oleum proxima sit; plenarie extin-
 „ guet, sed patienter hæc omnia perferet; usquedum
 „ veniet tempus, quo proferet ad victoriam judici-
 „ um, exequendo omnia ea quæ ad judicium sive
 „ munus judiciale ejus pertinent; annuntiando Evan-
 „ gelium, passionibus & morte Judicium sive justiti-
 „ am Patris ostendendo, effundendo Spiritum San-
 „ ctum, adversarios suos puniendo, atque de Hosti-
 „ bus

„bus suis triumphando. Proximum autem consecuens rejectionis hujus Judæorum erit, quod Infidelæ sive Gentes sperabunt in nomine ejus, hoc est, loco Judæorum rejectancorum Doctrinam de Christo spernentium, Gentes vocabuntur ad Regnum Christi, in eoque omnem spem atque fiduciam collocabunt.

§. V.

Exposito jam nexu & brevi Paraphrasi inde deducta, nunc restat, ut hanc quam protuli sententiam, ex verbis textus porro explicem atque confirmem. Propositi vero mei non est, harmoniam sive concenrum inter Prophetæ atque Evangelistæ verba ostendere; id enim ab omnibus, quotquot Vaticinium hoc interpretati sunt, jam factum abunde constat; sed hoc mihi incumbit, ut ostendam, hæc verba, neutiquam de suscipiendis infirmis fide, sed de tolerandis Ecclesia Doctoribusque Judaicis usque ad tempus exitio ipsorum definitum, intelligenda esse: in hoc autem ita versabor, ut *unam* sententiam rationibus satis probabilibus, ex significatione Phrasium desumptis, adstruam, *alteram* deinde variis argumentis destruiam.

§. VI.

Duo *EMBLEMATA* sive locutiones allegoricæ sunt, quibus *subjectum orationis* describitur, alterum a *Calamo quassato*, alterum vero a *lino fumigante* desumptum; inter ambo tamen uti aliqua & discrepantia, ut res diversas significent, ita etiam aliqua relatio esse mihi videtur. Et procul dubio veritati proxime accedunt, qui hic ad *CANDELABRUM* illud *aureum in templo* alludi contendunt; ut per Calamum quassarum intelligatur *Ramus* candelabri illius in sanctuario constituti; *εὐραφεία* enim allegoricæ hujus locutionis huic interpretationi quam maxime favet, quoniam Ellychnium fumigans clarissime ad lucernam relatione-

lationem habet, & קנה est eadem vox, quæ de Candelabro *Exod. XXV.* adhibetur; cumque his duobus *Similibus* inter se diversis, in eadem autem re Judæis maxime nota occurrentibus, Propheta utatur, convenientia rei nos dubitare non sinit, quin ad Candelabrum illud alludatur, in quo utrumque occurrit. Huic sententiæ favent duo maximi nominis Viri LAMPIUS & MAJUS: quamvis, uti deinceps videbimus, in applicatione rei errasse videntur. Prior sententiam suam exponit in *commentario de Fœdere Gratiæ Tom. IV. cap. XXVI. §. XVII. pag. 1301.* Es scheinet auch auf das Geheimniß des güldenen Leuchters zu zielen der Ort *Jes. XLII. 3.* - - Denn das Wort (קנה) welches durch Rohr wird übergesetzt, ist dasselbige, womit die Röhren des güldenen Leuchters bezeichnet werden; und das Gleichniß eines glimmenden Tochts zeigt uns gleichfalls auf eine Lampe, worinn dieselbe brennet. JOH. HENR. MAJUS *F. Observ. Sacr. Lib. II. pag. 24.* in hunc Esajæ locum ita fatur: *Crediderim קנה Ramum hic Candelabri inferre, quo sensu legitur in Exod. XXV. 31-36. ubi LXX. constanter habent καλαμίσκον, uti in hoc Esajæ vaticinio καλαμὸν. Jam פשתן sive Ellychnium, id quod in Candelabro potissimum est, sic ut sine eo nullus hujus sit usus, declarat; ut adeo integrum hic habeamus candelabrum. Totum hoc respicit illud, quod in sancto ad dextram Dei & ingredientis sinistram fuerat in Tabernaculo Mosaico collocatum. Supra laudatus LAMPIUS deinde hanc Clar. MAII sententiam in Commentario in *Joh. Cap. V. 25. Tom. II. pag. 99. in notis Lit. K.* ut elegantissimam & plusquam probabilem laudat. Accedit insuper, quod & Rabbini, & in specie MAIMONIDES, dicit in *Tamid. Cap. 3. §. 12, 13. &c.* quod si in Candelabri sacri Lampade aliqua Ellychnium adhuc fumigaret, eo tempore quo accendendæ omnes erant, idem illud non extinguendum fuisse, sicut vicissim, si semel esset extinctum, etiam oleo adhuc suppeditante, totum Ellychnium removebatur & abjiciebatur.*

§. VII.

§. VII.

His rationibus adductus, veritati maxime consentaneum esse videtur, cumque scopo Prophetiæ convenientissimum, quod ad *Candelabrum aureum* fiat allusio. Duæ autem allegoriæ in vaticinio nostro inde desumuntur, alterum a *Calamo* candelabri, alterum a *lucerna*; unum ergo post alterum erit explicandum. *CANDELABRUM* autem hoc (cujus calamus pars) una cum calamis, scapo & quicquid eo pertinet, non particulare aliquod Ecclesiæ membrum, vel aliquem fide infirmum, significare, ex toto ejus mysterio satis apparet: *Illud* enim figuram *ECCLESIAE UNIVERSALIS* esse, scriptura sacra non uno tantum in loco, & ipse Dominus in sancta Johannis Patefactione, declarat: & *SCAPUS* ejus in specie, sub septem calamis, ex Abrahamo ortam *Ecclesiam Israëliticam* significat, stirpem nempe oleæ, cui Ecclesia N. T. insita est, *Rom. XI. 17.* Rami vero sive *Calami* *ECCLESIAS PARTICURARES* notant, tanquam tot Ecclesiæ Universalis membra. *Calamus* autem *quassatus* dicit tristem sive *DEBILEM* aliquem *Ecclesiæ* alicujus *particularis* statum, interitui proximum. Cumque hic sermo fiat ad Judæos, & de modo, quo Christus cum Ecclesia Judaica ejusque Doctoribus egit, per *Calamum quassatum* statum Ecclesiæ hujus particularis Judaicæ depingi, clarissimum est,

§. VIII.

Attributum ergo hujus calami est, quod sit *quassatum*, קנה רצוצ לא ישובו Καλαμὸν συντετριμμένον ἢ κατεαῖξει. Verbum רצוצ significat *frangere*, & etiam *impingere*, citante enim Doct. MAIO Author τῆς Aruch. fol. 149. Col. 4. scribit, radicem hanc de allisione ad parietem capi. Candelabrum nimirum in sanctuario alio impingere non potuit quam ad parietem, nisi fatali casu penitus dejiendum fuisset; *prosternere autem*

tem vel loco movere Candelabrum, est poena gravissima, per os divi Johannis Angelo Ecclesiæ Ephesinæ intentata. Apoc. II. 5. & secundum GROTIUM idem est ac si diceretur : *Efficiam ut plebs tua alio diffugiat, nempe ad ea loca, ubi major habetur cura Pauperum.* Majori autem cum Emphasi beatus COCCEJUS rem exponit, quando dicit : *Motionem Candelabri e loco suo significare sublationem Ecclesiæ ex eo Populo vel ex eo loco, in quo antea fuerat.* Celeb. VITRINGA explicat per ablationem & translationem Regni Dei, ut eadem sit poena quæ Judæis a Christo intentatur Matth. XXI. 43. *Propterea dico vobis, ὅτι ἀρθῆσεται ἀπὸ ὑμῶν ἡ βασιλεία τοῦ θεοῦ. Regnum Dei auferetur a vobis, & dabitur populo, qui fructum suum feret.* Si igitur Ecclesia aliqua particularis loco movetur aut debilitatur, dici potest, quod Candelabrum e loco moveatur, aut calamus ejus, Ecclesiam particularem significans, conquassetur. Et revera, si conditionem illius Cœtus de quo hic sermo est spectemus, tunc temporis Ecclesia Judæorum, sive status eorum Ecclesiasticus, eo sensu quo calamum quassatum explicavimus, tali calamo fuit similis : Eadem enim poena, idem malum, quod per calamum quassatum intelligitur, ipsis non tantum imminebat, sed jam inchoaverat. Cultus enim ipsorum cæremonialis, in quo tantopere confidebant, & cujus candelabrum insignis pars erat, jam incipiebat labascere ; omnis hic typicus apparatus debebat cessare ; REGNUM CŒLORUM jam AUFERRI coepit ab ipsis ; omnia quæ ad Regimen Ecclesiasticum pertinebant, ad perniciem jam maxime vergebant : Ecclesia eorum in varias Sectas erat discissa ; Pontifices ad arbitrium Præsidum Romanorum constituebantur & removebantur, absque ulla successionis legalis habita ratione : Sacra ipsorum multo contemptui erant exposita, ut afflictissima fuerit Ecclesiæ hujus facies. Sed multo adhuc tristior & foedior erat

erat status Ecclesiæ Judaicæ internus, qui Doctrina & moribus corruptionis fastigium attigit, uti ex Historia Evangelica patet; crecebant in immensum obstinata Gentis peccata, ut iustis Dei Judiciis impliciti paulatim ad plenarium interitum suum appropinquarent.

§. IX.

Ingens est pœna, quæ per *concussionem* Candelabri vel ejus locomotionem exprimitur, qualis Ecclesiæ Ephesinæ fuit intenta, & qua Ecclesia illa particularis, in qua optimus Salvator versabatur, jam afflicta erat; Sed majus adhuc eam manebat supplicium, quo calamus hic non tantum debuit prosterni vel a loco suo moveri, sed suo tempore plane *confringi*, id est, hic calamus, Ecclesia hæc particularis, a candelabro integro debuit auferri, & Ramus amputari, ut alius ejus loco posset inferi. Quod justum Dei Judicium tantum erat, ut homo quidam rusticus, nomine Jesus Anani filius, multiplex illud Væ in Populum Judaicum, ad obsidionis Hierosolymitanæ tempora usque, per septem & quod excurrit annos detonuerit. Totius enim Populi vires debebant frangi; totus ille cultus typicus, totum templum, tota Hierosolyma erant vastanda atque deruenda; bello cum alio Populo debebant implicari non finiendo, nisi cum Reipublicæ suæ plenario excidio; Discordiis internis, quibus se invicem conficiebant Judæi, omnia cædibus & rapinis implentes, advocata Cæsaris Romani arma, quibus partim fame partim vi urbs expugnata, templum incensum, Sacerdotes necati, ex ipsis fundamentis ingrata civitas diruta, undecies centena hominum millia variis mortis generibus durante obsidione enecata, reliqui captivi ducti, plurimam partem in publicis Spectaculis aut ferro aut bestiis consumpti, omnia cultus atque Templi instrumenta in triumpho Romam fuerunt portata. Et ita luculentissimum

tissimum iræ divinæ in excidione populi hujus exstat exemplum, quam suis perditissima hac natio in se concitavit sceleribus; unde *TITUS* vicinis Gentibus, ipsi ex more ob victoriam coronas offerentibus, teste *PHILOSTRATO* in Apollonii Thyanæi vita, Lib. V. cap. XIV. *eo se honore indignum dicebat: neque se hoc patravisse, sed Deo iram demonstranti suas commodasse manus.* Hoc igitur modo calamus hic quassatus plane confractus fuit atque contritus, ejusque restauratio deinceps frustra tentata.

§. X.

Noluit tamen optimus Salvator, pro Longanimitate sua, tremendum hoc quidem sed justissimum Dei Judicium, eo quo inter hunc Populum degebat tempore, exequi: *Calamum enim quassatum NON confringet, USQUE DUM protulerit ad victoriam Judicium.* Pertulit enim hosce inimicos suos, superstitioni obnoxios, veræ Religioni adversos, verum salutis Authorem, tot se prodigiosis operibus divinæque missionis certissimis Argumentis comprobantem aspernantes, oblatam sibi salutem respuentes, ipsumque Jesum Christum non modo proterve spernentes sed sceleratis manibus cruci affixum interimentes; Imo non tantum pertulit hos, sed piis adhuc lachrymis miserum hunc Populum futurumque ejus casum misertus, saniozem mentem ac meliora fata ardentibus votis deprecatus est.

§. XI.

ALTERA locutio allegorica ab alia candelabri parte desumpta esse videtur, a *lucerna* scilicet: ופשתה לא יכבנה *אף ליוון תופרמנון & σβεσει.* Singuli nimium rami una cum stipite, ex quo reliqui sex calami prodibant, suis lampadibus erant instructi, medius autem ex his septem lychnus, ad quem, ex mente Judæo-

rum, sex reliqua ellychnia fuerunt conversa, vulgo נר מערבי *Lychnus occidentalis* sive *Lucerna vespertina* appellatur, ejusque ellychnium ad sanctum sanctorum conversum fuisse dicitur; & hoc solum ex septem interdii arsit, e quo reliqui lychni tempore vespertino accendi solebant; templo secundo stante etiam interdii præter hunc occidentalem sive vespertinum alios aliquos Judæi lucere voluerunt. Lampades autem hæ ardebant oleo olivæ purissimo, linis ex detritis Sacerdotum vestibus confectis, deficiente autem oleo, aut lino non recte præparato, lychni subinde ante diei adventum erant extincti, & lucere paulatim cessantes ante plenariam extinctionem adhuc fumigabant.

§. XII.

Uti autem *CANDELABRUM* figura Ecclesiæ universalis est, quæ, ita nonnullis interpretantibus, dicitur *columna & stabilimentum veritatis*, 1. Tim. III. 15. ita *LAMPADES* ei impositæ nihil aliud significare possunt, nisi *Doctrinam veritatis & veræ cognitionis lumen*. Oleum autem est Spiritus Sanctus, 1. Joh. II. 27. qui solus veræ scientiæ atque sapientiæ omnisque illuminationis Author existit. *Linum* autem ex vestibus Sacerdotum confectum Doctorum Ecclesiæ Symbolum est, mediantibus quibus Spiritus Sanctus verbum divinum Ecclesiæ lucere facit, quique vi *olei illius alacritatis* impleti, ignique ex Altari, qui Amor Christi est, accensi, ita ardent ut totam Ecclesiæ domum illustrent, aliis vero inserviando, uti linum, ipsi consumuntur. Duæ autem potuerunt existere causæ, ut paragrapho præcedente monui, cur lychni subinde fuerunt extincti, *vel* olei defectus, *vel* linum non satis urendo idoneum; & res eodem plane modo se habet in significatione Mystica. Quando lux veræ cognitionis in Populo aliquo extinguitur, inde est, quod

quod Deus ab una parte iustissimas sapientissimasque ob causas salutaria Spiritus Sancti dona subtrahit, ab altera autem parte tales Ecclesiæ illi dat Doctores, qui operationibus atque influxui Spiritus Sancti resistentes lucendo quam maxime inepti sunt. Uti autem lux Lampadis non unico momento extinguitur, si desit unum aut alterum requisitum, sed paulatim decrescit, & tandem *fumigans* plus foetoris quam lucis edit; ita etiam cum Doctrina veritatis in hoc vel illo populo se habet, quem Deus iustissimo iudicio lucē Evangelicæ Doctrinæ privare vult, subtrahente nimirum Deo dona Spiritus Sancti, aut mittente Doctores mendacii, lux veræ cognitionis per gradus extinguitur, subinde per multum temporis spatium adhuc parvo splendore fumigans, ut in Doctrina adhuc veritatis aliquid supersit, quæ tamen nebulis sive fumo errorum, ingenio & cupiditatibus hominum accommodatorum, ita obfuscata est, ut nihil fere lucis amplius adsit, sed ingratum Domino excitet odorem, ipsi animarum sanitati officiat, lucendoque hominibus minime apta sit.

§. XIII.

Explicato nunc Lampadum Candelabri mysterio, expediendum nobis erit, quid per *λινον τυφόμενον* in versu nostro intelligendum sit. *כהן כהן* significat *linum hebesens*, *HESYCHIUS* vocem Græcam explicat *τυφειναι, μαραινεσθαι, &c. marcescere, paululum exardere, sine flamma fumum esse*, ut sit linum extinctioni proximum, sine flamma fumigans, quod propter defectum olei hebescit, flamma imminuta lumen obscurius & plus fumi quam luminis spargens. Sensum autem iterum esse allegoricum, quisque facile videt. Assentire autem hic non possum Erudit; MAJO, qui a vulgo Interpretum, per linum hoc infirmam fidem intelligentium, abit; ita nempe Doct. Vir:

Deum - - neque *linum fumigans deleturum*, hoc est, nec *verbum propheticum*, etiamsi *λυχνος* sit ἐν *αυχμηρῷ τοπῷ*. 2. *Pet. I. 19.* nec *cetera V. T. Oracula aboliturum*, quæ *lucis & lucernæ adpellatione veniunt in Hymno CXIX. 105.* Si enim simpliciter diceretur, *Lampadem sive lucernam non extinguet*, adhuc de verbo divino Prophetarum oraculis contento explicari posset: Cum autem *verbum divinum illustret oculos*, *Psalmo XIX.* & sit *lux pedibus nostris*, *Psalmo CXIX. 105.* adeoque purissima, hic vero mentio fiat de lino fuliginoso, qui fumo oculis & foetore naribus incommodat, quæ de Prophetico verbo dici nequeunt, & eo ipso, quo est *λυχνος ἐν αυχμηρῷ τοπῷ*, illuminat, & *linum fumigans* vocari non potest.

S. XIV.

Potius ergo hic *corruptam Doctorem & Phariseorum Doctrinam* intelligendam putamus; nexus enim indicat, Christo rem fuisse cum Legis Doctoribus atque Phariseis, qui Populo Doctrina pura atque sancta vita præluere debebant, atque Lampadis clare lucentis vice fungi, sed potius erant *כזה כזה linum caliginosum*, obscurius ardens, multum fumi, parum lucis exhalans, prope ut extingatur; erant *Cæci du. Ctore cæcorum. Oleum Sacrum*, Emblemata Spiritus Sancti, ipsis defuit, Dona ejus a iustissimo rerum Moderatore ipsis, ea non petentibus, fuere subtracta, ignis cœlestis non amplius ardebat in ipsorum animis, *Luce & Veritate, URIM & THUMMIM*, fuere privati; & licet adhuc scintilla aliqua veritatis divinæ in ipsis remanserat, tamen non tantum fuit perparva, sed infinitis erroribus, præceptis humanis, traditionibus, fumo propriæ iustitiæ, falsa iegis cæremonialis interpretatione, falso de *MESSIA*, vera atque sola Ecclesiæ luce, conceptu, adeo erat obfuscata, ut nihil luminis remanserit, quo errantes in tene-

tenebris potuissent illustrari atque per viam duci. Et foetor hujus lini prope extincti in coelum ascendens, tremendam in ipsos iræ divinæ tempestatem excitabat; & licet magnus ille Israelis Doctor atque Prophetæ, vera atque unica lux mundi, qui ambulat inter septem Candelabra, summus ille Pontifex, continuo luminis influxu in suos radians, has Lampades adhuc fumigantes nondum abjicere, sed potius iterum fovere, excitare atque accendere volebat, omneque illud quod splendorem offuscat removeere studebat, ipsis veram viam monstrabat, Doctrinæ sacræ perspicuitate atque Vitæ exemplari sanctitate lucem eorum promovere quærebat, mendaces tamen hi Judaicæ Ecclesiæ Doctores atque prope extinctæ Lampades lumen hoc recipere nolebant, sed fortiter ei resistebant & veræ Religioni sese opponebant. Quam bene hæc omnia cum *lino fumigante* quadrant!

§. XV.

Idem etiam, quod hucusque diximus, memorabili aliquo facto fuit figuratum, si Judæis hac in re sit habenda fides; qui memorant in *GEMARA JO-MA*, apud *GALATINUM* de Arcan. Cathol. Verit. Lib. IV. Cap. 8. *LIGHTFOOTUM* Horis Hebr. ad Matth. XXVI. *BOCHARTUM* Hieroz. Part. I. Cap. LIV. aliosque: Durante Tabernaculo & Templis ambobus, quando Lampades vespera accensæ fuerint, sæpe omnes septem tota nocte ad tempus usque matutinum arsisse, interdum quasdam durante nocte fuisse extinctas, *Lampadem autem Vespertinam* sive occidentalem, quæ media fuit versus Sanctum Sanctorum versa, nunquam extinctam fuisse; præter propter autem quadraginta ante ultimam Urbis Hierosolymorum desolationem annis, etiam hanc Lampadem fuisse extinctam. Ita enim *BOCHARTUS*,

loco citato pag. 657. ab initio, inquit: Talmudici scribunt in *JOMA* Cap. IV. fol. 39. b. תנו רבנן ארבעים שנה קודם חורבן הבית לא היה גורל עולה בימין ולא היה לשון של זהורית מלבין ולא היה נר ערבי דולק והיו דלתות | Magistri docuerunt; quadraginta annis ante Templi desolationem non ascen-
 „ disse amplius sortem in manum dextram, neque
 „ linguam coccineam amplius exalbuisse, & neque
 „ Lucernam Vespertinam amplius arsisse; Templi fo-
 „ res per se patuisse. *Nempe annis quadraginta ante*
Templi desolationem Christus passus est, & illius morte lega-
libus sacrificiis omnis virtus adempta, LUMEN COGNITIONIS IN EA GENTE EXTINGTUM, nec
Templum solum, sed & Cælum hætenus clausum Gentibus
tum demum patere cæpit. Hæc Bochartus. Idem ergo, quod tum temporis Candelabro accidit, ad quod in dicto nostro alludi plusquam probabile est, idem etiam Doctoribus Judaicis contigit, quorum Lumen Cognitionis plenariæ extinctioni proximum paulatim hebescebat; habebant quidem Lampades, sed ut fatuæ illæ Virgines sine oleo; cognitionem quidem aliquam, sed non eam quæ est a Spiritu Sancto, ideoque nec veram sed proprio ingenio procusam, præter Doctrinam a Deo per Spiritum Sanctum traditam.

§. XVI.

Uti autem Benignissimus Salvator καλαμον συκί-
 τεισμενον noluit confringere, ita etiam nec λινον τυφο-
 μενον voluit extinguere, ἢ σβεσσει. Supra annotavimus, quod si in Candelabri Sacri Lampade aliqua ellychnium adhuc fumigaret eo tempore, quo accendendæ omnes erant, idem illud iterum accendebatur, sicut vicissim si semel esset extinctum etiam oleo adhuc suppetente, totum Ellychnium removebatur & abjiciebatur: vide *MAIMON*. in *Tamid.* & *Jom Tobh*

ad Cod. Tamid. Cap. III. Misch. 9. Christus etiam Misericors Sacerdos fumigans hoc Doctorum Judaicorum linum tenerrimo studio iterum accendere studuit : Ipsi autem, deficiente oleo & linis lucendo aptis, igni accipiendo toti erant inepti, unde non tantum veræ huic luci sese opponebant, sed & eam propriæ Sapientiæ typho atque falsæ Doctrinæ fumo suppressere atque extinguere quærebant. Noluit tamen Jesus Christus hoc linum adhucdum plane extinguere, sed Doctores hi eorumque doctrina, qualis tunc erat, una cum Levitico illo cultu, ad tempus constitutum usque permanere debebat.

§. XVII.

Hæc nexui, scopo & verbis convenientissima significatio esse, mihi quidem videtur. Placuit vero Theologis summis, inter quos *VITRINGA*, *HUY-SINGA*, aliique fere omnes, per *calamum quassatum & linum fumigans* intelligere Pauperes Spiritu, infirmos fide, cognitione, charitate, zelo, sanctitate, patientia, animos fractos, ob peccata sua afflictos, coram Deo se humiliantes, depresso ac dejectos, spe vacillantes, in quibus tamen adhuc supersit aliqua vis spiritualis, seria poenitentia peccati commissi, desiderium gratiæ divinæ, quos Christus consolatus sit, instruxerit, fidem eorum excitaverit, eos corroboraverit, lætificaverit. Verum equidem est, Christum, qui scit *fesso loqui verbum tempestivum*, hæc omnia fecisse, uti passim apud Prophetas de eo vaticinatum fuit; hoc vero Vaticinium, quod mihi nunc præ oculis est, non de animis tenerioribus & fractis, fide infirmis, explicandum esse, sequentia præcipue mihi suadent; si mihi difficultates, quibus altera sententia premitur, proponere licet.

a. Obstat *nexus & scopus*, qui est, ostendere, quomodo Christus se erga suos Hostes convenienter Oraculo

culo divino gesturus sit ; Inimicos enim ejus hujus Orationis & Longanimitatis Christi esse objectum , ex verbis & versibus præcedentibus clarissime patet. Ratio autem satis valida dari non potest, cur ii, cum quibus Christus non clamosa inire voluit jurgia, non iidem sint qui, verbis immediate sequentibus ad eandem rem probandam allatis , per Calamum quassatum a Domino non conterendum & linum fumigans non extinguendum exprimuntur ; Christus enim totum hoc vaticinium cum in finem allegavit, ut Discipulis suis ostenderet, quod convenienter Prophetarum oraculis cum hostibus suis agat , atque hunc agendo modum justificet.

β. Talis allegoria adhibetur, quæ *fidem infirmam* exprimendo inepta mihi videtur. Fides nimirum, utut sit exigua, Deo ramen est gratissima ; *linum* autem *fumigans* est aliquid maxime ingratum, & non majoris usus quam linum plane extinctum, sed magis adhuc oculis naribusque incommodat, unde *PLINIUS VII. 7.* & *ÆLIANUS Hist. animal. IX. 54. pag. 559.* tradunt, odorem a lucernis fumigantibus abortus esse causam. Differentia insuper est inter linum obscurius ardens, quale fides esse potest, & *λινον τυφομενον*, *caliginosum*, nil nisi fumum atque foetorem teterrimum & intolerabilem spargens, quæ de fide exigua, se coram Deo humiliante, veram propter commissa peccata poenitentiam agente, dici neutiquam possunt ; unde mihi dubitare vix licet, quin Christus vel Esajas aliud, ad Deo gratam actionem, qualis fides est, vel subjectum fidei, quod fideles sunt, exprimendum, simile adhibiturus fuisset.

γ. Verba *ὃ καλεᾷ, ὃ σβείει*, ab Interpretibus maxime *sensu affirmativo* explicantur, ut significant, Messiam afflictos illos non tantum non destructurum, sed adhuc consolationibus suis erecturum eosque corroboratu-

raturum esse ; hic autem verba hæc *sensu* tantum *negativo* intelligi posse , ex iis quæ statim annotatione sequente dicemus patefiet ; & bona illa quæ Christus animis afflictis , oneratis , pressis , allaturus erat , non tantum verbis negativis , ubi nihil affirmativi est , exprimi solent ; dicitur exempli gratia *ESAÏÆ* LXI. 1. quod *evangelizaturus sit mansuetis* , quod *obligaturus sit fractos animo* , quod *præclamaturus sit captivis libertatem* , &c. Item *EZECH.* XXXIV. 16. *Pereuntem requiram* , *depulsam reducam* , *fractam obligabo* , & *ægrotam confirmabo*. Porro quod *refocillaturus sit* & *requiem daturus afflictis* & *onerosis*. *MATTH.* XI. 28.

δ. Fides etiam maxime exigua nunquam plane *extinguitur* , nunquam plane eam deficit oleum Spiritus Sancti ; Hic autem ita sermo fit de calamo & lino , ut aliquando confringendo & extinguendo , & quod hæc Messia Patientia tantummodo duratura sit usque quo protulerit ad victoriam Judicium. Sed quam bene hæc e contra quadrant Judæis ! quorum status Ecclesiasticus , tunc temporis quassatus , aliquando plane confringendus erat. Et sicuti Lampades in Candelabro durante nocte clare luxerunt , adveniente autem mane paulatim defecerunt , & aliquando plane extinctæ fuerunt ; quod ultimum etiam , uti supra annotavimus , tempore Christi ipsi Lampadi vespertinæ , antea insolitum , accidit ; Ita etiam Doctrina Ecclesiæ Judaicæ ab initio noctis V. T. valde pura , adveniente autem aurora N. T. paulatim de splendore suo amisit , appropinquante autem mane similis fuit lino fumiganti ; donec tandem umbris plane cedentibus fuit extincta , deficiente oleo Spiritus Sancti.

ε. Duplex simile , quo Christus utitur , indicat , non unam eandemque rem significari , sed aliud quid per

calamum quassatum, aliud vero per *linum fumigans*, esse intelligendum; si vero ad Candelabrum sacrum alludatur, hæ duæ locutiones allegoricæ de eodem subiecto, nempe fide infirma explicari vix possunt.

5. Nec etiam quadrat fidei infirmæ, quod statim additur, *usque quo protulerit ad victoriam iudicium*. Qualis enim sensus esse posset, si diceretur, fidem infirmam, sive *ὀλιγοπισίαν*, non destructum iri a Christo, donec ad victoriam iudicium manifestaverit, mihi non liquet.

6. Optime quoque mea explicatio convenit cum *versu sequente vicesimo primo*, qui agit de vocatione Gentium, ut effectu & consequente ejus, quod *versu vicesimo* dictum fuit. Quam belle autem hæc conveniunt, quod postquam *versu vigesimo* dictum est de stupore & incredulitate Ecclesiæ Judaicæ miseroque ejus statu ejusque rejectione, deinde *versu vigesimo primo* immediate sequente de proxima ejus sequela & effectu, nempe de conversione Gentium, agatur. Qui etiam *ESAÏÆ*, in toto illo capite de vocatione Gentium & rejectione Judæorum agentis, scopus fuit.

§. XVIII.

Si autem aliquis concedere nolit, allusionem hic fieri ad *Candelabrum sacrum*, quod tamen probabilissimum est, sed malit intelligere quamvis etiam *arundinem*, & Christum alias vulgaresque in animo habuisse *Lampades* existimet, quales erant Candelæ Sabbathicæ, ad quas nullum opus fas erat conficere, vel illæ quibus diebus festis, initiationis repurgari templi & Altaris per Judam Maccabæum, utebantur, vel quæ adhibebantur quærendo fermento, vel illæ ad quas Israelitæ in festo Tabernaculorum saltabant, vel quæ in signum gaudii inter Hebræos accendebantur, ut *PERSIUS Sat. V. 180.*

Herodis

*Herodis venere dies, unctaque fenestra
Dispositæ pinguem nebulam vomuere lucernæ.*

Significatio tamen erit fere eadem; *Arundo quassata* scilicet & signum fragilis hominis, aut Regni cui tuto fidere nequeas, ut 2. Reg. XVIII. 21. *Ecce fiduciam tuam habueris in scipione arundinis istius quassata, in Ægypto*: Cui loco parallelus est *Esaja XXXVI. 6.* eodem etiam sensu sumitur *Ezech. XXIX 6.* ita *JOHANNES* vocatur *Arundo a ventis agitata. Matth. XI. 7. Luca VII. 24.* Significaret ergo hic debilem & fragilem Reipublicæ sive Politicæ Judaicæ statum; *Lux* vero & *Lucerna* in Sacra Scriptura ubique Symbolum cognitionis, Doctrinæ & Doctorum est: *Psalmo CXIX. 105. Matth. V. 14.* Ut *linum fumigans* nihilominus designaret Doctrinam corruptam atque falsos Doctores.

§. XIX.

Sequitur nunc *ALTERA* hujus versus pars, in qua determinatur; *QUAMDIU* mansuetudine sua Hostes suos Judæos Optimus Salvator perlaturus sit; nempe *Ἔως ἂν ἐκβαλῇ εἰς νίκης τὴν κρίσιν. (ὡς)* *Ἔως ἂν* vertitur per *donec, usque quo*, quæ particulæ hic maxime terminativæ, id est, certum temporis terminum ponentes videntur. Particula *PRIUS QUAM & DONEC*, CHEMNITII verba sunt, quæ in Harmonia Evang. Cap. VII. pag. 168. citante GLASSIO in Philol. Sacra, Lib. III. Tract. V. pag. 454. leguntur, *terminum temporis aliquando ita significant, ut illud, quod ante terminum illum temporis removetur, postea factum fuisse, intelligatur.* Ut *Gen. XIX. 22.* *Non potero pluere ignem super Sodomam donec (ἕως) ingrediaris Segor*: ita *Levit. XII. 4.* *Erit immunda donec (ἕως) impleantur dies purificationis ejus,*

Eodem

Eodem modo etiam hic accipitur, ut sensus sit, non destruet Ecclesiam Judaicam cum ejus Doctoribus, donec proferet sive protulerit in victoriam judicium. Vocem autem κρίσιν (משפט) non nimis proprie & stricte explicandam puto, ut tantummodo significet *Judicium* de Judæis Christi Hostibus, non statim extirpandis, aliquando sumendum, ut Clar. GURTLERO placuit; vox enim hæc ad exemplum Hebr. vocis משפט latius extendenda est: Sed minus adhuc placet interpretatio Doct. ELSNERI, qui verba hæc interpretatur: *Dum CAUSA superior discedat*, hoc est, dum victoriam Causæ suæ judicem constituat, cujusmodi Phrasim ex PLUTARCHIO in Cicerone affert. Interpretatio hæc alienior nata videtur ex eo, quod Doct. Vir nec ad significationem, quam vox κρίσις versu 18. omnino habere debet, nec ad hebraicam vocem משפט attenderit, uti iis accidere solet qui ad unam aliquam Phrasin attentam ex Authore aliquo Græco explicare nituntur, non attendentes, nec ad contextum in quo Phrasim occurrit, nec ad textum Hebræum, si dictum ex V. T. citatum sit. 1. Quoad contextum nemo dubitabit, vocem κρίσις eandem hic significationem habere, quam versu 18. habuit, ubi dicitur κρίσιν τοῖς ἐθνέσιν ἀπαγγελεῖ; sed qualis sensus esset, si hoc vertetur CAUSAM suam Gentibus annuntiabit. Secundum mentem ergo Docti ELSNERI hæc vox prorsus deflecteretur ab eo significato, quem versu 18. omnino obtinet, & hic obtinere debet. 2. Cum hic non minus ad phrasas Hebræas quam ad Græcam attendendum sit, probandum fuisset Viro Docto, משפט simpliciter significare causam, & quod לאמת יציא משפט sive ער ישיב כארץ משפט, ad quas duas Phrasas MATTHÆUS respicit, apud Autores Græcos significet, dum CAUSÆ suæ judicem victoriam constituat, si-
ve

ve dum CAUSÄ superior discedat. Alio ergo sensu vox משפט sumenda erit :

α. Nimirum significat rectam & veram Evangelii Doctrinam, sive Evangelicam justitiam, omnesque leges æquitatis & juris, revelationes, doctrinas, institutiones, præcepta, in negotio Religionis, quæ spiritum Jehovæ immediate respiciunt, & principiis conscientiæ fundata sunt; Quæ Doctrina Evangelii est canon Judicii Christi, qui canon principiis æquitatis & justitiæ subnixus est; unde in Psalmis dogmata sive statuta Religionis vocantur משפטי יהוה, & hæc vox apud Esajam Cap. XLII. 3, 4. comparatur cum voce תורה Lex, Doctrina Religionis. Hanc autem Doctrinam protulit Messias, quando manifestavit illa a jactis mundi fundamentis abscondita mytheria salutis & Regni Cœlorum, quæ nec oculus vidit, nec auris audivit, quæ nemo Principum seculi hujus cognovit, quæ nulla quantumlibet subacta ratio excogitare potuit, & quæ cœlestes myriadam Angelorum Chori, jugiter licet Dei faciem contemplantes, cernui scrutati sunt: eaque Judæis primo, deinde Gentibus etiam annuntiavit; idque eis vixos, felici cum successu, ut Judicium sive Evangelium ejus ubique obtinuerit viceritque, frustra obsistente Satana & mundo; non enim sine magno certamine Evangelium propagandum erat. Ut sensus sit, Christum, nunc mollem & clementem erga Hostes suos, tamdiu dilaturum executionem supplicii in eos, donec ita produxerit atque propagaverit veram Evangelii Doctrinam, ut superior evaserit atque victoria potita sit, eaque æterna, nam eis vixos apud Græcos hebraizantes etiam significat in æternum.

§. XX.

β. משפט, si recte sentio, etiam significat Judicium Patris per justitiam Christi, passionem & mortem ejus, demonstratum; unde sæpiissime apud Prophetas Judicium

dicium & Justitia Christi & Regni ejus conjunguntur. Ita Psalmo LXXXIX. 15. XCVII. 2. צדק ומשפט מכון : כסא : *Justitia & Judicium sunt Basis Solii ipsius.* Judicium autem hoc interdum præcedit Justitiam, interdum eam sequitur; si illud præcedit, respicitur ad *Judicium Dei Patris*, in quo a Filio lytrum poscit, eoque soluto illum absolvit ejusque perfectionem agnoscit; hoc autem justum Dei Patris Judicium Christus manifestavit atque protulit in morte sua, in qua Deus Judicium suum loco Electorum in ipsum exercuit, atque demonstravit, quam justus sit Judex, judicans secundum legem & rigidissimam Justitiam. Ut ergo & hæc Judicii pars ante Judæorum extirpationem debuerit exerceri; idque *eis vixos*, ita enim Christus in hoc Judicio triumphavit, ut omnes Hostes suos, Satanam, mortem & infernum vicerit.

γ. Subinde autem Judicium Justitiam sequitur, & tunc considerandum est, tanquam merces a Patre Christo data, quo Deus ipsum constituit supremum Judicem, ipsi tradens omne Judicium, ideo quia *Filius Hominis*, id est, perfectus Salvator est; unde sedens ad Dextram Dei accepit omnem Potestatem in Cælo & in terra. Hoc autem *Judicium protulit*, seque supremum Judicem exhibuit, dando novam Legem משפט effundens Spiritum Sanctum. Prima nimirum Legislatio erat in monte Sinai: Novam autem Messias promulgavit in monte Sion, quoad formam antiqua Sinaitica sanctiorem & perfectiorem, Legem novi Foederis; unde dicit Esajas Cap. II. 3. *ex Zione egredietur Lex*; מציון תצא תורה hoc est, Doctrina veræ Religionis, Lex משפט (quod vocabulum interdum idem notat quod תורה) Messias egredietur ex Ecclesia, Societate sive Schola Zionea, post effusionem Spiritus Sancti; iterum *eis vixos*. Decore enim suo, ut præpotens aliquis Victor, equitavit super, vel in, verbo veritatis, & proloquutus est Justitiam, edens documenta sui, terri-

terribilibus dextra sua. Sagitta ejus acuta, ut populi sub illo procidant, penetrant cor inimicorum Regis. Psal. XLV. 5. 6.

δ. מִשְׁפָּט sive κρίσις significat tandem etiam Judicium Christi in Hostes suos, quod Regii ejus muneris pars est, quando eos qui Evangelium Gratiae rejiciunt etiam rejicit, suamque Populique sui causam in Hostibus suis ulciscitur. Cum vero Judicium hoc varia judicia particularia includat, hic illud intelligitur, quod Salvator in Judæos Doctrinæ ejus resistentes & sese ei opposcentes exercuit, quæ etiam occasio fuit, cur hic vaticinium illud citavit; ut sensus sit, Christum qui tanta lenitate atque patientia usus erat erga malos Judæorum mores, qui maximum studium impendit ad revocandum eos ad meliorem frugem, qui magna cum patientia bonas uvas exspectans omnia beneficia Vineæ suæ præstitit, & in statu humilli, abjecto, contempto, munera sua administravit, aliquando *proferet judicium ad victoriam*, seque Vindicem, Judicem & Victorem exhibebit in Gentem istam nequissimam, rebellium colla confringet, non ut mansuetus & clemens, sed ut severissimus Judex, conspicuo & tremendo Judicio, causam suam ab illis ulciscendo, donec plenaria Victoria potiatur. Unde executio judicii in Gentem istam vocatur *Adventus ejus in Gloria*.

S. XXI.

Hoc unum adhuc addere lubet, quod post mentionem Judicii & Victoriæ in Judæos statim addatur, *Et in nomine ejus מְהִירָה in Doctrina ejus*, quæ, cum se per eam manifestet, etiam est nomen ipsius, *Gentes sperabunt*. Ut adeo rejectio Judæorum causa fuerit Vocationis Gentium, τῷ αὐτῶν παραπλῆματι ἡ σωτηρία τοῖς ἔθνεσιν, unde ἡ ἀποβολὴ αὐτῶν erat καὶ ἀκαταργητὴ κόσμου. Loco enim Rami jamjam quassati & tandem amputati, debuit inseri oleaster ille sylvestris, Rom. XI. 17. quam bene ergo per Judicium versu præcedente etiam exterminatio Populi Judaici intelligitur! Rogo

S. XXII.

Rogo autem Misericordem illum Sacerdotem, ambulans inter septem illa Candelabra, ut pro Bonitate & Clementia sua Calamum hunc confractum, Gentem nunc quidem rejectam, ob Patres autem adhuc dilectam, mox in gratiam recipere & Candelabro Ecclesiæ iterum inferere velit; utque tempore vespertino, quando omnes septem Lampades ita lucebunt, ut splendor ipsorum *septies major* futurus sit quam antea (hoc est, quando lucebunt non tantum Lampades unius candelabri, sed omnes Lychni septem Candelabrorum) ut inquam tum temporis etiam hanc Ecclesiæ Judaicæ Lampadem, olim fumigantem, nunc plane extinctam, secundum Misericordiam suam iterum oleo Spiritus Sancti sui velit implere, aptis lucendo linis instruere, igneque tenerrimi Amoris sui accendere!

TANTUM.

VIII.

Nova Literaria Helvetica.

Vix vulnus gravissimum ex obitu Summe Venerabilis CRAMERI Academici Tigurini inflictum coalescere coepit, cum d. 8. Eid. Martii hujus anni novum accideret, decessu Viri Celeb. JOHANNIS SCHEUCHZERI, M. D. Phys. Prof. & Archiatri Excell. de cujus Vita Scriptisque videsis *Temp. T. II. p. 159. sq. 502.* Addantur *Theses Physicæ Miscellaneæ*, paucis ante supremum diebus, *Respp. 4. Candidatis*, defensionæ. Vitæ Fatorumque Ejus compendium exhibet, quod in Tumulo legitur, Tetraſtichon:

*Mercator, Medicus, Miles, Scriba, ullius expertus
Ne fierem sortis, denique Doctor eram.*

Qua

Qua mihi tam varios emenso præmia cursus ?

Nulla, nisi cæli præmia parta forent.

Relicta Philosophiam Nat. tradendi Provincia ab Ampliff. *ACAD. CURATORIBUS* commissa fuit Viro Clar. *JOHANNI GESNERO*, M. D. & Professori Matheseos Solidiff. ut utramque simul Spartam egregia, qua pollet, Eruditione exornet.

Libri & Dissertationes.

1. *Heilige Bibel: Übung / oder deutliche und gründliche In Fragen und Antworten gefassete Erklärung und Zueignung des Evangeliums St. Lucæ, in welcher jedes Stück dieses Heil. Schreibers begriffenlich erläutert, und zur Gottseligkeit zu Nutz gemacht wird; von Hans Conrad Wirtz / Pfarrer und des Stiffts zum Grossen Münster; Zweyter Theil / in sich begreifend die Verhandlung der XII. letzten Capiteln. Zürich, verlegt David Gefner, Gebrüdere. An. 1738. 8. 3. Alphab.*
2. *ACADEMIA COELESTIS (ex mente Socini & Luca Mellenii, Antemonii dicti:) ad S. Scripturam, sanam rationem, & canam antiquitatem examinata, cum vindicatione locorum Joh. III. 13. VI. 62. Phil. II. 4, 6. aliorumque. Quam Disquisitionem Theol. sub Præsidio Samuelis SCHEURERI, SS. Theol. Prof. defendit Sam. Kauffmann, V. D. M. Bernæ 1738. 4. pl. 10.*
3. *Joh. Jacobi LAVATERI, S. Theol. Prof. Dissertatio Theol. de Semine Abrahami, in quo benedicantur omnes Familix Terræ. Respp. 5. Candidatis. Tig. ex Officina Heideggeriana. 1738. 4. pagg. 28.*
4. *Ejusd. Dissertatio Theol. de Spiritu testante, quod Spiritus Veritas sit; ad 1. Joh. V. 16. Resp. Joh. Henr. Waser, V. D. M. Assum. Diethelmo Meisio, S. Theol. Stud. Tig. Typis Gesn. 1738. 4. pl. 5.*

Tom. III.

A a

NU

5. *NUMISMATA REGUM MACEDONIAE OMNIA*, quæ laboribus Cell. Virorum, *Crophii, Lazii, Goltzii, Patini, Spanhemii, Harduini, Begeri, Wildii, Haymii, Liebii, &c.* ex Regiis aliisque Numismatophylaziis hætenus edita sunt, additis ineditis & nondum descriptis, quotquot comparare licuit, integra serie historica, *Tabulis Aeneis*, repræsentata; digessit, descripsit, & *Notis Variorum* Doctissimorum Virorum illustrata edidit *Johannes Jacobus GESNERUS, Tigurinus*. Præfixa sunt *Prolegomena*, de Thesauro Universali omnium Numismatum Græcorum & Romanorum; item, de Numismatum Græcorum Præstantia, Ufu & Raritate, &c. Tiguri, ex Officina Heideggeriana, 1738. Fol. pl. 10. Tabb. 7. Conf. *Tempe*, T. I. p. 243.
6. Anpreisung des hell, leuchtenden Urims und Thummims/ des Lichts und der Wahrheit, die einig zu finden auf der Brust des Obersten Priesters J. H. S. mit erwünschtem Nachdruck angetrungen in freundlichen Gesprächen eines Römisch, Catholischen und Evangelischen. Zürich, bey Joh. Heinrich Bürkli, 1736. u. f. 8. Hætenus 6. Stück, jedes circiter von 8. Bogen
7. Ein neuer Strauß von schönen und gesunden Simmels, Blumen/ welche denen Heyls- begierigen Menschen-Kindern zur Erweckung und Ergözung aus seinen gedruckten und ungedruckten Schrifften durch Göttliche Gnaden- Hülff zusammen gelesen und gestochten Christophilus Grætianus oder *Samuel LUCIUS*, Gärtner des HErrn im Bernerischen Ober- Land. Basel, bey Johann Rudolph Imhoff, 1737. 4. 7. Alph. 12. Bogen.
8. *Jacob Lauffers* / Prof. Hist. Bern. Beschreibung Helvetischer Geschichte, 2c. XVI.ter Theil. Zürich, bey Conrad Orell und Comp 1738. 8.
9. *Xenophons* Geschichte von der Lebens- Art und den Lehren des Socrates / nach *Christian Thomases* Übersetzung; Der beygefüget ist Abhandlung von der Kunst und den

- den Vortheilen der Socratischen Lehr: Art und Gespräche, durch den Zürcherischen Zuseher. *ibid.* 1738. 8.
10. *Le Babillard, ou le Philosophe Nouvelliste*, traduit de l'Anglois par A. D. L. C. nouvelle Edition. 2. Voll. 8. a Basle chez Jean Brandmüller & Fils. 1737.
11. Ouvrages pour & contre les services militaires étrangers, publiés pour mettre le public en état de juger sainement de l'usage des Peuples anciens & modernes à cet égard, & en particulier de celui des Suisses; par *J. Louis de BOCHAT*, Prof. en Droit & en Histoire à Lausanne. 8. 3. Tom. à Gen. 1738.
12. *P. Leodegarii MAYER* Explicatio Compendiosa, Litteralis, Historica, Ceremoniarum Ecclesiasticarum, earum præcipue, quæ ad S. Liturgiam spectant. Tugii, Typis Hen. Ant. Schell. 1737. 8. pl. 41.
13. *Histoire du Concile de Trente*, écrite en Italien par *Fra-Paolo SARPI*, de l'Ordre des Servites; & traduite de nouveau en François, avec des Notes critiques, Historiques & Theologiques, par *Pierre-François le COURAYER*, Docteur en Theologie de l'Université d'Oxford, &c. 2. Voll. 4. Basle, chez Jean Brandmüller & Fils. 1738.
14. Oeuvres de Mr. de *VOLTAIRE*. 3. Voll. 8. Basle, chez les mêmes. 1737.
15. *Le Mentor Moderne*, ou Discours sur les Mœurs du Siècle; Traduits de l'Anglois du *Guardian* de Mrs. *ADDISON*, *STEELE*, & autres Auteurs du *Spectateur*. 8. 3. Voll. chez les mêmes. 1737.
16. *Le SPECTATEUR*, ou le *Socrate Moderne*, où l'on voit un portrait naïf des Mœurs de ce Siècle. Traduit de l'Anglois. 8. 6. Voll. chez les mêmes. 1737.
17. Commentaire sur la Traduction en vers de Mr. l'Abbé du Resnel, de L'Essai de Mr. *Poppe* sur l'Homme, par Mr. de *GROUSAZ*, 12. à Geneve, chez Pelissari & Comp. 1738.
18. Essais sur la Necessité & sur les Moyens de plaire, par

- par Mr. de *MONCRIF*, de l'Acad. François. 12. à Geneve, chez les mêmes. 1738.
19. Abregé de l'Essai de Mr. *LOCKE*, sur l'Entendement Humain, traduit de l'Anglois par Mr. *Bosser*. 8. à Geneve, chez les mêmes 1738.
20. M. Christian Scrivers *Seelen, Schatz*, 1c. bey dieser neuen Aufflag mit bequemen Dispositionen an dem Ende einer jeden Predigt/ 1c. versehen. 2. Voll. fol. *Schaffhaus* sen, druckts und verlegt Emanuel Hurter, 1738.

CONSPECTUS.

Sectionis Decima.

- I. *Marci MORLOTI* Disputatio Theol. de Idololatria Gentili. p. 169.
- II. *Gasp. BRUNNERI* Oratio Paneg. de Spiritu non extinguendo, ad locum 1. Thess. 5 : 19. p. 191. cui adjuncta est Historia Vitæ Ejus a *J. Casp. HULDRICO*. p. 225.
- III. *Ludov. TRONCHINI* Oratio Inauguralis de requisitis Doctoris Evang. in 2. Tim. 2 : 23 - 25. cui adjecta Descriptio Vitæ & Obitus atque Operum V. Cl. *Joh. Alphonsi TURRETTINI*. p. 232.
- IV. *Jacobi BRUCKERI* Dissertatio Epistolaris, de *STOICIS*, Subdolis Christianorum imitatoribus. p. 260.
- V. *Jac. Christoph. BECKII*, Specimen Observationum Historicarum. p. 296.
- VI. *Sam. KOENIGII* Meditationes de Mysterio Vaticiniorum Jesajæ & Michæ citat. Matthæi cap. I. & II. de Nativitate D. N. J. Christi. p. 310.
- VII. *Joh. Frid. STAPFERI* Dissertatio de Longanimitate Christi erga Ecclesiam Judaicam interitui proximam, ad illustrationem loci Matth. 12 : 20. p. 325.
- VIII. *Nova Literaria Helvetica*. p. 356.


TEMPE HELVETICA,

Dissertationes atque Observationes

THEOLOGICAS, PHILOLOGICAS,
CRITICAS, HISTORICAS,
EXHIBENS.

Tomi Tertii

Sectio Tertia.



TIGURI,
EX OFFICINA HEIDEGGERIANA.
M DCC XXXVIII.



*Amplissimo,
Plurimum Venerando atque
Celeberrimo*

**CHRISTOPHORO
MATTHÆO PFAFFIO,**

SERENISS. WIRTEMBERGIÆ DUCI
A CONSILIIS,
In Celeberrima

Academia Tubingenfi

S. S. Theologiæ Doctori & Professori
Primario & Universitatis Cancellario;

V I R O

*Ad pacem & tranquillitatem Ecclesiæ
stabiliendam, augendam, conservandam,*

Ad Rempublicam Literariam immorta-
libus Ingenij & Doctrinæ multivariæ do-
cumentis illustrandam, erudiendam,

Ad bonarum Literarum Cultores
juvandos, ornandos, promovendos,
Spectatissimo, Honoratissimo,

Sectionem Undecimam
TEMPE HELVETICÆ

Tanquam publicam Cultus sui

Tabellam,

Cum ardentissimo perpetuæ incolumitatis
Voto,

Suspendit,

Simulque Virum Magnificum
ad hanc Collectionem

Ex incomparabili Vastæ suæ Eruditionis
thesauro illustrandam

Rogat

J. GEORGIUS ALTMANNUS.



I.

JACOBI KOCHERI

V. D. M.

OBSERVATIO CRITICA

DE

EMPHASI SERMONIS

In terna interrogatione Christi ad Apostolum Petrum

Joh. XXI. v. 15. 16. 17. †

Οτε οὖν ἤρισθησαν, λέγει τῷ Σίμωνι Πέτρῳ ὁ Ἰησοῦς.
Σίμων Ἰωάννα, ἀγάπας με πλεον τούτων; λέγει αὐτῷ, Ναί
Κυριε, συ οἶδας ὅτι φίλω σε. λέγει αὐτῷ, Βοσκε τὰ ἄρνια
μου. λέγει αὐτῷ παλιν δεύτερον, Σίμων Ἰωάννα, ἀγάπας με;

B b 3

λέγει

† Constitueram apud me, cum traditam ab Amico Doctissimo
Dissertationem hanc primo legissem, spicilegium aliquod
adnectere; non quidem ea mente, ut elegantissimam ob-
servationem, quæ nova luce hunc locum perfundit, im-
pugnarem, sed ut quædam ad ternam Christi Petro fa-
ctam interrogationem, quæ maximo pondere non caret,

λεγει αὐτῷ, Ναί Κυριε, συ οἶδας ὅτι Φιλῶ σε. λεγει αὐτῷ, ποιμαίνε τὰ πρόβατα μου. λεγει αὐτῷ τὸ τρίτον, Σιμων Ιωαννα, φιλεῖς με; Ελυπηθῇ ὁ Πέτρος, ὅτι εἶπεν αὐτῷ τὸ τρίτον, Φιλεῖς με. Καὶ εἶπεν αὐτῷ, Κυριε, συ πάντα οἶδας. συ γινώσκεις ὅτι Φιλῶ σε. λεγει αὐτῷ ὁ Ἰησοῦς, Βούκω τὰ πρόβατα μου.

subjungerem; Cum autem à Celebert. *Lampio* jam maxima pars eorum, quæ dicenda videbantur, sit occupata, nolui talia adferre, quæ ex aliorum scrinijs transumpta videri possent. Peculiari vero observatione digna est, non tantum terna Christi interrogatio, sed etiam Petri responso. Occasionem ternæ Christi interrogationis ex Patribus omnium optime nobis exhibet *Cyrillus*, in qua facile acquiescimus. Terna igitur, inquit. confessione Petri ternæ denegationis delictum est evacuatum; dixit autem, pasce oves meas, Apostolatus ei renovans dignitatem, ne propter negationem, quæ humana infirmitate accidit, labefacta videretur. In prima interrogatione Christi observamus, quod Doctôr optimus Petrum interroget, *Simôn Iωνα, diligis me plus quam hi?* Huic interrogationi occasionem fecerat non tantum magnificum Petri promissum dicentis, se nunquam Christum abnegaturum, licet omnes reliqui discipuli ipsum abnegarent, sed etiam præsens factum Petri; cum enim audiret, Christum in ripa adstare, illico Petrus descendebat in mare, cum non expectare vellet cum reliquis, donec navis ad ripam appelleret, moræ omnis impatiens illico in aquam insiluit, reliquis in scapha manentibus; utrumque horum Domino occasionem fecit ad hanc interrogationem faciendam, *an diligis me plus quam hi?* Ex omnibus illis, quæ historia Evangelica nobis de Petro Apostolo tradit, patet, illum ingenio & natura fuisse fervida, prompta, veloci; & exinde etiam mira velocitate & promptitudine gladium stringebat ad servum Pontificis feriendum. Ex responsione autem ad ternam inter-

interrogationem facta videmus, quod Petrus tristi abnegatione magistri, sui nimiam confidentiam abjecerit, indeque ipsi sufficiebat responsione interiores animi sui motus omni candore & modestia prodere, qua fidem, amorem & sincerum in magistrum suum affectum in apricum produceret. Interpretes quidam in suis commentarijs ad hunc locum, solliciti inquisiverunt, an non quædam differentia ponenda esset inter ἀγαπᾶω & φιλέω; aliquam etiam sibi invenisse videbatur *Casaubonus*, quam autem *Lampius* merito tanquam nimis argutam atque subtilem habet, dicit enim, quod si inter voces, quibus *Johannes* usus, aliquid est discriminis ponendum, dici potest non absurde, *Joannem* in Christi interrogatione usum esse verbo ἀγαπᾶν semel atque iterum, ut significaret, Christum desiderasse in Petro amorem perfectum, qualis Deo debetur, nam in scripturis, quoties ferme amor Dei præcipitur, non φιλεῖν verbum usurpatur, & amor erga Deum & proximum in scriptura ἀγάπη, dilectio, dicitur, nam φιλία est amor. Petrus igitur, qui interrogatus bis per ἀγαπᾶν, semel per φιλεῖν respondens, videri queat conscius suæ infirmitatis, consulto consilio verbum aliquod Syriacum usurpasse, quod Græco φιλῶ magis respondet. Hoc equidem verum est, quod sacri scriptores sæpissime, imo fere semper utantur verbo ἀγαπᾶω, quoties de amore, quem Deo & Servatori nostro debemus, sermo est; nihilominus tamen etiam notandum, quod usus horum verborum sit promiscuus, ut recte observat *Dietric*: in *Antiquitatib. N. Test.* p. 20. Sicuti autem Latini non ubivis observant discrimen inter amare & diligere, sed promiscue ijs & indifferenter utuntur, ita nec in Græcica observatur lingua, inter ἀγαπᾶν & φιλεῖν, unde Christo interroganti, ἀγαπᾶς με πλείον τῶτων, respondet Petrus, Ναί κυριε, σὺ οἶδας ὅτι φιλῶ σε; cui demum ter amorem professo suas committit oves, ut sciamus, neminem idoneum esse Sacerdotio, nisi qui neglectis omnibus terrenis nil amet quam Christum. Extant tamen exempla, ubi φιλῶ occurrit in locis ubi de divi-

L E M M A.

Studium conferendi di&tionem sacrarum tabularum cum oratione Auctorum των ἱζω commendatur & vindicatur, §. I. & II. Tentatur idem in loco præscripto, cujus majestas generatim exponitur, §. III. Eidem singularis Orationis figura, & complexa vis tribuitur, §. IV. Eaque α. *satisfaciendi*, §. V. Ex qua παρερμηνεῖα Pontificiorum notatur, §. VI. β. *Stipulandi & adstipulandi*, §. VII. γ. *Obtestandi & adjurandi*, §. VIII. & IX. Exemplum geminum ex *Aristophane* adfertur. §. X. Reliquæ orationis virtutes per satyram quasi perstringuntur, §. XI.

*Lemmata, si quæris, eur sint adscripta, docebo;
Ut si malueris, Lemmata sola legas.*

§. I. Quum

no amore sermo est, & de Patre Cœlesti dicitur, Matth. X: 20. ὁ γὰρ πατήρ φιλεῖ τον υἱον; atque exinde facile videmus, quod non tantum de amore communi, quales inter Parentes & liberos. vel amicos familiares esse solet, sed etiam de dilectione divina accipiat. Eadem fere ratio est duorum verborum etiam in hac pericopa occurrentium βοσκω & ποιμαίνω; Primum *pascere* & *alere*, apud scriptores ubique notat, ut hoc adductis locis evincit Cl. *Schwarzius* in *Commentar. Ling. Grac. pag. 259.* Hoc autem *docere* & *pascere* ubique significat, ut A&tor. XX: 28. *Rarissime*, si de regibus sermo est, etiam *regere* significat, probante *Raphelio* in *Observat. ad N. Test. ex Polyb. p. 6.* & Cl. *Alberti* in *Observat. Philolog. ad Novum Foedus. p. 7.* Hoc vero peculiari attentione dignum, quod Salvator ad primam interrogationem & responsionem Petro curam committat των ἀρνιων, agnorum,

* * * * *

§. I.



Uum multa sunt, propter quæ in Sacro-
rum Voluminum reconditos sensus al-
tius hoc, quod vivimus, quam ante-
rioribus seculis penetratum esse, ex
vero prædicare liceat, tum id in pri-
mis eximium duco, quod hoc præci-
pue ævo sermonis, quo S. tabulæ exaratæ sunt, vir-
tutes, dotesque, prægnantes & reconditi sensus cura-
tius scrutati, atque etiam demonstrati sunt, quam an-
te hac factum fuerat. Atque ego quidem ita sentio,
scriptores sacros duce Spiritu Deo ita exarasse volu-
mina sua, instruendis omnibus seculis destinata, ut
ea perfectissima exemplaria Orationis jure merito ve-
neretur omnis, qui Christum profitetur, Orbis:
Quod duplici dote absolvitur, sublimitate rerum, &
concinna majestâte verborum, ita ut non modo con-

B b 5

tenta

ad secundam & tertiam vero τῶν προβατῶν, ovium; in
quibus haud dubie regulam habemus à Doctore Cœlesti,
quæ debeat esse ministrorum cura, primo quidem in il-
los, qui adhuc sunt fide imbecilla, tenera, ad primos
hactenus cognitionis & illuminationis gradus tantum pro-
gressa, & propter quam lacte tantum, non fortiori cibo,
ejusmodi agnellis prospiciendum est, & secundo demum,
in alios, qui jam ad numerum ovium ætate & doctrina
profectorum pertinent, qui cognitionis & illuminationis
majorem gradum sunt consecuti, ita ut in hoc Christi
Petro dato mandato tota prudentia regiminis Ecclesiastici
comprehendatur. Quanta autem vis lateat in hac terna
Domini nostri interrogatione, atque toties à Petro data
affirmatione, ex veterum scriptis Eruditiss. atque Amiciss.
KOCHERUS in hac observatione abunde declaravit.
J. G. Altm.

tenta eorum longissime omnem humanæ sapientiæ doctrinam antecellant, sed ut ipsa Oratio virtutes, quas in summis quibusvis Auctoribus miramur, exæquet, quin superet. Uti vero sublimis rerum dogmatumque majestas cuivis, qui sensum sui habet, ultro & prodit atque ingerit, ita alterum illud paulo altius est conditum, quodque quis non absque interiori Sermonis Originalis cognitione, & curata optimorum scriptorum lectione comparanda assequatur. Sunt viri alti adeo Spiritus, & divinæ fidei, ut sacer stylus præjudicatæ ipsis Auctoritatis sit, parum in eo laborandum censent, ut divinorum Auctorum oratio cum profanorum scriptorum dicendi ratione in concordiam redigatur, illorumque cum his consensus demonstretur; firmiter, nec abs re, tenent, volumina sacra convenientissimo ad scopum, quem præfixum habent, hoc est, perfectissimo stylo esse exarata, neque adeo ea cum humani ingenij monumentis conferenda, multo minus ad horum normam exigenda esse concludunt. Veneror virorum istorum præclaram fidem, & ipsorum sententiæ meam adjungere nullus abnucrem, nisi hominum quorundam, Christianæ civitati male volentium, perversa studia hanc, quam isti supervacuam æstimant, operam necessariam utique efficerent. Hi omnes, vel præcipuas saltem, ornatæ & suis numeris absolutæ Orationis virtutes sacris Oraculis non alio fine denegarunt, quam ut hoc nomine ea in contemptum adducerent, atque de divina eorum Auctoritate fideque detraherent. Et speciosum istud non minus atque periculosum eorum est consilium, minuendæ divinarum tabularum fidei, ut hodie maxime homines sunt, unice idoneum. Qua de causa consultum, quin necessarium omnino est, ut cœlestis veritatis Interpretes in id incumbant strenue, ut omnem vel speciem imperfectionis ab sacris monumentis abstineant, docendo

do, summas quasvis virtutes, quas in perfecta oratione Sermonis Magistri requirunt, ijs ita proprias esse, ut omnium, quæ sapientia claruerunt, seculorum iudicio & hac in parte præclare se tueantur.

§. II.

Huc accedit propior quoque consilij quod commendo ratio, eaque rei, de qua ago, insita. Placuit providentissimo Numini, cœlestem veritatem, qua salus humani generis continetur, lingua humana nobis patefacere, debuit ergo se accommodare legibus Orationis inter homines constitutis, quæ ut principiis quibusdam certis, humanæ menti congruentibus nitantur, regulas tamen speciales inde deductas nimium quantum ex arbitrio hominum vario & in secula mutabili trahere, nemo unus ignorat, qui aliquam Linguis & orationi impendit operam. Præcepta itaque Sermoni scripta in tantum ex rationibus necessarijs ac intrinsecis fluunt, ut maximam tamen partem a decretis sapientum & usu vulgi pendeant, quorum placita pro norma, ad quam perfectio Orationis exigatur, fixa sunt. Ex quo prono alveo consequitur, non modo neminem sacrorum voluminum interiorem intelligentiam sibi comparare posse, qui linguæ qua exarata sunt non aliquam facultatem habeat, sed id inprimis, neminem perfectissimam indolem sacræ dictionis, ejus concinnam structuram, sublimem vim, jucundam varietatem, reconditum sensum, nervos denique, veneres & virtutes omnes plene assecuturum, nisi qui probatissimorum, ejusdem maxime ævi & linguæ, scriptorum assidua & curata Læctione iudicium subegerit, & ad omnes venustates dotesque dictionis observandas ac dijudicandas formaverit. Istud quoties animo cogito, non me contineo, quin prædicem præclarorum Virorum sapiens consilium, & imitandam industriam, qui certatim

Classi-

Classicos veteris ævi, quorum stylus præjudicatæ per omnia secula authoritatis fuit, Authores, cum Classicis Sacris eo fine contulerunt, ut luculentis exemplis evincant, hos omnibus Orationis virtutibus, quas in illis miramur, esse locupletes, priores ut non assequantur modo, sed post se relinquant. Quæ laus cum nostro seculo fere priva sit, tum eam spartam magna cum nominis sui gloria nuper admodum exornavit *ANTONIUS BLACKWALLUS* Anglus, Vir divinis ac humanis litteris æque excultus, cujus *Classicos S. illustratos* latio donatos & proprijs Musis locupletatos debemus industriæ Doctissimi Viri *CHRISTOPHORI WOLLII*. Est iste liber elegans aliquod quasi Criticæ Sacræ Systema, & præceptis non minus quam exemplis locuples viam munit ad Sermonis divini dotes indagandas ac assequendas. Quantiscunque vero laudibus hujus & cæterorum, quos enumerare longum foret, studia digna existimem, fatendum tamen est, in elementis nos ac carceribus adhuc harere, nec spes est, ad aliquam perfectionem laborem perductum iri, nî pertinaci seculorum industria urgeatur, & felicibus nobiliorum ingeniorum studijs profligetur.

§. III.

Interea dum plena lux, cujus Splendorem spe præcipio, venturæ ætati exoritur, juvat bonis præsentibus frui, & animum præclaris monumentis optimorum virorum pascere, quibus hac quoque in parte res sacra & litteraria quotidie locupletatur. Sed dum horum divites musas veneror, nonnunquam tamen & meis, sint quamvis pauperes, indulgeo: frequens aliquem Oraculorum divinorum locum ab interpretibus vel neglectum, vel minus excultum, examini subicere, atque tentare soleo, num ex styli profani collatione cultior aliqua & significatior dictionis virtus ei tribui & vindicari queat: quod ipsum

sum & nunc agenti commodè se offert gravissimum illud Colloquium Jesum inter & Petrum habitum, a S. Johanne Evangelij sui Cap. ult. commat. 15. 16. 17. exhibitum, quod sub simplicibus verbis, & interrogationum responsionumque minime quæsito apparatu, fecundissimos sensus, & ingentia rerum pondera complectitur; *ἐστὶν αὖτ' ὁ ἰδιωτισμὸς * ἐνιοτε τοῦ κοσμοῦ παραπολυ ἐμφανιστικώτερον*: *Est quippe vulgaris Oratio exornatâ sæpe multo illustrior.* Judice *DIONYSIO LONGINO* περὶ ὕψους Sect. 27. Qui idem apte ad institutum nostrum Sect. 5. ita præcipit: *Τοῦτο γὰρ τὸ ὂντι μέγα, οὐ ποτὴν μὲν ἡ ἀναδεωρησις, δυσκόλος δὲ, μακρὸν δ' αὖ δύναλος ἡ καλεξαναησις, ἰσχυρὰ δὲ ἡ μνημὴ, καὶ δυσεξαλειπλος. ὅλως δὲ καλὰ νομιζέε ὕψη, καὶ αἰληθινὰ καὶ διαπαντός αἰρεσκονία, καὶ πασιν. ὅταν γὰρ τοῖς ἀπο διαφορῶν ἐπιηδευματων, βίων, ζήλων, ἡλικίων, λογῶν ἐν τι, καὶ ταῦτον αἶμα περὶ τῶν αὐτῶν ἀπασιν δοκῇ, τοῦτ' ἡ ἐξ ἀσυμφωνῶν ὡς κρεῖσσι καὶ συγκαταθεσις τὴν ἐπὶ τῷ θαυμάζομένῳ πίστιν ἰσχυρὰν λαμβάνει καὶ ἀναμφιλέκλον.* *Illud namque vere magnū, quod sumbinde cogitandum considerandumque nobis occurrit, quod vix, ac ne*

* *Ἰδιωτισμὸς* est is sermonis character, quem D. Paulus sibi tribuit, quando se *Ἰδιωτὴν τῷ λόγῳ* fatetur 2. Cor. XI: 6. Oratio nimirum vulgaris, nativa, simplex, rebus exprimendis respondens, qualis fere hominum privatorum, præceptis quæsita eloquentiæ non imbutorum esse solet: Opposita Orationi legibus artis adstrictæ, nimium exultæ, & curiose ornata, quæ intra naturæ terminos se coerceri non patitur, sed omnia vel in majus auget, vel nimium deprimit, qualis est plerorumque ex ijs, qui eloquentiam profitentur. Prius dicendi genus, non nisi sapientissimis probatum, ad laudem perfectæ eloquentiæ non assurgebat, probabat enim populus Oratores, qui quicquid vellent, invita veritate dicendo efficere valerent: hinc frequenter Oratores veritatis fidem sibi conciliaturū hunc quasi Orationis defectum ita excusare solent, ut ap-

ac ne vix quidem animo excidere potest, sed constanti, firma ac indelebili memoria retinetur. Denique præclaram illam demum granditatem & veram esse ducito, quæ per omnia & omnibus placeat: Quam enim in Oratione aliqua, quimoribus, vitæ ratione, institutis studiisque & ætatibus differunt, idem simul de iisdem sentiunt omnes, tum a dissidentibus alias & discrepantibus veluti profectum iudicium & approbatio unanimis ei, quod habetur in admiratione, fidem certam & minime dubiam acquirit. Ad hanc normam si exigatur iste, quem tracto locus, nemo Lector perspicax, & ad rei gestæ ordinem attentus, eum non gravem & sublimem dicere ausus fuerit: Præsentem tibi siste animo Servatorem O. M. ab intimæ admissionis discipulo, qui fidem suam sæpe antea, & nuper demum sancte obligaverat, in vitæ discrimine constitutum, & Capitis causam dicere iustum, non relictum modo, sed negatum ejuratumque, nihilominus tamen hunc ipsum Dominum, vitæ æternæ redditum, venia decreta Discipulum poenitentem, blandis non minus, quam gravissimis verbis compellatum,

pareat se eum in laude ponere, & de eo gloriari. Eo sensu *XENOPHON* de Venatione p. 787. Ἰδιωτὴν se profitetur: locum ad Paulinum cit. notavit *RAPHELIUS* Annotatt. *Xenophont.* p. 242. Addo alium, hæud minus luculentum ex *DIONIS* Chrysostomi λόγῳ Ολυμπικῷ p. 134. edit. Aldinæ. ὁμῶς δὲ προλεγω ὑμῖν, ὅτι ἐσπουδακατέ ἀνδρὸς ἀκουσαί - - μαθητὴν οὐδενὰ ἔχοντος, τεχνὴν δὲ ἢ ἐπιστήμην οὐδεμίαν ὑπὸ σίχνουμένου σχεδόν, ἢ τῶν σεμνῶν, ἢ τῶν ἐλαττωδῶν, ἢ τῆς μαντικῆς, ἢ τῆς σοφιστικῆς, αἷμα δὲ ῥητορικὴν τινὰ ἢ κολακευτικὴν δύναμιν, ἢ δὲ δεινὸν συγγραφεῖν. & aliquibus interjectis. χρὴ δὲ εἰαν ὑμᾶς ἐν βραχεὶ ὅτι ἂν ἐπιήμοι τοῦτω ἐπεῖθαι, καὶ μὴ ἀγανακτεῖν εἰαν φαίνωμαι πλανώμενος, ὥσπερ ἀμελεῖ καὶ τὸν αἶθρον (χρόνον) ἐξηκα αἰλωμένος, αἶμα συγγνωμὴν ἔχειν αἰτε ἀκκουσίᾳς ἀνδρὸς Ἰδιώτου καὶ ἀδόλεσχου. Reliqua lege penes authorem, est enim locus prolixior.

latum, in munus, quo dignius in his terris non datur, restituere: Præsentem tibi siste Legatum Domini, non fidum modo, sed zelo pro gloria ejus ardentem, eo prolabi, ut ipsum, quem Deum noverat, & professus fuerat, ejuraret, & atroci adeo crimine se obstringere, ut videri potuerit omnem emendationis & reconciliandæ gratiæ spem decollasse, hunc ipsum tamen conscientia facti attonitum, pudore suffusum, sincera poenitentia ductum, in ordinem vel juratum redire, & blanda satisfactione præstita non veniam modo gratuitam consequi, sed prolixa Domini gratia florere, & denuo jurata fide domui præfici: Cogita tenerrimorum affectuum multiplicem complexum, blandam neque minus vehementem vim, quæ omnia tanquam in tabula vivis coloribus expressa Colloquium hoc sistit, & fatebere, grandem Orationem esse.

§. IV.

Sunt ista sublimia, nullius non animum afficere idonea, magis tamen in rei gestæ magnitudine ordineque, quam in verborum arte sita, cuivis aperta, indice non indigentia. At alia quædam virtus, minus obvia, in hoc loco residet, non nisi ex verborum structura eruenda, ab Interpretibus, quos evolvi, non observata, figura nimirum Orationis vehemens, ad affectus ciendos, & mentem intime commovendam unice apta. *Continet, si quid argumentis valeo, sermo sacer gravem obtestationem Servatoris, quæ sub amoris titulo à Petro satisfactionem, & emendatam fidelitatem in obeundo amplissimo munere, cui denuo inauguratur, sub juramenti fide stipulatur; Quibus is, satisfactione præstita, jurando solemni adstipulatur. Hoc si evicero, operæ fecisse pretium mihi videbor. Habent Hebræi, Græci, Romani, cultissimæ quævis gentes, in omnibus publicis ac privatis negotiis, conceptas quasdam formulas*

mulas, & solemnia verba, quæ, cum virtutem suam ex usu solemnî, civili, sive religioso potius, quam ex nativâ vocum vi trahant, ampliorem, quam pro verborum significatione, potestatem habent, & brevi ambitu maxima rerum pondera exprimunt: Istiusmodi sunt satisfaciendi, stipulandi, obtestandi, iurandi formulæ, negotijs hominum, quibus maxima fides & religio in societate adhibetur, transigendis propriæ. Constant autem plerumque formulæ istæ interrogatione emphatica, ad quam ipsis interrogationis verbis repetitis solet respondere interrogatus, cumque hanc Orationis formam referat sermo noster, & omnis rei ordo suadeat, formularum, quas dixi, contextam quasi & colligatam vim eundem in se continere verisimillimum habeo: Quæ ut singulatim pertexam adnitar.

§. V.

Insunt loco nostro satis indicia, deinceps curatius evolvenda, quæ suadent, Servatorem interrogantem respexisse ad tristem illum Petri lapsum, quo ipsum Dominum suum ejuraverat, quod observatum sponte nos eo ducit, ut suspicemur, Sermonem Sacrum satisfactionem à Petro, Christo præeunte, præstitam continere: Istud, quod rei gestæ ratio verisimile reddit, ex solemnî satisfactionis formula, quam verba exhibent, porro confirmatur, ut a certitudine parum absit. Satisfaciendi apud Romanos hic erat plerumque legitimus modus. Læsus verbis conceptis de injuria sibi illata interrogabat reum, num eam confessus, & pœnitentia ductus, satisfacere velit? Atque hac ratione satisfactionem reo deferebat, qui non nudis modo verbis, sed jurejurando in re majoris momenti interposito, eam præstabat.

Ita Alcumena probri ab Amphitruone viro suo
infi-

inſimulata poſtulat apud *PLAUTUM Amphitr.*
Act. 3. Sc. 2.

- - *Satisfaciat mihi, atque adjuret inſuper,
Nolle eſſe dicta, qua in me inſontem protulit.*

Jupiter vero, alter ille Amphitruo, ita ei ſatisfacit:
*Per dextram tuam te; Alcumena oro, obſecro;
da mihi hanc veniam, ignoſce, irata ne ſies.*

& juſjurandum ſubjungit.

- - *Arbitratu tuo juſjurandum dabo,
me meam pudicam eſſe uxorem arbitrarier;
id ego ſi fallo - - -*

Qua ſatisfactione Alcmena contenta redit cum eo in
gratiam;

*Quin veni, quando vis intro: ſaxo haud quicquam ſit
moræ;*

quando exjuraſti, te mihi hæc dixiſſe per jocum.

Quamquam veto ut plurimum in ſatisfaciendi formula expreſſa injuriæ mentio fieret; haud tamen inſolitum erat in quibusdam caſibus, quando honori rei conſulendum erat; obliquis verbis eam concipere; ut non de injuria, ſed de emendato animo interrogaret læſus; quod in ſermone ſacro obtinere arbitror. Erat ſatisfaciendi maxima neceſſitas, poterat Petrus ſibimet ipſi, poterat cæteris Apoſtolis, poterat omnibus omnino fidelibus videri atroci crimine dignitate Legati Jeſu Chriſti prorsus excidiſſe, poterat iſta dubitatio turbas dare Evangelio peſtiferas, Civitati- que Chriſti anæperniciſas; intererat itaque Petri, intererat Eccleſiæ, intererat Principis Eccleſiæ Chriſti ipſius, ipſum quondam Apoſtolum poſtliminio priſtino muneri ſolemniter reſtitui; idque ſeria pœnitentia & emendato mentis propoſito à Domino conſe- cutus erat, ut gregi electo Paſtor denuo præficere:

tur, non tamen sine prævia satisfactione, quæ offensionem aboleret, & fidem fidelibus ipsique Petro certam faceret, ad officium redeuntem, veniam eorum, quæ deliquerat, amplissimam consecutum esse. At nolebat Servator optimus injuriam condonata dignis coloribus pingere, nolebat ancipitem Discipuli animum commissa exprobrando prorsum de statu deicere, quin potius, qua est facilitate & immensa gratia, blandis ex opposito traductis verbis, ita lapsum in memoriam ei revocat, ut poenituisse laudet, eoque fortius ad officium reducat; Satisfactio aliquis verbis per definitionem ex opposito ita concipitur, ut reo parceret, neque tamen minus offensionem tolleretur, in quo dicendi modo latet virtus bonis Auctoribus non neglecta. Ejuraverat Petrus Dominum, quem unice profiteri debuerat, peccatum ex defectu amoris erat, neque ergo congruentius de injuria satisfacere, nec certius immutatæ mentis fidem facere poterat, quam Sacramento dicto, se utique Dominum tenerrimo amore prosequi, quem, cum præ reliquis Discipulis constantem ostentaverit, professus, *ἐὶ καὶ πάντες σκανδαλισθῶσιν αἰ ἐν σοὶ, ἐγὼ οὐδέποτε σκανδαλισθῶμαι, & κ' ἂν δεῖ με συν σοὶ ἀποθάνειν, οὐ μὴ σε ἀπαρνησομαι.* Matth. XXVI. v. 33. 35. Miser tamen turpiter fefellerit: Huc dubio procul Jesus respicit, dum interrogationem ex comparatione exaggerat, non simpliciter quærens, Simon, fili Jonæ, num amas me? Sed, num plus quam isti me amas? plus quam cæteri Discipuli, * quos amore mei vince-

re,

* Ita enim verba *πλεῖον τούτων*, quorum ambiguitatem *Vulgata* quoque *Versio* servavit, de *Subjektivis* potius, quæ amant, quam de *Objectivis*, quæ amantur, explicanda esse, concinnitas sensus, emphasis, & omnis rei ratio persuadent, consentientibus *Syro* & eruditissimo quoque *Interpretum*. Vid. *LAMPE Comment. in b. l.*

re, fidem mihi feceras, quam cum turpiter destitueris, num veniam consecutus ita ad officium redis, ut memor arctioris vinculi, quo ob gratuitam veniam mihi obligaris, intensiori etiam, quam cæteri, amore me complectaris. Non poterant non hæc penitus commovere primum in affectus Petri animum, cogitantis, quanto se scelere obstrinxerit, abnegando Dominum Optimum, Maximum, Clementissimum quoque, qui pœnitenti, nec dum præ pudore orare auso, veniam gratuitam, dudum decretam, non tam concedat, quam sponte offerat, qui blandis adeo verbis, amicitiam unice spirantibus satisfactionem exigat, necessariam eam quidem, dulcissimam tamen, quod conscientiam sauciam penitus sanaret; promte itaque satisfacit solemni professione, utique se Dominum diligere, quam ut sinceram esse doceat, ex intimo cordis affectu prolatam, ad ipsum eum emendati animi sui conscium provocat, pudibundus tamen, jactantia pristina in modestiam versa, non audet cæterorum amoris suum præferre, abunde ei sufficiebat, quod hanc consecutus esset immeritam gratiam, amore Servatoris sui non excidisse; Jesus quoque in simplici declaratione acquiescebat, ut comparisonem posthac omitteret. Quum tamen de re maximi momenti ageretur, & commissum facinus adeo turpe esset, ut merito dubitare licuerit, num Petri promissis posthac ulla fides tuto adhiberi possit, altera atque tertia vice eandem interrogationem Jesus repetit, cui Apostolus uti prius satisfacit, quin tertium concepto jurejurando Dominum omniscium, consequenter Deum testatus; qua sanctissima asseveratione non veniam modo delicti tacitam, sed ejus declarationem publicam, restitutione in amplissimum munus demonstratam, obtinet.

§. VI.

Hujus, quam commendavi sententiæ, si Lectori
C c 2 meo

meo fidem feci, mirabitur profecto, frontem adeo de rebus periisse, ut majestatis Pontificalis Patroni ad hunc inter primos locum provocare audeant, quo D. Petro dignitatem præ fratribus eximiam, invito ipso, adstruant, eumque his ipsis verbis Ecclesiæ summum Præsidem constitutum esse evincant: istud dum moliantur luculento nobis exemplo sunt, homines, partium studiis præcipites, noxiis argumentis quam nullis, ad causam nullo tubicine nixam, quam tamen obtinere e re ipsorum est, ornandam uti malle. Ita solent, qui præjudicata ratione utuntur, ijs armis causam præpropere susceptam defendere, quibus ea jugulatur certissime; quo ipso speræ veritatis pœnas luunt, dum fidem suam non ex Dei Oraculis hauriunt, sed doctrinæ præcipitis aliunde acceptæ rationes ex iis firmare, cumque id minus valent, cum iis saltem in aliquam consensus speciem redigere nituntur, ut ne cum veritate cœlitus patefacta fronte adversa pugnare videatur. Nam quid, quæso tuam fidem Lector! Sermoni S. inest, quod ulla cum specie causam eorum juvare aptum sit? quid, quod ei non sit adversum; Constituitur S. Petrus Pastor gregis Domini, quid in eo eximij occurrit, quod ipsi cum cæteris Apostolis, fratribus suis, non fuerit commune? Pastorum titulo omnes, cujuscunque gradus & ordinis Ecclesiæ Doctores atque Ministros, in divinis literis indiscriminatim venire, apertius est, quam ut negari debeat; dum ergo Petrus Pastor constituitur, nihil inde evincitur, quod ipsum cæterorum numero eximat, & in altiori gradu collocet; atque dum Coetui selecto generatim Pastor datur, non restricto ad gregem aliquem particularem munere, ut eo supra ordinarios Ecclesiæ Ministros evehitur, ita in numero Apostolorum manet, quorum id commune munus erat, ut Civitatis Christianæ universæ commodis, non partitis provinciis, invigilarent. Sed, in-

quiunt,

quiun', Petrus tamen solus hic a Domino sanctifica-
to gregi præficitur; in promptu causa est, debebat
transcribi in ordinem fratrum, ex quo ejectus videri
poterat, cæteris iterata inauguratione non indigen-
tibus; nihil est quod dominium, nihil quod non
Ministerium inferat; ποιμαίνει τα πρόβατα μου, ait Do-
minus, oves alienas pasce, non proprias, meas, non
tuas. Magnifice secum actum putabat Vir ex lapsu
& pœnitentia humilis, si pristinum locum tueri, &
in Collegium fratrum æquo jure cooptari denuo me-
ruisset; adeo non ex verbis Servatoris altiora reliquis
sentiendi materiam captabat, ut potius in memoriam
revocata tristi abnegatione dejectum se sentiens, &
in tristitiam prolapsus, erigi necesse habuerit. Ver-
bo ut absolvam, qui id unum cogitaverit, oratio-
nem esse satisfactoriam, is nunquam in animum in-
ducere poterit, ut credat, ea jus concessum esse D.
Petro, præ omnibus omnino hominibus eximium,
& potestatis divinæ æmulum, quale Romanæ fidei
Vindices hic tuentur, invitis priscae Ecclesiæ Docto-
ribus, invito *J. O. LAUNO J. O.** fidei ipsorum So-
cio, sed præ multis erudito, & quæ major virtus
est, ingenuo.

§. VII.

Non tamen Servator, dum Petri amorem explo-
rat, ita de injuria præterita fuit sollicitus, ut non ad
negotium præsens, quod agebatur, vel primario re-
spexerit, atque Apostolum ad fidelitatem in obeun-
do munere, & intensam curam concrediti gregis va-
lide obligare intenderit; qua ratione interrogatio

C c 3

Chri-

* Vide eum in *Epistolis*, p. 90. 637. 703. seqq. edit. Canta-
brig. fol. 1689. & passim alibi. Auctores cæteros, qui
veritatem in hoc loco, ultra quam in causa manifesta ne-
cessum fuit, vindicarunt, laudatos vide à Cel. *PFAFFIO*
de Originibus Juris Ecclesiast. p. 33. seq.

Christi stipulandi & obsecrandi, responsio Petri, iurejurando firmatæ adstipulationis vim habet: Est autem *Stipulatio*, verborum conceptio, ad quam quis congrue interrogatus respondit, velut *spondes? spondeo; dabis? dabo; promittis? promitto; fidei tuæ erit? fidei meæ erit.* Desinente **PAULO** Lib. II, *Sententiarum* Tit. 3. adde *Institut. Tit. de Verbor. Obligat. & Commentatores ad eundem.* ita apud *Plautum* in *Bacchid. Act. IV. Sc. 3.*

CH. *Roga hunc tu, tu promitte huic. N. Promitto.*
CH. *Roga,*

CL. *Ducentos Nummos aureos Philippos probos*
Dabin? CH. Dabuntur, inquam, responde,
N. Dabo.

Idem in Captivis Act. IV. Sc. I.

ER. *Sponden' tu istud? HE. Spondeo.*

Has dum formulas Romanas in exemplum excito, non sum adeo nullius iudicii, ut Jesum ex Jure Romano cum Simone egisse mihi persuadeam; hoc solum ostendere intendo, missa solemnitate rituum & verborum, apud varias gentes varia, quæ ex Jure quoque Romano Leoniana constitutione postea sublata est, sensum & consonantem intellectum, interrogatione & responsione ab utraque parte declaratum, substantiam stipulationis absolvere; Cumque ex jure naturali promissa obligationem constituent, Hebræos maxime, sanctissimo & divino jure usos, hac verborum forma solemnem obligationem contraxisse. Compareret itaque hic optimus *Servator*, phrasi juris Romani, *Reus stipulandi, Petrus Reus promittendi*: Ille, sub amoris titulo stipulatur omnes, quæ inde fluunt virtutes in Pastore necessarias, diligentem operam, curam, fidelitatem in gubernando grege. Est quippe amor Domini virtus in bono Pastore primaria, conditio sine qua nemo legitime gregem regere possit;

possit : Amantis is character est, ut ejus quem diligit commoda omni nisu promovere studeat ; cumque in salute gregis gloriam suam ponat Christus, is demum, qui ipsum diligit, scopo huic digne profecundo erit idoneus, is demum saluti gregis unice studebit, nullo labore, molestia, periculis, persecutionibus nullis abstinere se patietur, quo minus cum saluum sospitemque servet, tueatur, augeat. Arduo Pastoris gregis, quem suo sanguine Dominus sibi redemit, muneri ex propria virtute nemo sufficit ; is demum, qui amicitia, amore paranda, ei jungitur, donis viribusque, quarum in obeundo munere usus est, large instruitur, is demum gregi regendo à Christo præficitur. Hac amoris nota qui caret, ineprus æque ac injussus sanctissimo muneri se ingerit, atque in jura Dei involat, sub specioso Pastoris titulo lupum agit, spe mercedis adductus sibi studet, nec gregem ultra curat, quam rationibus suis conducere sibi persuadet. Petrus itaque, dum Jesum de amore suo certum esse jubet, rogationi ipsius adstipulatur, fidem & summam, quæ quidem in hominem cadit, sancti cœtus curam promittit, atque ad omnia officia, quæ cum amore Christi conjuncta sunt, & ex eo consequuntur, sollicitè præstanda semet obligat. Sed hæc, cum ab alijs, tum maxime à Cel. LAMPE, in luculento, quo *Johannis Evangelium* illustravit, *Commentario* ad h. l. pro rei dignitate pertractata, opera mea non indigent. At quorsum isthæc ? inquires : paucis docebo, ea observata maximum pondus orationi addere. Poterat Christus de mente Petri persuasissimus, omis- sa exploratione, munus pristinum ei reddere, sed malebat ex pacto cum ipso agere ; volebat, ut de amore suo magis ex propriæ conscientiæ sensu, quam ex Domini sui testimonio certus esset ; volebat, ut in se descenderet, atque amoris infirmitate deprehensa, ei continuo alendo & perficiendo studeret ; volebat

fidem ejus eo validius obstringere. Jesus gratiose agit cum Discipulo, jubere poterat, sed rogare mavult, spontaneam obedientiam imponit, stipulatur officium, jam ante debitum, eo fine, ut vinculum eo fiat arctius blandiusque, quo lubentius homo eo se ipse obstrinxit. Hac itaque verborum solemnitate obligatio maxima imposita fuit Apostolo; *Nam verbis obligatio contrahitur, ex interrogatione & responso, cum quid dari fierive verbis stipulemur; ait Cajus in L. 1. §. verbis ff. de Oblig. & Act.* Quam non ad fidem servandam stimulare mentem Petri cogitatio debuit, se ad stipulationem promissi reum factum esse, & ex pacto teneri, quod præmia amplissima Pastori fido, pœnas atroces infido distet; non poterat non continuo animum ejus subire sententia, non deo muneris, quod deliberato consilio, sponte mea in me suscepi,

§. VIII.

Non tamen ijs, quæ hætenus diximus, omne Orationis S. pondus absolvitur, eadem illa formula, quam satisfactionis & stipulationis esse ostendi, obtestationem quoque adjurationemque gravissimam continet, hancque eximiam dictionis vim ab interpretibus neglectam huic loco vindicare operæ pretium duxi. *Obtestatio dicitur, quando cum adjurantes, quem rogamus, oramus per eas res, propter quas rogamus, deficiente Donato in Terent. Andr. Act. 1. Sc. 5.* Solebant veteres rem gravem difficilemque à quoquam oraturi, vel valide ad officium præstandum hortaturi, cum obtestari, & Sacramento rogare. Testabantur ea fini Deos, homines, fidem x. r. l. quicquid unquam sanctum, grave, dilectum, gratum erat, quicquid movere, & ad fidem servandam homines obligare posse credebant. Exempla non dabo, dabit autem ipso horreo Vir Litteris quam infaustis honoribus illustrior Barnabas Brissonus in eruditissimo de formulis sollemnibus Populi Romani verbis Commentario, Lib. VIII. quem

quem alias quoque ad locupletandam hujus nostræ tractationis pauperiem a B. L. adhiberi velim. Satis erit, ad rem præsentem notasse, veteres frequenter etiam amorem, quo vel ipsi complectebantur alterum, cum quo res erat, vel quo hunc in ipsos ferri par erat, allegare consuevisse: ita apud **TERENTIUM** in *Andr. Act. II. Sc. 1. Charinus*;

- - *Nunc te per amicitiam & per amorem obsecro.*
 & *ibid. Act. IV. Sc. 2. Ancilla ad Pamphilum*:
orare jussit, si se ames hera, jam ut ad sese venias.
 apud *Aristophanem in Pace v. 118, puella ad Trigeum*
Patrem:

- - *ἐπ' ὃ παῖς ὅτι φίλεις με.*

Dic, genitor, si quid amas me.

curatius apud *Terentium in Andr. Act. I. Sc. 5. Chrysis.*
 Quod ego te per hanc dextram oro, & ingenium tuum
 per tuam fidem, perque hujus solitudinem
 te obtestor, ne abs te hanc segreges, nec deseras.
Si te in germani fratris dilexi loco,
sive hac te solum semper fecit maximi,
sen tibi morigera fuit in rebus omnibus.
 Te isti virum do, amicum, tutorem, patrem.
 bona nostræ hæc tibi committo, & tuæ mando
 fidei.

&, ne in re obvia testimonia accumulæ, fuisse hanc obtestandi formulam Hebræis quoque solemnem docet locus *1. Sam. XX. v. 17.* in quo Jonathan Davidem per amorem obtestatur. *יוסף יהונתן* quorum verborum emphasin, ab Interpretibus fere neglectam, curate expressit **R. LEVI GERSONIDES**, qui postquam ad præcedentia notasset: *הנה*

ברת יהונתן גם כן ברית עם בית דוד ר"ל שאין כריתו עם
 דוד לכך אבל עם בית דוד בכללם לשמורם מהרע לפי
 היכולת וקלל יהונתן עצמו אם יעבור על זה הברית לבגוד
 : *ecce pepigit Jonathan cum Davidis quoque*
familia fœdus, videlicet ne David solus, sed omnis simul ip-
sius familia eo contineretur, ad ipsos a malo tutandos pro vi-
rili. Et imprecatus est sibimetipsi Jonathan, si transgrede-
retur fœdus, perfide cum Davide aut familia ejus agendo,
dum dixit: Requirit Jehova e manu inimicorum Da-
vidis. Comma citatum deinde sequentem in modum
 והוסיף גם כן יהונתן להשביע את דוד ברך
 שיהיה ברית שלום ביניהם מצד החק אהבתו אותו כי אהבת
 Porro Jonathan sacramento rogavit Davidem,
 quo fœdus inter ipsos perfectum foret, ratione vehementis er-
 ga ipsum amoris, ex animo quippe diligebat ipsum. paria fa-
 cit KIMCHI ad h. l. חוסיף להשביעו בכח האהבה שהיה
 ; *præterea obtestatus est ipsum Jonathan, per vim*
amoris, quo ipsum complectebatur. Obtestatur itaque Jo-
nathan Davidem per amorem, quo vel ipse in hunc
ferebatur, quod simplicius & verius est, vel quo
David Jonathanem prosequeretur, uti Alexandrini in-
tellexisse videntur, qui amorem reciprocum expresse-
runt, quemadmodum priora quoque verba non de
Jonathane Davidem obtestante, sed ipso illi juramen-
tum præstante, at male, transtulerunt. Καὶ προσέειπε
ἐπὶ Ἰωνάθαν ὁμῶσαι τῷ Δαυὶδ, ὅτι ἠγάπησεν ψυχὴν ἀγαπῶντος
αὐτόν. Utrum sensum præferas ad rem præsentem pe-
rinde est, sufficit inde patere, obtestationem per amorem
 Hebræis consuetam fuisse ; Eadem ratione Servator
 O. M. Petro illustre Legati munus commissurus, &
 Coetum fidelem ejus curæ mandaturus, ipsum obte-
 statur per id, quod sanctissimum & dulcissimum
 communionis cum ipso est vinculum, per amorem,
 quo is jure merito intensissimo complecti debebat
 Dominum, clementem & facilem adeo, ut disci-
 pulum

pulum alienatum sanctissimo amore præoccupaverit ; eaque obtestatio tanto est gravior, quod is ipse amor sit conditio & qualitas, in Pastore gregis Jehovæ requisita, sine qua ad munus prorsus ineptus est, quod modo monuisse sufficiat. Neque quemquam moretur, quod non expressa per amorem formulâ, sed simplici interrogatione, num amas me ? obtestatio concepta sit, ita enim frequenter juramentum deferri solebat. POLLUX in Onomastico L. VIII. c. 9. n. 86. Erat & quædam Thesmothetarum discussio (ἀνακρίσις) appellata, num scil. ex utroque Parente Athenienses sint a tertia usque generatione ? κ. τ. λ. ἐπηρώτα δὲ ἡ βουλὴ, ὡμνυόν δὲ οἱ τοὶ πρὸς τὴ βασιλείῃ σοῶ, interrogabat autem Senatus, hi vero jurabant apud porticum regiam, quæ est lapidea, se leges observaturos &c. A. GELLIUS, Censor, inquit, agebat de uxoribus solenne jusjurandum. Verba ita erant concepta ; & tu ex animi tui sententia uxorem habes ?

Verborum adeo Christi sensus commode sic exprimitur : per cum, quem mihi debes, amorem te obtestor, ut gregem meum pascas, uti hoc amore dignum est. Vel etiam sic : Si me amas, pascere gregem meum, ut servum amantem Heri condecet.

§. IX.

D. Petrus sinceri amoris sibi conscius sancte affirmat, Ναὶ Κυρίε. Quæ particula asseverantis, promittentis, & promissis stantis est, adeoque solitaria jam maximam vim habet ; persuasus tamen, Domino intimos cordis sui recessus patere, ad ipsum affectus sui infucati testem confidenter provocat, eoque ipso Judice dignus habetur, cui cura Ecclesiæ denuo demandetur. Quo tamen rei momentum diligentius pensitet, quoque ad fidem datam intemerate servandam validius adigatur, ut etiam circumstantes rei gestæ testes, & dehinc coetus ipsi concreditus, de ejus emendatione, & restitutione in pristinum munus certissimi

tissimi forent, Servator altera atque tertia vice obtestationem repetit, & Petrus quidem obtestanti verba sua reddit; *vox mea facta tua est*. Attamen vehementissimorum affectuum pugna agitatus, ejurationis prioris memor, & metuens, ne sinceritati suæ diffusus eandem interrogationem denuo repetat, solemni nunc demum jurejurando fidem datam roborat, invocans Dominum, quem omniscium profitetur, Testem & Vindicem veritatis. Solemne id jusjurandum appello, quod ex Hebræorum quoque doctrina tale sit. Jure Consulti Judæi, varijs licet constitutionibus in juramenti religionem haud parum sint injurij, præclaro tamen Canone decreverunt: Asseverationes, allegato aliquo ex attributis Divinæ Majestati privis confirmatas, juramentis per nomen Dei *τρεῖς ἁγιστάριον*, quod ipsis, ut decet, sollemnissimum jusjurandum est, æquipollere. Ita docent in Codice *SCHEVUOTH. IV. 13.* מִשְׁבִּיעַ אֲנִי עֲלֵיכֶם בְּאֵלֶיךָ דִּלְתָּ בְּיוֹד ה' בִּשְׂרֵי בְּצַבֹּאוֹת כַּחֲנוּן וְרוּחַם בְּאֶרֶץ אֲפִים בְּרַב רָחוּם וְכִמִּי שְׁשֻׁמוֹ חֲנוּן כִּבֵּל לִשׁוֹן הָרִי אֱלֹהֵי חַיִּיבִין; Si quis dixerit; *Adjuro vos per Aleph, Daleth, per Jod, He, per omnipotentem, per Zebaoth, per gratiosum & misericordem, per longanimum aut per multum beneficium, aut per quacunque (Dei) cognomina: tum ecce isti sunt rei.* Quem Canonem paulo dilucidius, ut solet, exprimit *MAIMONIDES Hilcoth Schevuoth. II. 2.* אֶחָד חֲנֻשָּׁבֶּעַ אוֹ שֶׁהִשְׁבִּיעוּ אַחֵר בְּשֵׁם הַמִּיּוֹחַד אוֹ בְּאַחַד מִן הַחֲנוּיִן כִּגוֹן שֶׁנִּשְׁבַּע בְּמִי שְׁשֻׁמוֹ חֲנוּן וְכִמִּי שְׁשֻׁמוֹ רָחוּם וְכִמִּי שְׁשֻׁמוֹ אֶרֶץ אֲפִים וְכִיּוֹצֵא בָהֶן כִּבֵּל לִשׁוֹן הָרִי זוֹ; *Qui jurat, aut quem alius adjurat per nomen proprium (Jehova) aut per aliquid ex cognominibus, v. g. qui jurat per eum, qui vocatur benignus, aut misericors, aut longanimis, &c. in quacunque lingua juret, ecce hoc est jusjurandum perfectum.* Ea itaque mente Petrus Dominum omniscium profitetur, ut doceat, id se agere, ut sanctissima juramenti religione fidem suam obliget, neque

que alium censerī velle, quam qui solemni ritu, summo Numine in partes vocatō, amorem, curam, & fidelitatem summam in munere demandato promiserit, quippe probe sibi sit conscius, quas quantasque pœnas in caput suum devocet, si datam fidem falleret. Qua ratione Christianis deinceps solemne fuit *per Christum* jurare, quod de Militibus purioribus sacris addictis testatur *VEGETIUS de Re Militari* L. II. c. 5. Perpende Lector, & agnosce mecum affectum in Petro vehementem vim, animum pudore, pœnitentia, tristitia, gratitudine, gaudio & quibus non moribus agitatū, his tamen prævalentibus, & in tranquillū amorem desinentibus, quem jurejurando testatur, quo nullum vinculum ad adstringendam fidem Deus arctius esse voluit. Ut enim Sacramentum temere dictū impiam actionem & orationem facit, ita illud ipsum in causa gravi, certo fine, sancto mentis proposito adhibitum sublime est, movet, flectit, persuadet; ex vero judicat *LONGINUS*, iterum mihi in partes vocandus, *περι ὕψους* Sect. 14. *ἐστὶ δ' οὐ το ὁπωσούν τινα ὁμοσαι μέγα, το δε που, καὶ πῶς, καὶ ἐφ' ὧν καιρῶν, καὶ τίνος ἐνεκα.* Jurare quomodo-
docunque magnum non est, sed jurare ubi, quomodo, quibus convenit occasionibus, & certo fine, utique sublime est. Magnum est in Petro, jurare in causa tanti momenti, in qua concordia, ædificatio, salus non unius modo hominis, sed cœtus totius a Christo redempti versabatur; magnum est ei fidem suam obligare, cujus causa agitur, qui jus habet Sacramento rogandi, qui, cum sit omniscius, novit mentis sanctæ propositum, qui Testis invocari ipse potest; pulcrum est, atrocis criminis noxium emendatæ sententiæ sacrum testimonium perhibere; sublime est, jurejurando vigilias, labores, mentis corporisque vires mancipare muneri, quo excelsius digniusque inter mortales cogitari nullum queat.

§. X.

Causa perorata videri poterat, sed metuo, ne parum exercitati in eruendis sermonis dotibus accusent sententiam, quæ varias dictionis virtutes ex plurium Auctorum phrasibus particulatim collectas, uni alicui loco eique simplici inesse, affirmet potius, quam argumentis evincat: istos velim perpendere, hunc quem Sermoni S. tribuimus sensum unicum, ita fecundum & abundantem esse, ut pluribus formulis æquipolleat; simplicibus phrasibus contineri, sed quarum diffusa vis, non nisi divisa Oratione singulatim exhauriri possit. Quo sapientior, doctiorque inter homines quis existit, eo dictis scriptisque ipsius ampliore significationem subesse recte præsumimus, quidni divinis Oraculis hunc honorem habeamus, ut ea, ultra quam humanum ingenium assequi plerumque valeat, putemus esse emphatica. Cœterum dubijs satisfactorum spero exemplum, quod, quippe Comicum, causæ gravitate & sensus divitijs sacro longe concedit, reliqua ita est geminum, ut mirer, ab Interpretibus, quorum labor in eo enituit, ut sacras tabulas ex Classicis Authoribus illustrarent, non esse cum eo collatum: Extat illud apud Comicorum Principem, *ARISTOPHANEM* Atticæ Orationis laude florentissimum, in *Nubib. v. 79. seqq.* Strepsiades ære alieno obrutus, magnum quid filium Phidipidem obsecraturus, quod ægre impetraturum se duxit, quod tamen curarum finem, quibus senex miser insomnis excruciabatur, laturum videbatur, filium e lecto excitat, clamans:

Φειδιππίδη, Φειδιππίδιον. ΦΕΙ. Τι ὦ πατερ,
 ΣΤ. Κυσον με, καὶ την χειρα δος την δεξιαν.
 ΦΕΙ. Ἰδου, τι ἔστιν; ΣΤ. ἔπε μοι, Φίλεις ἔμε;
 ΦΕΙ. Νη τον Ποσειδω τουτονι τον Ἰππιον.

ΣΤ. Μη

ΣΤ. Μη μοιγε τούτον μηδαμῶς τον Ἴππιον

Ουτος γὰρ ὁ Θεὸς αἴτιος μοι τῶν κακῶν.

ΑΛΛ' εἶπερ ἐκ τῆς καρδίας μ' οὕτως Φίλεις,

Ω παι, πιθου. ΦΕΙ. Τι οὖν πιθουμαι δῆτα σοι;

ΣΤ. Εκστρεψον ὡς τάχιστα τοὺς σ' αὐτοῦ τροπούς

Και μανθάν' ἐλθων αἶ' ἢ ἐγὼ παραινέσω.

ΦΕΙ. Λέγε δὴ τι κέλευεις. ΣΤ. Καί τι; Πείσῃ. ΦΕΙ.

Πείσομαι,

Νῆ τον Διονυσον. ΣΤ. Δεῦρο νῦν. κ. τ. λ.

Phidippide, Phidippidule. PH. Quid est pater.

ST. Exosculare me, ἔ' tuam cedo dexteram.

PH. Ecce, quid est? ST. Dic mihi, num amas me.

PH. Ita per Neptunum equestrem.

ST. Ne mihi hunc ullo modo equestrem.

Iste enim mihi Deus malorum fons est omnium.

Sed si me animitus utique amas

Fili mi, obtempera. PH. Quid ego obtemperem tibi?

ST. Mores tuos immuta quam celerrime:

Et ego, quæ te jussero, in his morem geras mihi.

PH. Quid ergo jubes? cedo. ST. An morem geres? PH. Geram,

Per Bacchum. ST. veni ergo. &c.

ad Socratem voluit ablegare filium, a quo discat injustas causas orando vincere, ut ne Creditoribus, quod debuit, teneatur solvere. Abstineo verba verbis, sententias sententijs componere, nemo est, cui non applicatio sit facilis.

§. XI.

Præter ea, quæ in medium proposui, sermo facer illustratur varijs quasi Orationis luminibus, quorum splendor omnium se oculis ingerit, ut Interpretes ad eum caligare non potuerint. Actum agerem, si in ijs exponendis prolixam operam posuisse velim; ad id tamen, ne tractatio hac in parte prorsus deficiat, quæ ad institutum maxime faciunt, obiter recensuisse sufficiet. Fidem, pondus, vehementiamque Orationi vel maxime repetitiones suo loco, in re momentosa positas, conciliare, apud omnes in confesso est, qui de Sermonis virtutibus præceperunt, quod in eo, quem volvimus loco, facilem applicationem habet: Trium interrogationis & responsionis repetitio, rei momentum, certitudinem, plura alia, quæ quis facilius secum sentiat, quam eloquatur, generatim insinuat. Exempla non cumulo, quod magna ubique eorum seges sit; unicum, negotio præsentī aptum excitabo. Apud *Comicum in Ranis* v. 306. *Bacchus* spectro vehementer territus *Xanthia*, asseveranti illud disparuisse, credere noluit, donec ter repetito juramento fidem veritatis fecisset.

. . . ΔΙ. Κατομωσον. ΞΑ. νη Δια.

ΔΙ. Καυθεις κατομωσον. ΞΑ. νη Δι'. ΔΙ. ομωσον. ΞΑ.
νη Δια.

. . . ΒΑ. Jura mihi. ΧΑ. per Jovem.

ΒΑ. Jura iterum. ΧΑ. per Jovem. ΒΑ. Jura.
ΧΑ. per Jovem.

Sed præterea repetitio in hoc loco eximiam vim habet, est enim trium ejurationi manifeste opposita, quod non potuit non Apostolum, tam memorem præteritorum, quam præsentium conscium, vehementer commovisse, & affectus maxime contrarios
in

in ipso excitasse : Ita censent ex veteris jam Ecclesiæ
 Doctoribus plerique. *AMMONIUS* in *Catena* ad
h. l. p. 470. Αναζωπυρῆσαι αὐτον βουλομενος ἐκ τῆς κατὰ
 τὴν ἀρενῆσιν ῥαθυμίας ; ἐρωτᾷ αὐτον , καὶ διὰ τῶν τριῶν ἐρω-
 τήσεων καὶ καταθέσεων ἐξαλείφει τὰς τρεῖς φωνὰς τῆς ἀρενῆ-
 σιος. *Jesús volens Petrum ex torpore abnegationis excita-
 re, interrogat eum, & per trinam interrogationem & pro-
 fessionem obliterat trinam ejurationem.* Plurium suffragia
 collegere *BASNAGIUS* in *Annalibus Politico-Eccle-
 siast. ad A. C. 33. §. 157.* *LAMPIUS* in *Commentar.
 ad h. l. & alij.* Quem porro cultum, quam pulchritu-
 dinem, quem vigorem, quod robur, quos lacertos,
 figuræ & translata verba Orationi addant, quivis in
 se experitur, & Rhetores docent, quorum hic vel
 præcipuus in perfecta Oratione describenda locus est,
 cujus tractationem *LONGINUS* *Secl. 28. lib. cit.*
 his verbis concludit. Ἀποχρητὰ δεδηλωμένα, ὥστε δεῖξαι,
 ὡς μεγάλαί τινι φύσιν εἰσὶν αἱ τροπαί, καὶ ὡς ὑψηλοποιον αἱ
 μεταφοραί ; καὶ ὅτι οἱ παθητικοὶ καὶ ἐκφραστικοὶ καὶ τὰ το
 πλεῖστον αὐταῖς χαιροῦσι τοποί. Sufficiunt, quæ exposuimus
 ad demonstrandum, quam sint natura grandes verborum mu-
 tationes, quantumque ad sublimem efficiendam Orationem con-
 ferant translationes, & quam affectibus & descriptionibus
 constantes loci istis ut plurimum gaudeant. Quam vero
 dulce, quam concinnum, quam verecundum & gra-
 ve hic Emblemata passionis est, quam apertum & ob-
 vium, quam amplum & fecundum ! Quam varia
 in exiguo gyro Oratio, quæ per ἀρενία, tenerissimi af-
 fectus vocem, ad προβάλα ; per βοσκειν, alimentum sup-
 peditationem, Evangelij præconium, ad ποιμαίνειν,
 omnem gregis curam, totum regimen Ecclesiasti-
 cum exprimens verbum, per gradus quasi ascendit,
 ut omnia qualiacunque Coetus fidelis membra ; om-
 nia omnino officia in Legato Domini requisita com-
 plectatur : Quam divina denique compellatio, quæ
 sub verbis φιλεῖν & ἀγαπᾷν perfectissimum amorem

Servatori O. M. ex jure atque condigno debitum, postulatur. Faxit Benignissimus Jesus, ut omnes & singuli hac fidelium certissima nota insigniti vel jurati profiteri possimus; Κυριε Φιλαμεν σε. Siquidem æternæ veritatis cœleste Oraculum sit: Εἰ τις οὐ φιλεῖ τὸν Κύριον Ἰησοῦν Χριστόν, ἢ τὼ ἀνάθεμα μαρτυρεῖται.

* * * * *

II.

JOH. GEORGII ALTMANNI

PRÆLECTIO LITERARIA

Pro

Comœdia & Ludis Theatralibus. *

Speciminis loco, jubente Amplissimo Magistratu Academico, pro vacua in Academia Bernensi Histor. & Eloquentiæ Cathedra habita Bernæ: 1734.

Solebant quondam apud Romanos artis Rhetoricæ & causarum magistri, omnibus illis, qui ad majorem Eloquentiæ gradum contendebant, difficillima orationum argumenta, in quibus artem suam expo-

* Is equidem instituti nostri scopus & ratio in hac Collectione Theol. Philologica non est, ut paginas Dissertationibus & Observationibus destinatas, Orationibus expleamus; cum autem hujus Prælectionis exemplaria dudum fuerint

exponerent, atque ingenii foecunditatem declararent, præscribere: Non enim artis nec peritiæ in dicendo esse credebant, vel bonam vel integram causam defendere, vel innocentem longa oratione ab injuria vindicare, vel virum bene meritum laudare: Sed illud demum artis esse; in re dubia & difficultatibus plena feliciter judicem movere, accusatum contra receptam fori, & plebis opinionem à carcere liberare, Virum communi suffragio damnandum è vinculis eruere.

Ego certe hodie A. H. in eruditissimo Veterum Romanorum confessu, ubi tenuis mea dicendi facultas censenda erit, constitutus videor, in quo non patrociniū suscipiendum causæ integræ & argumentis ubique affluentibus refertæ, sed dubiæ, difficultatibus ubique confitæ, & in qua forsā optimus dicendi magister ingenii & Eloquentiæ laudem facile decoquere posset. Clamant enim parentes, *Comædiarum & Ludorum Theatralium* usu, Juvenes ad Rempublicam natos, ad mollitiem, ad otium, ad temporis perditionem abduci. Clamant matres, filias in locum, ubi amor per visum & aures intret, à re domestica, à castitatis & modestiæ legibus abduci. Clamant mariti, pudicas uxores lascivo histrionum & pantomimorum saltu, gestu, personarum scenicarum impudica oratione, ad illicitos amores pellici, & sopitos lubricæ ætatis motus iterum moveri & suscitari. Clamat subditus, frustra Judicium fores pulsari, ubi magistratus ad spectacula defluat ► imo & ipse tandem

D d 2

dem

distrahta, malebam iteratæ editioni in his Miscellaneis locum dare, quam paucas pagellas iterum separatim prælo committere. Pium vero lectorem rogo, ne temere ex sola *Orationis inscriptione* judicet; quam serio enim rem egerim, atque *Ludorum Theatralium* causam defenderim, ex lectione cuilibet facile patebit.

dem clamat coquus, totam in expectatione, longiori comoedia, coenam assatam & exustam: Creditisne jam A. P. me tantum hominum globum in partes meas modica admodum & inexercitata dicendi facultate abrepturum? Putatisne Auditores, me his omnibus ex assè responsurum, variasque difficultates, vel a bono cive, vel à morum & pietatis cultore, contra spectaculorum theatralium usum exhibitas, me solidis & invictis argumentis exsoluturum? Existimatisne tandem A. Nobilissimi, hominem umbraticum, recto, in loeo à theatris & urbibus semoto, gaudentem & umbra, & simplici & agresti vita, in augustissimum hoc auditorium delatum, rationes inventurum, quibus vobis facile persuadeam, scenas & theatra in hac urbe extruenda, atque personatum hominum chorum in nostram civitatem advocandum esse? Cum autem Vestris, Mecoconatès Spectatissimi, obtemperandum sit imperiis, meum est, ludorum theatralium usum omni nisu & ratione defendere. Faciam ergo, ut *Carneades* injustitiam, *Quintilianus*, oratorum optimus, Meretricem atque Tribunum Marianum militi stuprum inferentem defendit. Orationem ergo habebò A. H. quali *Heinsius* pediculum, *Erasmus* stultitiam, ebrietatem & tertianam alii, laudarunt & extulerunt. Cum enim, teste *Plinio juniore*, oratoris officium sit, bene dicere in causis, quatenus rerum & personarum conditio patitur, nemo, quantum ego quidem confido, abs me expectabit, quod in causa satis suspecta, nolentes & repugnantes obtorto collo perpetua Eloquentiæ ubertate in partes meas trahere possim. Cum autem sapius per integras horas non sine attentione & delectatione varias in theatro personas loquentes audiveritis, mihi ut jam eorum causam agenti, eandem gratiam & voluntatem per brevissimum tempus præsteris, ea quæ decet submissione & observantia rogo atque obtestor.

Primo

Primo ergo, ne causæ meæ deesse videar, ne *COMOEDIARUM* Fautores & Patroni aliquid, quod ad præsidium *Ludorum Theatralium* afferri posset & deberet, à me neglectum aut omissum conquirentur, fabularum scenicarum usum ex remota antiquitate vobis repetere & probare primo jam loco constitui. Nostis enim A. P. quanta apud nos sit, ut apud moratiores gentes omnes, antiquitatis existimatio: Quidquid enim ex longa seculorum & temporum antiquissimorum perpetua serie & consuetudine ad nostram defluxit ætatem, illud communi gentium consensu, bonum, justum, æquum & laudabile censetur. Nihil autem in omni disciplinarum genere antiquius, nihil magis venerandam redolet prisce temporis memoriam, quam ludorum scenicorum inventum; Tanta illorum est vetustas, ut originem *Comœdiarum* & *Tragoœdiarum* antiquissimi scriptores ne quidem certo evolvere possint. Natales habet ludus scenicus in remotissimo tempore mythico, in quo secundum Poëtam

- - - - - *Frigida parvas*

Præberet spelunca domos, ignemque laremque

Et pecus & dominos communis clauderet umbra.

Cum enim homines à natura ad Sacrorum culturam, honorem Deorum, & laboris intermissionem animum intenderent, non in luctu & mœrore, sed in hilaritate & curarum oblivione tempus illud collocandum esse existimabant. Variorum hinc Deorum Gentilium cultus natus fuit & exortus, inter quos Liberum Patrem, tristitia mortalium pectora curis solventem, primum posuere, cui Satyros & Silenos comites adjunxerunt: In hujus præcipue honorem vetustissimi mortales collectis frugibus conventus cogere, genio indulgere, vino se proluere, liberiora scommata effundere, alter alterum inter hilaritates

& pocula dictis incescere cœperunt. Ita paulatim ab his initiis crevit, ut festorum dierum cura & Solemnitas, ita etiam, crescente hominum industria, in ordinem aliquem coacti liberiores joci, ex quibus primo *Satyrice fabulæ & poemata* nata sunt. Antequam enim homines in Græcia urbes colerent, & pagatim in sylvis & agris dispersi habitarent, hæc dramaticæ Poëseos fundamenta jacta sunt. Originem *scenicæ fabulæ* ita etiam describit *HORATIUS*:

- - - - *Agricolæ prisci, parvoque beati,
Condita post frumenta, levantes tempore festo
Corpus & ipsum animum, spe finis dura ferentem,
Cum Sociis operum, pueris & conjuge fida,
Tellurem porco, Silvanum lacte piabant;
Fescennina per hunc invec̃ta licentia morem,
Versibus alternis opprobria rustica fudit.*

Cum jam, modo & ratione ita descripta, artis scenicæ fundamenta jacta essent, mox sequente tempore versus in Deorum honorem componere, eorum laudes & beneficia carmine describere, & Deos ipsos in fabulis loquentes introducere cœperunt; quod *Tragædia* fuit initium. Ex quo jam facile colligitis A. P. quod *Satyrice* Græcorum poësis omnium sit antiquissima, quæ confusa ex *Comœdia* & *Tragoedia* primitus constabat, quia antiquo illo tempore iidem poëtæ, qui *Satyrice* poemata scribebant, etiam simul *Tragoediarum* auctores fuere. Cum vero hoc modo paulatim hominum ingenia frequentiore exercitatione à naturali stupiditate & hebetudine, ad liberius vitæ genus essent transmissa, varia insequenti tempore ludorum theatralium genera fuere exorta. Primi equidem dramaticæ poëseos auctores & fabularum scenicarum architecti, inter *Tragoediam* & *Comœ-*

Comœdiam distinctionem hætenus nullam excogitaverunt, sed ab iis, qui ad majorem splendorem, ordinem & elegantiam scenam evehebant, Tragœdia novo ornatu commendari, & Comœdia, novum jam scenæ genus, extolli cœpit. Tum statim confusa ante ex utroque Satyrica fabula penitus sepulta & abjecta. Prima hæc *Comœdiæ inventio vetus* dicta, quia multa adhuc cum Satyrica poësi & prisca simplicitate communia habebat, nec illa certis hætenus regulis & membris esset addicta: Miræ etiam erat hæc vetus comœdia licentiæ, quia ea principum, heroum vitam & mores, ne suppresso quidem nomine, cruento dente lacefferet. Hanc veterem excepit *media*, quæ vitia exagitabat dissimulato nomine. Post hanc tandem caput extulit *nova*, à *MENANDRO* exculta, ex cujus scriptis modicæ admodum nobis remanent tanquam ex ingenti naufragio tabulæ. Ut jam magnifica & decora à Græcis facta Tragœdiæ & Comœdiæ facies, ita etiam utramque talem excepere Romani; hinc Latini Comici & Tragœdiæ artifices ex Græcorum fabulis & inventis, aliena arte & ingenio superbientes, scripta sua locupletarunt; docent nos *TERENTII* fabulæ, quas *Philemoni* & *Menandro* furtim abstulit comœdias; docet nos *SENECÆ Tragici* exemplum, qui ex *Sophocle* & *Euripide* cothurnos suos instruxit. Hos jam natales & primordia ex remotissima antiquitate brevibus hic exponere necessarium videbatur, ut ante omnia sua se vetustate cum ludis theatralibus commendaret comœdia. Quis jam est, A. H. qui receptam apud gentes, quibus omnium artium & disciplinarum incunabula debentur, perpetuam consuetudinem apud nos antiquare sustineat? Quis est, qui gentibus, quibus sanctissimas legum tabulas, & doctrinæ moralis perpetua exempla debemus, non laudabilem & decorum in Republica bene instituta ludorum theatralium usum affirmare audeat?

audeat ? Mos est sua antiquitate venerabilis ; hunc ergo morem, ut *QUINCTILIANUS*, optimus dicendi magister, de *Ennio* dicit, sicut sacrum vetustate lucum conservabimus, qui non tantum habet apud nos speciem, sed ex antiquitate religionem. Si ergo Græci Romanique, homines ad unguem facili, boni justique perpetui Censores, ad Reipublicæ decus & ornatum commodam & salutarem judicarunt Ludorum Scenicorum operam, quare ergo nos à tam laudabili instituto animum oculosque averteremus ?

Si autem quisquam est, A. P. qui antiquitatem contemnit, facile erit, per omnes probationum classes, quas nobis *Cicero* & *Quintilianus* præscribunt, decurrere, & Ludorum theatralium non utilitatem tantum, sed & necessitatem demonstrare, ita ut nullus vestrum deinceps futurus sit, qui non prompto animo Comicis atque Tragicis theatris locum apud nos sit concessurus.

Unaquæque res vel consuetudo publice probata, quam Reipublicæ moderatores intra moenia recipiunt, & suo quasi consensu foveant, vel utilitatis publicæ, vel commoditatis, civilitatis, vel jucunditatis communiter probatæ nomine, commendari debet. Hoc jam à vobis, A. majorem in modum peto & contendo, ut victas pro comœdia manus detis, si invictis per has classes rationibus causam meam theatrali vobis probavero. Suadet ergo primo utilitas, justi prope mater & æqui, ut ait *HORATIUS*, theatrales ludos in urbem advocandos ; quid enim magis scenam & theatrum propugnat & defendit, quam fabularum scenicarum non utilitas, sed necessitas, quæ vitia omnis generis quocunque modo urbe & civitate ejicere, depellere, atro carbone notare, proprium suum & perpetuum finem habet. Non Reges, non Principes, non accuratissima Legum l'condendarum ratio ita presso pede vitia possunt insectari,

ri, ut illud Comici faciunt, & feliciter exequuntur. Sola Comœdia, publice audet

*Detrabere & pellem, nitidus qua quisque per ora
Cederet, introrsum turpis.*

Scopus Societatis est, ut homines, seposita vitiorum intemperie, honeste vitam agant; Huc leges, huc placita & responsa sapientum, unice tendunt; his vero amicas manus jungit comœdia, quæ temulentum, quæ avarum, quæ sub religionis larva omne criminis genus committentem, quæ amatorculum insanum, quæ vetulas & mulieres jam edentulas, in amore & insano adhuc vestium ornatu, ad exemplum primæ ætatis puellarum inepte superbientes, seque pueris adhuc probare studentes, ineptiæ ac stulti-
tiæ arguit, & ad meliorem forsan mentem reducit, ut dehinc publicis hominum sibilis se exponere desinant. An non hoc grande & magnificum Comœdiæ emolumentum? quo zelotypus maritus, quo ad lulum & aleam effusus juvenis, quo forma sua & novo vestium ornatu captus Adonis & amatorculus, quo affectati Sermonis imitator, ad insanix suæ cognitionem adducuntur. Si forsan hujus rei testimonium desideratis, gravissimum dabo, auctorem enim & testem habeo elegantissimum Eloquentiæ Romanæ Parentem CICERONEM. *Fabula*, inquit, *conficitur sunt à Poëtis, ut effictos nostros mores in alienis personis, expressamque imaginem nostram vitæ cottidianæ videremus.* Testem habeo Celeberrimum Gallum D. de la BRUYERE, qui cum diu contra Comœdiam disputasset, hoc fere unicum in patrocinium addit: *On dit, que Arlequin avec un ridicule assortiment de rubans a fait eclipser les grandes Fontanges de Paris; Que les folies d'Octavie sont des leçons de sagesse, combien il est fatal, de s'abandonner à l'amour. Le Phoenix détruit la fausse vertu de prudes; La Baguette decouvre l'artifice d'une Femme qui as-*

Æta de la passion pour son Mari, qu'elle n'aima jamais. Testes tandem habeo pueros omnes, qui tempus matutinum in coma concinnanda, & corpore ad genium seculi exornando consumunt. Testes habeo viros plurimos splendide compositos & ornatos, qui, ut *Seneca* ait, magis amant Rempublicam, quam capillorum crispatum ordinem turbare. Testes habeo mulieres & puellas universi Orbis, quæ per integras horas tot compagibus altis ædificant caput, ut decenti & magnifico ornatu formæ suæ cottidianæ nævos & errores è hominum aspectu subducant. Quis jam vestrum est, A. H. qui causam meam tanto testium veterum & modernorum exercitu munitam atque suffultam damnare possit? Quis jam est, qui ludos theatrales, communi suffragio ita probatos, non admittendos esse censeat? Sed si hæc nondum movent, tanto adhuc Vos, A. P. argumentorum apparatu expugnabo, ut me, non malam vel dubiam, sed optimam, sed probatissimam causam defendere, deinceps existimetis.

Nostis A. Humanis. in quo censu Helvetiorum natio hætenus à Gallis, ab Italis, ab ipsis tandem majori nobis pituitæ parte pressis & gravatis vicinæ Germaniæ incolis habita sit; Nobis enim vix, ac ne vix quidem, in hominum Societate locum relinquunt, sed ad brutorum classem inique protrudunt, nosque tanquam magnarum ædium molossos habent, quibus horrendo sonitu & acerbo vultu latrandum sit, quoties vel latrones vel sicarii palatium spoliare tentent. Quid autem illis eventurum putatis, A. si apud externos rumor increbresceret, Comœdiæ artifices, ludorum theatralium institores, histrionum turbam, Psaltriarum chorum, apud ipsos etiam obescæ naris Helvetios, locum invenisse? An non illico nos ad veterum Græcorum sagacitatem & ingenium, ad modernam Gallorum agilitatem transformatos dicturi essent? Sed

Sed quæ hætenus à me dicta sunt & allata argumenta, mihi quidem gravia & egregia esse videntur; Ast alia adhuc supersunt, quæ tantam persuadendi vim secum ferunt, ut nullus jam dubitem, unumquemque vestrum, certam & destinatam argenti summulam ad ludos theatrales illico exhibiturum; Et, cum ab initio argumentum sterile mihi habere visus sum, tanta rationum undique affluentium copia me quasi obrutum sentio, ut iis omnibus vel enarrandis vel evolvendis & lingua & tempus deficere videatur.

Nemo est in tota hac Civitate, qui non mecum facile fateatur, vino, otio & alea in Republica nil esse deterius; Nullus vestrum est, A. H. qui non utraque manu mihi largiatur, communes hos esse civitatis nostræ hostes, contra quos vel leges vel remedia invenienda sint: Certiora autem, & quæ magis sint in promptu, inveniri nulla possunt, quam ludorum theatralium expedita institutio. Sic enim qui ad tabernas vinarias decurrunt, qui turpi otio tempus segniter absumunt, qui argentum ludo & alea perdunt & abiiciunt; his, perdit i isti homines, omnibus neglectis, ad sola Comœdiæ spectacula decurrent. Quid præterea utilius, quam mentem lectione veterum & recentiorum auctorum imbui, & ita politiori literatura ad morem seculi examussitari? Cum autem omnes isti, vel prisca theatri, vel recentioris temporis comœdiarum scriptores, vel immoderata fere pecuniæ summa comparari, vel longo temporis spatio legi & evolvi necesse habeant, brevi tempore Comœdiarum usu & frequentatione, quæ vel *Æschylus*, *Sophocles*, *Euripides*, *Aristophanesque* Græcis, vel *Plautus*, *Terentius*, *Seneca* Latinis exhibuere, percipi, animusque omni morum & urbanitatis cognitione imbui potest. Quis jam non videt, A. P. brevem hanc & compendiosam ad artium & disciplinarum experientiam, ad honestam vitæ consuetudinem instillandam,

dam, ad mores recte instituendos viam, solo ludorum Scenicorum usu & exercitatione comparari posse?

Ut autem hætenus sua se utilitate commendavit Comœdia, ita certe non minore commoditate sua se deinceps in vita civili probatura est. Quid enim commodius à crapula & ludo surgentibus, temporisque sui teredinem quærentibus, quam tutissimum Comœdiæ refugium, ubi vino sopitæ mentes iterum suscitantur, & histriones sepultam quasi animam restitunt? Quid certius illis, qui alea magnam æris copiam jacturam fecere, quam Comicorum fabulis, Pantomimorum salibus & saltationibus molestæ memoriæ & detrimenti oblivionem obducere? nulla unquam Philosophorum Stoa vel Academia tam docta & opportuna fuit ad tantum dolorem tam cito & feliciter abjiciendum & mente extirpandum. Quis unquam ex priscis & recentioribus præceptorum moralium Magistris & Professoribus, ad omnes hominum motus & passiones cognoscendas vel detegendas viam invenit, ut Comicorum descriptionibus & reprehensionibus sagacitatem & eruditionem suam æquiparare posset? in quibus interiores cordis recessus aperiuntur, omnis conditionis & ætatis vita & mores describuntur, & quæ sint vitia magnatum, quid moliatur herus, quid hera, quid servulus audax, tanquam in elegantissima tabella nativis coloribus exhibetur. De Tragœdia idem affirmari potest; quam opportuna enim, quam apta ad animum hominum humi repentem ex limbo quasi & torpore ad augusta, ad magnifica extollendum, & ad gesta heroica, ad virtutem, ad magnanimitatem provehendum? In ea enim dum magni heroes loquentes in Scenam prodeunt; Dum Hannibal, ingenti caliendro ad novissimum Gallorum genium comtus & ornatus, facta sua exponit; Dum exempla Ajacis, Herculis, Thesei, Agamemnonis, pectori juvenum calcar addunt; an

non

non simul ad patriam tuendam, ad amicos ex miseria liberandos, ad vitia punienda instigantur? Videtis, A. ludorum Scenicorum emolumenta. Quam magnifice *SENECA* dulcissimis verbis virtutis amorem & moris contemptum instillat? Quam candide homines ad quotidianas vitæ molestias & labores ferendos suscitatur, & instruit, ne imparatum ærumnis pectus gerant? Quam necessaria hæc sint præcepta pueris, ad luxum, & molliem educatis, ne deinceps conspecto vulnere, & periculo, ne ad stridorem hostilis ensis & globi illic contremiscant, sed firmiter præbeant periculis latum nemo vestrum est, A. qui ignoret. Quis jam porro est, qui Comoëdiarum & Tragœdiarum usum, ex uberrimo inde in vitam communem se se spargente fructu, & commodo dehinc ex nostra urbe & Republica describere sustineat? Nulla ætas est, nulla conditio, quæ non aliquam inde utilitatem & boni alicujus concessionem sentiat.

Plurima quidem hætenus, A. pro luc. theatra- libus audivistis argumenta, sed multa adhuc supersunt, egregia & gravia, quæ vacillantes adhuc animos ad Comoëdiæ favorem movere & stimulare deinceps possunt. Cognitum vobis est & perspectum, nil in vita humana tristi & tenebricosa vita esse calamitosius; Vitium hoc Graeci voce *melancholiam* vocant. Gravi hoc morbo juvenes apud nos laborant, virgines atque uxores molestæ pituitæ questus Medicis ubique ingerunt, atque lamenta eructant; Sola Comoëdia ad hos morbos funditus delendos & curandos apta nata est. Quis ergo curarum unicum & dulce solamen, tot morborum pertinacium salutarem medicinam, è civitate ejicere deinceps auderet? Nostis ad hæc, A. P. senes plurimos apud nos, totamque juventutis coronam, pro naturæ instinctu, vel viduarum vel puellarum amore teneri, quibus, qui
avido

avido & suspenso amore capiuntur, conditos cordis motus aperire & declarare nunquam sultine; Sed Comœdia sola eos audaces facit, dum enim personæ comicæ vim amoris, sollicitos pectoris ignes perpetuo Eloquentiæ flumine exprimunt, inde sapius linguæ repagula solvuntur, dum verba & sententias arripiunt, quibus tandem vulnerum amore pectus aperire & significare possint. Quot jam torrida & amoris ignibus & flammis laqueantia pectora in Orchestra suo onere fuere verata? Sed non minus emolumentum ex ludis neutralibus viduæ & puellæ, quam masculi, colligit atque percipiunt, cum enim innata foemineo generis modestia, vel formæ suæ venustatem, vel ad conjugale vinculum propensionem exponere prohibeat, sola Comœdia sine dedecore & famæ detrimento illas omnium oculis tanquam eximia amoris ignora proponere potest, dum enim

Spectatam veniunt, veniunt spectentur ut ipsæ.

Verum non formam tantum, non modo roseam cervicem, altiusque sui decus & elegantiam, sed & novæque vestium ornatum & fulgorem publice ita exhibere & exponere possunt. Quis theatro locus commodior, ad novissime effictas Gallorum, vel in ornatu capitis, vel alio vestimentorum genere, orandi & cincinnandi formulas in apicum explanandas? Quot non mulieres, tenui admodum, vel castitate, vel fortuna gaudentes, hac via ad altiore, vel honorum, vel divitiarum gradum ascenderunt? Quot non jam matronas atque puellas theatrum, coelibis vitæ tædio feliciter liberatas, maritali thalamo junxit?

Sed jam ad finem mea paulatim A. H. procedit oratio. Dum vero in evolvendis pro ludis theatralibus argumentis hætenus desudavi, non plane negligendæ sunt objectiones aliquot, quas mihi forma-

ri posse sentio. Et ante omnia primæ Ecclesiæ ab ejusmodi spectaculis horrorem non absque gravi ratione obiicietis : Nullus fere primorum Ecclesiæ seculorum scriptor est, qui non doctrinæ evangelicæ discipulos, à Comœdia præsertim, tanquam rerum turpissimarum spectaculo, omni ratione & labore avertere conetur. Quid autem ad hanc sanctissimæ, & in primæva integritate viventis Ecclesiæ legem pro causâ ludorum theatralium responderi cum aliqua argumentorum firmitate possit, mihi equidem, ut verum fatear, parum constat. Memini autem, à Comœdiæ Fautoribus ad piam hanc Christianorum veterum consuetudinem responsionem aliquam parari : in eo autem pro ludis theatralibus nostri temporis patrocinium se invenisse existimant, quod scilicet in primis nascentis Ecclesiæ natalibus, gentilium Comœdia non nisi sarcasmis, scommatibus atque distictis, adversus Christianæ Religionis cultores fuerit referta, quæ vel videre vel audire, in sanctissimæ doctrinæ discipulis non incongruum modo, sed & sceleratum & impium futurum fuisset. Satis enim cognitum est, atque variorum auctorum probatum testimoniis, quod temporibus Heliogabali & sequentibus, cum ipsi Cæsares ad perditam ingluviem & omne propudium deflexissent, theatra publica impunitatis & nefandi sceleris templa facta sint, in quibus omni plane honestate abjecta nudæ meretrices in scena chorum agebant : quæ effrenis libido & licentia postea correctæ & repressæ. Hoc equidem certum est, ludorum theatralium usum, regnante Theodosio, ad majorem iterum emendatum & correctum fuisse modestiam, atque passim tum iterum ludi scenici ipsis etiam Christianis videre & frequentare permitti ; sed nihilominus tamen salutari lege cautum erat, ne dies dominica, Deo & rebus sacris destinata, Comicarum fabulis conturbaretur. Aliud tandem ludorum præsidium quidam se invenisse putant

in exemplo *CHRYSTOMI*, qui ex Comœdiis *Aristophanis* stilum suum castigasse, & plurima exinde ad rem suam hausisse, à plurimis insimulatur. Omnia vero, quæ vel ex Scriptis Patrum, vel ex rationibus vel Theologicis vel Politicis, contra Comœdiam obiici possunt argumenta, solidis & invictis rationibus Ecclesiæ Romanæ Theologia casuistica ita solvit & dilucidavit, ut vobis dehinc nec dubium, nec in mentē scrupulus ullus remanere possit. Licet enim priscei temporis scriptores, qui Patrum nomine circumferuntur, unanimi quasi consensu adversus theatra omni spiritualium armorum apparatu depugnaverint, nihilominus tamen posterioris Ecclesiæ Proceres atque doctores, qui feliciter, quod in Ecclesiæ ædificio addendum, vel labefactatum & adhuc deforme emendandum erat, perfecerunt, Comœdiam absque scandalo non tantum è civitate Christiana, ut illam vocant, non ejiciendam, sed potius admittendam & fovendam esse existimarunt. Testem dabo gravissimum Ecclesiæ Seraphicum & Angelicum Doctorem *THOMAM AQUINATEM*, virum unanimi Ecclesiæ consensu in Patrum numerum receptum; Hic, cum rem maturius examinasset, publicam ludorum theatralium institutionem ad Eutrapeliam, hoc est, ad decentem morum urbanitatem, pertinere invictis rationibus probavit; Cum enim homo animi relaxatione, ad pia & bona opera eo alacrius peragenda, opus habeat, comœdiarum usum necessarium esse censuit, cum nec preces fundi, nec mentes rebus sacris addictæ esse possint, nisi pectus lætitiâ perfusum ad sanctum fervorem prius stimuletur. Habetis A. novam & in hoc auditorio forsan vobis inexpectatam, sed solidam, sed rebus convenientem ad quorundam Theologorum objectiones responsionem. Videtis, Studiosi præstantissimi, quam facilis, quam tuta hæc sit, ad omnes nodos the-

theologicos exsolvendos, ad omnes turbatas conscientias illico sedandas, via & remedium. Ne autem adhuc aliquis Vestrum, vel Alcibiadis, Comicum tanquam hominem impune in publico civitatis conspectu mentientem, indeque eum in mare abiicientis exemplum; vel Justiniani Cæsaris legem, qua Comædos tanquam probrosum hominum genus publicâ notavit infamiâ; vel sanctissimos Patres, theatrales personas communione Ecclesiæ & Sacramentorum usu prohibentes, mihi eorum causam omni industriâ agenti obiiciat, Vobis omnia hæc occupare & diluere me posse promitto. Cum enim Thomas Aquinas, Bonaventura, & alii, ex Vita Patrum probent, quod *Paphnutius*, Vir in Ecclesia probatæ fidei & authoritatis, tranquille dormiens visionem habuerit, in qua Vir hic Venerabilis inter alia Comædum aliquem summum in Cœlo honoris & beatitudinis locum occupantem vidit, nihil deinceps contra hanc vitæ conditionem obiiciendum erit. Quis jam A. hos homines dehinc vel inhonestum vitæ genus profiteri, vel jocularum tantum & inutilem artem exercere affirmare sustinebit? Cum tandem videmus, A. P. sedis Sanctissimæ Romanæ Purpuratos Senatores & Antistites, Venerandos Ecclesiæ Episcopos, perpetuæ castitatis & integræ obedientiæ legibus devotos Presbyteros, Comædiis assistentes, quare ergo nobis vel dubium ullum oriretur, hæc spectacula non salvâ conscientia à toto Christianorum cœtu posse frequentari? ubi gregis antisignani primi Scenicorum portam ingrediuntur, Orchestram occupant, & personarum sermonibus & fabulis aurem mentemque delinunt. Quis tandem unquam audivit, teneras, molles, & in rebus levissimis suspensas hominum religionum mentes comædiarum usu fuisse vel leviter vulneratas? Quis unquam audivit in venerando peccata confitentium tribunali, vel cottidianam spe-

ſpectaculorum theatralium frequentationem, hominibus ſuſpecta & ærumnam extorquere, vel de cohibenda, Comicatorum colloquia audiendi conſuetudine dubium ſuſcitare potuiſſe?

Ut nunc tandem, A. N. è pictoris pergula, ubi ſiſta erant omnia, (quo enim alio dicendi genere ad cauſam Comicatorum defendendam, quam comico, convenientius uti potuiſſem?) ad Vos redeam; Non ſam vel ſatyricæ vel ironice, ſed ut mihi res ipſa videtur, ſententiam meam deinceps declarabo.

Theatrales ludi, ut res fere omnes, lapſu temporis, quales eos à Græcis & Romanis accepimus, à Chriſtianis mihi videntur deteriores facti; ſive Anglorum ſpectem, quæ auctore Johnsonio caput extulit, comœdiam, ſive Gallorum, quæ Molierio famam ſuam & patrociniū debet. Habent equidem omnes plurima virtutis præcepta, vitia atro carbone pingunt; interim tamen interlocutiones tantum mali habent, quantum virtutis & morum præcepta in illis contenta utilitatis. Ego equidem nullus dubito, quin brevi tempore, ut lux crevit & effuſa licentia, theatrum apud nos locum & commodum domicilium inventurum ſit; dudum haud dubie id factum eſſet, niſi ambitioſa paupertas retinuiſſet; ad tabernariam ergo, qualem quædam Italicæ urbes quondam habebant, nobis recurrendum erit. Ludum tamen aliquem theatralem, & ad regulas veterum Comicatorum adornatum, & ego ferre poſſem; ſed à laſcivo hiſtrionum & ſaltatorum geſtu & ſermone remotum. Comœdias vel Tragœdias in Reipubl. Chriſtiana facile admitterem, quales vel *Gualtherus*, vel *Aretius* & *Beza*, vel alii probatæ virtutis viri quondam compoſuere. Optime & elegantiffime de Comœdia judicarunt elegantiffimi ſcriptores epistoſularum, ſur les Anglois, ſur les François & ſur les Voyages, dicentes: Si la Comedie étoit rectifiée & purgée de ce qui n'eſt que ſarce, ſi elle

elle étoit vouée à la correction, autant qu'elle l'est à l'amusement, il se pourroit enfin qu'elle eût son usage, & que ce fût un jeu à donner au peuple. Ego quidem, nec Comœdiam nec Tragœdiam virum Sapientem apud nos ad hodiernum, vel Gallorum vel Italorum, genium examussitatum optare, certissimis argumentis mihi facile persuadere possum : Dum enim ipsa vita ludus est ; dum ego tumidos Ajaces & Hannibales in plateis decurrentes video ; Dum ego juvenes tales, quales Terentius depingit, in amore perditos, animadverto ; dum Pïaltrias amoris retinacula ubique spargentes deprehendo ; dum Senes vel avaros noctu in angiportis stantes conspicio ; dum homines pietatis & religionis prætextu aures demittentes, vixque humi repentes video, Comœdiam nullam peto. Unusquisque nostrum scenam suam in misero ærumhosæ vitæ Stadio exhibet ; ubi certe nulla Scenicarum personarum larva est, quæ se attendenti non facile conspiciendam exhibeat, & certe verissimum est illud Satyrici :

*Humani generis mores tibi nosse volenti
Sufficit una domus.*

Vos autem, A. P. veniam dabitis, si, pro argumenti præscripti ratione, liberiori stilo pro Comœdia vobis locutus fui. Si grave contigisset argumentum, si pro bona causa dicendum fuisset, à tali equidem dicendi genere abstinuissem. Si contra ludorum theatralium usum mihi depugnandum fuisset, talia mihi forsan dicenda obvenissent, quæ eruditioni, quæ pietati, quæ auctoritati vestræ accomodata magis fuissent : Nunc autem, ut communi more Comœdiarum personæ è Scena discedentes exclamant : *Valete & plaudite* ; hâc ego rogatione à vobis discedo : ignoscite, & quæ Vobis minus grata & accepta dicta sunt, æqui bonique consulite.

T A N T U M.

E c 2

III. M.

III.

M. PETRI ADOLPHI
BOYSEN,

Dissertatio Philologico - Critica

De

KYBEIA ANΘΡΩΠΩΝ,

*In Loc. Eph. IV. 14.**Argumentum.*

§. I. Seculi nostri præ præcedentibus eruditio; Quæ ex studio Philologiæ provenit; Cujus studium defenditur. §. II. Ad Epistolas Pauli intelligendas Philologia est necessaria. Pauli eruditio indicatur, quæ in loco illustrato quoque elucet. *Kυβεία* ex Antiquitate illustrabitur in hac Dissertatione. §. III. Varians Lectio, quam *Millius* annotat, nullius est ponderis. Profecta est illa à *Jacobo Fabro*, qui male *Κυβείαν* pro *Κυβείαν* descripsit; qui error probabiliter inde venit, quod Seculo IX. B. & K. iisdem figuris signarint. §. IV. *Salmasii* sententia proponitur. Vocis *Κυβος* & *Κυβεία* sensus indicatur. Sententia allata *Salmasii* refutatur. §. V. Clerici profertur conjectura, atque refellitur. Male ex etymologia vocis ad sensum ejus concluditur. §. VI. *Bezae*, *Dempsteri* & *Xylandri* opinio indicatur. §. VII. Sen-

tentia Authoris proponitur. §. VIII. Fraudes in lusu aleatorio olim obtinuisse probatur. §. IX. Sensus vocis affixus confirmatur testimoniis Græcorum. §. X. Ulterius ex Scriptoribus Ecclesiasticis probatur. §. XI. Consensu Talmudicorum & Versionum, præcipue Syriacæ, pondus sententiæ affertur. §. XII. Sensus loci explicati breviter enarratur.

§. I.

CUM ea seculi nostri felicitas sit, ut literæ incrementa subinde capiant, & Viri doctrinæ copia, ingeniique viribus excellentes, ad summam disciplinæ amplitudinem ac dignitatem deducant; tum imprimis illis divini oraculi cœtus non destituitur, qui in peroranda divini oraculi causa non cande minus quam diligenter versati sunt. Unde adeo contigit, ut veritates illæ divinatorum scriptorum, germanaque spiritus sancti sententia nobis multo melius pateant, quam veteribus, ab illis, quibus recentior ætas abundat, præsidii, maxima ex parte destitutis. Neque vero falli mihi videntur, qui neglectum literarum, quas ab humanitate appellare consuevimus, ad causas referunt, quo minus ad interiorum sacri Codicis notitiam bona Interpretum pars adspirare potuerint, sed partim nodos finxerint, nullo consilio solvendo, partim expedita quædam judicant, quæ insigni adhuc difficultate laborant, sæpius autem mente Spiritus S. exciderint. Quæ cum ita se haberent, aliam ingressi sunt viam Viri Eruditi, atque unanimi consensu decreverunt, Grammatices, sanæque φιλολογίας studium, & cum Theologiæ cultura, & cum Scripturarum explanatione, nexu quodam singulari esse copulandum. Comparentur ornamenta Ecclesiæ nostræ *CHEMNITIUS*, ὁ μακαρίτης, *Part. II.*

*Loc. Theol. p. 217. & GLASSIUS, in præf. ad Gram. Sacr. Part. II. edit. recentiss. ut & WOWERIUS de Polymath. C. XVIII. WITSIUS in præf. ad opera Gatakeri Crit. & qui instar multorum esse poterit, illustris SPANHEMIUS in Epist. Hist. Crit. V. T. R. Simonii annexa p. 65. qui nostram de hoc argumento sententiam luculenter & copiose explicarunt. Laudandum itaque eorum institutum, qui ad profanos profecti Authores, nativam vocum significationem ex illis depromunt, & verecundo modestoque Critices studio telam, quam alii haud infeliciter exorsi sunt, pertextunt. Neque sane illis fraudi esse poterunt *Πευδεγανειαι* quorundam, quas ex intempestiva scriptorum profanorum collatione dimanasse, graviter B. CALOVIUS, ὁ πᾶν, in *Præl. Gener. ad Bibl. illustr. p. 14.* monuit. Cum enim hi, profanæ sapientiæ fastu inflati, mediam non institerint viam, sed ipsa adoranda mysteria, ab intelligentia hominum multum remota, ex imbecillitate ingenii humani metiri, ac proprias Theologiæ locutiones ad stilum τῶν ἱζω exigere voluerint, bonorum merito indignationi sese propinarunt. Melius vicissim illi rebus suis consulunt, qui de vocibus, quas sacri cum profanis scriptoribus communes habent, solliciti, Græcorum Magistros adeunt, indeque locis difficilioribus lucem fœnerantur. Non attinet hic dignis laudibus extulisse Dietericos, Gatakeros, Schmidios, Stolbergios, Casaubonos, Olearios, aliosque qui magna cum nominis sui celebritate in hoc negotio versati sunt, ut proinde merito acquiescamus in Th. HAYNII, hominis Angli, in præf. dissert. de linguis, quam vide in *Anal. Phil. Crit. Th. Crenii, p. 14.* effato: *Profanos authores, in usu quarundam vocum explicando, subvenire, par est.* Conf. DILLHERR, in *sarrag. Rit. Sac. & Sec. in Fasc. VIR opusc. p. 358.**

§. II.

Nominatim autem ea, quæ D. PAULUS in literas retulit, difficilius intelligentur, nisi ab illis, quæ nominavimus, studiis tempestive interpretes præmunitus sit. Qui enim secum perpendit, quanto Paulus sapientiæ & cognitionis apparatu res divinas exponere consueverit, nunquam, credo, ei denegabit elogia, quæ CHRYSTOSTOMUS Homil. XLIII. μεγαλοφωνώτατον, THEODORITUS Epist. CXLVI. πανσοφον, PHOTIUS Epist. CXCI. τον ἑρμηνεύον παιδεύοντα διδάσκοντα καλεῖται, καὶ τῶν ἀπορητῶν ἐξηγῶν πρότερον, Paulum nuncupantes, in illum contulerunt. Ipsa illa, quam ad Ephesios exaravit, epistola, ad reprimendum, refellendumque hæreticorum furorem composita, exquisitaque eruditione referta, luculenter illam suadendi vim, dicendique gravitatem comprobatur, quam jam olim admirationi habuisse cives Lystrenses, tradit Lucas Act. XIV. 12. Cui quidem asserto abunde viri eruditi adstipulantur, nec exiguam fidem facit idonea illa, egregiaque loquendi ratio, qua mores hominum callidos, versutosque κυβερναῖον recondita sententia appellat Apostolus. Cujus adeo vocis dulcedine deliniti, præsens molimur institutum; operæ pretium facturos nos esse existimantes, si genuinam hujus vocis significationem, à plerisque male intellectam explicatamve, ex ipsis antiquitatis fontibus eruamus, valoremque illius commonstremus; tantus judicio nostro qui est, ut nihil & ad argumentum sermonis, & ad personas accommodatius dici potuerit; quod ex tractatione, credo, elucescet.

§. III.

Ante vero, quam id expediamus, juvat varias hujus loci lectiones, si quæ sunt, exponere, & quo loco habendæ sint, brevibus dispicere; ubi equidem

non magnam illarum copiam afferri videas, dum *MILLIUS* in *N. T.* ad *h. l.* p. 447. ed. *Kuſleri*. Celebris inter Anglos scriptor, unicam saltem lectionem, à vulgata diversam, adducit, ita comparatam, ut vel primo intuitu non omnium rerum imperito pateat, nullius eam pretii esse, tantumque abesse, ut aliquam hoc loco lucem fœnerari possit, ut & mentem *Apoſtoli* intervertat & obfuscet, nec ulla probati Codicis autoritate nitatur, sed illam potius Lectionum classem occupet, quæ à *Lud. KUSTERO*, Viro literatissimo, in præf. ad *Millii N. T.* *3. falso ita dictæ appellantur. Cum enim, præeuntibus *ERASMO* in *Comment. ad h. l. T. VI. opp. p. 846. edit. Lugd.* ipsoque, quem modo laudavimus, *MILLIO* l. c. à *Jac. Fabricio Stapulensi* eam profectam esse, exploratum habeamus, qui vel ex male impresso exemplo, vel, quod probabilius nobis videtur, male lecto intellectuque Codice descripsit, quid pretium statuendum sit idgenus lectionibus, dudum Viri Clarissimi *Clericus, Wihelbius, Kuſterus*, alique monuerunt. Non forte causam hujus mendosæ lectionis inde temere derives, quod in Codicem Seculi IX. vel alium ab hoc tempore exaratum, inciderit, ductusque literarum, quibus ea ætate usi sunt librarii, familiares sibi non reddiderit, sed permutatis inter se clementis ex similitudine ductuum *κρυεῖαν* legerit, quam *κρυβείαν* legendam esse, Codices conspirant. Exploratum enim veterum monumentorum explanatores reddiderunt, nominatim doctissimus *MONTFAUCONIUS* in exquisito illo opere *Palæogr. Græc. Lib. IV. cap. X. p. 335.* & *Eduard. BERNARDUS* in *Tab. sua Alphab. Var.* receptum fuisse Seculo IX. à librariis morem, B. & K. literas eadem figura exhibendi. Comparentur cum hætenus dictis, quæ *ERASMUS* l. c. cui eadem suboluit conjectura, hanc in sententiam est commentatus. Cæterum non impune tulit illam Lectionem suam

Stapu-

Stapulensis, quandoquidem adversarium expertus *Joh. Stunicam Castellanum*, contentiosum pariter ac impotentis animi virum, hanc quoque hallucinationem exprobrari sibi ab eo videbat. Conf. *Erasmus & Millius l. cit.* Nec minus *ERASMUS* partim in annotationibus in *N. T. l. c.* partim in *Apologia*, qua contra *Fabrum* causam suam peroravit, *Tom. IX. opp. edit. laud. p. 63.* genuinam nostram lectionem, aut temere aut per oscitantiam à *Fabro* sollicitatam, vindicavit; quibus causis motus ille mutavit sententiam, & a nostris stare partibus incepit.

§. IV.

Hiscæ ita præstructis, pulchri rem operis judicamus, ante ad varias eruditorum, quas de loco hoc foveant, persuasiones examinandas proficisci, quam nostram depromamus fulciamusque sententiam, quarum aliæ ita comparatæ sunt, ut non idoneo nitantur fundamento, aliæ vicissim, ut nimis longe petitæ sint, nec sensum vocis, qui amplissimus est, legitime exhaustiant. Primo nobis loco, & propter nominis celebritatem, & meritorum magnitudinem, *Cl. SALMASIUS*, exquisitæ doctrinæ vir, est nominandus, qui cum à πολυμαθὲς αἷω *Gatakero* de subdifficili aliquo loco *Antonini Imperatoris Lib. I. eis ἐαυτον. §. 8.* in consilium adhiberetur, quam quoque sententiam ὡς ἐν ὁδῷ παρεργῶ, *Lucianus in Nigrino T. I. p. 20.* de nostro loco hisce verbis, quæ vide in *Annot. GATAKERI* ad *Anton. l. c. p. 9. opp. Crit. Gatakeri edit. Wits.* expromebat: eodem, inquit, sensu, quem antea verbo κυβερνεῖν adjudicaverat, κυβερνα τῶν ἀνθρώπων usurpatur ab *Apostolo*; puerorum enim ætas improvida, qui nondum certæ rationis usum habent, paulo momento huc & illuc impellitur. Κυβερνᾶν ἀνθρώπων *Apostolus* appellat rationes hominum temerarias & fortuitas, quæ nullo certo consilio explicantur. Causas vero, quibus opinionem suam su-

perstrueret, nullas attulisse virum doctissimum videas, præter testimonia quædam, ex *SUIDA*, quæ significationem vocis *κυβος* & *κυβευειν*, non autem *κυβειας*. tradunt, hausta; ex quibus tamen parum præsidii ad Cl. *SALMASIUM* redundabit. Quamvis enim non inviti largiamur, *κυβευειν εν τω βιω*, præter rationem & cum periculo aliquid facere, Græcis dici, bene memores fragmenti illius, quod ex *Polybio* diversis vicibus retulit *SUIDAS*: *ὁ μὲν ἀλογισίαν καὶ μανίαν ἐφασαν εἶναι, τὸ παραβαλλεῖσθαι καὶ κυβευεῖν τῷ βίῳ, τῷ ἔστι παραλογῶς τι πράττειν καὶ εἰς φοκινδυνῶς*; nec inficiemur, *κυβευειν τοις πράγμασι* de illis dici, qui nihil ex certo destinatoque consilio agunt, sed incertis fortunæ casibus se suæque committunt. Præterea quoque, quæ hic opposita est, locutionem *ἀκυβεύον εἶναι*, cum ex mente *Antonini Imperatoris* eis *ἐαυτον*, *Lib. 1. §. 8.* qui ea utitur, denotare, qui firmo certoque proposito res suas conficit. Ista tamen omnia, re curatius examinata, ita comparata sunt, ut nihil ad explicationem *κυβειας* faciant, nec illam voci significationem concilient; cui præterea & autoritas idoneorum scriptorum, & textus inprimis *συναφεία* repugnat. Constat enim inter omnes, derivari *κυβείαν* à *κυβος*, quam vocem *SUIDAS* *πᾶν τετραγώνον* denotare ait, *ἢ voc. κυβος*. Licet autem tesseram aut cubum significet, à Græcis tamen, *ρητορικῶς πάνυ* loquentibus, ad fortunam periculumque, quod in alea obtinere consuevit, illud *κυβος* vocabulum fuit traductum: Eleganter hanc in rem *Author incertus* apud *SUIDAM* in *voc. κυβος* & *ἀδυναία*, *τῇ ἐρατῇ αὐδυναίᾳ ἔχοντος, ἀναρρίψαι κύβον πολεμῶ τοσούτῳ*; quem loquendi modum quam eleganter imitati sint Latini, hic excutere non convenit. Eundem fere in modum voce *κυβειας* Græci utebantur; cujus nativam significationem si spectes, jactum tesserarum aleamque, si metaphoricam, vafritiem & calliditatem, quam adhibebant aleatores, designabit.

Ver-

Vernacula lingua non inepte cum quibusdam das
 Würffel: Riepen appelles. Utramque significationem
 idonei scriptores calculis suis luculenter comprobant,
 à nobis deinde excitandi. Conf. *BALDUINUS*, ὁ
 μαχαρίτης, in *Comment. ad h. l. p. 907*. Inprimis vero, non
 multum sententiæ Cl. *Salmasii* tribuendum esse, inter-
 pretes Syrus & Arabs, quorum auctoritatem defu-
 gere non debemus, haud obscure suadent, textusque
 series jubet. Meminisse enim debemus, scopum
 Apostoli non esse, ut Ephesiorum temerarias & for-
 tuitas actiones, id quod Cl. *SALMASII* sententia
 invehere videtur, increpet juxta ac detestetur; sed ut
 animos illorum ab hæreticorum strophis tempestive
 præmuniat, riteque præparet, ne sibi ab aliorum
 calliditate imponi paterentur Ephesii, sed circumspe-
 cte agerent, astutiamque evitarent; non Gnostico-
 rum solum, quos *HAMMONDUS* in præf. *Epist. ad*
Ephes. (*HAMMONDUS* semper Gnosticos ab Apo-
 stolis innui & refutari, valde confidenter & in publi-
 cis scriptis & in familiaribus, quos cum amicis cæde-
 bat, sermonibus confirmavit, ut adeo ludibrium *Uf-*
ferio, aliisque doctis debuerit, notante *MOYNEO*
Observ. Sac. p. 598. adde *CLERICUM* in *Epist. Crit.*
p. 327. & *Cel. ITTIGIUM* de *Hæres. Ævi Apost.*
Secl. II. Cap. IX. p. 166. seqq.) hic denuo sibi reperis-
 se visus est; sed Judæorum quoque & Philosopho-
 rum, quæ probabilior *GROTII* ac *CLERICI* c.
 est sententia, inprimis, qui ex Pythagoræ schola pro-
 dierant; &, à quibus majus periculum imminebat,
 Pseudo-Apostolorum, quippe qui id unice intende-
 bant, ut decipere incautum, illique, aleatorum ad
 instar, qui homines nummis arte sua emungunt, fu-
 cum facere possent. Quæ præterea Cl. *SALMASIO*
 obstitit παραγίγας vox, quæ sequitur, nos à sententia
 non dimovet; usu enim receptum esse D. Paulo no-
 vimus, pleonasmò, non vitioso illo quidem, sed
 quem

quem numerosum appellamus & ἐξηγητικόν, suam orationem animare, vocibusque sæpe ejusdem significationis uti; provocamus saltem ad eundem, in quo versamur, versum, ubi Apostolus eleganti pleonasmō μεθοδεῖαν τῆς πλάνης conjungit, quibus, si sensum respicias, eandem rem Apostolus insinuasse videtur. **HESYCHIUS** enim hanc vocem τεχνᾶς interpretatur. **SUIDAS** in voc. μεθοδεύειν: μεθοδεύειν, τεχνᾶσθαι, ἐξαπατᾶν, & *Ephes. VI. 11.* Apostolus per μεθοδεῖαν διαβολᾶς, insidias, ἐπιβουλᾶς καὶ δολᾶς, intelligit. Non vacat, rem tralatitiam, & communi consensu comprobata, operosius roborare; illud tamen observamus, paria cum **SALMASIO G. CALIXTUM** in *Annot. ad h. l. Job. COGEEIUM* in *Comment, ad h. l.* aliosque, sentire.

§. V.

Nec mentem Apostoli affectus esse videtur **CL. CLERICUS**, ornamentum illud Bataviæ, quando in diversam prorsus ab aliis abiit sententiam, in notis, quibus *Hammondianas* in hunc locum observationes emendare annisus fuit, eandem confidenter valde ita explicans: *Vocem κυβείας, inquit, non male vertas sortilegium, si liceat uti voce inferioris ævi; hancque opinionis suæ interferit causam, quod plani talis seu sortibus ad divinandum uti consueverint. Quod ultimum momentum uti verissime ita se habet, & communi reconditæ antiquitatis consensu comprobatur, ita vereor, ut conjectura, tali tantum fundamento superstructa, ætatem ferat, aut calculum mereatur. Digna sunt, quæ commemorentur, CICERONIS verba, quando, Sortilegus, inquit, est, qui per sortes futura prænunciat, & quæ alibi Lib. II. de Divin. c. 18. in argumento non dissimili dicit: Quid fors est? idem propemodum, quod micare, quod talos jacere. &c. Novimus præterea, quæ viri eruditi de sortilegio, diversa ab*
Augu-

Augurio & Extispicio divinationis specie, plerisque gentibus familiari, monuerunt. Consulat, qui harum rerum desiderio tenetur, *BARTHIIUM* in *Animad. ad Statium T. III. 1341. & 1156. DOUSAM Juniolem in Præcid. ad Tibull. C. VIII. p. 432. ed. Zill. C. PEUCERUM de divin.* & ex antiquis *CICERO-NEM de divin.* & *VALER. MAXIMUM Lib. I. C. I. p. 6. ed. Hack.* inprimisque *BULENGERUM de Sortibus, ANT. van DALEN Dissert. II. de Oraculis. & Cl. STRUVIUM in Syntagm. Antiqu. de reb. Sac. p. 304.* ut reliquam testium nubem silentio involvamus. At mirari convenit, quod unica hac ratione suffultus *Cl. CLERICUS* significationem voci affinxerit & veteribus incognitam & nostro loco minus convenientem. Ad consensum scriptorum se provocare non posse, ipse doctissimus Vir non obscure confiteri videtur; quibus tamen non præcuntibus, talem cur accipiamus significationem, causa apparet nulla. Nec *EUSEBII* locus, *Hist. Eccles. Lib. IV. Cap. 11.* quem excitavit, negotium conficit, quandoquidem à nostris *Eusebium* stare partibus, copiosior deinceps dabitur evincendi locus. Quamvis autem præsidium sententiæ suæ aliquale in Etymo reperierit, res tamen ipsa loquitur, & consensu eruditorum comprobata est, nullam faciliorem esse conjecturam, quam quæ sola Etymologia nititur. Videatur vel ipse *CLERICUS in Arte Critica T. II. p. 130. seq. & in Dissert. II. Commentario in Genesin præmissa de Interpret. Script. S. 12.* ubi inter cætera ait: *Cavendum est, ne ex sola Etymologia ratiocinationes deducamus, ut faciunt quandoque Rabbini, qui paratas historiolas habent inde confectas.* Cum enim Etymologia nihil fallacius sit, ut propterea eam *αλαζονεία* vocet *GALENUS*, facile apparet, rationem ei superstructam incertam admodum fore. Non enim in sola nominis ratione interpreti acquiescendum esse, sed autoritatem etiam aliorum, usumque

in

in partes vocandum, & præterea ordinis ac συναφειας rationem habendam esse, pervulgatum quidem, sed prudens admodum graveque doctorum monitum est. Quod si enim viæ, à Cl. Clerico trita, insistere velimus, nescio, quem voci κυβειας sensum affingere possemus, & quid quæso obstaret, quo minus κυβειαν per molem quandam quadratam, fundamento τετραγωνω superstructam, exponendam censeremus, cum vox κυβος, ipso non diffitente Cl. Clerico, autore Suida παντετραγωνον denotet. Quæ tamen explicatio, tantum abest, ut aliqua veri specie se tueatur, ut potius & ludicra sit, & usui adversa, menti sigillatim Pauli in hoc loco plane contraria. Textus etiam rationem contra Cl. Clericum urgeremus, nisi eam supra satis occupassemus, & infra luculentius simus tradituri, ut adeo conjectura Cl. Clerici de significato vocis κυβειας magni non sit facienda, cum fallax sit nec legitimis nitatur fundamentis.

§. VI.

Pari ratione illi mente Apostoli excidisse videntur, qui cum BEZA in vers. h. l. vocem κυβειας proprie accipiunt, aleamque interpretantur, quam tamen sententiam ipse BEZA καλαρον δευτερον πλεν. (comp. de eleganti hujus παροιμιας ab aliis neglectæ usu, *Arist. Eth. Lib. II. C. IX. Synesius in Dione, Antonin. L. IX. εις εαυτον §. 8. & ad hunc Gatakerus in notis, inprimis Gyraldus de navigat. C. IX. p. 621.*) in quibusdam editionibus ita emendavit, ut aleatoriam ludificationem substituerit, si SUIZERO in *Thef. Eccles. voce κυβεια* fides habenda; tamen LEIGHIUS in *Crit. Sac. p. 361.* adversari videtur, quando ex mente Bezæ aleam illam ad incertos casus, quibus jactantur homines, & ad quasvis incerti eventus res deducit. In partes BEZÆ quoque abiisse videas DRUSTUM *Lib. VIII. Præter. & alios, quorum recensioem habent P O L U S,*

LUS, scriptor laude dignissimus, in *Syn. Crit. ad h. l.* & CRAUSERUS in *Phosph. N. T. p. 293.* quorum opinionem examinandam nobis sumeremus, si exiguae hæ pagellæ sufficerent, nec limites, quibus inclusi sumus, nimis angusti essent. Certi interim sumus, eam locum hic habere non posse, argumentis muniti, quæ partim jam delibavimus, partim adhuc subjiciemus. Neque porro multum desudamus in sententia *Th. DEMPSTERI*, *Scoti, in Paralip. Rosini p. 432. ap. Crauserum l. c.* excutienda, qui hic nescio quod periculum ac discrimen, quod hominibus immineret, à Paulo connotari, sibi & forte aliis persuasit, reclamante licet & vocis natura, & textus ratione. Parum præterea moramur *Guil. XYLANDRUM*, qui quamvis multam lectori spem de interpretatione vocis *κυβειας* fecisset, in *Observ. ad Anton. Imper. l. cit.* in eo tamen industria ejus substitit, ut verba tantum, & quæ antecedunt *κυβειαν*, & quæ sequuntur, explicaverit, ipsa voce relicta; ita enim, *D. PAULUS*, inquit, monet, *ut κυβειαν ανθρωπων caveamus, i. e. ne omni vento doctrina circumagi nos, & in errorem abripi patiamur.*

§. VII.

Quæ cum ita se habeant, nihil amplius restare videtur, quam ut nostram tandem, quam supra jam attigimus, proponamus plenius firmemusque sententiam. Ubi mittimus propriam significationem, qua *lusum tesserarum aleamque* denotat; ita enim *ARISTOTELES Lib. I. Rhetor.* &, ut reliquos taceam, *PLATO in Phædro*, qui etiam *περσειαν καὶ κυβειαν* sollicite distinguit, atque utriusque inventionem *Ægyptiis* tribuit, in quo momento eum secuti sunt ex veteribus *DIOGENES, de vit. Philos. Proæm. n. 2. p. 8.* & quos allegavit Authores *MENAGIUS in Observ. ad Laërt. l. c. p. 8. edit. Meibom. & PHAVORINUS in Lex. p. 1494.* Adde, si placuerit, *Th. HYDII, vi-*

ri in literis ac antiquitatibus Orientis apprime versati, *Commentarium*, nec ineruditum, nec invenustum de ludis *Orientalibus* L. II. §. 1. ubi diversa illa nomina, quibus aleæ ludus significatur, excussit; eam ita explicandam putamus, ut Apostolus respexerit ad *astutiam fraudesque aleatorum*, ac mores hominum denotarit, ad calliditatem, versutiam, ac decipiendum ea ratione compositos, qua agyrtæ & aleatores pueros nec usu nec judicio confirmatos, aut infimam multitudinem, rudem illam quidem, ludique ignaram, arte sua fortunis bonisque evertere, atque mira defraudandi libidine circumvenire alios, doloque suo ac malis artibus fallere consueverunt.

§. VIII.

Aleam autem non minus arti, quam fortunæ patuisse, lutoresque calliditate sua ac subdola animi nequitia, quod male ceciderat ex tesserarum jactu, emendasse pariter ac fraudulenter correxisse, non dubitare sinunt ea, quæ Cel. *BERGERUS* nuper admodum non sine exquisito diffusissimæ doctrinæ apparatu explanavit, cum aleæ veteris fraudem ipso Præside excutere mihi liceret. Quamvis vero otium nobis abunde factum videamus, temperare tamen nobis non possumus, quominus quædam adhuc eaque luculenta astutiæ aleatoriæ documenta ex eodem reperamus. Illustris ille, sed in vulgus notus, incerti authoris Trochaicus, *P. Syri* mimis annecti qui solet: *Aleator quanto in arte sua melior, tanto nequior*, non obscure comprobat, quanta calliditate usi fuerint aleatores, ubi aliis fallacias intendere satagebant. Celebre præterea est illud *Lysandri* dictum, Philippo Macedoni quod alii tribuunt, autore *ÆLIANO* *Var. Hist. Lib. VII. C. 12. p. 140. ed. Schef.* alii tamen *Dionysio Majori* assignari malunt, ut fecit *PLUTARCHUS* in *Lib. περι της Αλεξανδρου τυχης η αρετης λογ.*

λογ. α. qui tamen diffidentius rem agit, dum alibi in *Apophthegm.* p. 229. & *Vit. Lys.* p. 437. Lyfandro tribuit, monentibus *GATAKERO* l. *fapius cit.* & *SCHEFFERO* in not. p. 327. τες μεν παιδας κυβοις καὶ ἀσφαγαλοις, τες δε ἀνδρας ῥημασι καὶ ὀρκοις ἡξάπαλιν δει. *Comparentur DIO PRUSÆUS*, gravissimus scriptor, *Orat.* 74. p. 640. ed. *Lut.* 1604. *POLYÆNUS* Lib. I. alii.

§. IX.

Cum itaque hoc ludicri genus dolo fallendique artibus sapius confectum sit, idonei scriptores vocem κυβειας eo, quo nos, modo sunt interpretati. Locuples admodum gravisque testis est *SUIDAS* T. II. voc. κυβεια, qui ita, κυβεια, πανουργια, quam *Aristoteles* δεινολητα ἐκ ἐπαινελην esse ait; & *PHAVORINUS* in *Glossario* p. 1612. Κατεχρησαντο τη λεξει πανουργιας καὶ πανεργας οἱ παλαιοι, καὶ ἐπι τε ἐν κακοις νοημασι καὶ ἐργοις ἐνεπιβελε, & alibi. p. 1410. Αποπλανημα καὶ την ἀπαλην πανεργημα λεγασι. *IDEM* veterum scriptorum compilator, luculento non minus quam eleganti veritatis documento, nostram confirmat sententiam, ubi hanc glossam adjecit: Κυβεια, πανουργια, ἡ παιγνιον. Non aliter *PHOTIUS*, ἀνεκδοτος: Κυβεια, πανουργια. Rei summam declarant *Scholia Aristophanea Act. V. Sc. 3.* p. 277. ed. *Genev.* 1607. fol. nec minus eleganter *BOURDINUS* ad ejusdem *Thesmophor.* p. 770. & *GERARDUS* ad *Plut.* p. 6. E. Præclare præterea suffragatur *HESYCHIUS*, quando hanc in sententiam: Κυβευσαι, πηξαι, ταβλισαι, χλευασαι, quam ultimam vocem non incommode illudere, subsannare, decipere vertas. Ita enim *ARISTOTELES* Lib. II. *Rhet.* Ὁρῶντιζονται δε τοις καταγελωσι, καὶ χλευαζουσι, καὶ σκοπιουσιν. Et *PHAVORINUS* l. c. p. 1867. apposite: χλευαζω, χλευη, ἀπαλη, καὶ χλευασια. *Glossa.* ἀλαπος. lege. ἀλωπος, ἀλωπηκωδης, πανεργος.

§. X.

Quamvis vero hæc ita comparata sint, ut rem egregie declarent juxta & confirment, magis tamen exploratior reddetur, si consensus scriptorum, quos Ecclesiasticos vocamus, accedat. *EUSEBIUS* ex *IRENÆO* Lib. III. adv. Hær. de Marco quodam dicturus, mores hominis ingeniumque ad varias fraudes atque fallendi artes fuisse compositos, monet, quandoquidem μαγικῆς κυβείας ἑμπειροῦλος fuerit, id est, vertente Doctissimo Interprete, *H. VALESIO*, *magicarum prestigiary peritissimus*; nec aliam explicationem vel vocis ratio, vel etiam ipsa locutionis *Eusebij* series admittit. Dixerat initio de Cerdone, qui ex Simonis Schola ac disciplina profectus, Romæ novæ sectæ author pariter ac caput fuerat. Hunc excepisse Marcionem Ponticum, ait, Scholam latius propagantem, ejus tamen ἀποκρυφον ἔσαν καὶ λεληθυῖαν τὴν κακίαν denudasse *Irenæum*. Pari cum Marcione fraude atque malitia usum fuisse alium quendam, nomine Marcum, author est *IRENÆUS*, quæ verba Græce *Eusebius* elocuturus, μαγικῆς κυβείας eum peritissimum facit; manifesto indicio, non alio, quam hæctenus explicato, sensu vocem κυβείας accipi vel posse, vel debere. Magis disertè *THEODORITUS* ad hunc Apostoli locum p. 308. Τὴν κυβείαν, inquit, Πάυλος πανουργίαν καλεῖ. πεποιήσαι δέ, ita pergit, ἀπο τῆς κυβεύειν τὸ ὄνομα. Ἰδίον δὲ τῶν κυβευόντων, τὸ τῆδε κακείσε μεταφορεῖν τὰς ψήφας, καὶ τὸ τοῦ πανουργοῦ ποιεῖν. Similiter *CLEMENS ALEXANDRINUS* Lib. I. Strom. p. 290. διαλεκτικὰ ἀσκῆτας τεχνηδῆς, idque agentes, ut inani labore ex scriptura errores suos pallient, atque adeo fucum imperitis faciant, κυβείαν ἀνθρώπων atque πανουργίαν exercere, graviter insinuat. Non minus eleganter *CHRYSOSTOMUS* Homil. XI. in Ep. ad Eph. κυβευῆσαι λεγόνσαι, inquit, οἱ τοῖς πηλοῖς κεχρημένοι, τοῖς

τοὶ εἰσὶν οἱ πανεργοὶ , ἐπειδὴν ἀφελσεως τινὰς λαβῶσι. Et qui ex hoc fonte rivulos suos duxerunt , *Theophylactus* atque *Oecumenius*. Plura hanc in rem ut excitemus Patrum loca , exiguæ hæ pagellæ non ferunt ; adeat interim , qui desiderio eorum tenetur , *SUICERUM* , multæ variæque eruditionis atque acerrimi judicii virum , in elegantissimo libro , *Thesaurus Ecclesiasticus* qui vocatur , *voc. Ἀρχαῖος num. 3. T. I. p. 126. & ὠβεία T. II. p. 181.* cui multa nos debere , ingenuè profitemur.

§. XI.

Talmudicis quoque frequentis vox est קוביא , quam , ut multas alias , à Græcis acceperant , ita tamen , ut ab ea , quam insinuavimus , significatione non discesserint. De קוביא enim & קוביאסטוס h. e. *alea* & *aleatore* ita pronuntiant , ut utramque hic paginam fraudes & dolos facere existimasse videantur. Propterea *R. MAIMONIDES* aleatorem à furto & rapina proximè abesse pronuntiavit in *Traët. גזילה* seu *rapina* , quando ait : היסטח קוב קוביא הריזה גזלו i. e. *ludens aleis raptor.* in *Traët. Talmud. גזילה fol. 9. cap. 2.* קוביאסטוס & אנוב h. e. *fur & aleator* conjunguntur. Videatur *DRUSIUS* in *Bibl. Critic. Tom. V. pag. 611.* *BUXTORFIUS* *Lex. Talm. Rabb. voc. קוביא & GROTIUS p. 45.* Quæ res , quamvis non levem nostro asserto fidem faciat , majus tamen robur collocamus in consensu interpretum , imprimis antiquiorum , Arabis videlicet , & qui maximæ autoritatis est , Syri. Huic enim versioni tantum tribuitur à nonnullis , ut eam ab Apostolico quodam viro , adhibitis in consilium Apostolis , elaboratam esse arbitrentur. Vide *B. FRANZII* elegantissimum librum de interpretatione *S. Scriptura* , ap. *Crenium* in *Musæo p. 287.* junge *TRMELLIUM* , *Jac. MARTINI* in
F f 2 *pref.*

praf. ad N. T. Syr. & FABRICIUM in dedic. Reliqu.
Syr. Hi enim doctrinam fallacem, astutiam, versuti-
 amque exposuerunt, quorum auctoritatem declinare
 cum non consultum videatur, in illis fundamentum
 præsidiumque sententiæ nostræ nos reperisse putamus.
 Ita enim accepit *D. AUGUSTINUS De Civ. D.*
Lib. XXII. c. 18. integrum incisum latine sic exhibens:
ut ultra non simus parvuli, jactati & circumlati omni vento
doctrinæ, in illusione hominum, in astutia ad machinationem
erroris. Nec abludit vetus Interpres, qui per *nequiti-*
am exponit, Gallus obsoleta voce *piperie*, alius magis
 eleganter *finesse, tromperie*, Italus *Malvagita d' huomini*,
 & *ERASMUS* commodius *versutiam aleatoriam*, op-
 time vero *D. LUTHERUS* *Schälcheit der Menschen*,
 reddiderunt. Consensum aliorum quorundam, qui
 Commentariis suis *N. T.* illustrarunt, hic exponere
 non juvat, quandoquidem eo labore viri doctissimi
POLUSI. c. LEIGHIUSI. c. CRAUSERUSI. c.
 jam pridem defuncti sunt. Adeundum tamen in-
 primis suaserim *CANTERUM*, cujus verba notio-
 nem *κυβερια ανθρωπων* luculenter exponentia, inserta
 leguntur *collectioni Adagiorum* absolutissimæ, uti voca-
 tur, sub titulo *Versutia* p. 360. ed. *Wechel. 1643.*

§. XII.

Atque hæc est insignis illa metaphora, quam
 orationi suæ inseruit Tarsense Oraculum; duæ prio-
 res, quibus utitur, non minus elegantes sunt. Alte-
 ra sumta est à puerulis, levibus quibusque rebus fa-
 cile, ad quodcunque volueris, pelliciendis. Altera à
 navibus, gubernatore destitutis adeoque *ἀναγκιστοῖς*, &
 quovis vento facile ad scopulos allidentibus. Tertia,
 ut *FLACIUS* in *Gloss. Comp. N. T.* pag. 942. ait, à
 fraudibus aleatorum hausta, qui habent *Singularia qua-*
dam compendia fallendi imperitos collusores. Confer præter
FLA-

FLAGIUM, CALOVIUM l. *supra* laud. & **GATAKERUM**. Omnia vero hunc in finem ab Apostolo disputantur, ut in doctrina, quam semel erant amplexi, confirmentur Ephesii, sibi que cavere discant ab Hæreticis, *iv* (Præpositio *iv* sæpe pro *per* usurpari, præter **GROTIUM** ad h. l. & **GLASSIUM** in *Phil. Sacr. p. 1039*. ostendunt **PFOCHENIUS** in *diatribe de Pur. Stylo N. T. Sect. 63.* & **GATAKERUS** in *Diff. de Styl. N. T. c. 18. p. 114. Opp.*) τῇ κυβείᾳ, *per præstigias suas*, malasque artes, imperitos, nimisque credulos, ac disciplinam Christianam non satis edoctos, qui decipere, irretire ac circumvenire consueverant. Ut adeo integri commatis sensus, serie orationis paulo altius repetita, huc fere redeat : „ Omnibus nobis eo enim, tendum est, ut omnes ad eandem perveniamus finem, & in viros evadamus, eamque attingamus ætatem, ut adulti plane in Christi doctrina, eaque firmiter eruditi videamur; ita enim fiet, ut tuti ab eo infelicitatis genere vivamus, quod hac tempestate multis contingere dolemus; qui scilicet, infantes adhuc cum sint, & nimia levitate instabiles, ac sine justo pondere jactati, instar navium, omni doctrinæ vento circumferuntur, modo ad hanc, modo ad aliam doctrinam amplectendam proni propensique, illudente illis astutia hominum hæreticorum, qui more, aleatoribus non dissimili, id agunt, ut dolis ac præstigiis suis nos adorianut, pariter ac nequitiam suam fraudis dissimulatione tegant, illaqueant etiam, atque ad disciplinam suam, fraudum & insidiarum plenissimam, alliciant.

T A N T U M.

IV.

J. R. S. V. D. M.

Emendatio & Explanatio

loci ex Epistola

FIRMILIANI

AD

CYPRIANUM

in Quæstionem :

An Heretici sint rebaptizandi?

nec non

Emendatio Loci cujusdam

ex FL. JOSEPHO.

Argumentum.

§. I. Epistolæ Firmiliani occasio. §. II. Locus in ea explanandus. §. III. Rigaltii emendatio rejecta. §. IV. Alia profertur, §. V. & ex Vetere Theologia de Differentia *Catechumenorum* & *Baptizatorum* adstruitur. §. VI. De diverso statu eorundem post mortem. §. VII. Narratio *Perpetuæ Mart.* de Dinocrate post mortem ex tormentis liberato. §. VIII. Augustini de hac narratione sententia excutitur. §. IX. Quid Ecclesia Antiqua de statu *Catechumenorum* absque baptif.

baptismo defunctorum senferit, indagatur. §. X. Cypriani verba exponuntur. §. XI. Pro quibus mortuis olim deprecationes & sacrificia fuerint oblata? §. XII. Quales fuerint illæ oblationes? §. XIII. Interpretes Justini M. notati. §. XIV. Quando & quo fine oblationes & orationes pro mortuis factæ sint? §. XV. *Passio SS. Perpetuæ & Felicitatis* examini subicitur. §. XVI. Collector istius monumenti fuit Montanus vel assecla quis Montani. *Nova Prophetia* Montanistarum tessera. §. XVII. Montanistarum martyria quando & qua ratione a Catholicis fuerint probata? Auctoritas hujus Monumenti & Narrationis cadit. §. XVIII. Quænam illa *Gratiæ Consummatio*, quam juxta Firmil. & Cypr. Catechumeni sine baptismo defuncti non assequebantur? *Commeatus delinquendi*, apud Tertullianum, explicatur. §. XIX. Locus 1. Petr. 3: 21. exponitur; ἐπερωτησῖα non significat *stipulationem*, sed responsionem vel promissum. §. XX. Baptismi accepti emolumentum. §. XXI. Diversi Gloriæ cœlitum Gradus. §. XXII. Locus *Fl. Josephi* emendatus.

§. I.

IN optimis S. Cypriani editionibus occurrit *epistola FIRMILIANI* *Cesareæ Cappadociæ Episcopi*, ad *CYPRIANUM*, græce forte scripta, a Cypriano vero latinitate donata; in qua Firmilianus omnem movet lapidem, ut suis & Cypriani in unum congestis argumentis, adstruat novi vel iterati baptismi necessitatem eorum respectu, qui olim hæretici, relicto errore, Ecclesiæ Catholicæ se addituri erant. Vulgo enim

notum, tum temporis litem de hæreticis rebaptizandis plurimas orbis Romani Ecclesias turbasse. Hunc novum baptismum vel rebaptismum Ecclesiæ Orientis & Africanæ mordicus tuebantur: Romana vero Ecclesia cum aliis quibusdam eundem repudiabant. At quamvis utraque pars & Conciliis & argumentis placita sua tuebantur, modestia tamen priores longe præpollebant, quippe qui (ut ex præfatione Concilii Carthaginensis patet) verbis conceptissimis declararunt, se neminem ob hanc litem judicatu-ros, multo minus a jure Communionis aliquem, si diversum senserit, amoturos, sed cuivis hac in re libertatis & potestatis suæ arbitrium concedere. *STEPHANUS* vero non eadem indulgentia agendum putavit, quin per Epistolas significaret, se nolle cum Cypriano nec Firmiliano, aut cæteris illius sententiæ sociis Episcopis, communionem colere. Quod Firmiliano occasionem præbebat, Sedis Rom. Episcopi typhum in hac Epistola acriter perstringendi & retundendi.

§. II.

Postquam Author hypothese-
sin suam optimis ut
potuit argumentis firmasset, ad
diluendas pervenit ob-
jectiones. *Quid ergo, inquiunt,*
(nimir. contrariæ opi-
nionis Patroni) *fiet de his, qui ab hæreticis venientes sine*
Ecclesiæ baptismo admissi sunt? respondet *FIRMILIA-*
NUS; *si de Seculo excefferunt, in eorum numero, qui apud*
nos Catechizati quidem sunt, sed priusquam baptizarentur
obierunt, habentur. Hactenus omnia expedita, sed non
ita se habent reliqua, sic enim pergit: *Non modo di-*
cunt, emolumentum veritatis & fidei, ad quam relicto erro-
re pervenerant, etsi consumationem gratiæ consecuti non sunt,
morte præventi. Quæ manifesto absona sensu carent?
interim tamen omnes Codices in hac lectione con-
sentire testatur *Rever. FELL, Oxoniensis Episcopus,*

§. III. R I.

§. III.

RIGALTIVS medicam manum afferre conatus per additionem verbi *habent*, quod, non intellecta reduplicatione præcedentis, excidisset; ideoque scribendum censet: *in eorum numero qui apud nos catechizati quidem sunt, sed priusquam baptizarentur obierunt, habentur. HABENT*, non modo discunt, emolumentum fidei &c. q. d. eos qui apud Orthodoxos catechizati quidem sunt, sed priusquam baptizarentur obierunt, non tantum didicisse, verum etiam habuisse emolumentum veritatis & fidei, vitæ scilicet æternæ, quamvis consummationem gratiæ consecuti non sint. Consummationem gratiæ vocari Sacramentum Baptismi, ita Illustr. **RIGALTIVS**. Sed, venia magni Viri, rem non acu tetigisse mihi videtur. 1. contra Mss. fidem lacunam statuit. 2. odiosa illa repetitio *habentur & habent*, nec **CYPRIANI** stilum redolens. 3. contra fidem ex *dicunt* facit *discunt*, 4. nec aridet phrasis *emolumentum fidei discere*.

§. IV.

Alia igitur ineunda via, ut absque lacuna, litterarum ductui inhærentes, scripturæ tantum compendium vel abbreviationem statuamus. Ita vero exaratum fuisse puto: *Non modic. cunt emolumentum. i. e. Non modicum capiunt emolumentum veritatis & fidei, ad quam relicto errore pervenerant, &c.* Hoc modo si legas, non litterarum tantum vestigia retinentur, sed ad sensum omnia clara, veterique Theologiæ imprimis consentanea erunt. *Non modicum* inquit *capiunt emolumentum*; minime ergo *omne*, & distant aliquantisper à *gratiæ Consummationem* per baptismum *Consecutis*, agnita autem veritas & fides desiderato fructu non penitus caret.

§. V.

Passim notum, magnam inter Catechumenos & Baptizatos fuisse differentiam, quæ posterioribus se-

culis immensum quantum augebatur ; Cum priores, etsi eorum conditio gentilium longe potior habebatur, nondum per baptismi lavacrum regeneratis pares censerentur, & quasi adhuc sub reatu constituti, a precibus publicis, ab auditione Religionis mysteriorum, quin ipso aspectu Baptismi & Coenae arcerentur : denegabatur iisdem dulce fratris nomen, quippe coelestem genituram nondum adeptis. Ut igitur introitus in Ecclesiam per baptismum dabatur, quippe qui peccatorum remissionem & spiritum sanctum conferebat, ita demum Evangelii promissionum participes evadebant, qui ejus unda lustrati erant. Sequitur, ut qui absque sacro hoc lavacro è seculo excefferint, non quidem gentilium, vel aliorum Christi & Salutis notitiam non genuine habentium, tristem sortiantur exitum : prout nec in hoc ævo agentes iisdem accensebantur, quin tanquam in Ecclesiae atrio constituti, Evangelico lacte nutrentur, precibusque, imo sæpe manuum impositione & crucis signaculo fruerebantur : etiam in futuro seculo *non modicum* agnitæ veritatis & fidei capturi emolumentum. Aqua æquissima sententia plures posteriorum seculorum Doctores longe deviarunt. Author *Quæst. & Respons. ad Orthodox.* qui JUSTINI M. operibus annectitur, (quamvis sit serioris ævi, cum Christianismus jam in orbe Romano prævaleret, ut ex *Quæst. CXXVI.* palam est, nisi forte hic liber ex diversorum Authorum scriptis compilatus sit ;) is autem qualiscunque sit, demortuos, lavacro baptismi non tinctos, omni fidei emolumento privare videtur ; Responsione enim ad *Quæst. LVI.* sic loquitur : αὐτῇ ἐστὶ διαφορά τῶν βαπτισθέντων πρὸς τὰ μὴ βαπτισθέντα, τὸ τυχεῖν μὲν τὰ βαπτισθέντα (intellige βεβήφη) τῶν διὰ τῆ βαπτίσματος ἀγαθῶν, τὰ δὲ μὴ βαπτισθέντα, μὴ τυχεῖν. Quod enim de infantibus, id etiam de adultis statuisset censendus est.

§. VI.

Haud immerito igitur quæritur : qua in re, maxime post mortem, baptizatis extiterint inferiores ? Si cum poenitentibus conferantur, forte de comparatione jure queri non poscunt. Poenitentium vero & lapsorum, cum stantibus & maxime Martyribus hanc CYPRIANUS instituit comparationem ; aliud est, inquit, ad veniam stare, aliud ad gloriam pervenire ; aliud missum in carcerem non exire inde donec solvat novissimum quadrantem, aliud statim fidei & virtutis accipere mercedem : aliud pro peccatis longo dolore cruciatuum emundari & purgari diu igne, aliud peccata omnia passione (ita etiam baptismo) purgasse : aliud denique pendere in die judicii ad sententiam Domini, aliud statim a Domino coronari. In Epist. ad Antonian : quæ Edit. Noviss. est LV. Pamel. LII. quæ verba si de statu morte functorum intelligenda, ut putat PAMELIUS, & ex nostris DODWELLUS in Dissert. Cyprian, nobis exhibent statum quendam tertium, a beatitudine & dampnatione æterna plane distinctum, in quo anima, pro conditionis suæ sorte, carceri quasi mancipata imo cruciatibus vexata & igne, æva degeret ; vel saltem vaga & inquieta, usque ad ultimi judicii sententiam, de defensione sua trepidaret,

§. VII.

Quod vero non vane conditionem salutari lavacro non tinctorum & poenitentium haud multo disparem dixerim, patebit ex iis, quæ ex *Passione S. Perpetuæ & Felicitatis*, (quæ haud multo plus 50. annis ante Cyprianum, forte in eadem Carthagine, Martyrio consummatæ fuere :) etsi longiora, hic apponam. Post dies paucos, sunt verba PERPETUÆ MART. dum universi oramus, subito media nocte oratione profecta est mihi vox & nominavit DINOCRATEM. Et obstupui, quod nequaquam mihi in mentem venisset nisi tunc,

& dolui commemorata casus ejus, & cognovi statim, me dignam esse, & pro eo petere debere, & capi pro ipso orationem facere multum, & ingemiscere ad Dominum. Continuo ipsa nocte ostensum mihi est hoc in Oromate. Video DINO-CRATEM exeuntem de loco tenebroso, ubi & complures erant, astuantem & sitientem valde, sordido vultu, & colore pallido, & vulnus in facie ejus, quod cum moreretur habuit. Hic DINOCRATES fuerat frater meus carnalis annorum septem, qui per infirmitatem facie cancerata male obiit; pro hoc ego orationem feceram; & inter me & illum grande erat diadema, (dialtema) ita ut uterque ad invicem accedere non possemus; erat deinde in loco, ubi Dinocrates erat, piscina plena aqua, altiorem marginem habens quam erat statura pueri, & extendebat se Dinocrates quasi bibiturus; ego dolebam, quod & piscina illa aquam habebat, & tamen propter altitudinem marginis bibiturus non esset; & expectata sum & cognovi fratrem meum laborare - & orabam pro eo. &c.

Hunc puerulum etsi Patris gentilis filium, aliqua Christi cognitione imbutum verisimile, nisi cum quis malit sororis pietate infernalibus tormentis creptum, quod ego asseverare non ausim. Eundem tamen absque baptismo mortem obiisse, multa, ut infra patebit, suadent, qui emolumentum veritatis & fidei aliquod habuit, quia non in gehennam detrusus fuerat: at gratiæ consummationem minime consecutus, verum carceri mancipatus, longo cruciatuum dolore emundabatur, ac vix enixis Perpetuæ sororis precibus inde liberatus & refrigeratus; ita enim PERPETUA: Die autem, quo in nervo mansimus, ostensum est mihi hoc: video locum illum, quem videram tenebrosus, esse lucidum, & DINO-CRATEM mundo corpore, bene vestitum, refrigerantem: & ubi erat vulnus, video cicatricem, & piscinam illam, quam retro videram, summisso margine usque ad umbilicum pueri, & aquam de ea trahebat sine cessatione, & super margine phiala erat plena aqua, & accessit Dinocrates, & de ea bibere cepit.

capit, quæ phiala non deficiebat : & satiatuſ abſceſſit, de aqua ludere more infantium gaudens, & experrecta ſum. Tunc intellexi, translatum eum eſſe de pœna. Paſſ. S. Perpet. & Felic.

§. VIII.

Intercedit AUGUSTINUS, qui *Lib. I. de Origine animæ, Cap. 10. & Lib. III. Cap. 9.* (citatus à Doctiſ. RUINARDO) putat, *Dinocratem* propter peccata quædam, poſt baptiſmum commiſſa, tales perſuuliſſe pœnas. At pace tanti Viri, id vero ſimile non eſt; puerulus ſeptem annorum erat cum vita fungeretur, at ſoror ejus *Perpetua* viginti duorum annorum, nupta, & mater filii ad ubera, nondum baptiſmo decorata eſt, itidem frater *Dinocratis* longe eo provectioris ætatis adhuc Catechumenus, &, hac *Paſſione* teſte, viva *Perpetua* nunquam baptizatus; nam cum illa a vacca fera in amphitheatro jactata fuiſſet, & menti reſtituta, accerſitum fratrem Catechumenum allocuta eſt, &c. *Perpetua* autem demum, cum in perſecutorum manibus eſſet, ſalutari hac unda dignata fuerat. Objici forte poteſt, morbo urgente *Dinocratis* baptiſmum acceleratum fuiſſe; Verum nec hoc plauſibile in familia cujus caput & pater familias gentiliſ & Chriſtianiſmi hoſtiſ ita profeſſuſ, ut etiam *Perpetuæ*, quod illam ab hac religione avertere non poterat, oculos eruere tentaret, narrante ipſa ab initio paſſ. ſuæ. Excipiunt S. Auguſt. deſenſoreſ, Patre excepto, univerſam familiam Chriſto fuiſſe dicatam, quod verbis *Perpetuæ* probare conantur, & ego dolebam inquit canoſ patris mei, quod ſoluſ de paſſione mea gaviſuſ non eſſet, de toto genere meo. Sunt hæc diſquiſitione aliqua digna. In monumento Martyrii *Perpetuæ* mentio fit Marriſ ejus & duorum fratrum præter *Dinocratem*; de matre ſemel tantum, quo tempore *Perpetua* in carcere conſtituta de puero ſub ubere ſolicita, matrem ad ſe venientem alloquebatur: non tamen

men ut Christianam, statim enim de fratre subjungitur, *confortabam fratrem, commendabam filium*; erat autem is frater catechumenus, de quo supra; alterius vero fratris nullum vestigium exstat, nisi in limine hujus Passionis. *Vivia Perpetua honeste nata, liberaliter instituta, matronaliter nupta, habens Patrem & matrem & fratres duos: alterum aque Catechumenum* (nimir. ut ipsa) *& filium infantem ad ubera*. Mirum autem esset, universam familiam in hac Martyrii Scena ita Christianissimum suum dissimulasse, ut ne scintilla ejus appareat, nisi in eo, quem statim in limine ut Catechumenum tantum nominasset. At sperat, excepto Patre, totum suum genus de passione sua gavisurum, sperat inquam, de futuro, sive visione monita, sive quod matrem & alterum fratrem causæ suæ faventiores sensisset. Laborat igitur Dinocratis baptismus, & præter allata, eo maxime, quod Perpetua admissio hoc baptismo, nunquam ita plane fratris sui parvi oblivisci potuisset, prout dicit: *Nominavit Dinocratem, & obstupui, quod nequaquam mihi in mentem venisset nisi tunc*. Cum pro more tunc temporis recepto, nomine ejus sacrificium pro dormitione forte singulis Dominicis fieri oportebat, cujus cura proximos tangebatur. Hypothesi ergo inserviunt S. AUGUSTINUS, & qui eum sectantur, factum *Perpetuæ* pro fratris refrigerio orantis, Orthodoxæ & Theologiæ sui ævi adaptantes, quod sæpe omnium sectarum Theologos transverfos rapit.

§. IX.

Ex hoc igitur monumento, & ex verbis CYPRIANI supra allegatis, expiscari posse videtur, quid Ecclesia primitiva, vel saltem nobilis ejus pars, Ecclesia nimirum Africana, senserit *de statu absque baptismo defunctorum*; quæ ad sequentia redigi possunt. 1. Eos damnationis æternæ ereptos, beatitudinem expectare posse, ideoque non modicum fidei emolumentum capere.

a. Dein-

2. Deinde in quodam quasi carcere, majoribus vel minoribus incommodis, ut & cruciatibus, saltem ad aliquod tempus, brevius vel longius degere, pro ratione haud dubie poenitentiae & fidei suae. 3. Superstitum deprecationibus inde liberari & refrigerio quandoque mastrari.

§. X.

Verum multa extorquent, ut saltem *Cyprianum* & *Firmilianum* maxima ex parte ab hac philosophia liberare cogamur. Quia juxta eorum scripta nec publicas deprecationes aut oblationes pro demortuis absque baptismo unquam admittebant, nec de privatis ullum vestigium apud illos extet; imo verba CYPRIANI ipsa supra allegata, probe expensa, de statu animarum nequaquam intelligenda videntur; solum ostendunt, quanto potior sit conditio stantium & Martyrum, pra poenitentibus & lapsis in seculo degentibus; ita enim ea & optime παραφραζει Doctiss. RIGALTIIUS: Disputat, inquit, CYPRIANUS de lapsis, ad poenitentiam, h. e. ad veniam & Ecclesiam, recipiendis. Nam post impetratam poenitentiam, ea recte peracta, poenitentibus venia datur, pax & communio redditur lapsis, ac varias quidem intercedere ait circumstantias & figuras delictorum, pro quibus Episcoporum arbitrio temperari poenitentia debeat. Hoc tamen interesse, quod cum libellatis mitius agi debere multa suadeant. Contradicebant Episcopi non nulli, - quod laxata semel disciplina regula, maximum sequeretur Ecclesiae detrimentum; - Nam quis deinceps pro nomine Christi martyria non fugiat, - qui lapsis poenitentiae tempus concedi debere intellexerit? Hoc vero non ita metuendum esse *Cyprianus* ait. Etenim longe aliam conditionem esse lapsorum, quam Confessorum Martyrum. Hos statim paradiso recipi, de gloria, de mercede, de corona certis: Illos ad veniam

„ niam stare anxios & sollicitos , quid statuat Episco-
 „ pus, & an pœnitentiæ tempus indicat tam longum,
 „ quam esse solet debitori carceris tedium, unde non
 „ exeant, donec solvant novissimum quadrantem? an
 „ forma pœnitentiæ futura sit tam atrox, ut per cine-
 „ res & pulverem volutari, per jejuniorum tristitiam,
 „ perque ciliciorum asperitatem macerari, per gemitus
 „ & suspiria , cordis exæstuantis dolorem clare
 „ loquentia, velut metallum ignibus ardentissimis ex-
 „ coqui ac purgari debeant? & post hæc omnia tan-
 „ dem, aut si qua infirmitas urserit, ægre recepti, in
 „ diem judicii, ad sententiam Domini pendeant re-
 „ servati, ita ut sine spe viva tremantes & Dei judici-
 „ um paventes ex seculo migrare cogantur. Nec ali-
 „ ter intelligi potest CYPRIANUS, quippe qui lo-
 „ cum aliquem medium inter mortem & immortalita-
 „ tem plane ignorat, ut ex tractatibus *de Mortalitate &*
ad Demetrianum patet; cujus *posterioris Epilogum* ita in-
 „ cipit: *Quando istinc excessum fuerit, nullus jam pœnitentiæ*
locus est, nullus satisfactionis effectus; h'c vita aut amittitur
aut tenetur. Et tantum abest, ut sine baptismi lavacro
 exeuntibus, carcerem, ignem vel qualescunque cru-
 ciatus paratos credat, ut etiam gentilibus sub viræ
 exitu ad Christum conversis, beatam immortalitatem
 addicat: *Tu sub ipso licet exitu & vitæ temporalis occasu,*
inquit, pro delictis roges, & Deum, qui unus & verus est,
confessione & fide agnitionis ejus implores, venia consenti
datur & credenti indulgentia salutaris de divîna pietate con-
ceditur, & ad immortalitatem sub ipsa morte transitur. ibid.

S. XI.

Nec deprecationes aut oblationes pro mortuis
 huic dogmati contrariantur. Ejusmodi enim solen-
 nes deprecationes & sacrificia pro iis tantum perage-
 bantur, qui in omnigena Ecclesiæ communione &
 pace obierunt, & quibus mori erat ad Christum ire,
 ut in *de Mortal.* loquitur, ergo pro vere piis aut qui
 saltem

saltem pro talibus habebantur, præcipue autem pro Martyribus, qui tamen ad complexum & osculum Domini, Domino ipso gaudente, venerunt. *Epist. XXXV. & X.* Denegabatur autem non tantum impœnitentibus, aut iis qui extra Ecclesiæ pacem, aut ante baptismum, etsi morte præventi, è seculo exceſſerunt. Sed etiam iis, qui contra Episcoporum Constitutiones alicujus delicti tenebantur, prout ille *Victor*, qui testamento presbyterum tutorem constituit. *Non est*, inquit *CYPRIANUS*, quo pro dormitione ejus apud nos fiat oblatio, aut deprecatio aliqua nomine ejus in Ecclesia frequentetur. *Epist. I.* Ex quibus patet, hæc solennia minime celebrata metu aliquo, quod spiritus vel animæ eorum felicitate æterna non fruantur; *Martyrum* enim *Commemorationes*, & *orationes pro anima defunctorum*, ejusdem generis erant; utræque enim in suis anniversariis peragebantur, sacrificiis utræque comitatæ erant, ob id etiam a *TERTULLIANO* in eundem censum relatæ; *Oblationes pro defunctis, pro natalitiis (Martyrum) annua die facimus. de Coron. Milit.* Quod etiam ex harum oblationum naturâ clarescet, de qua aliquid dicendum.

§. XII.

Temporibus, quibus Ecclesia, dives gratiâ, redivitibus vero pauperrima erat, fideles Authore *D. PAULO 1. Cor. XVI.* singulis dominicis varia dona in Ecclesiam ferebant, idonea tam ad *S. Coenæ* celebrationem, quam ad sustentationem cleri & pauperum; pars quæ *S. Coenæ* utilis erat, per manus presbyteri *Sacramento solito prædicationis offerebatur*, ut cum *Cypriano* loquar. Unde haud dubie factum, quod augusta illa *Coena & Sacramenti & Sacrificii* nomine gauderet. Posterius ostendit idem *CYPRIANUS*, qui *Matronam* divitem sed avaram ita perstringit: *Locuples & dives es, & Dominicum celebrare te credis, qua corbonam omnino non respicis, qua in Dominicum sine sacrificio venis,*

Tom. III

Gg

qua

quæ partem de sacrificio , quod pauper obtulit, sumis. Tr. de Opere & eleemos. Dominicum celebrare est S. Coenam celebrare, edendo nimirum de oblatione vel sacrificio, quod pauper obtulit ; in Dominicum venire, est in ædes sacras venire. Altera vero pars per manus Diaconi recipiebatur, & in Ecclesiæ usus adhibebatur, quæ & ipsa προσφοράς sive oblationis nomine veniebat, ac in usum Cleri, qui in honore sportulantium fratrum erat, CYP R. Epist. I. cæterorumque, ut & pauperum & viduarum, cedebat, teste JUSTINO, Apol. I. §. 88. edit. Grabii.

§. XIII.

Cum hic JUSTINI M. & προσφοράς mentio fiat, forte non inutile erit, observare, quod ejus Interpr. sæpe credant, *Justinum* de hisce oblationibus verba facere, quum ne id quidem cogitet. Ut Apol. I. §. XVI. de sui ævi Christianis, *Athei non sumus*, inquit, (prout accusabantur, quia sacrificare renuerent) qui Condito-
torem hujus universi colimus, minime quidem sanguine & incensis indigentem, λόγω δ' εὐχῆς καὶ εὐχαριστίας. ἐφ' οἷς προσ-
φερόμεθα πᾶσιν ὅση δύναμις αἰνέτες. Quod ita reddunt : in oblationibus, quas asserimus omnibus, quantum facultatis est laudantes. Ad quæ verba Doctis. GRABE in notis addit: intelligit JUSTINUS oblationes panis & vini in Sacramento Eucharistiæ. Minime vero, alius plane sensus verborum est: non sumus Athei, inquit, Condito-
torem hujus universi colimus, non sanguine quidem & incensis, quibus non indiget, sed precibus & gratiarum actionibus, propter vel super omnes cibos quos capimus, quantum possumus eum celebrantes. Duplici hallucinatione, particulam adversativam δὲ ante εὐχῆς omiserunt, & verbum προσφέρω, admoveo, hic male pro offero, sumserunt, cum προσφέρωμαι haud dubie hic significet cibum capio, ut de Cicerone PLUTARCHUS, ὅψε τῆς ἄρας προσφερόμενος, sero in die cibum capiens ; &
idem

idem de Cæsaris militibus, εἶζαν τινὰ κίπλους καὶ γάλακτι φερῶντες προσφέροντο, in Cæs. σιτία καὶ πόλα προσφερόμενος, cibum potumque, eundem nimirum, quem cæteri milites, capiebat, Severus apud HERODIAN. Lib. II. Hinc τὰ προσφερόμενα, cibi apud LÆRTIUM in Xenoph. & προσφορήματα apud EURIPID. πολλὰ δαιτὶ προσφορήματα, in Electra. Verba, quæ apud JUSTINUM M. statim sequuntur, Interpr. de errore monere potuissent. Cum hunc honorem, ita pergit, illo (Deo) dignum esse acceperimus, ut quæ ab illo ad alimentum sint creata, non igne consumamus, ἀλλ' αὐτοῖς καὶ τοῖς δεομένοις προσφέρειν. i. e. sed in nostrum & indigentium usum convertere. In eundem lapidem iidem Interpr. sæpius impingunt, sed non soli.

§. XIV.

Sed ut redeat unde digressa est oratio ; pro mortuis offerebatur, quando singulis Dominicis, vel anno recurrente, nomine mortui etiam oblatio per parentes vel amicos ejus fiebat, inter præsentes viritim distribuenda. Id obtinuit ut indicarent, non omnia hominis morte absunta, sed potissimam ejus partem vivere, nec per mortem avulsam Ecclesiæ membrum esse, sed vivos & mortuos in Christo ut capite unitos, unam eandemque Ecclesiam Dei constituere, ac in ea vivere ; oblationibus hisce addebantur preces & commemorationes, quarum summam ex TERTULLIANI verbis colligere possumus : Enimvero (vidua relicta) pro anima ejus (defuncti mariti) orat, & refrigerium interim postulat ei, & in prima resurrectione consortium, & offert annuis diebus dormitionis ejus. De Monogam. Quid vero his orationibus intenderint, Tertullianus optime ostendit, quando has deprecationes vel potius orationes ideo producit, ut viduas superstites doceat, matrimonium morte non directum, nec repudium esse cum eo, pro quo adhuc oret, nam nisi hæc

fecerit, inquit, i. e. memoratas oblationes & preces, tunc vere repudiavit quantum in se est. ibid. & paulo post addit, aut nunquid nihil erimus post mortem, secundum aliquem Epicurum, & non secundum Christum. Habebant igitur eundem finem cum sacrificiis quibus sociatæ erant, ad demonstrandum unam & eandem Dei Ecclesiam esse, quæ in terra incolaret, & eam quæ in supercœlestibus degeret, utriusque etiam vota & desideria amice conspirare, ut militantis Ecclesiæ emolumentum Triumphanti curæ, ita etiam illi hujus consummationem cordi esse. Sed qualia desideria vel vota attribuentur membris Ecclesiæ triumphantis, cum sint spiritus *τελειωμένων*, *Hebr. XII. 23*. Sunt perfecte beati, h. e. in statu felicissimo, ad quem spiritus a corpore separati, stante adhuc Ecclesia militante, pervenire possunt? At iidem spiritus glorificati, non plane afflictionum Ecclesiæ in hoc mundo commorantis ignari, desiderio tenentur interitus Regni tenebrarum, collectionis omnium fidelium, accelerationis ultimi iudicii & gloriæ consummationis totius hominis. Rem mire illustrat Locus *Apocal. VI. 9-12*. ubi animæ Martyrum a Deo vindictam sanguinis sui, quasi dilationis pertæsi, postulantes, nobis sistuntur: quibus stolis albis interim indutis responsum est, (*ecce refrigerium*) ut adhuc breve tempus quiescant.

§. XV.

Quum igitur in eruenda Ecclesiæ primitivæ vel saltem Africanæ sententia, respectu status ante lavacrum mortuorum, prout eum superius posui, a Cypriano & ejus *συμφωνῶ* Firmiliano, contra spem, me destitutum videam, reliquum est, ut dispiciam, quid in *Passione S. S. Perpet. & Felicit.* præsidii sit. Si quis vel obiter audit, quid PERPETUÆ precibus in *Dinocratis* anima effectum, negare nunquam poterit, tunc temporis saltem apud quosdam Christianæ fidei addi-

addictos supra dicta dogmata viguisse ; quare enim sæpius laudata Perpetua ad fratris nomen pronunciatum scivisset , se pro eo petere vel orare debere , nisi antea persuasa , ejusmodi preces non irritas fore , & Catechumena ita edocta fuisset ? Etsi auctoritatem traditionis Ecclesiæ Catholicæ sibi vindicare non possit , quippe ad quam requiritur , juxta VINCENTIUM LIRINENSEM , ut dogma *ubique & semper & ab omnibus creditum sit* , in *Commonit. §. 2.* Si vero quis hæc Martyrii acta pro spuris & embolymæis traducere vellet , næ is hypothesis & sectæ studium proderet. Haud dubie igitur , cum viris Doctissimis & de antiquitate Ecclesiastica optime meritis , HOLSTENIO , PASSINO , RUINARDO , pro genuinis & antiquitate sua venerandis censenda & habenda sunt. Celebris est in Ecclesia Romana *Perpetua & Felicitatis* memoria , & Martyrologia festum earum Nonis Martii tribuunt : Quod etiam earum festivitas primis temporibus Romæ celebrata , patere putat Doctiss. RUINARDUS ex Missali Gelasii , & ex antiquo Martyrologio Bucheriano. De Ecclesia Africanæ idem testatur AUGUSTINUS , qui earum die natali tres tractatus habuit , qui in ultima operum ejus editione Sermones sunt 280. 281. & 282. Asserit sibi itaque Ecclesia possessionem harum Martyrum ; num vero jure mancipii & Quiritium , ac de evictione secunda ? statim patebit.

§. XVI.

De Collectore hujus monumenti jam dudum judicavit Celeberr. HEINR. VALESIUS , atque cum *Montano* vel ejus sectæ afferuit ; quo jure quave injuria , inquirendum. In proëmio Collector disputat de Authoritate Novæ prophetiæ & visionum , easque veteribus non tantum æquiparandas sed & præferendas statuit. Nemo autem Authorum Ecclesiasticorum

rum *Nova prophetia* mentionem facit, excepto MONTANO & ejus Affeclis ; tempore maxime, quo hoc monumentum exaratum fuerat, *Nova prophetia* quasi tessera & Symbolum MONTANISTARUM erat, cujus prædicatione & laudatione quisque se Montano palam addicebat. Nec unquam erat controversia, visiones, prophetias, ut & alia S. Spiritus charismata, in Ecclesia tunc temporis vigere, teste IRENÆO apud EUSEB. H. E. Lib. V. C. VII. & DIONISIO ALEXANDRINO apud eundem Eusebium, imo asseverat modo laudatus Author : πλείσται γὰρ ὧν (loquitur de temporibus M. Aurelii & L. Veri ;) καὶ αἱ παρὰδοξοποιίαι τῷ θεῷ χαρίσματα εἰσέτι τότε κατὰ διαφορὰς ἐκκλησίας ἐκτελεόμεναι, πρὶν παρὰ πολλοῖς τῷ κακίῳ (Montanum & ejus affeclas) προφητεύειν παρεῖχον. i. e. quia tunc temporis non insolens esset, Spiritus S. charismata extraordinaria videre, id ipsum & Montano prophetiæ fidem repræsentasse. H. E. Lib. V. C. III. Insuper nullum vestigium deprehendimus, ejusmodi dona pro ætatibus judicata, sed omnia pari honore habita, nec vetustiora recentioribus præpolluisse propter ætatem. Sed hoc controvertatur inter Catholicos & Montanistas, num prophetiæ post clausum Canonem, prophetiis Vet. & Novi Testamenti æquiparandæ sint ? quod priores negabant, Montanistæ non tantum asseverabant, sed novas paracleti ævo veteribus longe anteponebant. Quum igitur Collectorem hujus Passionis omnibus viribus intentum videmus, ut primo novas visiones veteribus æquiparet, his verbis in præfatio : *Itaque & nos, qui sicut prophetias, ita & visiones novas pariter repromissas* (ut N. Testamenti in Vetere) *& agnoscimus & adoramus.* Et paulo ante perstrinxit adversarios his verbis : *Sed viderint, qui unam virtutem spiritus unius sancti pro ætatibus judicent.* Deinde etiam tantum non præferat, ita enim pergit : *Cum majora reputanda sint novi-*

novitiora quæque ut novissimiora, secundum exuberationem gratiæ in ultima seculi spatia decreta; in novissimis enim diebus, dicit Dominus, &c. ex Joel. II. pro MONTANO, nisi iniusti simus, vindicias dicere coacti sumus. Idem etiam de Martyribus ipsis censendum; cum quilibet suæ sectæ hominibus quam maxime faveat, eorumque nominis famam præ reliquis promovendam operam det. Sed Collector ipse nobis hac de re omnem dubitationem eximit, suos enim hortatur, ut communionem cum his Martyribus arcte servant; ita enim in præfationis clausula; & nos itaque, inquit, quod audivimus & contrectavimus, annuntiamus & vobis, fratres & filioli, ut & vos qui interfuistis rememoremini gloriæ Domini, & qui nunc cognoscitis per auditum, communionem habeatis cum S. S. Martyribus, & per illos cum Domino nostro Jesu Christo. Et vel tacente eo multiplices ac passim, ut ita dicam, iteratæ visiones, Spiritus impulsus extraordinarii, meritorum magna opinio, quæ in aliis Martyribus, aut eorum actis genuinis, tam crebro nunquam reperiuntur, satis id attentum Lectorem edocerent.

§. XVII.

Jure quis mirari possit, qua ratione Montani Sectatores Catholicis tantopere, ut supra vidimus, placuerint; cum tamen vulgo notum sit, Catholicos hæreticorum, imo & Sectariorum, Martyriis iniquiores semper extitisse: ardeant licet, inquit CYPRIAN. flammis & ignibus traditi, vel objecti bestiis animas suas ponant. Non erit illa fidei corona, sed pœna perfidiæ, nec religiosa virtutis exitus gloriosus, sed desperationis interitus. Occidi talis potest, coronari non potest. in de unitate Eccles. Hujus honoris à Catholicis habiti plures possunt esse rationes. Earum Martyrium erat præclarum, tum ob fortitudinem & constantiam, & sexus & ætas & status laudem & gloriam abundantiorum reddebant,

puellæ & Catechumenæ erant, quibus Martyribus Ecclesia maxime gloriabatur. Ideo Ecclesiæ vel locis vel temporibus remotiores, absque inquisitione eas recipiebant, vel dissimulantes Montanistis præripiebant. Usque enim ad Augustini ætatem, excepto *Tertulliano* Montani Sectatore, in Ecclesia Africana nulla earum mentio. Nemo autem scire potest, quo tempore ante Augustinum earum memoriæ cultus inceperit, maxime cum Kalendarium Carthaginense à *Mabillonio* & *Ruinardo* editum, eas non nominet. Porro Montani secta diversa habuit fata, non semper omnibus æque exosa erat. Eleutherus Episc. Rom. non statim Aniceti decessoris sui auctoritatem secutus, (qui novam prophetiam admittere recusaverat;) sed litteris & exhortationibus Martyrum impulsus, ad Ecclesias Asiæ atque Phrygiæ Epistolam scripserat de recipiendis in Ecclesiam Montanistis. Sed postea à Praxeæ quodam Asiano admonitus litteras pacificas revocavit, teste *TERTULL. adv. Praxeam*. Perpetuæ vero passio non adeo multis annis post, forte sub initiis Zepherini Episcopatus, qui Montanistis faventior erat, accidebat: Memoria vero ejus posterioribus temporibus, evanescente jam & secta & ejus odio, gliscente vero visionum & defunctorum apparitionum studio, prævalente etiam dogmate de mortuorum statu tertio, maxime in Ecclesia Latina, festivitibus celebrari cœpit. Quocunque autem modo id factum, id certe constat, earum Acta a Montanistis primo laudata & Ecclesiæ propinata fuisse.

Cadit ergo hujus monumenti auctoritas, frustra- que sit oportet, qui primitivæ Ecclesiæ dogmata ex eo eruere conatur, imo discimus, quorum Sectatores sint, qui talia credunt & docent, & quo firmamento nitantur.

§. XVIII.

Inquirendum nunc , quo salutari lavacro non tincti, juxta *Firmiliani & Cypriani* sententiam , cæteris sint inferiores, quum vita æterna & ipsis competat, omnisque baptismi validitas, secundum horum Theologiam, fide baptismum recipientium nitatur, quod & Cyprianus & Firmilianus semper inculcant. Quam igitur illa *Gratia Consummatio*, quam morte præventi non assecuti sunt. Hujus quæstionis enucleatio non tam difficilis est. In genere notandum, primævos Christianos non sine ratione de non baptizatorum salute trepidasse, eosque quasi pro non Christianis habuisse, ut ejus candidatos magis ad baptismum desiderandum & petendum exstimularent. Erant enim & plures tergiversatores, qui ante actæ vitæ non plane pertæsi dilationes necterent; *Certi enim* (ut optime & in cute eos noverat & depingit TERTULLIANUS:) *indubitata venia delictorum* (per futuram intinctionem,) *medium tempus interim surantur, & commeatum sibi faciunt delinquendi, quam eruditionem non delinquendi.* in de *Penitent. Commeatum delinquendi* dicit, voce ex Castrensi disciplina; est autem commeatus tempus, quo iri rediri que possit, ab Imperatoribus militibus dare consuetum; ex FESTO. Haud dubie enim non optime sperandum de iis qui felicissimam non delinquendi necessitatem sibi imponere nollent. *Hoc enim precio Dominus veniam addicere instituit, hac penitentia compensatione redimendam proponit impunitatem,* ut iterum TERTULLIANUS Loc. Cit.

§. XIX.

Deinde non ignorabant Domini promissionem, ὁ πνεύμας καὶ βαπτισμὸς σώσει. Marc. XVI. v. 16. & quod, juxta D. Petrum, baptisma σώζει, saluum faciat, non certe carnis ablutio, sed ἐπερωτήμα bonæ conscientiæ in Deum 1. Petr. III. v. 21. Vir Summus, memoria lapsus, ἐπερωτήμα apud Theophilum Juris C.

occurrere dicit, & *Stipulationem* significare. Nunquam vero is neque alius de iis, qui Jus Romanum græce scripsere, ἐπερώτημα, sed ἐπερώτησιν, *Stipulationem*, dixerunt, ut apud THEOPHILUM in Tit. de verborum *Obligationib.* qui est *Instit. Lib. III. Tit. XVI. & sequent.* imo & alibi centies, & in *Basilicorum Eclogæ Lib. XXIII. Tit. IX. περὶ ἐπερωτήσεων* &c. & alibi. Quod ideo monendum, quia Authoritas summi illius Viri, præter suam mentem, magni nominis Theologum & suos discipulos decepit, ut hunc Petrinum locum intelligerent, quasi baptismo tingendus a Deo stipularetur bonam, i. e. lætam conscientiam, quasi Deus esset ὁ ἐναγόμενος vel ὁμολογήσας, quod plane secus est, cum baptizandus promittendi reus fiat, i. e. Deus per presbyterum stipuletur vel poscat ab homine bonam conscientiam. Utitur autem D. Petrus verbali passivo. ἐπερώτημα, prout Juris Cons. verbo passivo ἐπερώτωμαι. Sicut enim ἐπερωτώντες sunt *Stipulantes*, ita ἐπερωτώμενοι *promittentes*; etsi autem ἐπερώτημα apud Juris Consult. nunquam occurrat, adhibent tamen affine τὸ ἐπερωτηθὲν *promissum*, ut ἐπάγγελμα & τὸ ἐπαγγελθὲν ejusdem significationis. Idem igitur est quod apud Ictos σύμφωνος ἀποκρισις, congruens responsio vel promissio, sponsio & ὁμολογία; unde SALVIANUS primam in baptismo *Confessionem*, de *Gubern. Lib. VI. §. 6.* edit. Baluz. ISIDORUS (citatur a Baluzio) *passionem* nominat. Interrogabantur enim, ut notum, Num abrenuncient diabolo, pompis & operibus ejus? &, abrenunciaturos, clara voce respondebant: iterum num credant in Deum Patrem & in Jesum Christum? & respondebant, credo.

§. XX.

Prout autem in humanis & civilibus, solennitates, arrhæ, pignora scripta & juramenta, non quidem pactum vel contractum efficiunt, interim tamen
argu-

argumenta ejus sunt, quæ omnimodam fiduciam gignunt, ut ex pacto agere, postulare & habere, sine controversia liceat, ita per baptismum jus acquirebatur, cum fiducia se pro Ecclesiæ membro gerendi, omnibusque mediis ad gratiam augendam & consummandam a Deo institutis utendi fruendi, omnesque promissiones divinas sibi vindicandi. Majus igitur emolumentum, statim absolvi, quam in die mortis & judicii pendere ad sententiam Domini. Porro per baptismum & cum baptismo Spiritus Sanctus dabatur, salutis arrhabo, cujus salutare effectus se nonnunquam maxime manifestabant; audiamus CYPRIANUM expertum: „Ego, inquit, cum in te, „nebris atque nocte cœca jactarem, difficile prorsus, „ac durum, pro illis tunc moribus, opinabar, quod „mihi divina indulgentia pollicebatur, ut quis renas- „ci denuo posset, utque in novam vitam lavacro „aquæ salutaris animatus, quod prius fuerat, exponeret, & corporis licet manente compage, hominem animo ac mente mutaret. &c. *Sed postquam undæ genitalis auxilio, superioris ævi labe deterfa, in expiatum pectus & purum desuper se lumen infudit, postquam cœlitus spiritu hausto, in novum me hominem nativitas secunda reparavit: mirum in modum protinus confirmare se dubia, patere clausa, lucere tenebrosa, facultatem dare quod prius difficile videbatur, geri posse quod impossibile putabatur ut esset. &c. in ad Donatum.*

§. XXI.

Cum etiam sit analogia inter gratiam & futuram gloriam, & hoc respectu genitali lavacro non tincti reliquis inferiores erant, choris sanctorum quidem accensi, & apud Christum existentes, non proximæ tamen admissionis, sed remotiores stabant: notum quippe veteres. D. PAULO Authore 1. Cor. XV. varios cœlestis gloriæ *βαθμους* quasi & gradus statuisse.

Extat

Extat locus *Math. XIII.* in quo memoratur, Dom. Jesum in parabola Seminantis de una terra & de una semente triplicem differentiam proposuisse, quæ trigecuplum reddat, quæ sexagecuplum & quæ centuplum. Hanc fabulam Veteres non tantum Seculo præsentī sed & futuro adaptaverunt; secundum eos maximus numerus pertinebat ad Martyres, proximus ad virginitatem, tertius ad viduarum continentiam. **CYPRIANUS** virgines ita affatur; *primus enim centenarius Martyrum fructus est, secundus sexagenarius vester.* in *de Habitu Virgin.* nonnulli utrumque tulerunt, teste eodem, loquens de virginibus, iisdem Martyribus vel confessoribus, *cujus numero nec virgines desunt, quibus ad sexagenarium fructum, centenus accessit: quasque ad cælestem coronam, gloria geminata provexit.* *Epist. LXXVI.* Aliter has rationes subducit **HIERONIMUS** *advers. Jovin.* ut & *ad Gerontiam de Monogam.* Centenarium numerum referens ad virginitatem, (ne suo ævo, deficiente Martyrio scilicet, primus vacaret locus;) medium ad viduas castas, minimum ad honestum matrimonium; at inter simplicem & trigecuplum proventum magnum adhuc interstitium, in quo *Cyprianus* haud dubie in conjugio viventes ponit, ut & diversis ordinibus cæteros gregarios Christianos, quibus, etsi forte ultimo gradu, baptismum nondum adepti adjungi possunt; quibus ut *Valentiniano Imper.* ex *Ambrosii* sententia, votum baptismi pro baptismo prodest, ut saltem aliquem fructum auferant.

§. XXII.

Locus ex **FL. JOSEPHI** *Ἀλώμενος Lib. V.*
Cap. V. §. 7. emendatus.

Loquitur in hoc loco **JOSEPHUS**, Author nunquam satis celebrandus, de Pontificis M. vestitu, nempe de Ephod & amiculo Coschen, reliquoque
 ejus

ejus ornatu; deinde subjungit : ταύτην τὴν ἐσθῆλα οὐκ ὁ Ἀρχιερεὺς τὸν ἄλλον χρόνον , λιτοτέραν δὲ ἀνελάμβανεν , ὅποτε δὲ εἰσίοι εἰς τὸ ἄδυτον . &c. i. e. *Hunc vestitum Pontifex non quolibet alio tempore habebat (viliores quippe sumpsit ;) sed tunc , cum intrabat in adytum , intrabat autem semel quotannis duntaxat . &c. Quo asserto sane nihil insulsius , aperte enim contradicit iis , quæ extant Levitici C. XVI. Adeoque mirandum , qua oscitantia hæc scripserit Vir genere ortus Sacerdotali , summisque honoribus in urbe Hierosolyma perfunctus , & qui ad seros posteros transmittere potuit , quæ viderat oculis suis & comperta habuit. Verum hoc ipsum Viros longe Doctissimos monere debuisset , quod mihi primo fere intuitu ipsa hæc JOSEPHI Auctoritas repræsentabat , χωρίον sive locum hunc in mendo cubare , cujus etiam medela facillima est ; Legendum enim ἐν pro ἐκ , deinde particula adversativa δὲ in ὅποτε δ' εἰσίοι e medio tollenda , ut verba ita sonent : ταύτην ἐν τὴν ἐσθῆτα οὐκ Ἀρχιερεὺς τὸν ἄλλον χρόνον . λιτοτέραν δὲ ἀνελάμβανεν , ὅποτε εἰσίοι εἰς τὸ ἄδυτον . i. e. *Hunc vestitum Pontifex quolibet alio tempore , (vel semper alias) habebat ; Ceterum viliores sumpsit , quum intraret in adytum. In qua lectione omnia sana & veritati congruentia sunt ; faveat etiam Josephi Auctoritas , qui aliter , nisi veritatis vel sanæ mentis dispendio , scribere non potuerat : Particula ἐν facile Exscriptoris præjudicio , (qui , ut in domesticis , viliora vestimenta quotidiano usui , & lautiora diebus festis destinabat ,) vel sane oscitantia , in ἐκ degenerare potuit : quæ mutatio ἐν in ἐκ additionem adversativæ δὲ in ὅποτε δ' εἰσίοι necessario post se traxit. Favet tandem tota constructio , quæ emendatione hac admissa magis fluit.**

Verum mihi videor audire , qui pessimi exempli ducant ejusmodi mutationes , quippe hac ratione omnia Veterum pro affectu & arbitrio refingi posse. Interim tamen , nisi quis insanire malit sana mente præ-

præditos, imo homines Doctos, omnino (etsi raro) tamen quandoque, hujus naturæ correctiones admittere cogetur. In *ARTEMIDORI Oneirocrit.* legitur: τῶν δὲ ἐνὸντων τὸ μὲν ἔξω τὴν γυναῖκα τὸ δὲ ἔσω τὸν ἄνδρα. i. e. Ex lecti spondis ea quæ exterior, proprie ad mulierem pertinet, altera interior ad virum. Quis autem hoc ferat, quis mediocriter Doctus, qui non malit cuivis alii quam *Artemidoro* hanc oscitantiam imputare? Idem judicium esto de hoc nostro *JOSEPHI* loco.

* * * * *

V.

EMANUELIS WOLLEB,

Phil. & J. U. D. Basil.

Disquisitio Historica

De

Causis proximè Antecedentibus

ROMÆ FUNDATIONEM.

§. I.

NULLA fere unquam extitit Respublica, de cuius initiis non extraordinaria quædam & miraculis proxima traduntur. Heroes præsertim illarum primi, parum abest, quin Diis accenseantur; imo inter Divos sæpissime sunt relati: uti patet exemplis Japeti, (a) Saturni, Jani, Bacchi, Herculis, Jovis,

Scholia.

(a) De Jano, quem Regem Italiæ fuisse, fama fert, res tra-

vis, Neptuni, Plutonis, &c. ut taceam Deos Germanorum antiquos (b), & illos, quos ex heroibus suis septentrionales populi coluere. (c)

§. II. Hu-

latitia. - De Saturno vide *DIONYSIUM* Libr. 1. ubi Fabulam de Seculo aureo adscribit felicitati terræ Italicæ, illis temporibus primum occupatæ. - De Baccho (*SICULUS* ait) Indicum Regem fuisse per 52. annos, & dein ob multa beneficia in subditos collata inter Deos relatum. (*Diod. S. L. 11. c. 10.*) - Mythologia Japetum inter cæteros Deos collocat, qui forsan per traditionem ille noster Noë filius, vel, si mavis, Semiramidis ex Menone natus Hupet sive Japet. (*Aurel. Viñ. de O. G. R.*) - Quin & juxta *HESIODUM* Chaos primum, deinde Terra fuit: Illud noctem peperit & Erebum: Nox Erebo mixta Æthera & diem protulit, quæ Hesiodo sunt incorporalia. Terra vero omnia corporalia, ut cælum stelliferum, & cum hoc concumbens Oceanum, & Montes, & Nymphas, & Cyclopas, & Rheam, & tandem Saturnum. Illic domitâ Rheâ Sorore, ex illa genuit Plutonem, Junonem, Vestam, Cererem, &c. quin & Jovem, quo gravida Rhea in Cretam confugit, ubi Jupiter iste prodigioso modo servatus & educatus, tandem pater factus ἀνδραπαύει θεωνίε. (*Hesiod. Theog. & Euseb. præp. Evang. paulum diversa. L. 1. c. VII. Diod. Sic. Rer. antiq. L. 11. c. 11. aliter paulo Pausan. in Eliacis.*) - Et hæc omnia, ni fallor, etiam Mythologiam Gentilium, Deos suos non nisi homines & Reges fuisse, Terræque particulam, (& Scripturæ more, Glebam Gleba prægnatos,) cum Tellus eos produxerit, indigitare, satis luculenter produnt. - Adde quod *HERODOTUS* dicat, Persas non, uti Græcos, Deos suos ex hominibus natos existimasse. (*Herodot. l. 1. 11. l. 4.*) Et quæ de Ægyptiorum Rege Sethone (qui forsan Sethus Adami filius) traduntur, qui & Sacerdos fuit Vulcani, & in hujus templo lapideus stabat, manu murem tenens, inscriptis his verbis, *In me quis intuens*

§. II.

Hujus rei ego duas præsertim esse rationes existumo, *Famam & Providentiam*: Illa venditata vulgo exordia Rerum publicarum supra modum extollit, & cundo crescit. Ut plurimum enim longo demum post exortas tempore in illarum originem inquiritur, quo fit ut fama in immensum augescens, fabulosaque veris miscens, divina plerumque illarum initia fingat, quæ tamen humana fuisse, apud cordatiores satis superque creduntur. *Hæc* vero quiddam saltem vel singulare vel mirandum, cuivis mutationi majori inesse voluit. Cum etenim pleræque factorum revolutiones

pius esto; a quo tempore nullum Deum humana forma fuisse, dicebant Sacerdotes Ægyptii; & *Zamolxin* Scytharum Deum Dæmonem, quem & ipsum hominem fuisse credit *HERODOTUS*: & *Apotheosin* novioribus cognitam temporibus, cujus exemplum delineatum in persona *Severi* Imperatoris nobis relictum est. *Quin* etiam Romulo idem accidit, Quirini nomine apud suos consecrato. (*Herodian. l. 4. -- Euseb. Chron.*)

- (b) Inter Deos Germanos *Tuisto* & *Mannus* notandi, quorum hunc illius filium, & utrumque gentis conditorem ferunt. Huic vero tres filios fuisse contendunt, unde Germanorum quidam *Ingevones*, alii *Istavones*, alii *Hermivones*, dicti sint. Ita & novissimum Idolum *Irminful*, quasi *Armins* - vel *Hermans* - *Eaul*, Heroi Germ. *Arminio*, temporibus *Germanici* notissimo, dicatum, & a Carolo M. subversum. Et *Velleda*, Sybilla Germanica, mulier fatidica, numinis loco a Germanis culta. (*Tacitus Annal. & de M. G. Ilachenb. Germ. Med. Poëta anon. de Car. M. &c.*)
- (c) Inter Septentrionales *Thor*, *Odhen*, *Frigga*, numina fuisse majora. - *Odhen* vero, natus apud eos heros, adhuc vivus cultus, post mortem vero majoribus diis fuit annumeratus. (*Masfcow. H. Germ. Olaus M. L. III.*)

nes non contingant, nisi causæ quædam extraordinariæ concurrant, & quam sæpissime, vel corruptio quædam non ferenda, vel aliud quidpiam quibusdam intolerabile visum, immutationes in hoc vel illo statu futuras præcedat; utique sequitur, *Res* quasvis *publicas* sine extraordinariis eventibus exortas haud fuisse, & providentiam singulares circumstantias, & animos fortes iis usuros, produxisse (d). Hinc, quæ tra-

Tom. III.

H h

dun-

(d) Exempla sunt, Nini & Semiramidis, Cyri majoris, (si vera sunt quæ *Xenophon*, *Herodotus*, *Diodorus Sic.* & *Ctesias*, varie tn. tradunt :) Sesostris Ægyptiaci, Alexandri Maced. & Rerumpubl. Græcarum stupenda facta. - - Ex Novioribus, incredibiles profectus Mahomedis, qui ex homine plebejo & mercatore, Arabiæ dominus evasit, & totum fere Orientem nova Religione imbuir. - - Quin & Migrationes Gentium, quæ Secc. V. & VI. tanquam mare quoddam totum Occidentem occuparunt. - - Et propriè nobis tempora considerantibus, ipsa Domus Austriaca, & tot terrarum acquisitio, admirationem præbent. Comitum Helvetiæ, apud Ottocarum Bohemiæ R. si consideremus, mox mox leges domino quondam suo daturum, & toti Germ. Nationi præfuturum. Cujus postea Propago Carolus V. quali non usus est fortuna, in conjungendis H. sp. & Germ. diadematibus, & aliis terris acquirendis, quas non nisi felix circumstantiarum concursus, & ejus in illarum usu solertia, ad invidiam usque in ejus finem effudit. Quod lepide admodum demonstrat *FO N. TENELLIUS*. (*Dialog. des Morts entre Charle V. & Erasme.*)

Ex Historia Ecclesiastica tantum Suprematus Pontificii incrementa invidenda considerentur, &, quam feliciter Præsules isti barbariei temporis inservierint, diligentius evolvatur. - - Nec sine miraculo ejus decrementum fuit. *Luthero* acerrimi ingenui viro, *Calvino* judicioso, *Henrico*

duntur mira, non in totum falsa habenda, sed potius deductis, quæ fidem historicam superant, illa præsertim, in quibus Scriptores (præsertim cæteris in circumstantiis dissentientes) conveniunt, vera censenda sunt, quamvis circumstantiis, quæ admirationem movent, sint concomitata. ἔδει γὰρ διὰ παντός ἀπιστεῖν τὴν τύχην, ὅσωντας οἷων ποιημάτων δημιουργός ἐστι. (Plut. Romul.)

§. III.

Et ut exemplo patrio rem illustrem. Helvetiorum contra Austriacos conamina, ducibus tribus, trium Pagorum rusticis, instigante Tello itidem rustico, cum tam potente Gente, ambiguo Marte primum agitata, sed quotidie accedentibus Sociis, tandem in libertatem sibi suisque perpetuam, & a solo Deo dependentem, desinentia, quis extraordinariis circumstantiis illa sustentata fuisse pernegabit? (e)

§. IV. Eo-

Angl. lascivioso, Gustavo Suecico prudente & connivente, Philippo Hisp. superstizioso & crudeliter superbo, Papa vero prodige avaro & cedere nescio, & aliis opus fuit, ad jugum unius Episcopi excutiendum. (Secund. Lutherum.)

Addi potest *Elisabetha R. felicitas*, & quæ in hunc fere modum de illa dicit *BACON VERULAMIUS*, qui circumstantias illi tale, quale est, nomen conciliantes enarrat. (*Encom. Elisabeth. Baconis.*) Et *Oliverii Cromwelli*, hominis astuti & crudelis, (si Famæ & Carol. defensoribus credendum;) & imperio nati, qui ex nobili minorum gentium Angliæ tandem Protector factus est. (*Defensio pro Carolo, Anonymi G. 1. Lat. V. di Crom.*) &c.

(e) Causæ concurrentes extraordinariæ erant: - - *Præfectorum Austriae nimia crudelitas*; - - *Helvetiorum in re gerenda solertia*, & in moderamine inculpatæ tutelæ servando *Justitia*, quæ utraque regulariter nec in plebem nec

§. IV.

Eodem modo & Rei Romanæ ultra sortem ordinariam felicia contingere initia. Et infantiam enim,
H h 2. &

in rusticos cadunt; *Telli Historia*, magis exasperans rusticorum animos, jamjam seditionem meditantium; - - *Alberti* l. mor., post ejectos præfectos opportune necati; - - *Tempus* ipsum Præfectorum ejectorum, dura hieme, quo tempore non facile poterant externis copiis infestari, & adeo se confirmandi & consilii capiendi relinquēbatur spatium. - - *Bellum* ex nece Alberti secutum Austriacum, ad persequendos conjuratores, quod iterum prærepiebat occasionem ulciscendi Helvetios. - - *Successio* Henrici Luzelburgensis in Imper. dignitate, qui ex aliena ab Austriaca familia satus, Imperatorem potius erga Helvetios, quam ultorem Alberti erat acturus. - - *Lud. vic. Brvri* post Luzelburgensem successio, qui *Princeps Justus & magnanimus* (*Avent. Ann. Boy. L. VIII.*), etsi (propter bellum, quo ipsemet tenebatur, contra Fridericum Austriacum.) Helvetios aperte non juvaret, tamen nec Leopoldo illos devoraturus auxilio fuit. - - In genere Jus manuarium illo tempore in turbato Germaniæ statu & via facti obtinens. - - *Tandem* & ad fortunam primæ pugnæ apud Morgardam fatum felices circumstantias protulit. v. gr. Nobilis a *Huneberg* (telum schedula his verbis inscripta, *hütet euch am Morgarden*, clam in castra Helvetiorum immittentis. *Stettlers Chron. p. 39. 40.*) in dominum suum sive perfidiam, sive in Helvetios amorem a fato quodam Helvetiorum tutelari illi inditum. - - Accedat *magnanimitas* so. Exulum Helvetiorum, terrorem incutientium hostibus. (infr. §. IX. *Schol. y.*) - - Genus bellandi ejus temporis, robustissimæ Helvetiorum genti perconveniens. &c. &c. Et hæc quidem fortunæ Helvetiorum, & quadantenus fortitudini, adscribi possunt; reliqua, quæ post primæ pugnæ felicem exitum fortiter & præclare gesserunt, potius illorum virtuti bellicæ sunt danda.

& adolescentiam, etiam in circumstantiis infelicissimis, ita transegit feliciter (f), ut non mirum sit, cur juvenilem suo tempore attingere ætatem, & internecionem pluries effugere, & ad virile tandem robur pervenire potuerit. Sed de his alibi. Hic non nisi causas ad ejus Originem concurrentes videamus.

§. V.

Primum ergo, quod novæ Romæ condendæ favebat, erat divisio Italiæ ejus temporis in quam plurima parva territoria, vel potius in civitates multas, quarum Imperium parum se extra muros suos protendebat (g). Quo factum, ut absque magno impedimento nova potuerit oriri. Et quamvis Nomen Hetruscum eo tempore jam satis fuerit clarum, singula-

(f) Huc spectant : Per dolum & prodicionem prope amissa Romanorum libertas, conjuratione Juvenum Nobilium a Vindicio servò detecta. - - Porfennæ & Tarquiniorum contra urbem molimina. - - Urbs a Gallis capta & ab exule liberata. (*Livius & alii.*) Annibalis de Romanis victoria, & futurum Romæ exitium, si victor uti victoria scivisset, & nisi Urbs cunctatorem reperisset, & si illo tempore reliquis Italiæ populis consultum fuisset, suas vires ad interitum Romæ cum Cartaginienensibus conjungere, ne deletis Romanis & ipsi Annibalem victorem experirentur; quippe qui pensitarent *Communem Gladem, communem patriam tuendam, non cum Samnite aut Hetrusco rem esse, ut quod ab alterutro ablatum, in Italia tamen imperium maneat; Pænum esse hostem, ab ultimis terrarum oris militem trahentem.* Liv. XXIII. 5. adde *FLORUM*, qui primam ætatem populi Romani, sub VII. Regibus, fatorum cuidam industria adscribit. &c. (*Florus L. I. C. VIII. Plutarch. de fortuna Rom.*)

(g) Respublicæ, quæ illo tempore vel mediam tantum partem Italiæ occuparunt, fuere Latini, Longa Alba, Sabini,

gularum tamen illud conficientium Civitatum non fuit satis arctum foedus, ut conjunctis viribus, commoda sua promoverent; quinimo, singulas sua tantum curasse, & communi potius nomine, quam re ipsa unitas fuisse, videtur (*h*). Hinc factum, ut invidia singularum reprimeret hostiles animos, quos contra novum Imperium, hodie forsan exorsurum, incendii instar exarsuros videremus. Neutra satis cum altera vinculo amicitiae fuit constricta, ut novam civitatem, tanquam commune incendium extinguere una ope vellet (*i*). Huc accedit illorum somnolentia (vel a fato Romae tutelari proveniens) (*k*) & quod

H h 3

omnia

Vejentes, Hetrusci, Fidenates, Volsci, Æqui, Falisci, Prænestini, Campani, Samnites, Hernici, Tiburtes, Marfi, Peligni, Gabii, Aricini, Ardeates, Umbri, &c.
(*Strabo L. V. Phil. Cluverii Geogr.*)

(*h*) Quamvis enim quasdam harum civitatum sub gente quadam, v. gr. Latina vel Hetrusca, comprehensas certum sit, illas tamen potius socias, pro se ceterum summum Imperium tenentes, quam unum Corpus cum illis fecisse, & communi summo Imperio subjectas fuisse, ex modo, quo Roma comesse cœpit singulas, patet. (*vid. vel sol. Liv. L. I. c. 110. 111. 12.*)

(*i*) Exempli loco esse possunt Vejentes & Fidenates, qui & Hetrusci & consanguinei fuisse dicuntur; Nec tamen contra Romanos causam communem cum istis, nec isti cum illis fecere. *Romanas enim vires nimis prope se convalescere videntes*, eos quidem sunt adorti, sed soli, nec communicato inter se nec cum reliquis Hetruscis consilio.
(*Liv. I. 14. 15.*)

(*k*) Ita enim sæpe sumus comparati, ut minus advertamus ad consequentias, ex re, quam nunc despiciamus, orituras. - Sed nec semper per humanitatem providere licet. Et hæc, ni fallor, sæpius a fato etiam perspicacissimis imposita lex, ut lynceis sæpius occultetur oculis,

omnia hæc minuta Imperia , multis circa se sueta sui Juris civitatibus, additamentum unus non adeo magni ponderis existimaverunt; præsertim cum spernenda & attentione vix digna ipsis, & Albanorum potius Colonia, quam civitas sui juris, Roma videretur. Hinc parvam Albam, parvum Lavinium, præ ea Urbe quæ conderetur, fore, non facile suspicari poterant.

§. VI.

Altera est ratio, quod Roma condebatur a duobus regio semine prognatis, qui auctoritate Avi, quæ fecere, facere cenlebantur, vel ad minimum ejus Patro-

tro-

quod vel luscii alias vidissent Ita nimirum procedit Providentia quosdam elevatura, ut in quibusdam casibus cæcitate feriat Potentiores, quo debilioribus sumendi vires interea detur copia. Et, ni fallor, hoc sensu sæpius sumendæ Scripturæ S phrasēs, quando dicitur v. gr. *Deum Ægyptios cæcitate feruisse*, vel illum *quidpiam coram oculis hominum occultasse*. Ita & primi parentes se *Nudos esse nesciebant*, quamvis se corpus non coopertum habere scirent, quia de aliis rebus cogitantes, animum ad hoc non adverterunt. Non ergo possum, quin semper exandescam in illos sibi præpostere sapere visos, qui in vita communi cuivis, ex imprudentia (apparente forsan) male negotium quoddam gerenti, frequenter objiciunt: *Cur non provide magis egisti?* *Du hättest sollen achtung geben.* Quasi vero nobis quævis prævidere liceat, vel non etiam sæpius prudentissimo cuique, animum forte (providentia sic dirigente) ad longe alia advertenti, aliquid effugiat, quod hucce cogitanti prævidere possibile fuisset Nec dicere vereor, qui omnia prævideret, Dei instar fore. Quis ergo nobis hominibus sæpius improvidè quid facientibus non facile condonabit? sed & vice versa, quam stulti sunt, qui omnia se provide semper fecisse contendunt?

trocinio carituri non erant, præsertim cum ipsis regnum suum debuerit acceptum ferre Numitor. Et hac autoritate ubique opus fuit, vel saltem illa inter urbis condendæ adminicula merito collocanda. Dico, autoritate Avi urbem incepisse geminos. Nam aliter concipi nequit, unde tam impune territorium condendæ urbis habuerint: Derelictum enim non fuisse agrum, quem occuparunt, vel exinde patet, quia locus, in quo educati expositive erant, fuit lectus condendæ Urbi. Locus vero iste erat in pascuis regiis, quæ, utpote jam occupata, nemini possessione cedebant, quam vi vel sponte. De vi, facta circa possessionem, nulla fit mentio. (*Conf. Liv. l. 6. & Dionys. de Faustulo.*) Sponte ergo illa cessit Numitor in nepotum gratiam (1).

H h 4

Sed

(1) Adde quod ex 1000. focis *PLUTARCHUS* dicat constitisse Romam ab initio. (*Plut. in Rom.*) Focum per *isias* exprimit. Focos Vestæ sacros fuisse constat, (*Gövil Feuerstätte;*) qui diis penatibus cujusque familiæ erant consecrati. Hinc ergo fuere ad minimum 1000. Familiæ, quæ 5000. & ultra constare debebant personis, & justum jam efficere poterant oppidum. Sed unde juvenibus tot subito homines, nisi autoritate majore suffultis? vel hominibus Cadmeo more ex dentibus terræ enatis? (*Heinecc. Ant. ad Inst. L. I. T. X.*)

Et paulo post, in raptu virginum, 683. raptæ dicuntur, quæ singulæ maritis Romanis singulis datæ fuerint. Quod si verum, uti diserte asserunt *DION. HALIC. l. 11. p. 100. & PLUT.* sine dubio jam magnum, & multum ultra 5000. hominum numerum fuisse Romæ, demonstrat; cum præter uxoratos & impuberes fuerint 683. Juvenes, cœlibes, matrimonio pares. Sed unde tanta hominum multitudo quarto urbis conditæ anno tam subito? Asylum solum certe, nisi & ipsum autoritate majore suffultum, tot homines fovere sparsim receptos,

Sed & veritas Historiæ huic adstipulatur ratiocinio : **DIONYSIUS HALICARNASSEUS** (*Edit. Silburg. p. 72.*) (quod & **LIVIVS** verbo annuere videtur *L. I. c. 6.*) expresse ait : *Numitorem, Reipublicæ statu post mortem fratris ordinato, (m) mox cogitasse de paranda propria ditioe juvenibus, novaque urbe in illa condenda ; simulque urbanam multitudinem, numero auctam vehementer, minuendam censuisse, & ideo communicato cum Juvenibus consilio, dedisse iis agros, in quibus educa-*

& sceleratis a vicinis expulsis impune refugium dare non potuisset.

Et unde 20800. armatorum, quos Romulus opposuisse dicitur Sabinis nisi Albani (& forsan Cæninenses, Crustumini & Antemnates, cum quibus paulo ante foedus junxit Romulus,) auxilio fuissent ? (*L. II. idemp. 103. & 105.*)

(m) Annum Urbis Conditiæ **DIONYSIUS**, ex Censoriis Commentariis erutum, dicit 25. **PATERCULUS** vero 22. post primam Olympiadem. (*Vellej. Pat. l. I.*) Sed cæterum cum Dionysio sentit, quod Avi autoritate exstructam Romam a Romulo dicat, *adjuto legionibus avi.* Sed nescio, cur istum avum *Latinum*, non *Numitorem* appellet, cum tamen & tempus Romæ conditiæ, fere uti **DIONYSIUS**, post Trojam captam Anno 437. collocet, & in quo cum fastis Consularibus tantum unico anno discrepat, ab U. C. ad Consulatum *Vinicii* vel *Vinutii*, quo tempore historiam suam collegit. 782 bene numeret ? Non desunt quidem, (quos vide apud **DIONYS.** & **PLUT.**) qui Romulum & Remum nepotes Latini vocant, & Romam tamen condidisse dicunt, sed illi 400. fere annis ante Æram hanc Dionysii nostri Romam collocant. Quæ discrepantia, præter rei antiquitatem, inde provenire potest, quia circa locum, in quo Roma nostra sita est, jam antea a Trojanis Roma quædam in Janiculo condita ; & ante illos, Morgete in Italia regnante, sit

ti erant ab initio ; populi suspectam (n) partem , ne quando novis rebus studeret , iis attribuisse ; magnam plebis partem migrationem hanc suscepisse ; Sed & optimatum multos ; accepisse

mentio Romæ cujusdam , apud Antiochum Syracusanum , quem Dionysius *non quendam ex recentioribus* vocat. (Dionys. p. 59.) Quam utramvis a nostra diversam , ita tamen vocatam fuisse possibile est. Ρωμαλεος enim & Ρωμη, cum sint voces significativæ, *Robustum* & *Robur* significantes , facile lingua Græca (qualem fuisse veterem Italicam, Latii & Hetruriæ præcipue, Oenotriis & Arcadibus, teste Dionysio, illuc delatis, constat ;) locus munitus ita appellari potuit , uti & olim Robur vocatum fuit castellum quoddam prope Basileam (*Wurflisen. L. I. C. 3.*) sive ipsum istud quod hodie auf der Burg vocamus. Quin & altera pars Carceris Romani , qua præcipitatio fiebat reorum , Authore *FESTO* in voce *Robur*, *Roboris* nomine veniebat ; ubi forsan Castellum , de quo Fab. Pict. *Roma* dictum, ante Romam conditam situm fuit. Ergo nec hæc discrepantia excusare videtur *PATERCULUM*.

(n) Suspectum tn. *HALICARNASSEI* testimonium reddit, quod dicit , Numitorem *eam præsertim urbanam multitudinem* in Juvenes impendendam ratum, (πολυλίκον πληθος μαλιστα, το διαφορον αυτω ποτε γενομενον) *quæ olim ab eo dissentiebat*. Hæc sine dubio illa , quæ ab Amulii partibus steterat. Sed anne credebat, Nepotes, ad novam urbem condendam omni diligentia egentes, his coercendis se ipso, *qui jamjam in pristinam formam Imperium suum , Amulii tempore exlex ,* (uti antea dixit *HALIC.*) *restauraverat* , magis fore pares ? fateor , hunc ejus argumentandi modum vix semper processurum. Sed exitus bene ratiocinatum esse ostendit. Deliniti forsan animi rebelles novis agrorum distributionibus. Vel Juvenum florentium illos magis devinxerat, quam Numitoris seniles, mores, cujus ipsissima persona olim objectum odii fuerat, quod jam in Nepotes transferendum, etsi eodem genere satos, non tantum esse poterat.

cepisse quoque Juvenes argentum, arma, frumentum, mancipia, jumenta, & alia ad paratum urbis necessaria (o).

§. VII.

Nec minor fuit causa, remotior quidem visa, sed magni ponderis, Tyrannis Amulii. Ne enim dicam, absque hac nasciturum non fuisse Romulum & Remum; cum si RHEA Vestalis non esset facta, clandestino forsan concubitu non eguisset, & legitimo matrimonio juncta vel plures vel nullos vel certe multo alios progenuisset liberos. Sed hoc longius petitum videretur, quare hoc allegando Tyrannidis ejus effectum supersedemus.

§. VIII.

Sed de istis conveniunt fide digniores. I. Amulium, Numitore pulso, Regnum invasisse; (ctsi enim

(o) Si hæc *DIONYSII* (uti abunde probatum credo) vera sunt, *LIVIVS* & *FLORUS* (& ex iis *JORNANDES* exscribens,) non exacte satis scribunt, Raptum Sabinarum ex sola mulierum penuria factum fuisse, quia *Res esset inius atatis populus virorum.* (*Flor. l. 1. c. 1. Liv. l. 1. c. 9. Jornandes l. 1.*) Posuere nimirum contra omnem probabilitatis notam, nullas fere Romæ fuisse mulieres, & cum plebe & Optimat. Alb. nullas eo concessisse, & Albanos denegaturos fuisse matrimonium urbis conditoribus, sua tamen autoritate illam condentibus, & inter pastores Pallantium incolentes nullas fuisse foeminas Romam cum pastoribus ituras, & nullas foeminas profugas, meretrices, rixosas, aliasque ejus generis Apylo usas fuisse. &c. Non ergo tam penuria mulierum, quam vel, ut vicinos sibi devincerent necessitudine, non sponte sed vi facta, cum factum infectum reddi non potuerit, illam forsan admissuros, raptus iste decretus, vel ex Romanorum Juvenum protervia (Romuli ferocia factum postea comprobante & defendente) factus fuit.

enim quidam contrarium dicant, (*Dissentit solus Aur. Victor de O. G. R.*) major tamen mihi fides est PLUTARCHI, LIVII, EUSEBII & DIONYSII.)
 II. Numitorem ad privatam sortem redactum fuisse.
 III. Mares Numitoris filios sublato, (*p*) Nepotesque ex filia, Vestæ consecrata, (*q*) natos expositos (*r*).

Quæ

(*p*) Filii Numitoris mentionem faciunt authores : Æge-
 stum vocant, & eum in venatione, positis jussu Amulii
 latentissimis insidiis, (asserit Dionysius *p. 62.*) occi-
 sum. Cæteros, si quos habuit, iam ante Patrem fato ces-
 sisse, inde patet quod *DIONYSIUS* dicat, post mor-
 tem Numitoris Albanos, deficiente st rpe regia, Dictato-
 ribus, non Regibus, usos esse. (*v. Dionys. p. 137. 140.*
& 337.) Livius tamen L. I. c. 22. & seqq. Reges illis
 dare videtur, nisi nomen Regis ambiguum ibi esse dice-
 re velimus.

(*q*) *RHEAM* sive *Riam*, sub specie honoris, Vestæ con-
 secratam fuisse dicitur. Nam ab antiquissimis tempori-
 bus, jam moribus invaluisse, ut illustres quævis & no-
 bilissimæ, in Dææ famulitium lectæ, sacro ordini dica-
 rentur, - An hoc veneratione religionis, an ex ra-
 tione Politica fuerit, non facile dixerim. In magno
 semper honore fuisse sacerdotium, vel ex hoc patet, quod
 jam apud Indos Bacchi tempore prima septem tribuum,
 in quas India fuit distributa, honoratissimaque, Philo-
 sophis Sacerdotibus data fuerit; (*Diod. Sic.*) & Asca-
 nio Ænæ filio defuncto, Juloque Ascanii Filio regno
 excluso, & Silvio Ænæ altero, quem ex Lavina con-
 ceperat, in regno succedente, Julo in solatium non ob-
 tenti regni, antidori loco, sacra quædam potestas &
 honos sacerdotalis tributus fuerit, qui ob quietem Mo-
 narchico præferebatur. (*Dionys. p. 50.*) - Sed potuit
 subesse quoque ratio politica, cur Vestales nobilissimæ
 legerentur, quia foeminae in Italia succedere poterant,

Silvius enim cum ex Lavina natus esset, ad quam tota regni hæreditas pertinebat, ob hanc solum rationem, Iulo Ascanii filio a populo fuit prælatum, quia regnum ad Lavinam potius, quam ad Æneæ posteros, ex aliena uxore natos, pertinere rebatur. (*Idem ibid.*) Quin & hic idem metus, ne Rhea Amulio aliquando succederet, (Amulio & Numitore filiis destitutis;) Amulio, ut sacro ordini illam manciparet, persuasit.

(r) Hanc etenim expositionem omnino fabulosam esse, non crediderim, cum illæ frequentes illo tempore fuerint; certam tamen esse, sustinere, cum omnibus circumstantiis, non ausim. (vide dissentientes apud Dionys. p. 71.) Mirum enim, quod multi Regnorum fundatores vel idem vel aliud mirandum fatum subiisse dicantur, quasi moris fuerit antiquis temporibus, talia de Heroibus prædicare. (*Diod. l. 11. c. 10. & 11. Libr. I.*) - - Ita Bacchus Indorum Rex primus in Jovis femore nutritus dicitur: Et Scythæ fabulantur, natam sibi virginem ex terra umbilicotenus hominis forma, reliqua viperæ, & eam ex Jovis congressu genuisse puerum, cujus nomen Scythæ, genti nomen dederit. (*Diod. Sic. Libro 2.*) - - Ita fere **HERODOTUS**, quod tn. & ipsi fabulosum videtur, de Cyro necando tradito & a cane enutrito. Quin & *Spaco* nomen foeminæ, & *Lupa* nomen meretricis, mysteriosam quandam similitudinem, sed suspectam, habet. - - Ita de Semiramide in silvestribus locis exposita & ab avibus enutrita dicitur. - - Taceo, quæ de Perseo, Hercule, Jove, Jone, Melitæo, Oedipode, &c. miris modis servatis fabulantur, quæ tn. aliquid veritatis abscondere (juxta §. II. supr.) non omnino impossibile. Hoc prodigiosum, quod de Urso, cum nobili virgine Sueciæ concumbente, septentrionales scribunt, ex quo coitu natus *Sprachalegum*, Suenonis Herois, ex quo Danorum Reges veteres stirpem suam accipiunt, patrem genuit. (*Olaus M. L. 18. c. 22. Herod. Clio.*) Forsan & sub hoc Urso humani monstri quid, uti

Quæ omnia ex Tyrannide Amulii orta , magna fuerunt Romæ condendæ præparatio. Hinc enim educatio Gemellorum acerbior & bello aptior , non in Curia Principis, ubi plerumque vitæ genere molliculo animi liberorum regionum emolliuntur. Procul educabantur a Curia , in loco ab omni adulatione remoto, inter pastores, qui eo tempore non tam viles fuere habiti ac hodie, & viri erant plerumque feroces & strenui (s). Vel si mavis, inscio Amulio, in Schola quadam Gabiis habita, ubi tanquam privati in artibus liberalibus instruebantur; quod, authore Plutarcho, quibusdam vero magis simile videtur, & expositionem infantum non excludit, cum expositum fuisse primum, & postea in Schola instrui, non sint *abusata*. Quicquid sit, in neutro horum locorum veritas sub specie reverentiæ occultatur, nec mendacia obtruduntur, quod porphyrogennetis solet evenire ple-

uti sub Dercete Pisce (quo nomine Semiramidis mater filia regia fuit appellata) & Semiramide Scythiæ avem denotante, & sub *Spaco* & *Lupa* & *Mulo* (uti Cyrus fuit appellatus) latet. Et ut ad expositionem redeam, non caret mirandis circumstantiis Moysis expositi in aqua conservatio, quæ tamen nobis certissima. (*Exodi. 2. Jos. Ant. L. 11. c. 9.*) Nec Romuli & Remi plus a verosimili abhorret expositio, modo *Lupam* quadrupedem altricem historiæ adimas.

(s) Faustulum *DIONYSIUS* vocat virum probum, Regis subulcorum magistrum, & alibi, montis Palatini incolam, regique pecoris præpositum, genus duxisse ab Arcadibus Evandri comitibus. - Ita & Silvium, Ascanii & successorem & fratrem, a pastoribus in montibus educatum ferri, ait *idem*. Lavina enim secundo nupta Æneæ, gravida post mortem mariti relicta, cui fideret nescia, Pastoris Tyrrhi, qui Latino maxime familiaris fuit, fidei se commisit. &c. (*Dionys. p. 56.*)

plerumque, (v. *Fenelon. Dialog. entr. Henri IV. & le D. de Mayenne.*) ut nullius rei minus quam humanitatis ideam illis comparent, & omnia fere prius quam veram virtutem bellicam & Politicam edoceant magistri (t).

Sed alterum, quod ex Tyrannide sequebatur Amulii, erat odium probiorum contra eum, & amor erga Numitorem & ejus propugnatores. Exinde tandem expugnatio regis, Amulii exitium, Gemellorum quadam factio, animorum ad majora invitatio, & ut verbo dicam, illorum urbis condendæ consilium.

§. IX.

Non parvum quoque ad Gemellorum institutum
mo-

(t) Quamvis enim curias Regulorum Latinorum non cum nostris comparare velim, in illis tamen adulationem æque ac hodie obtinuisse probabile est. Nam Æneam (qui ex potentissima Urbe exul in Latium venit, dux belli expertus, & luxus pergnarus;) successoribus suis, in rebus parvis, artibus politicis, majestatem suam conservandi, (fere uti fieri hodie solet in Curiis *Comitellorum* & *Marchionettorum*,) egregium exemplum reliquisse, non est improbabile. Et solius Alladis qui 100. in circa annos A. U. C. Latio imperitavit exemplum, quanto jam illo tempore astu regnaverint reguli in Latio, ostendit. Is enim machinas excogitaverat, quæ fulmina imitarentur, & tonitruum similes strepitus ederent, quo Dei instar terreret subditos. (*Id. p. 57. Liv. l. 20.*) Quæ & astum, & mechanicam scientiam, & alias curiarum nostrarum (quas vocant) machinationes politicas, ab omni rusticitate abhorrentes arguunt. Quin & hinc patet, Regulos Latii non fuisse adeo novos homines. & nequaquam rusticitatis arguendos, quod L. Alba Numitoris Amulique temporibus jam per trecentos annos steterit, longa regulorum successione gubernata. Per tantum tempus non facile civitas simplicitatem morum retinere potuit.

momentum attulit, quod Amulius, regno pulsus, prole caruerit (u). Nemo enim ignorat, quos tumultus regum proscriptorum Liberi ciere soleant in avito regno. Parum absuit, quin Porfennæ ope ad exitium redegerint Romam jam adultam Tarquinii: Quare tot stupendis Viris ad servandum nomen Romanum illo tempore opus fuit, Mutio Scævola, Clælia Virgine, Horatio Coclite, &c. Quid non factura fuisset Amulii proles (si quam reliquisset) urbi infanti adhuc, insidiis perpetuis struendis parata? Non ergo mirum, Principes patria extorres tam facile apud externos refugium invenire. Hinc magnum quoddam regnum, miserorum Regum solamen perpetuo esse voluit, ut semper haberet, quo vicinos suos, si e re sua esset, vexaret. Hoc sine dubio olim metuentes illi, qui principes deposuere, melius rati sunt, illos vel perpetuæ custodiæ mancipare, vel luminibus (x) orba-

(u) Filia quidem Amulii mentionem facit *DIONYSIUS*, (*Halic. L. I.*) quæ Rheæ necem deprecata, illi vitam conservavit. De masculis vero nulla vestigia reperio. Hoc reperi, eundem (*Id. Lib. V.*) occasione primi Dictatoris T. Largii Romæ creati, dicere, cum Albanos regia stirps deficeret, post Amulii & Numitoris mortem illos dictatores creasse. Idem asserit Geographus supra laudatus (*Strabo.*) ubi de Italia loquitur, utrumque sine liberis decessisse.

(x) Hunc excæcandi modum olim frequentem fuisse in Oriente & Occidente, historia docet. Friderici primi temporibus adhuc obtinuit hæc in proditores poena; Poeta dicit:

Nam re comperta prius illi lumina lictor
Fodit, &c.

Sic Bernhardus, Ludovici Pii ex Pipino fratre nepos Nothus, ob seditionem cum sociis fuit excæcatus. Ita

orbare, quam e regno ejicere, quo facto, absentes dum sunt, majores in republica ciere solent turbas, quam præsentes dum essent fecere. (y) Quare utile con-

& Constantinopoli Imperator Constantinus, Helenæ Imperatricis Filius, luminibus orbatus. Idem evenit Conjuratoribus Germanis contra Carol. M. rebellantibus. Pipinûs vero Nothus in patrem rebellis in Monasterium detrusus. (*Günther. Lig. L. II. Thegan. de G. Lud. Pii. Mon. anon. vita Car. M. Albert. Stad. Lib. IV.*)

HERODOTUS ait, Scythas excæcare solitos fuisse servos suos, quod tñ. crediderim de uno oculo tantum intelligendum, alioquin institutum nimis absurdum vix fidem merebitur.

(y) Nec solum viri patria pulsi, qui magnum patriæ, exterorum ope, fecere negotium, sed & magnanimi exules, quorum exilium auxilio fuit patriæ, quam periculosum sit, tales viros patria pellere, demonstrat *Thrafsybulus* Atheniensis, patria pulsus, & eadem a Tyrannide liberata, Legem de oblivione injuriarum tulit, cum in illius potestate fuisset, opem ad illam delendam conferre. (*Æmyl. Probus in Thras.*) *Marcus Coriolanus* Roma ejectus, sed cum exercitu hostili redux, illa jamjam positurus & injuriam ulturus, nonnisi pietate in *Veturiam* matrem (*Volumniam* vocat *Plutarchus*) impeditus fuit, quo minus Romæ dominus fieret. (*Livius. Plutarch. in Coriol.*) *Themistocles* exul patriam perdere poterat, sed morte sua maluit prævenire illius exitium. (*Plut. Themist.*) *Camillus* exul Gallos fudit, & Romam Romæ reddidit, cum illi conturbatæ leges ipse dare potuisset.

Et 50. illi Exules Helvetii, qui ante pugnam apud *Morgardam*, exilii remissione a suis petita, etsi pro patria se pugnaturos promississent, tamen repulsam passi sunt: Sed hoc necquicquam commoti, nec amoris in patriam obliti, (Magnanime magis quam fortiter di-

consilium esse arbitror, Principes viros, ob delicta contra rem publicam, morte potius quam exilio mul-
tandos. Illo enim fit modo, ut uno ictu finiantur
dissidia, hoc vero, solum ad tempus malo remedium
affertur, & ulcus sæpe majore cum veneno erumpit,
dum suppuritandi & maturescendi denuo tempus illi
fuit relictum, vel si non erumpit, canceri tamē in-
stat membra perpetuo corrodit & fatigat. (2) Sed nec
perpetuam custodiam remedium semper satis vali-
dum

Tom. III.

I i

dum

cam!) loco præcipiti, quod Austriacis, antequam Hel-
vetios adorirentur, proxime erat subeundum, occupa-
to, antequam illi nostros invaderent, saxis & lapidibus
lacestos & turbatos, terroris illorum & fugæ subsecu-
tæ prima causa fuere. Quo demum feliciter patrato faci-
nore, victoria ab Helvetiis parta, exilii veniam merue-
runt, dum tn. ni amor in patriam obstitisset, in Leopoldi
castra transeundo, magna pars potuissent fieri cladis
forſan Helvetiis infligendæ. (*Stettlerus, loco supra laud.*)

Addi possent Bellisarius, Narses, (*Hist. Græc. l. i.*)
Alcibiades, &c. de hoc v. Xenoph. & Plut.
parallel.

(2) Ita Alex. M. *Sicut in corporibus ægris nil, quod nocitu-
rum est, medici relinquunt, sic nos quicquid obstat imperio
recidamus. Parva sæpe scintilla contempta magnum excitavit
incendium. (Curt. L. VI. c. 8.)* Optume loqueretur Rex,
si sententia ista non ad latrocinium suum Heroicum ul-
terius extendendum, (uti fecit,) sed contra illos usus
esset, qui damno Reipublicæ esse queunt. De his enim
utique consultius est, sæpe durius, quam meriti sunt, in
eos statuere, quam, lenius cum illis agendo, periculum su-
bire, ne scintilla non extincta, & magno exinde incendio
orto, detrimenti quid capiat respublica. Μικρά γὰρ ζυμὴ ὁ-
λον το φυγαμα ζυμοι. (*Gal. V. 9.*)

dum esse (a) contra novos motus, vel sola Historia Angliæ luculenter ante non adeo multa lustra comprobavit.

§. X.

Sed nec hoc parum ad Romæ exordium contulit, quod Fortuna reliquias istas & quasi ruinas regii sanguinis adeo nobiles creavit, & revolutioni, qualis erat in fatiis, aptas. Utrique enim Gemellorum erat (*Authore PLUT. in Romul.*) quædam in corporibus generositas, & in Pueris adhuc species magnitudinis. Cum vero adolevissent, uterque fortis, animum gerebat inexterritum, & ad quævis audenda paratum. Ideo æqualibus & humilibus grati esse, regios

(a) Temporibus tn. illis, quo Clero divinus honos tributus, Laicis vero obedientiæ gloria fuit relicta, & Tonfuratio maxime obtinuit, hoc carceris genus securius fuit. Quis enim inter angelos, Archangeli jussu, incarceratos liberasset? Ludovicus Pius coram *Stephano in terram ter prostratus omni corpore, tantissimum Pontificem salutavit.* (*Theganus §. XVI.*) En ergo quantum Clericorum princeps principem laicorum antecelluerit. Sed & crimina Clerus impuni patrare poterat. Bernhardus & omnes ejus socii seditionem contra Ludovicum vel morte vel cæcitate expiarunt. Tres vero Episcopi, facinoris correi, in confessione, a suis, non ab Imperatore deponerantur. (*idem §. XXII.*) In sancta ista capita durius quiddam statuere non licuit. Indulgentius enim in suos est Nov. Test. quam fuit vetus, quo obtinente HELI, quod lenior fuisset in filios immorigeros, de sella præceps ruit, (*1. Sam. C. IV.*) & leges ultrices in sacerdotes, imo illorum Liberos, duriora statuebant quam in Laicos. (*Levit. XXI. 7. 9. — X. 1. 2. 9. — Joseph. Ant. l. III. c. 14. & IV. 6.*) Non ergo mirum, carceri Moniali olim jussu clericali inclusos firmiorem ibi sedem habuisse, cum tanta Cleri fuerit veneratio.

gios. officiales aspernari, amplecti labores, venationes, cursus; Latronum insectatores, miserorum patroni esse &c. Præclari ob id facti & magni nominis. Romulus tamen excellentior & fortitudine & civili consilio putabatur.

§. XI.

Sed hæc nondum sufficiebant ad Nomen Rom. condendum. Facto quodam opus erat decisivo, quod tam felicibus circumstantiis opem ferret. Opus erat Fortuna, quæ jamjam viam meditabatur, qua ad scopum suum perveniret propositum. Juvenes isti jam satis clari propria virtute, alieno auxilio egebant, quod & Authoritatem imaginariam ipsis conciliaret. Nil est, quod a rerum inde initio majorem viris claris adjecerit authoritatem, nativitatis gloria, adeo ut hanc sæpe fictam, si vera non aderat, constet (b). Necessè igitur fuit, ut & de Gemellorum nostrorum constaret nativitate. Sic enim & justitia quædam illorum facta erat sustentatura, & opinio hominum illorum parti magis erat fautura. Sed veritati non facile aditus patet ad eos, qui summa tenent, nec adeo de vera Gemellorum origine, nisi difficulter, constare poterat; & timor a Tyranno os occlusit Faustulo, quo minus, quæ de illa sciret, effaretur. Nam ardua quam maxime, vel spe vel metu sæpius abscon-

I i 2

dita

(b) Exemplo Lamberti Simmelii, qui Temporibus Henr. VII. R. Angl. Comitem a Warvvik e mentitus fuit: Et *Perkini* vel Petri, Richardum Eduardi IV. Filium sub eodem Rege agentis. Quorum uterque magnas Henrico turbas suscitavit. (*Bacon. ver. Hist. H. VII.*) - - Huc quoque faciunt 5. Pseudo-Friderici, Fridericum II. Imperatorem se esse contententes; & dum se pro illo venditarent, illum A. 1250. in Italia fato defunctum negantes: quod & Conradino ultimo lineæ Suevicæ postea contigit. (*Servii Reichs, Hist. C. XX. XXI.*)

data manent, & ex illorum præcordiis, qui illa vehementius propalata cupiunt, vix invenit exitum, donec fortuna præbeat, qua illis exitus impune, recluso quasi carcere, pateat. Hoc opus erat gemellis, & quo fuit opus, fortuna suggererat.

§. XII.

: Nam Lupercali deditis Ludo, Pani sacro, cum nudi circumcursarent, (c) inopinato Remus, (Romulo se vi defendente) capitur ab insidiantibus, & Amulio traditur. (*Liv. & alii.*) Crimini dabatur maxime, in Numitoris agros ab his impetum fieri, & inde prædas agier. Amulius causa cognita, captum Numitori ad supplicium tradit. Hic specie juvenis, cum iis quæ de illo audiverat, comparata, de origine ejus interrogat, & juvenis de incerta sua nativitate differentis responso, cum ætate ejus & expositionis tempore conlato, nepotem suum agnoscit; dum interea Faustulus, suspicatus aliquid, Romulo Historiam non solum detegit, sed & adit Numitorem, & alveo, in quibus expositi erant gemini, illi ostenso, meretur fidem. (*Dionys. Hal.*) Interea & Romulus avum Numitorem adit, & ab illo agnitus, juncto celeriter dolo, cum globo juvenum, jussis aliis alio itinere ad regiam confluere, in regem impetum facit, obtruncat, fratrem liberat, avoque regnum paternum conciliat; Avus verò restitutis rebus, de paranda propria ditione cogitat, locum & Coloniam deducendæ necessaria subministrat, ipsi vero Romam condere occipiunt. (*Euseb. Chron. &c.*)

(c) Variant quidem scriptt. quoad Circumstantias, sed Re conveniunt. Quare & inutile & vix possibile ducerem, exactam omnium circumstantiarum veritatem noscere. Nosse sufficiat, factum decisivum intervenisse, quo & de Gemellorum origine constaret, & Amulius deiceretur regno, & Numitore restituto, & ipse & Juvenes, conjunctis viribus Romam condere possent.

§. XIII.

Ut autem urbs non solum conderetur, sed ut cito conderetur, Fatum alterum fratrum occidi voluit; (d) vix enim erat, novam civitatem a duobus capitibus recte constitutum iri, nedum fratribus, nedum Gemellis. Nimirum sicut in unaquaque republica, unica tantum summa potestas esse debet, ita & hic unicam esse opus erat. Ubi duo regnant, si (quod humaniter impossibile,) non in omnibus consentiant, vel nil agitur, vel id agitur, ut discordia, rixæ, cædes, imo bella intestina, inde oriantur,

Nec enim regna socium ferre nec tædæ possunt.

(*Senec. Trag.*)

I i 3

Plu-

(d) Qua occasione, an juste, quando, & a quo Remus occisus, litem meam non facio, nec huc spectat. *Vide Auth. supra cit.* - Si propterea occubuit, quia fossas urbis transiluit, statim ac aratro ductæ essent, transiluit; absurdum enim esset credere, illum jam perfectas transiluisse. Utrumvis tamen crimen capitale fuisset. - Si in pugna inter partes Romuli & Remi commissa cæsus fuit, etsi multi ex utraque parte occubuerint, & plures ex Remi parte discesserint, & ideo magnus antea numerus colonorum ad parvum redactus fuerit, reliqua tn. vis unita fortior fuit, quam fuisset major numerus, duobus subiectus, discordia certissime brevi dilapsurus. - Quare & Tatium post foedus cum Sabinis factum, in consortium quoddam regni receptum, sed a Laviniis occisum, haud ægre tulit Romulus, sine dubio ob minus securam, & nec utilem populo, nec imperanti gratam regni societatem. (*Liv. l. i. c. 14*) - Ex eadem ratione Palamedes Græcis gratissimus, & proinde reliquorum gloriam ducum sua gloria obfuscaturus, indigne ab Ulysse & Diomede, insidioso modo lapidibus in puteo obrutus, e medio sublatus ante Trojam. (*Dionys. Cretensis. L. II.*)

Plurimum ergo ad urbis incrementum Remi interitus fecit.

§. XIV.

Verum est itaque, originem civitatis Romanæ extraordinariis deberi circumstantiis, quæ illi, fato sic volente, dedere initium, & quibus Remus, & præsertim Romulus feliciter usi, viri magni nominis evasere. Nec opus est, ut recurramus ad fabulosa, memoriæ passim a Scriptoribus tradita (e), quæ antiqui-

(e) Ad fabulosa refero, Martis cum Rhea concubitum, - - Lupam gemellis mammæ præbentem, - - Picos Marti sacros minutis cibariis enutrientes expositos infantes. - - Classen, quæ ex Græcia veniens, per sceminam Romam combusta dicitur. - - Coitum Ancillæ cum Genitali masculo, quod per miraculum in foco Tarchetii apparuerat, ex quo (filix regis, sed illum spernenti, preparato) Romulus & Remus nati produntur. (*Authores passim.*) - - De alio spectro, quod fani Numen erat, cujus vestalis erat Rhea, ex quo gravida illa facta gemellos peperit. (*Plut. Rom.*) - - De sole eo tempore obscurato, &c. Quod tamen absolute falsum non dixerim. Sed nos eandem *fallaciam causæ non causæ* commissuros existumo, si illum propter Romulum obscuratum fuisse contendamus, qualem commiseri veteres, quibus defectus lunæ & solis omni fuere; cujusmodi exempla multa sunt apud scriptores. (*Curt. L. IV. Plut. Pelop. Euseb. Chron.*) Nec ergo vereor hallucinationem addere, Romuli tempore aliquid extraordinarii circa solem contigisse. Ezechias enim Rex illi fuit coætaneus. De hoc SS. asserit, dum ægrotaret, solem 10. lineis retrogressum, (2. Reg. XX. *Joseph. ant. L. 10.*) Et cum Judæa respectu Italiæ 30. Gradibus sit Orientalior, sol vero singulis horis 15. gradus dimetiatur, solem Italiæ duabus horis tardius oriri, quam Palæstinis, certum est; Crassa tn. Minerva, non Astronomica exa-

quitati & magnitudini Urbis condonanda sunt ; Quia tale miraculum orbis , modo ordinario oriri haud potuisse videbatur , & divino hinc semine , divinis viribus , ad eam producendam , & primos ejus moderatores procreandos , opus fuisse , haud ita absurde , credebatur , τοῖς τὰ Ρωμαίων πραγματὰ λογιζομένοις ; ὡς ἔκ ἀν ἐνθαυτὰ πρῆξι δυναμείως μὴ θείαν τινα ἀρχὴν λαβόντα .
(*Plut. Rom.*) I i 4 §. XV.

ctitudine, facta computatione. Quod si ergo istud miraculum Ezechiae, hora matutina solis in horizonte Judæorum apparentis, 3. & dimidia vel 4. contigit, in Italia fuit 1. & dimidia vel secunda diei hora. Pone jam solem vel paulum retrogressum, facile infra horizontem Latii visibilem post juga Pennini absconditus delitescere, & *Chlamyde sol operiri* potuit. Miraculum vero istud tempore matutino factum esse, apodictice ut probem, non habeo ; sed eadem est probabilitas pro matutino, quam pro alio tempore ; Cui accidit, de quo loquimur, extraneorum testimonium (*Plut. Peric.*) de sole illo Tempore eclipsin passio. Et ESAJAM insipientibus, in Lamentatione Hezechiae ægrotantis, illum Regem introducere anxium per totam diem usque ad noctem, optantem ut ad minimum crastinum diem videret : Et dum ita per totam noctem angitur, Esajas in paroxysmi apice advenit, emplastrum ficulneum applicat ; sed de ejus effectu dubitat rex, petit signum, & impetrat. (*Esaj. 38. 12. 13. 21.*) Et si multorum Criticorum more, sententiam meam enixe defendere animus esset, haberem adhuc HERODOTUM pro me militantem, qui Cyaxare Lydiam debellante ait νύξ ἡ ἡμέρα ἐγένετο. (*Herod. Clio. Polymn.*) Nam tempus non omnino abhorret. Sed scio, illum Xerxis tempore Eclipsin descripturum, solem omnino e cælo discessisse scribere, quare allegatam ejus phrasin (veritatis magis quam sententiæ meæ amans) non captabo.

(Obiter occasione Miraculi, quod Ezechiae contigit, monendum, JOSEPHUM (*Ant. l. 10. c. 3.*) adde.

§. XV.

Illi ergo, qui novis rebus student, probe attendant, an felicem circumstantiarum concursum prævideant: Et caveant sibi rebelles animi, ne nimis confidant Fortunæ, alioquin rempublicam turbaturi, si-bique suisque exitio futuri. *Fortes Fortuna*, sed non semper, *juvat*: & audacissimi vix fortes dici merentur; nam tantum fortis ab audace differt, quantum providus a meticulofo.

re, Regem præcipue anxium fuisse de hærede, antequam moreretur impetrando; quam circumstantiam in S. literis non reperi, etsi in se vera esse possit. Nam tribus post morbum ejus annis Manassæm ei demum natum esse patet, quia 15. annis postquam convaluisset vixit Ezechias, & relicto Manassæ filio duodecenni defunctus est. (2. Reg. XXI. 1. 2. Chron. XXXIII. 1. Jos. L. X. C.V.) Sed quomodo in Josepho dicitur, hunc vixisse annos 77? cum hoc posito juxta Josephi verba antecedentia, qui illum regnasse annos 55. asserit, Manassæ mortuo patre juvenis fuisset annor. 22. adeoque natus 7. annis ante patris morbum, quo tn. tempore juxta eundem Josephum Ezechia nulli hucdum erant filii. Impossibile est, Historicum doctissimum exactissimumque talem errorem commisisse, quare cum indubius error in MSc. lateat, loco 77. ponenda absque scrupulo 67. Quod nondum factum miror* hoc enim modo Josephus & secum & cum SS. facile conciliabitur.)

His affine est, quod tradunt, ipsum Amulium cum Rhea coivisse, septum armis, quo magis puellæ metum incuteret, & ne facile agnosceretur, ob insolitam cultus speciem. Unde potuisset esse orta fabula de Martis cum puella concubitu, & quod ajunt quidam, remissio supplicii capitalis Rheæ juxta LL. infligendi, Amulii precibus facta, &c.

* *Id factum jam in nupera JOSEPHI Editione Germ. Cel. J. B. OTTII, l. c. H.*

* * * * *

VI.

THEMATA

Praelectionum & Disputationum, *

Speciminis Publici edendi gratia
pro

Cathedra Philosophica,

In Academia

BERNENSI, quæ LAUSANNÆ est,
rite consequenda,

Decem Præstantissimis

CANDIDATIS

præscripta.

* Qua occasione & qua lege hæc *Themata Philosophica* publici juris fuerint facta, ex Præfatione adjecta quilibet videbit. Post edita vero Specimina *Cathedra* hæc Cl. PETRO de CROUSAZ, *Philosophia* antehac jam *Professori*, illo eam flagitanti, fuit commissa, cum ex aliquo jam tempore ex Aula Hassiaca domum redierat; Sed ipsi simul Collega datus Vir Rev. & Cl. JOS. FRANC. du MOULIN de MONTAGNI, cui præsertim *Theol. Nat. & Metaphysicæ* Pensum a Supremo Magistratu fuit demandatum,

PRÆ-

PRÆFATIO.
 JOH. GEORGIUS
 ALTMANNUS,

Ling. Græc. & Ethices Professor Publ.
 ACADEMIÆ BERNENSIS

h. t. Rector,
Lectori Erudito
 S. P. D.

PLacuit summo rerum humanarum Moderatori
 & Arbitro, jam ante quosdam menses ex do-
 lorum & ærumnarum ergastulo ad cœlestem
 evocare sapientiæ fruitionem Virum Clarissimum
 atque Celeberrimum *FRANCISCUM FRI-*
DERICUM de TRAITORRENS, dum vi-
 veret, *V. D. M. Philosophiæ atque Matheseos in*
Academia LAUSANNENSI Professore *P.O.*
 qui per annos undecim spartam suam ita exorna-
 vit, ut bonis & eruditis omnibus obitus ejus in flo-
 rente adhuc ætate flebilis acciderit atque luctuosus.
 Cum itaque ex morte Viri desideratissimi suo re-
 ctore & doctore sit orbata Cathedra, Illustrissimæ
 Reipublicæ *BERNENSIS* Proceres, Academiæ
 Patres Benevolentissimi, pro perpetua & provida
 in bonas literas cura, de successore in locum bea-
 te defuncti surrogando animum adverterunt, ex cu-
 jus ore sapientiæ, veritatis, atque cognitionis so-
 lidæ regulæ atque præcepta avidi auditores excipe-
 rent,

rent. Ut ideo ad *vacuam Sedem Philosophicam* talis surrogari posset, qui non tantum *Philosophiæ* sit *Professor*, sed & **PHILOSOPHUS**, pro more recepto atque legibus Illustris Reipublicæ, Clarissimi atque Doctissimi Viri, ad Specimina publica in materias præscriptas prælegendo atque disputando, jubente summo Magistratu, ab Amplissimo Senatu Academico fuere evocati, qui suam in scientiis Philosophicis sagacitatem & eruditionem publice exponerent, atque diebus sorte præscriptis probarent, se esse Philosophos veri nominis. Per *Philosophum* autem nos intelligimus talem Virum, qui perpetua claritate, & tanta, quanta fieri potest, simplicitate causas rerum evolvat; rationes solidas atque sufficientes de iis, quæ tanquam veritates agnoscit, vel tanquam falsa & inania rejicit, producat; quæ sint initia, progressus, causæ & rationes rerum lucidis & certis argumentis evincat; veritatemque in omnibus meditationis & laboris scopum præfigat, sive illa ab **ARISTOTELE** & **PLATONE**, sive à **CARTESIO** & **NEWTONO**, vel etiam à **LEIBNIZIO** vel **WOLFIO** fuerint tradita; quique ab omnibus præconceptis opinionibus sit immunis & liber, ne amore vel odio ductus veritati & cognitioni obicem ponat. Cum ergo sanctissimi Senatus Patres constituerint, spartam Vero Philosopho decernere, themata hæc præscripta typis mandari, atque ad eruditissima certamina omnes bonarum literarum Fautores, Cultores, atque Amicos volunt invitari. Veniam tandem depono, si præscripta Præ-

tationem

ctionum & disputationum themata non omnibus arrideant. Me equidem facile defendo, si quidam putent, me ex proprio vortice à vicino fuisse abreptum, cum *RECTORIS* munus mihi collectionem & dispositionem harum quæstionum imposuerit; meam vero, quam potui, dedi operam, ut illa argumenta seligerem, quæ apud Philosophos nostri temporis sunt & celeberrima, atque productis ex utraque parte rationibus agitata. Hæc adjicienda putabam, ne quis mihi forsan occinat, *non tibi rerum causas & origines, corporum cœlestium motus, naturæ & mentis humanæ abdita, rimari sorte datum,*

- - *Tua te jactes in aula.*

* * * * *

I.

JOH. PETRO PEREY, V.D.M.

& Pastori in loco dicto *le Lieu,*

Ad diem 13. Januarii, M DCC XXXVIII.

- I. Materiam Prælectionis matutinæ dabit Responsio ad Quæstionem: *Quomodo origo mali contra omnes difficultates sufficienter possit explicari & defendi?*
- II. Materiam disputationis pomeridianæ dabunt sequentes Quæstiones:

I.

Scientia, fides & opinio, de eadem re, an in uno eodemque subjecto & tempore consistere possint?

2. Lo-

2. Logica naturalis sufficiatne ad cognoscendam veritatem ac vitandum errorem ?
3. Verumne sit illud *LEIBNITIANUM*, *præsens gravidum esse futuro* ?
4. Deturne status perfecti æquilibrii ?
5. Verene dicatur, quod *CARTESIUS*, si hucusque provixisset, systema harmoniæ amplexurus fuisset ?
6. Mundus potueritne creari a Deo ab æterno ?
7. An Essentiæ rerum sint æternæ ?
8. Num Cl. *WOLFIUS* in sua *Theol. naturali* intellectum divinum ex plurium mundorum possibilitate demonstrative deduxerit ?
9. An systema influxus Physici repugnet veritatibus aliunde cognitis : *Quod nihil sit sine causa sui, & quod in effectibus determinatis debeat esse ratio determinationis* ?
10. An omnia quæ sunt, sint æterna & infinita, ut asserit *SPINOSA* ?
11. Num definitio amoris *WOLFIANI* sit genuina, & nemo ante illum amorem ita definiverit ?
12. Num ex corruptione & putrefactione aliquid possit generari, an vero conjunctio utriusque sexus requiratur ?
13. Undenam maris falsedo sit arcessenda ?
14. Cujus naturæ sit Vis Electrica, & an omnia corpora hac virtute sint prædita ?
15. Quænam sit ratio, quare magnes ferrum attrahat ?
16. Sensus quis sit illius *PLATONIS*, *Quod origo mali inde sit, quod non omnis materia potuerit in ordinem convenientem redigi* ?
17. Fatum Platonicum & Stoicum quomodo inter se differant ?
18. Num *Cometa* una cum omnibus Planetis primariis revolvantur circa Solem in umbilico Ellipseos constitutum, secundarii autem circa suos primarios, lege

lege eadem ac simili plane ratione ? Numque tanta ubique jam regnare deprehendatur maiestas & harmonia in universo , ut vel ipsius Alphonsi Regis satisfaceret fastidio , impio ore fabricam universi increpantis ?

19. Num omnes, quæ corporibus accidunt, mutationes, secundum regulas legesque motus fiant ?
20. Num figuræ sphaericæ, quam guttas cujuscunque liquoris induere videmus, a vi attractiva, ipsis guttis interna, producantur, an vero a fluidi ambientis pressione ?

II.

JOSEPHO FRANCISCO du MOU-
LIN de MONTAGNI, V. D. M.
in *Mont & Romanel.*

Ad diem 16, Januarii MDCCXXXVIII.

- I. Materia prælectionis matutinæ erit, *de Anima Brutorum.*
- II. Materiam disputationis pomeridianæ dabunt sequentes Quæstiones:

I.

AN aliquis Syllogismorum sit usus in veritate invenienda ?

2. Verine sint Canones Syllogistici: *Ex puris negativis nihil sequitur ; conclusio sequitur partem debiliorem?*
3. Num recte *LEIBNIZIUS* Systema causarum occasionalium rejecerit, & suum de harmonia præstabilita substituerit ?
4. An judicium Cl. *JACQUELOTI*, quod idem Systema causarum occasionalium libertati hominis adversetur, sit verum ?

5. An

5. An mala, salva rerum serie, ex ea auferri possint?
6. An decretum Dei nullam rebus inducat mutationem?
7. Annon quidam Philosophi recentiores decreta absoluta cum fatalismo unum idemque faciant?
8. Annon absurdum sit asserere, *peccatum etiam ad mundum optimum pertinere?*
9. Num in brutis sit analogum rationis?
10. Quid de Systemate æquilibrii Cl. *ENGELHARDI* sentiendum, & annon magnis sublit difficultatibus?
11. Num vis, quæ in universo residet, ab initio materiæ a Creatore impressa fuerit, an vero Deus quovis recurrente momento immediate motum secundum datas leges producat?
12. Quænam sit figura globi terrestris, oblonga, an compressa?
13. Fontium quænam origo ponenda?
14. Verumne sit assertum Sectæ *HERACLITÆ*, *quod mors & destructio rerum nihil aliud sit quam mutatio in contrarium?*
15. Num *PLATO* materiam æternam statuerit?
16. An Platoniorum *λογος* in Scriptores Sacros defluxerit?
17. Num dari possint duo corpora volumine æqualia, & densitate utcunque inæqualia, in quibus pororum seu meatuum summæ fere æquales sint, ut existimant Angli?
18. Num terra nostra cum planetis reliquis urgeatur vi centripeta versus solem, ita ut cessante motu progressivo, continuo caderet in solem? & quæ sit origo tantæ vis centripetæ versus solem directæ?
19. An Theoria *GALILÆI* de motu gravium a natura observetur?
20. Quænam explicatio Physica singularis illius phaenomeni, quod ostendit radium lucis, ex Diaphano

no in Diaphanum diversæ densitatis transcuntem, a via detorqueri, optima existimanda, *Js. NEWTONI* an *LEIBNITII*, an vero ea, quam exhibuit Vir Cl. *Johannes BERNOULLIUS*?

III.

SAMUELI KOENIG, SAM. Fil.

Ad diem 18. Januarii M DCC XXXVIII.

- I. Materiam prælectionis matutinæ dabit, *Præstantia PHILOSOPHIÆ LEIBNITIANÆ & WOLFIANÆ. ad Rationem, Religionem naturalem & revelatam, melius demonstrandam & confirmandam, quam secundum ductum omnium Philosophiæ systematum hæctenus conscriptorum factum.*
- II. Materiam disputationis pomeridianæ dabunt sequentes Quæstiones:

I.

- A**N ex libertate philosophandi, methodo philosophica, nullum religioni imminet periculum?
2. An principia Geometrarum & illorum procedendi ratio, sint certa & evidentia?
 3. An Systema causarum occasionalium leges naturæ evertat?
 4. Principium rationis sufficientis sitne universale?
 5. An tantum illud sit absolute possibile, quod vel est, vel fuit, vel erit?
 6. An illud verum sit, imperfectiones partium interdum pertinere ad perfectionem totius?
 7. Num principium indiscernibilium *LEIBNITII* fundamento nitatur?

8. Num

8. Num Cl. *WOLFIUS* intellectum divinum & reliqua attributa ejus demonstrative ex possibilitate plurium mundorum collegerit?
9. An necessitas hypothetica, sub qua omnia in mundo fieri dicuntur, brutam necessitatem ac fatum inducat?
10. Num ex cujusvis entis; etiam animæ, statu dato colligi queant omnes mundi status, præsentēs, antecessanei & futuri?
11. Quinam in materia de viribus vivis bonam causam defendant, Angli, an Germani?
12. Num corpora durante conflictu quiescant, ut existimat Cl. *WOLFIUS*?
13. Sitne differentia inter vires vivas & vires mortuas?
14. Deturne saltus in rerum natura à motu ad quietem, a quiete ad motum?
15. An Planetæ sint orbes habitabiles & revera habitati?
16. Num à Cometa, qui anno Christi 1680 apparuit, diluvium universale Noëticum excitatum fuerit?
17. An lex naturæ, qua eadem virium motricium quantitas, & eadem directio totalis in universo corporeo conservatur, sit principium harmoniæ universalis in natura?
18. Num gravitas, quam in hac terra nostra experimur, propagetur usque in lunam, ita ut luna versus terram gravis sit, ac delaberetur, quam primum motus lunæ progressivus sisteretur?
19. Num vortices, planetas circa solem deferentes, cum regulis *Keplerianis* consistere nequeant?
20. Quid *ARISTOTELES* per suam *ἐντελεχείαν* intellexerit?

IV.

JOHANNI BERNOULLI, J. U. D.

JOH. Fil.

Ad diem 20. Januarii MDCCXXXVIII.

- I. Materia prælectionis matutinæ erit, *De Vi Electrica.*
 II. Materiam disputationis pomeridianæ dabunt sequentes Quæstiones:

I.

AN definitiones negativæ in Philosophia sint admittendæ?

2. An ex unica præmissa conclusio recte inferri possit?
3. Quid sibi velit *harmonia LEIBNITII universalis*, & in specie illa, quæ inter regnum physicum naturæ, & regnum morale gratiæ intercedit?
4. Num in Systemate harmoniæ præstabilitæ leges motus non violentur?
5. An Systemati *LEIBNITIANO* sufficienti ratione imputet celeberr. de *GROUSAZ* in *Reflex. sur l'Essai de Pope* pag. 118. quod scribit: *En vérité il y a là plus qu'il n'en faut, pour rendre son, quiconque se livre à toutes ces chimères, à moins qu'il ne le soit déjà?*
6. An miracula in systemate *WOLFIANO* Cosmico locum habere possint?
7. An mundus potuerit ab æterno à Deo creari?
8. An influxus animæ in corpus, & corporis in animam per experientiam constet?
9. An ullus spiritus in corpus agere possit? & num Celeberr. *LEIBNITIUS* & *WOLFIUS* propter hanc sententiam influxum physicum rejecerint?
10. Deusne serio omnia intendat bona, cum tamen non omnia actu perficiat?

11. An

11. An per hypotheseſin *BURNETI* diluvii univerſalis cauſæ recte poſſint explicari ?
12. Num fluxus atque refluxus maris ab attractionibus ſolis & lunæ oriantur ?
13. An radii luminis exigua ſint corpuscula, ex corporibus lucentibus emiſſa ?
14. An ſyſtema mundi paulatim deficiat, ita ut interdum reparatione indigeat, ut *NEWTONUS* aſſerit ? an autem in eodem & perfectò ſtatu permaneat perpetuo, ut *LEIBNITIUS* aſſerit ?
15. An tranſitus viſ motricis ex uno ſubjecto in alterum, tanquam realis admitti poſſit ?
16. Quomodo *PYTHAGORAS* triangulo originem & formam omnium rerum adſcripſerit ?
17. Rationes quænam ex Philoſophia veterum afferri poſſint, quod priſci mortem in undis infaſitam habuerint, & lapidibus ſepulchralibus hominum naturali morte defunctorum conſueram hanc formulam adſcripſerint, *Sit tibi Terra levis* ?
18. Num Cometæ ſint phænomena ſublunaria, an in regionibus planetarum verſentur ?
19. An ſententia *LEIBNITII* de menſura vitium vivarum ſit admittenda tanquam vera ?
20. An per Syſtema undarum *HUGENII*, phænomenorum luminis ratio reddi queat, an melius per explicationem *NEWTONI* ?

V.

JACOBO WOLFIO, V. D. M.

Ad diem 23. Januarii M DCC XXXVIII.

- I. Materia prælectionis matutinæ erit, de *Essentia Animæ ejusque libertate.*
- II. Materiam diſputationis pomeridianæ dabunt ſequentes Quæſtiones :

K k 2

1. An

I.

AN definitionibus adhiberi non possint, nisi termini clari, fixi ac proprii?

2. An verum sit, quod ex puris particularibus nihil sequatur?
3. An Systema *LEIBNITIANUM*, explicandi commercium mentis & corporis, ita judicantibus *Trivoltinis* librorum Censoribus, libertati hominis valde faveat?
4. Num possibile sit, divina saltem accedente opera, ut materia cogitare possit?
5. An principium rationis sufficientis libertatem tollat & immutabilem necessitatem, fatumque fatuum inducat?
6. An detur tempus, & an sit ens reale?
7. Num essentiae rerum sint aeternae & absolute necessariae?
8. Num Enthymema *CARTESIANUM*, ego cogito, ergo sum, tantum valeat, quantum sectae amici contendunt?
9. Quid sit *miraculum*, & num sit actio, cujus causam naturalem solide explicare non valemus, ut *SPINOZA* voluit & *LOCKIUS*?
10. An essentia & natura mentis consistat in vi representandi universum pro situ corporis in hoc mundo?
11. Quid de animalculis spermaticis sentiendum sit?
12. Unde *Magnes* vim suam ad utrumque Polum directricem habeat?
13. An *Conchae Lapideae* in montibus repertae, sint pro reliquiis diluvii habendae?
14. Quid *EPICUREI* per voluptatem intellexerint?
15. An explicari possit, & quomodo, sententia *DEMOCRITI* dicentis: quod atomi moveantur ab aeterno secundum lineam rectam?

16. An

16. An gravitatis actio mutua & utrinque æqualis sit, ita ut corpora universa gravitent in terram & terra in omnia corpora vicissim æqualiter gravis sit?
17. Cuinam systemati in explicatione physica systematis Mundi palma tribuenda, veteri *Ptolomaico*, recentiori *Coperniceo*, an *Tychonico*?
18. Deturne clara & distincta virium centripetarum & centrifugarum idea; sintne hæ vires ejusdem speciei cum vi gravitatis, ita ut cum illa comparari queant?
19. Num vires attractivæ à figuris pendeant?
20. Num corpora in Luna existentia leviora sint corporibus in hac terra constitutis, & quidem circiter sexagies, ita ut massa ex. gr. plumbi apud nos 60. librarum unam tantum libram ponderaret in lunam translata?

VI.

NICOLAO BLAUNER,

SS. Theol. Stud.

Ad diem 25. Januarii M DCC XXXVIII.

- I. Materia prælectionis matutinæ erit, *De causa diluvii universalis Noëtici*; numque validis satis rationibus quidam se probare existiment, Cometas tam stupendos posse edere effectus, ut inde diluvium recte deduci possit.
- II. Materiam disputationis pomeridianæ dabunt sequentes Quæstiones:

I.
AN omnes propositiones categoricæ ad quatuor species referri possint?

2. An quis veritatem propositionis non agnoscere in-

- re dicendus sit, etsi observet subjecto aliquid convenire, & propositio sit vera?
3. An in tertia figura conclusio semper debeat esse particularis?
 4. Num essentia rerum ab intellectu divino, an vero ab ejus voluntate dependeat?
 5. Num Systema *LEIBNITIANUM* de nexu rerum, omnem libertatem, religionem & moralitatem tollat?
 6. An dentur miracula restitutionis?
 7. An mens humana tantum habeat unicam vim, ex qua omnes ejus facultates & operationes derivari possint?
 8. An haecenus incognita sint principia, quibus explicari possint actiones daemonum in corpora?
 9. Regimen animae in corpus, an per influxum physicum exerceatur?
 10. Quænam definitio *Wolfiana* de *DEO* ex utraque sit præferenda? & annon Idealismus vel Spinosismus involvant?
 11. Num ratio elasticitatis ab attractione derivari queat?
 12. Num *NEWTONI* explicatio, cur in lamellis tenuissimis colores iridis exhibeantur, bona sit & admittenda?
 13. Num generatio sit evolutio animalis præexistens?
 14. Quænam sit ratio fluxus & refluxus maris?
 15. Probabilene sit, ut quidam putant, veteres superasse recentiores in construendis machinis, ad moles immensi ponderis in altum tollendas?
 16. An aliquo fundamento *Sceptici* asseruerint, quod omne argumentum habeat æquale contrarium, ex quo fiat, quod de re nulla possimus esse certi & persuasi?
 17. Num diversa inclinatio orbitarum planetariorum, tam

tam inter se, quam respectu *Æquatoris*, à rationibus mechanicis descendat, an vero casui tribuenda?

18. Num colores & proprietates lucis congenitæ sint? an tantummodo diversæ modificationes lucis, ut voluit *CARTESIUS*?
19. Num pondera corporum, æqualiter à centro terræ distantium, sint ut quantitates materiæ in corporibus?
20. Quænam sit causa, cur aqua, simul ac gelu constringi & in glaciem abire incipit, tam immensam se expandendi vim acquirat, ut crassissimos tubos æneos, quibus includitur, sæpe pulveris pyrii ad instar findat atque disrumpat? Numque explicatio huic phænomeno omnibus numeris satisfaciens dari possit?

VII.

JACOBO KOCHER, V. D. M.

Ad diem 27. Januarii M DCC XXXVIII.

- I. Materia prælectionis matutinæ erit, *De finibus sapientissimi Creatoris, in condendis corporibus cœlestibus, stellis fixis atque inerrantibus; Sintne illa corpora, ut hæc nostra tellus, cultu & ornatu comta, & creaturarum varietate; & in quantum, omnia hæc nostri causa facta fuisse, existimari possit?*
- II. Materiam disputationis pomeridianæ dabunt sequentes Quæstiones:

I.

- Q**uare Logica sit possibilis, vel, quodnam illius sit fundamentum?
2. Quænam definitiones sint meliores, an nominales, an reales?

3. An *CARTESII* criterium veritatis, quod ponit in clara & distincta rei perceptione, sit genuinum?
4. Quo in casu minor propositio, sit propositio infinita?
5. Num detur vacuum?
6. Num lumen zodiacale & boreale sint phænomena longe ultra atmosphæram terræ nostræ in cœlis genita?
7. An detur spatium & locus, & quid sit?
8. Num ideo influxus physicus sit rejiciendus, quia intelligibili modo explicari nequit, vel an saltem ideo pro incerto sit habendus?
9. Num actiones corporis & animæ mutue repugnent canonì metaphysico, *effectus integer æquipollet causæ plenæ*?
10. Essentiæ rerum num ab intellectu divino, an vero ab ejus voluntate dependeant?
11. Definitio mundi *WOLFIANA* sitne accurata & genuina, an vero idealismum, materialismum, factum cœcum, mundique æternitatem præ se ferat?
12. Rectene dicatur, in *Systemate* causarum occasionalium perpetua fieri miracula?
13. *Monades LEIBNITIANÆ* sintne spiritus an corpora?
14. Num Luna reliquaque planetarum corpora sint atmosphæra circumsepta?
15. An corporis essentia in triplici dimensione posita sit?
16. Num actio in distans sit impossibilis?
17. Sitne differentia inter quantitatem virium motricium, & quantitatem motus?
18. Quid *ORPHEUS*, alique veteres, per mundum visibilem & invisibilem intellexerint?
19. An radii luminis exigua sint corpuscula, ex corporibus lucentibus emissa, & refracta attractionibus & repulsionibus quibusdam, quibus lumen & corpora in se agunt?

20. Quid *SOCRATES* per Summum Bonum Hominis, quod in virtute & sapientia consistere aiebat, intellexerit?

VIII.

DANIELI PAVILLARD, V. D. M.

Ad diem 30. Januarii M DCC XXXVIII.

- I. Materia Prælectionis matutinæ erit: *De causæ gravitatis explicatione physica, de rationibus illorum, qui fluido in Vorticem acto illam tribuunt, ut & ANGLORUM sententia, gravitatem omnibus corporibus innatam existimantium.*
- II. Materiam disputationis pomeridianæ dabunt sequentes Quæstiones:

I.

AN methodus philosophica eadem esse debeat cum ea, qua utuntur Mathematici?

2. Quale judicium sit ferendum de hypothesebus Philosophicis?
3. Num detur demonstratio?
4. An animæ, vi & virtute agendi in corpus ac continendi machinam corporis in statu functionibus humanis opposito, creari potuerint?
5. An in voluntate Dei tantum quærenda radix possibilitatis?
6. Quomodo possibilitas realiter definiri possit?
7. Num miracula, in se spectata, sint opera non præcise sapientiæ, sed potentiæ Divinæ?
8. Num plures mundi sint possibiles?
9. Quid sit substantia? & num sit sensu Ontologico subiectum modificabile & perdurabile?
10. An quatuor species entium simplicium, quas statuit *LEIBNITIUS*, essentialiter à se differant?

K k 5

11. Num

11. Num explicatio causæ gravitatis, quam dedit *HUGENIUS*; admitti queat?
12. Omnesne, quæ corporibus accidunt, mutationes, secundum regulas legesque motus fiant?
13. Num *colorum* physica explicatio derivari queat à seriebus seu filamentis corporum à sole excussorum, quæ, cum in singulis contiguis seriebus diversæ molis sint ac diversa celeritate ferantur, sensationem diversorum colorum excitent, ita uti *NEWTONO* visum fuit?
14. Quies absoluta an detur;
15. An omnis *monas* sit automaton?
16. Quomodo *ACADEMICI* intellexerint, quod rebus insit veritas, ad quam comprehendendam homo capax sit, sed quod imagines rerum per phantasmiam ortæ nos decipiant?
17. Quomodo omnium optime acervalis argumentatio à *CHRYSIPPO* proposita juxta *CICERONEM* Lib. IV. *Quæstion. Academic. c. 28.* solvi possit?
18. Num vis inertię sit principium regularum motus?
19. Num Regulæ motus *CARTESIANÆ* bonæ sint & admittendæ?
20. Num Materiæ exiguæ quævis particula possit in spatium quantumvis magnum extendi, ut particulæ sint à se invicem remotæ intervallo, data recta minore?

IX.

DANIELI WYT TENBACH,

V. D. M.

Ad diem 1. Februarii M DCC XXXVIII.

- I. Materiam prælectionis matutinæ dabit, Explicatio Physica *Iridis*, *Coronarum*, *Parheliorum*, & quid in aëre & sole requiratur, ut ejusmodi phenomena

*mena compareant ; & an probabile sit , ante diluvium universale IRIDIS phenomenon compa-
ruisse ?*

II. Materiam disputationis pomeridianæ dabunt se-
quentes Quæstiones :

I.

AN, quia sufficiens notarum enumeratio est signum
distinctæ notionis , ideo non sequatur , cum di-
stincta carere notione , qui notas enumerare ne-
quit ?

2. Ex impossibili possitne colligi possibile ?
3. Num influxus phylicus leges motus tarbet ?
4. Num nexus rerum *LEIBNITIANUS & WOL-
FIANUS* sit fatalis , ut eorum adversarii contem-
dunt ?
5. An cum Philosophia & Libertate Mentis humanæ
consistat novorum Philosophorum assertum , quod
*operationes Spiritus Sancti interna in animis hominum , re-
spectu naturæ , sint miracula ?*
6. An detur harmonia mentis & corporis , & quid il-
la sit ?
7. An possibile , ut id possit esse perfectius , quod plu-
res altero habet imperfectiones contrarie dictas ?
8. An distinctio voluntatis antecedentis & consequen-
tis in Deo sit admittenda , ut vult *LEIBNIZIUS* ?
9. Immortalitas animæ humanæ , an ex sola ejus in-
destructibilitate solide demonstretur ?
10. An hic mundus sit omnium optimus & perfectis-
simus ?
11. Regimen deturne animæ in corpus , si corpus om-
nes suos motus convenienter structuræ suæ pro-
ducit ?
12. Quid sit ignis ?
13. Thermæ an ex igne subterraneo , an vero ex fer-
mentatione calefiant ?

14. Num

14. Num regulæ motus sint necessariæ, an contingentes?
15. Num materia in infinitum sit divisibilis?
16. Doceantne phænomena, gravitatem aliquam universalem, in omnibus hujus Systematis mundani partibus obviam, ita ut corpusculum minimum attrahat corpora maxima, Solem & omnes Planetas, Sol ac Planetæ omnes attrahant vicissim illud corpusculum, conati perpetuo & indefinente? Numque universi Creator corporibus talem vim indiderit, ceu primam & simplicissimam naturæ legem, per rationes mechanicas non explicabilem?
17. Num causa motus corporum cœlestium aliter, quam per vortices fluidos, intelligibili modo explicari possit?
18. An Cometae sint signa irati Numinis, an vero corpora perennia, perenni motu atque regulari gaudentia?
19. Quomodo procedat argumentum *XENOPHANIS* dicentis, nullus datur verus motus, & exinde nulla nec generatio, nec vera destructio?
20. Quid familiæ *HERACLITEÆ* Sectatores intellexerint per ignem æternum, ex quo omnia fiant?

X.

ALBERTO ÆCHLER,

SS. Theol. Candid.

Ad diem 3. Februarii M DCC XXXVIII.

- I. Materia prælectionis matutinæ erit, *De Harmonia Præstabilita.*
- II. Materiam disputationis pomeridianæ dabunt sequentes Quæstiones:

I.

Quid sit differentia specifica & numerica?

2. An

2. An *LEIBNIZIUS*, & post eum *WOLFIUS* notiones recte distinxerint, in claras & obscuras, illasque iterum in distinctas & confusas?
3. An in quibusdam syllogismis genuinæ formæ, major possit esse propositio particularis?
4. Natura corporis an consistat in vi ejusdem activa vel motrice?
5. An elementa rerum sint entia simplicia, sive monades?
6. An dentur duo rerum omnium principia æterna?
7. An spatium sit attributum divinum, vel organum sensorium Dei?
8. An per *nexum rerum*, secundum systema *LEIBNITIANUM*, tam fatalis rerum necessitas stabiliatur, ut systema universi perituum foret, si vel minima actio non eveniret, ut assertioni Leibnitianæ tribuit Cl. de *GROUSAZ*, in *reflexions sur l'Essai de Mr. Pope* pag. 25.
9. Quid *CARTESIUS* intelligat per vim animæ movendi corpus?
10. Possibilitas absoluta quid sit, quid respectiva?
11. An in æternitate detur successio?
12. Num quævis monas sit speculum universi?
13. Num omnia corpora organica inde à tempore creationis præformata existant?
14. Quomodo *STOICI* asserant vel intelligant, unum elementum in aliud transfigurari?
15. Quid *PYTHAGORAS* per numeros suos immateriales intellexerit?
16. Quænam sit ratio incrementi & decrementi montium glacialium, & an illud sit periodicum?
17. Causa gravitatis an à Vorticibus derivari queat?
18. Num à gravitate ætheris durities & cohesio corporum derivari queat?
19. An lumen eodem modo propagetur, ut sonus?
20. Num

20. Num *Cometa* in suis revolutionibus observent legem omnibus Planetis impositam, ut radii inde ad Solem ducti describant areas temporibus proportionales, atque ita in orbitis Ellipticis ad instar omnium Planetarum moveantur?

* * * * *

VII.

JOH. ROD. RODOLPHI,

S. S. Theologiae in Academia Bernensi olim Professoris Primarii,

IRIDIS

THEORIA SACRA,

Sive

DISSERTATIO THEOLOGICA

De

FOEDERE NOACHICO,

Ejusque SACRAMENTO, nempe

Arcu Cœlesti,

GEN. IX. vers. 8 - 17.

Summarium.

Exhibetur in hac Dissertatione §. I. NEXUS cum antecedentibus hujus Capituli. §. II. III. ANA-

LYSIS

LTSIS rerum tractandarum. §. IV. VERBORUM *Explicatio*, & quidem *primò* vocis *MR*. §. V. Quomodo Deus dici possit, aspectu Iridis recordari foederis sui. §. VI. Indicatur *deinde*, quid sibi velit repetitio verborum, quæ occurrit vers. 12. & 17. item vers. 13. & 14. §. VII. VIII. Post explanationem verborum acceditur ad REM IPSAM, & quidem *α.* agitur *de Fœdero Noëtico ipso*. §. IX. Quod transactum fuit cum NOACHO, ejus Posteris, & ipsis animalibus. §. X. *Substantia* Fœderis consistit in triplici promissione: *α.* de Terra, non amplius inundanda, §. XI. *β.* de Genere Humano, ad usum Ecclesiæ conservando, §. XII. *γ.* de Fœdere Gratiae, cum Noacho ejusque posteris, ejus fidei adherentibus, erigendo & obsignando. §. XIII. Cujus Longanimitatis & conservationis mundi causa indicatur. §. XIV. Quæ nonnisi Filii Sponsione nititur. §. XV. Incertum vero, quamdiu hicce mundus in hoc statu permanens sit. §. XVI. *α.* agitur de Fœderis hujus SIGNO & SACRAMENTO. §. XVII. Cujus *Præstantia* indicatur. §. XVIII. Causæ ejus naturales sunt, §. XIX. ejus *Forma*, §. XX. *Situs*, §. XXI. & *Colorum numerus* exponitur. §. XXII. Quæ de ejus præsaigiis dicuntur, incerta sunt & fabulosa. §. XXIII. *IRIDIS* significatio spiritualis disquiritur. §. XXIV. XXV. Uñbus Theoreticis & Practicis Dissertationi finis imponitur.

§. I.

A Reum Cœlestem non tam ea parte, qua se tanquam pulcherrimum Cœli spectaculum oculis ingerit, quam ex usu, quo tanquam divinæ benevolentiae Symbolum, pactique gratuiti signaculum, piorum fidei sese commendat, contemplari volentibus, primum de pacto, sive Fœdere Noëtico, quæ videlicet ejus fuerit ratio & quis tenor, tantisper disquirendum. Postquam licenter grassatam ubique libidinem atque Numinis contemptum, effusi divinæ indignationis imbres, totiusque terrarum orbis cluvio justissimâ poenâ extinxisset; reliquias in spem futuri Mundi intra familiam Noæ conservatas, Deus primum benedictione consolatur, Gen. IX. v. 1. *Et benedixit Deus Noacho & filiis ejus, &c.* Deinde cum humanarum legum instauratione & sanctione, v. 2-7. tum etiam fœdere, metum diluvii adimit; ne miseranda generis humani clade & horrendâ terrarum vastitie, dubio procul, expavectis, diluvii memoria & obvia passim divinæ ultionis monumenta novos subinde terrores incutiant, quoties cœlum nubibus obductum pluviam minari videtur. Erat certe quidem Noë rara & incomparabili fide ad miraculum usque præditus, verum quodnam esse potuit tantum constantiæ robur, quod non illa tam tristis & horribilis Dei vindicta percelleret? tum vero istud fidei adversus Cœli minas firmamen non Noacho solum atque filiis ejus, sed & posteris quibusque longissima generationum serie post nascituris Dei clementia paraverat.

§. II.

Hic usui fuerit, ante omnia, pericopam historiæ, qua fœdus istud à Mose refertur, qualicunque Analyfi adumbrasse, & vocabula vel phrasés, quæ aliquid caliginis habent, illustrasse. Observanda igitur

✠ Generalis Propositio v. 9. 10. 11. *Quod autem me attinet, ecce ego constituo fœdus meum vobiscum, & cum semine vestro post vos. Et cum omni anima vivente, quæ vobiscum est, cum alitibus, cum pecudibus, & cum feris terræ vobiscum, & illis quæ exiverunt ex arca, & omni fera terræ. Et constabiliam fœdus meum vobiscum, & non exscindetur omnis caro adhuc ab aquis diluvii, & non erit adhuc diluvium ad perdendam terram. Quibus verbis exponitur*

1. Fœderis Pactio, phrasi Scripturis S. in fœderum negotio usitata **ברית מקים** *Ecce ego constituo, stare facio fœdus. LXX. ἀνίστημι & στήσω τὴν διαθήκην. R. Sal. explicat per ברית והווק קיום לעשות מסכים להבטחתי* *Ecce ego sponte mea paciscor & stabilio fœdus, quo certam tibi spem sive fiduciam mei faciam, scil. de propagatione generis tui, de quo Noam sollicitum fuisse existimat ille Hebræus. De nomine ברית specialius dicendum suo loco.*

2. Fœderatorum Circumscriptio v. 9. 10. Ubi memorantur ab una parte DEUS, de bonitatis suæ divitiis pro arbitrato disponens, & quid suæ voluntatis sit circa easdem liberali promissione notificans. Ab altera parte NOAH, filii ejus cum ipso, & semen sive posterius eorum: omnis anima vivens, alites, pecudes, (Hebræis נסה ורקח כהמה *pecus domestica major & minor, Græcis θήματα καὶ ὑποζύγια*) & feræ bestię; חיה enim in oppositione ad בהמה ferum quodvis & sylvestre animal significat; juxta usum vocabulorum, qui Moysi ætate obtinuit. Quid vero de reptilibus &c. num fœdere isto comprehensa negabimus? R. SALOMON illud de omnibus quæ exiverunt ex arca, addi putat **והביא שקצים ורמשים** *ut eo numero includi intelligamus etiam animalia immunda (quæ lex abominabilia haberi jubet) & reptilia: imo & illo cum omni fera terræ comprehendi etiam חמיקים bestias noxias. Verum ista λεωτολογία non erat opus, quando ex scopo liquet*

Tom. III. L 1 atten-

attendenti, fœdere illo præter hominem etiam contineri animantia cætera, quatenus illa conservari, ad levamentum miseriarum atque consolationem hominis pertinet.

3. Fœderis Substantia, v. 11. לא יכרת *Non exscindetur omnis caro adhuc ab aquis diluvii &c. LXX. ἡ ἀποθανεῖται*, quibus alioquin Hebræum vertitur, ἐξαίρειν ἐκ medio tollere, & ἐξολοθρεύειν *funditus perdere.*

§. III.

ב Signum, quod ad κύρωσιν τῆς διαθήκης, & fidem promissioni firmandam additur v. 12. - 17. *Et dixit Deus, hoc signum fœderis, quod ego do inter me & vos & inter omnem animam vivam, quæ vobiscum est, לדרת עולם in ætates seculi. Arcum meum do in nube, & erit in signum fœderis inter me & inter terram, & erit בטנני ענן quum nubem faciam super terram, & conspicietur arcus in nube, recordabor fœderis mei, quod est inter me & inter vos, & inter omnem animam viventem, in omni carne; & non erunt amplius aquæ in diluvium, ad perdendum omnem carnem. Et erit arcus in nube, & videbo illum, ad recordandum fœdus seculi inter Deum & inter omnem animam viventem in omni carne, quæ est super terra. Et dixit Deus ad Noach; hoc signum fœderis, quod erexi inter me & inter omnem carnem, quæ in terra est. Quibus verbis Deus Signum fœderis 1. exprimit & definit; rem videlicet non per miraculum factam aut faciendam, sed ex causis naturalibus, Deo sic providente, existentem, quæ est IRIS v. 13. Arcum meum do in nube, & erit in signum fœderis &c. 2. Indicat & amplificat signi istius usum v. 14. 15. 16. Et erit quum nubem faciam in terra &c. 3. In re præsentī exhibet & spectandum præbet v. 17. Hoc signum fœderis &c. הראהו הקשת ואמר לו הרי האות שאמרתי ostendit ipsi arcum, & dixit; Ecce signum, de quo dixi! inquit recte Glossator Hebræus.*

§. IV.

§. IV.

σημεῖον, *SIGNUM*, in Sacris dicitur, quid-
quid seipsum sensui, & præter se aliud quid, sive præ-
teritum, sive præsens, sive futurum, menti repræsen-
tat: quicquid item exempli novitate & inolentia ad-
mirationem movet, & quo fine factum sit inquirendi
studium excitat, speciatim מופת dictum: quicquid
rei à re discernendæ servit: quicquid denique ad fi-
dem rei faciendam adhibetur, quo sensu signa, pro-
missis conventis & pactis adjecta, sigillorum & pig-
norum vice sunt, & obsignandi, applicandi suoque
modo rem significatam exhibendi usum præstant;
quanquam omnis ille usus sola *significatione* expediatur,
quod in *Catecheticis ad 2. LXVI. §. 4.* ostendimus.
Qualia signa Theologis in materia Fœderum Divino-
rum sunt Sacramenta. לדרת עולם in *etates seculi*. Hic
λεπτολογίης, supra nobis notatus, observat לדרת scri-
bi חסר deficiente & eoque significari, fuisse *etates* שלא
הוצר בו לאות quibus non erat opus signò, arcu cœlesti in
nubibus exposito, quippe in quibus fuerint nonnulli per-
fecte iusti. Talem fuisse ait *atatem Hiskia, Regis Judæ,*
& *atatem Rabbi Simeonis, Filii Jochai.* Idem Magistri
etiam de Viris Synagogæ Magnæ & aliis prædicant,
quibus iustitiæ & pietatis laude abundantibus visam
in cœlo iridem fuisse negant. Verum id genus glos-
semata Pharisaismi fermento putere, facile sentit, qui
quid veri salis in pectore habet. עולם nomine ab ig-
norantia deducto, integram rei cujusque *durationem*,
nobis fere *incognitam*, designat. Infinitam igitur an
finitam, licet homini incompertam, *durationem* sig-
nificet, non ex solo vocabulo, verum cum ex rei cu-
jusque existentis indole & natura, tum ex divina de-
finitione, per Scripturam & experientiam indaganda,
colligitur. Hinc Judæi ante Christi tempora spem
vitæ profiterentes æternæ, precibus suis adjicere sole-

bant clausulam *עולם עולם* in *secula seculorum*, exosi dogma Sadducæorum, qui unicum duntaxat *seculum*, vitæ animalis ambitu conclusum, credebant. Qui nihil nisi Pentateuchum Mosis legeret, facile sibi persuaderet, legem ceremonialem, cultum atque sacerdotium Leviticum, fore simpliciter sempiterna, frequenter adhibitis in legum sanctione verbis *לדורותיכם עולם עולם*, חקת עולם, &c. Scilicet prudentiæ Legislatoris erat, legis quasi perpetuo duraturæ observantiam inculcare, ne si abrogandam diceret aperte, populo ad licentiam proclivi legibus obediendi animum immi-
nueret. Hinc facile plura & evidentiora antiquationis, tempore *διορθώσεως* futuræ, argumenta atque testimonia in Prophetarum Scriptis, quam in Pentateucho Mosis, invenias. Quanquam rursus phrasæ illæ, suo ex usu & rei natura spectatæ, nihil aliud significare comperientur, quam legi Mosis tam diu suum fore locum & usum, dum Israel futurus esset populus, ab aliis Mundi populis separatus & *αὐτόνομος*. Sic in textu nostro *עולם עולם* in *etates seculi*, tantundem est, quasi dicat, *quoad homines nascentur ex hominibus*. *וְנִבְנָה בְּעֶנְנִי* pro *בְּעֶנְנִי* q. d. quando nubifico. LXX. καὶ ἔσται ἐν τῷ συννεφεῖν με νεφέλας ἐπὶ τὴν γῆν. V. V. *cum obduxero nubibus cælum*. SYRUS, *Et erit* *ⲉⲣⲓⲧ ⲉⲣⲓⲧ ⲉⲣⲓⲧ ⲉⲣⲓⲧ* *quum ascendere facio nubes super terram*.

S. V.

Humanitus loquitur Deus, quum se Iridis aspectu memorem fore dicit foederis sempiterni, v. 14. 15. *Et erit, quum conspicietur arcus in nube, recordabor foederis mei* &c. Et v. 16. *Erit arcus in nube, & videbo illum, ad recordandum fœdus seculi* &c. Homines quidem signorum conspectu admonentur rerum signatarum. Deus, qui pactorum oblivisci non potest, eo revocandæ memoriæ adminiculo non habet opus. Quæ enim necessitas, arcu cœlesti conspecto foederis commoneri cum,

eum, qui, foederis perpetuitatem homini in memori-
am reducturus, iridem in nubibus spectandam exhi-
bet? Verissime igitur AUGUSTINUS cavillatori,
*Deum obliuiosum & emortua memoria, cui merito opus sit
assiduo monitore, criminanti, regerit: Iste non memoria,
sed anima mortua, quid loquatur nesciens, sic in rebus aper-
tioribus calumniatur, quanto magis caligat in nubibus & de-
lirare compellitur. Lib. 1. contra Advers. Leg. & Proph. In
hoc & consimilibus exemplis tenenda est regula Theol.*
*ἀνθρώπου μόρφωσις & ἀνθρώπου παθὼς διττὰ θεοπρεπῶς εἶναι intelli-
genda.* Solet scriptura actiones Dei describens phrasin
petere a membris, sensibus atque affectibus hominis,
quod faciens *lingua filiorum hominum loqui* dicitur He-
braeis. Id vero fieri per metaphoram, vel si mavis,
metonymiam, inde liquet, quia Scriptura in isto lo-
quendi genere eum habet delectum, ut Deo non at-
tribuat, nisi quæ sui generis perfectionem aliquam
arguant. Sic *in membris* Deo non attribuuntur hume-
ri gestaminibus ferendis, nec organa alimentis capi-
endis, digerendis, distribuendis, seruiencia. In *sensi-
bus externis* Deo non tribuuntur gustus & tactus; in
internis non phantasia sive imaginatio &c. De quibus
diligenter, nec tamen satis, differuit MAJEMON:
in *More Nevoch. lib. 1. cap. 26. &c.* Non enim expli-
cuit, quid divinæ perfectionis adumbretur, exempli
causa, quando Deus *recordari* dicitur, hic & alibi Scri-
pturarum. Nobis, salvo exercitiorum iudicio, sic
videtur: perfectio est, menti, quoties rei cuiuspiam
meminit, rem cogitatione præsentem sisti. Rursus
imperfectio est, cogitationem, quæ excidit, signis,
aliisve memoriæ adminiculis revocare. *DEO inter-
minabilem vitæ totam simul & perfectam possessionem* habenti,
cogitatio infinita, cum genera singulorum, tum
singula generum complectens, perpetuo præsens est:
recordari tamen dicitur, quando eam cogitationem
inescinenter sibi præsentem, seque adeo curam rerum

perpetuam agere, signo aliquo, vel opere hominibus patefacit. Exemplo sint hæc : *Gen. 8 : 1.* Deus recordatus dicitur Noachi, & omnium bestiarum - - - *quæ erant cum ipso in arca*, quando eorum se rationem habere testatum fecit immisso vento, terram exsiccaturus, oclulis fontibus abyssi & cataractis cœli, cohibitoque imbre è cœlo, *ibid. v. 2.* Quemadmodum ex adverso Deus negat se recordaturum amplius peccati domus Israël & Judæ, *Jer. 31 : 31. 34.* disuncto scil. chirographo, & sublata necessitate profitendi reatum, quæ quondam inter onera pædagogicæ legalis erat, *Col. 2 : 14.*

§. VI.

Quæri tandem possit, quid sibi velit repetitio verborum, quæ occurrit v. 12. & 17. item v. 13. 14. rursus v. 15. 16. Quid nobis videatur de v. 12. & 17. constabit attendenti ad ea quæ §. III. dicta. Hebræi, qui Scripturæ S. nihil incuriosè transmittunt, præterquam quod omnium maxime observatum oportet, has repetitiones, ut & illam *Cap. 8 : 21.* ubi bis positum לא אסוף לא non pergam &c. pertinere putant ad jusjurandum, de quo *ESAÏ. 54 : 9.* Nam *aquæ Noachi hoc mihi, quemadmodum juravi, non transitaras aquas Noachi terram, sic juravi, ne efferverescam in te, &c.* Atqui, inquirunt, nusquam in historia diluvii jusjurandum invenias. Hinc regula Hebræorum, citante KIMCHIO ad locum *Esaia :* לאו לאו שבועה זמר לאו לאו שבועה הן נמי שבועה *Non facit juramentum.* Et quia repetitio ista particula negative jusjurandum infert, *Ita, Ita, etiam jusjurandum est.* Rectius tamen cum ipse Kimchi, tum Abarbanel existimant, pro juramento haberi foedus ipsum, quandoquidem ut per jusjurandum, sic per foedus קיום הברר *sua verbis stabilitas accedit.* Et vero jurari foedera solennia quis nescit? Unde etiam διαθήκη *pro jurare usurpatur apud ARISTOPHANEM.* Eapropter promissio, Noacho & posteris

steris ejus facta, ut jurisjurandi vim habere, eoque simpliciter irrevocabilis esse intelligeretur, foederis illi nomen inditum est. Interim repetitiones istæ suo non carent usu atque emphasi, inde amoris divini quasi sollicitudinem, hinc nostrum torporem & credendi tarditatem, arguentes. Non potest satis inculcare, fore se memorem pacti, quoties arcus ipsius in nubibus apparuerit, ut omnem cordis humani hæsitacionem auferat, & credere cunctantibus certam ex repetito signi conspectu fidem rei significatæ faciat.

§. VII.

Ista verborum explanatione præmissa, rem ipsam nunc propius inspecturi, primum de Foedere Noachico, deinde de Arcu Cœlesti ceu Foederis Sacramento, pro instituti ratione differemus. *FOEDUS* in nostro aliisque Scripturæ V. T. locis appellatur ברית nomine non à ברא succidere, ut Grotius & alii, ex loco Ezech. 23 : 47. male intellecto arbitrantur, ob invisam sibi Testamenti Θεσπονύμους accepti notionem, quam vox ברית Græcæ διαθήκη respondens non raro fert : sed à ברה eligere, deducto. Propria enim & essentialis foederum ratio est, non victimarum cæsis, sed libera personarum & conditionum electio, & in conditiones delectas mutua consensus. Tametsi rursus negari non possit, ad ritum cædendi victimas, antiquitus usitatum, respici, quando כרת ברית secare, pro pangere, *sædus*, dicitur, phrasi Scripturæ tralatiua. Cæterum ברית non semper *sædus* mutua partium conventionem constans, sed quandoque per Synecdochen vel *præceptum*, cui annexa est promissio, vel *promissionem* irrevocabilem significat. Prioris significatus exemplum est, quando Levitæ dicuntur *observasse dictum & sædus Dei*, Deut. 33 : 9. Posterioris exemplum est Exod. 34 : 10. *Ecce ego ferio sædus : coram toto populo tuo faciam mirabilia*, &c. Neque enim hic

versus, ut male sentit ABEN ESRA, conferri debet cum v. 27. Sic Eij. 59: 21. *Et me quod attinet, hoc est fœdus meum cum ipsis: Spiritus meus, qui est super te, & verba mea, quæ posui in ore tuo, non recedent ab ore tuo, &c.* Ratio *συνεδόχης* non obscura est attendenti. Cum enim in fœdere divino duo sint, *præceptum*, seu officii stipulatio, & *promissio*: qui præceptum servavit eique per omnia satisfecit, jus sibi quæsitum habet expectandi promissum. Hinc promissio, licet absoluta, quoniam promissario jus parit promissa petendi, perinde ac si præceptum fecisset, fœderis nomine venit in Scriptura. Consimilis etiam ratio est præcepti *συνεδόχης* pro fœdere positi.

§. VIII.

Quemadmodum כרת ברית *secare fœdus*, loco f. c. sic הקים ברית *statuere fœdus*, in argumenti nostri historia idem est quod *promittere*, vel tanquam ex fœdere rato *addicere*. Fœdus igitur hoc loco est voluntaria, absoluta, irrevocabilis, nulloque casu vel impedimento frustranda, boni cujuscumque promissio, qua is, cui facta est, bonum illud suo jure, tanquam præstita pacti lege sibi debitum, expectare atque petere potest. Cum autem hujusmodi promissio peccatoribus facta non possit non esse notificatio consilii vel propositi divini de re quapiam circa peccatorem, ad illustrationem gratiæ vel justitiæ divinæ, facienda, inquirendum: 1. *Quibus sit facta promissio?* 2. *Qua de re*, atque adeo quæ promissionis, propositum Dei notificantis, sit substantia? 3. *Qua denique propositi divini ratio*, & boni inde promissi certissimaque fide præstandi causa?

§. IX.

Primum quod concernit, illi, quibus facta fuit promissio, sunt I. NOACHUS, nomine Symbolico patris sui spem & expectationem de semine in quo esset

esset benedictio profitens, vir fide sua justus & iustitiæ præco, trium filiorum pater, mundi ruinæ per diluvium inductæ solus cum familia superstes, alter quasi Adamus & generis humani reparator, cujus Adamus erat auctor. Huic atque filiis, eorumque posteris, orbem terrarum inter se partituris, & ex uno sanguine Noachi juxta promissionis vim Gen. 9. v. 1. repleturis, universo proinde generi humano, foedus illud pacis atque securitatis proponitur. *Minime dubium est*, inquit CALVINUS, *quin Dei consilium fuerit, omnibus ejus, Noæ, posteris consulere. Non ergo privatum foedus cum una tantum domo sancitum fuit, sed omnibus populis commune, & quod seculis omnibus usque ad finem mundi vigeat. Et sane cum hodie non minus exundet impietas, quam ætate Noah, plusquam necesse est, hoc Dei verbo tanquam mille seris & claustris cohiberi aquas, ne ad nos perdendos erumpant. Comment. ad Gen. 9. II. Animantia cuncta, alites, pecudes, feræ agrestes. Quærenti, quomodo statui possit foedus cum animantibus ratione destitutis, respondent interpretes, foedera Dei duorum esse generum; alia absoluta, alia conditionata. Absolutum esse, quod sola promissione constar, ad cujus præstationem Deus sese voluntate sua ita obstringit, ut promissionis suæ executionem nolit pendere ex ulla re, quam à creatura stipuletur. Conditionatum contra &c. Prioris generis foedera cum bestiis iniri non posse, quia servandarum conditionum sunt incapaces: Quæ vero sine conditione feriantur, nec vicariam requirunt observantiam, beneficii agnitionem & animi gratitudinem, ut ait Magnus MUSCULUS ad Gen. 9. posse utique non cum hominibus tantum, sed & cum bestiis statui. His non acquiescenti, & forte causanti, ne quidem promissionis absolutæ capaces esse bestias: respondemus nos, Deum tamen bestias pacto comprehensas voluisse, ut intelligeremus: a. pactum esse absolutum, & hominem nihilo plus quam animalia ratione & consilio carentia ad ejus executionem con-*

ferre. Quapropter fides, quam tacite postulat divina promissio, non ut præstandæ promissionis conditio, sed, quemadmodum fides in humanis ad testimonium & promissum viri probi & veracis concurrere solet, ut assensio animi, promissionem sibi ratam & irrevocabilem facientis, spectanda est. Sic *recepto Dei testimonio obfirmamus in corde, quod Deus verax sit*, Joh. 3: 33. β. Bestias hoc foedere comprehendere, quatenus ad homines pertinet, etiam bestias conservari. Significat ergo Deus, se providente, animantium genera hominum usibus perinde certo conservatum iri, quasi illis ex pacto perpetuam sui conservationem deberet. Quemadmodum Eliphaz homini pio *foedus fore dicit cum lapidibus, & pacem cum bestiis agri*, i. e. æque nulla ex illis sensurum esse damna, ac si religione foederis jurati nocere prohiberentur. Job. 5: 23. :

§. X.

Promissionis foederalis SUBSTANTIAM his verbis complectitur Deus: *Ecce ego constituo foedus meum vobiscum; --- non excindetur omnis caro adhuc ab aquis diluvii, & non erit adhuc diluvium ad perdendam terram.* v. 9. - 11. Quæ verba plus in recessu habent, quam animo minus intento legenti præferre videntur. I. Istis enim verbis fidem dat Deus, posthac non amplius inductum iri diluvium, quo, quemadmodum factum erat, & terra ipsa vastetur, & universa caro deleatur. Metuendum igitur negat diluvium *Universale*, non particularia, quæ in Græcia fuit diluvium Ogygis, Eleusinae Conditoris & Regis, tempore effusum, ut inquit OROSIUS lib. 1. c. 7. & alterum illud, Deucalionis dictum, quod *majorem partem populorum Thessaliae absumsit, paucis per refugia montium liberatis, maxime in monte Parnasso, in cujus circuitu Deucalion tunc regno potiebatur: qui tunc ad se ratibus confugientes susceptos, per gemina Parnassi juga fovit aluitque, à quo propterea genus huma-*

humanum reparatum ferunt. Ut idem OROSIUS refert ibid. Cap. 9. Quorum illud, illustris SCALLGERI calculo, ad annum M. 2186. P. J. 2950. à diluvio Universalis 530. atque adeo ad ætatem Jacobi Patriarchæ, refertur: hoc vero annis 248. illo posterius creditur.

§. XI.

II. Iisdem verbis non tantum cavetur de securitate contra universalem aquarum eluvionem, verum etiam pactum continetur longanimitatis & clementiæ divinæ, cum de terra & animantibus ad usum generis humani conservandis; tum de genere humano, ad usum Ecclesiæ, per omnes mundi ætates, juxta ordinem atque leges naturæ primitus à Deo sancitas, multiplicando, & per universum terrarum orbem propagando. Cur alioqui adversus periculum diluvii cautum vellet humano generi, quod alio periculi genere perire pateretur? Eo tendit benedictio: *fructificate, multiplicamini & implete terram*, Gen. 9. 1. & promissio de perpetuanda tempestatum anni dierumque & noctium vicissitudine, cum καιροῖς καρποφόροις. Gen. 8: 22. Act. 14: 17. conf. Jer. 31: 35. & 33: 20. Eo etiam comparata fuisse existimamus societatis œconomicae & civilis inter homines ineundæ, colendæ & tuendæ adminicula, quæ Deus suppeditavit, ceu ὡς σωφρονίζων τὰ ἔθνη, gentes quasi injecto disciplinæ fræno *coercens* & regens, alias in omne nefas & mentem nihil pensi habentem, cum certo societatis humanæ exitio, sese projecturas, Psal. 94: 10. Unde enim egregia illa bene multa virtutum apud Philosophos gentiles, plurima de æquitate legum condendarum, de Reptubl. prudenter constituenda feliciterque moderanda, de judiciis agendis, & id genus aliis, apud Jctos Romanos antiquitus prodita juris præcepta? Unde juramenti religio, Numinis metus? Unde pudor, sapientum reverentia, conscientiae vis, quam

quam nec pessimi quique, ut maxime vellent, intra se extinguere totam potuere? Unde Principes, Magistratus, tribunalia, judicia, leges; unde animus onera publica ferendi, seque omnino aliorum arbitrio subjiendi, non propter iram tantum, sive pœnæ metum, sed etiam propter conscientiam? Rom. 13: 5. Unde artes honestæ, ad vitam commode agendam adminiculantes? Quid beneficia cœlitus data, *pluvia, tempora fructibus perferendis præstituta*? &c. Act 14: 17. Quid bella, quid regionum inundationes, pestes, terræ motus, Rerumpubl. revolutiones, &c. nonne evidentissima sunt Divinæ cum ἀνοχῆς καὶ μακροθυμίας, tum παιδείας καὶ σωφρονισμοῦ experimenta? Hinc Gentiles inexcusabiles facti dicuntur Apostolo, quia, quæ læva ipsis & perversa mens erat, deos sibi dona fecerunt, & quæ creata sunt ad utendum, venerati sunt ad colendum. Ne tamen nesciremus, ista longanimitatis divinæ experimenta specialioris gratiæ esse præludia, Gentibus verbi gratiæ sensim oblitis, & ut meruerant, in suis ipsarum viis incedere permissis, Deus interim populum Israeliticum, ex aliis populis selectum, propius sibi admovit, exquisitoribus bonitatis suæ beneficiis fovendum. Unde MOSES, nam pars, inquit, Jehovah est populus ejus, Jacob funiculus hereditatis ejus. Inveniebat ipsum in terra deserti, & in vasto ejulabili solitudinis; circumdabat eum, erudiebat eum, conservabat eum, ut pupillam oculi sui. Ut aquila excitat nidum suum, pullitum suam, super pullis suis fertur; pandebat alas suas, accipiebat illum, ferebat ipsum super ala sua, &c. Deut. 32: 9. seqq.

S. XII.

III. Nulli dubitamus, quin Deus longius prospiciens pacto longanimitatis etiam fœderis gratiæ promissionem inclusam, & Noacho ejusque posteris, quotquot fidei avitæ vestigiis insisterent, obsignatam voluerit. Verissime D. P. MARTYR, Hoc, inquit, diligen-

diligenter annotabimas, hoc fœdere, etsi homines promittatur à Deo liberandos quoad corporis vitam, ne aquis præfocentur, tamen hic subesse umbram liberationis ab æterna morte, ne scil. æterna damnatione obruamur. Et præterquam quod umbra istud ostenditur, argumento etiam à fidelibus ita colligi debet: si Deus sibi fidentibus ita prospicit, ut velit certos esse, nec dubitare de liberatione ab aquis, quanto magis animos illorum, eorundem potiores partes, liberabit non à momentanea, sed perpetua morte? Si in his quæ minoris ponderis ita est sollicitus, ut erit circa id, in quo nostræ felicitatis summa versatur? Quod equidem credo probatu esse proclive. I. Quia Deus, tanquam יי דין pollens decencia, Ps. 89: 9. in longanimitate sua nec mundum ferret, nec peccatores mundi incolas toleraret, neque creaturam vanitati & servituti corruptionis subijci pateretur, nisi apud ipsum esset condonatio & redemptio, Psal. 130: 4. 7. parata resipiscentibus. Unde illud Apostoli: *An divitias bonitatis ipsius & tolerantia ac longanimitatis contemnis, ignorans, quod bonitas Dei ad resipiscentiam te ducat?* &c. Rom. 2: 4. II. Fœdus Noeticum ad Ecclesiam pertinere, instituta docet comparatio, Esai. 54: 9. *Nam aqua Noachi hoc mihi, quemadmodum juravi, non transituras aquas Noachi terram, sic juravi ne effervescam in te, & increpem te.* Comparat fœdus, quod cum Ecclesia N. T. & accedentibus ad eam gentibus, hætenus fœderis divini exortibus, sub emblemate mulieris olim sterilis & desolatæ proposita, erat percussurus, & in quo gratiam & misericordiam æternam in assertore Jehova consequendam promiserat v. 7. 8. cum fœdere Noetico, non solum ut promissi firmitudinem & promittentis constantiam simili exemplo adumbratam videat, ad id enim quidni sufficeret dixisse, *se jurasse, item, montes decedent & colles nutabunt, & gratia mea à te non recedet, & fœdus pacis meæ non nutabit: ait miserator tuus Jehova?* v. 9. 10. Verum ut in fœdere Noetico eandem gratiam sibi promissam, obli-

obsignatam, & per tot secula præstitam, & porro plenius præstandam, animo nequaquam hæsitante, intelligat. III. Idem probat etiam quæ signo cum re signata intercedit analogia, de qua suo loco: item longanimitatis exercendæ ratio, de qua mox dicendum.

§. XIII.

Oeconomia ista longanimitatis & tolerantia divi-
vinæ, inde à lapsu protoplastorum usque, universa
Ecclesiæ seu regno Christi per Orbem terrarum eri-
gendo & propagando comparata est: ut adeo pro-
positi divini foedere Noetico notificari ratio non sit
obscura. Qua, quæso, de causa mundus, lege Dei
ab homine violata, non illico interiit, nec cælum
virtutis suæ influxum telluri, nec tellus suum homini
proventum negavit? Quare homo juxta divi-
nationis rigorem non illico repentina morte con-
cidit? Sed stare perrexit mundus per tot retro secula,
staturus porro ad novissimum usque diem, Deo defi-
nitum & cognitum, homine interim & animantibus
genus suum secundum primævæ benedictionis legem
propagantibus? Scilicet, quia Deo propositum erat,
genus humanum veluti sylvam cæduam ædificandæ
Ecclesiæ suæ conservare. Hinc tametsi, exundante
scelerum diluvio, mundum antiquum inducto aqua-
rum diluvio delere constituerat, mundum nihilomi-
nus conservavit, dum perdidit, reparandi generis
humani seminio in arca Noë reservato. Quod futu-
rum promiserat DEUS, Gen. 6: 18. *Et faciam stare
fœdus meum tecum, & intrabis in arcam tu & filii tui, &
uxor tua, & uxores filiorum tuorum tecum &c.* qui primus
Scripturæ locus, in quo disertæ fœderis mentio. Sen-
sus verborum est, do fidem, vel promitto, te tuos-
que mediis in aquis diluvii salvos fore atque incolum-
es, ut per vos cum genus humanum, veluti sylva,
materiem in usum ædificationis suppeditatura, tum
Eccle-

Ecclesia, veluti domus Dei indidem extruenda & propaganda, servetur. In quam mentem etiam accipiendum esse fœdus, quo Deus generi nostro adversus diluvium universale deinceps cautum voluit, docet vaticinium, quo ordinem regni Dei inter posteros suos observandum, delineare cœpit NOAH, Gen. 9: 26. 27. *Et dixit, benedictus Jehova Deus Semi. - Persuadebit Deus Japheto, & habitabit in tentoriis Semi. &c.* Significans, genus humanum ex se propagatum, sed simul dispersum iri multos in populos, seorsum habitaturos, neque in fidei concordia semper perseveraturos, ut idem de Deo & justitiæ via sentiant atque loquantur. Ab ea via etiam aberraturos *Japheti* posteros. Deum vero pacturum fœdus cum posteritate *Semi*, & inde daturum Messiam, ut qui te salvum esse velit, necessario cum semine *Semi* communicet, & in eo sibi benedicturus, in ejus quasi familiam commigret. Missis suo deinde tempore Evangelistis *Japheti* posteros ad communionem seminis *Semi* invitaturum & allecturum: ut tanquam in tentoriis *Semi* habitantes inter se fratres sint atque cohæredes. Memorabile etiam est illud DEI ad Zionem, de sui desertione conquerentem; *An oblivisceretur mulier parvuli sui? - Ecce in manibus signavi te, muri tui coram me sunt semper.* Esaj. 49: 16. Curam suam erga Ecclesiam egregia nobis adumbrat similitudine sapientis *rexylu*, qui inter operandum ob oculos & quasi in manu depictam habet operis ideam. Quo docemur, quicquid operis sui, præsertim illustrioris, in mundo fecit facietque Deus, id suo quodam modo ad commodum Ecclesiæ referri. Quo etiam Imperiorum collineant revolutiones, Deo non sine respectu ad Ecclesiam regnumve Uncti sui transferente & erigente reges & regna, Dan. 2: 21. Quatuor famosæ illæ Monarchiæ exemplum exhibent hujus providentiæ divini evidentissimum; facta enim fuit illarum revolu-

tio ad Ecclesiæ vel castigationem vel consolationem. Rege Babylonio in virgam, Cyro Persa ad dandam libertatem, Græcis ad tentationem, & rursus ad verbi divini per orbem terrarum propagationem, Romanis denique ad politiæ Judaicæ abolitionem, suscitatis. Verissimum est illud libri Sobar: *Deus Benedictus* *μαρτυροῦμαι* *erga impios* *כעלמא טבא גזעא מנהון* *ut* (Dei benedictione) *proveniat ex illis germen bonum in mundo: sicut ex Theracho prodiit Abraham, qui est germen bonum, radix & portio bona in mundo.* Hinc etiam electorum, qui soli demum veram constituunt Ecclesiam; in judiciis rationem haberi testatur Christus Matth. 24: 22. *Propter electos veni decurtabuntur dies illi.* i. e. bello Judaico per Romanos inchoato, sic providente Deo, talis intercedet armorum suspensio, cujus beneficio multi data fugiendi opportunitate servabuntur. Quod angustiae laxamentum gratiæ, Electos charissima coeli pignora prosequenti, acceptum ferri debet. Quo etiam spectat illud Zach. 11: 7. *Et pascebam oves occidionis, ad præparandum inopes, vel propter rectos inter inopes ovium.* Vere Lutherus: *Quicquid habet Mundus, habet beneficio Ecclesiæ: sicut inquit Angelus in Actis ad Paulum: Ecce donavit tibi Deus omnes, qui navigant tecum, qui certe erant idololatrae & impii.* T. III. in Gen. c. 44. *Electos vere dixeris Sal terræ, quo illa ab interitu præservatur,* Matth. 5: 13. Quanta igitur iniquitas odii, quo electi in mundo laborant, quibus tamen reprobi longanimitatis divinæ beneficia sua quadam ratione debent.

§. XIV.

Et si vero Longanimitatis exercendæ consilium à Dei *εὐδοκία* pendeat, Consilii tamen executio causam habet in sponsione Filii Dei, *μεσότης*. Prius vel ex eo liquet, quod Deus citra conditionis ullius stipulationem promittit, se longanimitate usurum erga genus humanum, & definitum tolerantiae tempus non amplius

plius universali hominum & animantium excidio interrupturum, quanquam non minor foret etiam post-hac, atque fuerat ante, hominum pravitas & impœnitentia. Gen. 8 : 21. adde Rom. 9 : 22. *Posterioris ratio* ea est, quod Deus salva sanctitatis & iustitiæ suæ gloria homini peccatori gratiam promittere, promissamque solenni symbolo obsignare & præstare non potest, nisi per Filium sponso-rem, quem constituit dare conciliatorem. Unde in Propheti- cis emblematis solium & caput Messiae iride cinctum. Apoc. 4 : 3. & 10 : 1. Et quando Noah arcâ egressus, arâ Domino statuta hostiam de omni pecude & volucri munda immolavit, egregio pietatis exemplo docens, primam patrifamilias in domo, & principi in politia, restauranda curam oportere esse de sacris, *Deus odorem fragrantiae odoratus* dicitur, Gen. 8 : 20. 21. Nunquid existimamus, Deum putido viscerum & carnis fumo atque nidore delectari, quod de Diis suis H O- M E R U S prædikat ? Scil. gratam sibi hostiam Noæ, forte per ἐμπυρισμόν, testatus est Deus, quippe obla- tam in fide, qua prospexerat in sacrificium, quod Deo offerendum erat pro peccato & ad impetrandam iustitiam, quæ est Dei iustitia, cuius ille fuerat *præco* & factus *hæres*, 2. Petr. 2 : 5. Heb. 11 : 7. Eam sacrifi- cii approbationem continuo secuta solennis promissio de diluvio non amplius immittendo, &c. haud ob- scure arguit, longanimitatis divinæ exercitium *dile- ctioni & clementiæ Angeli faciei, quâ suos bajulabat & fere- bat omnibus diebus seculi*, Esaj. 63 : 9 & propter suos etiam *verbo potentia fert omnia*, Heb. 1 : 3. acceptum esse ferendum.

§. XV.

Quæ- runt multi, sæpe curiose veritatem quam mo- deste, de mundi hodierni duratione : nonnullis è cœ- lo & astris, eorumque periodis & revolutionibus ; aliis ex terra ejusque qualitatibus ; aliis denique ex

calculis prophetis, exoticis aut sacris, Hebræis aut Christianis, mundi hujus obitum definiri posse, autumantibus. Nos, quibus ad talia oculos deesse hærenus, libenter fatemur, de annorum atque dierum numero securi, satis habemus observasse, mundum conservari propter electos, nascituros deinceps & vocandos. *Deus enim longanimis est erga nos, non volens quosquam perire, sed omnes ad resipiscentiam concedere, quos scilicet elegit, & ab interitu vindicare decrevit, 2. Petr. 3: 9. Quapropter etiam Domini longanimitatem nobis salutem esse reputandam, dicit Apost. ibid. v. 15.* Desinet igitur ordinariæ providentiæ mundum conservantis & gubernantis œconomia, ubi numerus electorum fuerit impletus, quandoquidem istius œconomix finis est executio consilii gratiæ erga hæredes Dei, sive electos, per omnes mundi ætates & temporum periodos exercendæ. Annus vel dies isti œconomix finem facturæ Θεὸς ἐν γένεσιν κτίται, vel, ut cum Scriptura loquar, *reconditus est penes Deum, obsignatus in thesauris ejus, Deut. 32: 34. nobis sancta conversatione & pietatis studio expectandus & accelerandus, 2. Pet. 3: 11. 12.*

§. XVI.

Hæc de fœdere Noetico. Signum ejus est *IRIS. Et dixit Deus; hoc signum fœderis. - Arcum meum do in nube, &c. v. 12. 13.* In eo refulget admirabilis Dei indulgentia, quod, ut solidam verbo suo fidem apud nos afferat, talibus adminiculis uti non gravatur. Iridem igitur quominus *Sacramentum* appellemus, atque etiamnum esse statuamus, nihil prohibet. *Etenim si fœdus Noeticum gratiæ fœdus fuit, quin signum ei additum veri nominis sacramentum fuerit, dubitari nequit. HEIDEGG. Corp. Theol. Christ. L. XII. §. 75.* Ergo Iris symbolum est gratiæ gratum facientis, quam Scholæ vocant, proinde Sacramentum, sed cum fœderis ingenio congruens, ideo dispensationi humanæ nullatenus subiectum. Neque tamen recte dixeris, duobus plura esse Novi Test. Sacramenta. §. XVII.

§. XVII.

Nisi quæ admiratione alioquin & consideratione dignissima sunt, familiaritate usuque vilescerent, arcu coelesti vix admirabilius quid in meteororum miraculis à natura nobis exhiberi crederetur. Hinc Poëtis *Thaumantias* dicta Iris, Thaumantis & Electræ filia; sic enim Ovid. *Metam. lib. 4.*

*Læta redit Juno : quam cœlum intrare parantem
Roratis lustravit aquis Thaumantias Iris.*

ex Hesiod. *Theogonia* 265.

Θάυμας δ' ἰκεατοῖο βαθυβρείταο θύγατρας
Ἠγάγετ' Ἠλέκτρην. ἥ δ' ὠκεῖαν τέκεν Ἴριν.

Thaumas vero Oceani profundiflui filiam

Duxit Electram : Hæc autem celerem peperit Irim.

Nominis notationem tradit PLUTARCHUS ex Platone; *πλάτων Φησὶ, Θαύμαντος αὐτὴν γενεαλογῆσαι τῆς ἀνθρώπου, διὰ τὸ θαυμάσαι ταύτην. Plato inquit, à Thaumante genus suum ducere Iridem, finxisse mortales, rei admiratione adductos : alludente videlicet ad nominis originem fabula. Lib. 3. de placit Phil. c. 5. Unde & in Sacris Literis celebrata Iris. Sicut enim lucis creatæ præstantiam arguit, quod Deus ipse *amicire se* dicitur *luce, instar togæ*, Psal. 104 : 2. Ita *iridis*, quæ nihil nisi lux variegata, excellentiam commendat, quod capiti & folio Messiae ornando adhibetur in picturis propheticiis. Ejus indagatio multum exercuit Philosophos, qua veteres, qua modernos. Hæc ingenium suum præstitit summus præteriti seculi Philosophus, Renatus CARTESIUS, miræ solertia & industria successuque felici, etiam hostibus laudato, iridis generationem, figuram, colorum varietatem, & alia, perscrutatus, adeo ut, quæ ARISTOTELES *Meteorol. lib. 3. cap. 4. 5. SENECA Natural. Quest. lib. 1.**

cap. 3. & seqq subtilissimus *SCALIGER* Exercit. 80. & alii, priscorum vestigia secuti, super hoc argumento scribere, mera caligo videri possint, *Cartesiana* recte assecutis.

§. XVIII.

Præsentis instituti est, ad illa *Iridis* attendere, quæ signi cum re significata analogiam exhibent. Si enim *Sacramenta* quandam similitudinem earum rerum, quarum *Sacramenta* sunt, non haberent, omnino *Sacramenta* non essent, inquit *AUGUST. Epist. 23.* Similitudinem certis reperturi vestigiis, brevi percurramus, quæ Naturæ historia de Iridis generatione, forma, situ, colorum varietate, effectis, &c. Authoribus priscis & hodiernis recensita, suppeditat. Iridem ex causis naturalibus existere, mirum est esse qui negent, eo quod signi loco foederi divinitus est adjecta. Suam isti opinionem dedoceri possunt experimento iridis artificialis in fonte saliente, prismate crystallino, pila vitrea &c. quæ tamen verius forte naturalis diceretur, arte non nisi occasionem & materiam ministrante. Qualia etiam veteribus non inobservata. Videmus, inquit *SENECA*, cum fistula aliquo loco rupta est, aquam per tenue foramen elidi: qua sparsa contra solem oblique posita, faciem arcus representat. Idem videbis accidere, si quando volueris observare fullonem, cum os aqua implevit, & vestimenta fidiculis diducta leviter aspergit, apparet varios ledi colores in illo aëre asperso, quales in arcu fulgere solent. Nat. Quæst. l. 1. c. 3. ibid. c. 7. est, qui exemplum prismatis objicit; Virgula solet fieri vitrea, stricta, vel pluribus angulis in modum clava torosa; hæc si ex transverso solem accipit, colorem talem, qualis in arcu videri solet, reddit. Sic cœlo pluvio ea saltem parte, qua iris apparet, adversi Solis radii in nube rorante, vel in guttas seu stillicidia liquescente, duas refractiones & unam vel duas reflexiones passi, arcum versicolore reddunt, oculo spectatoris in linea

nea recta, centrum solis & iridis jungente, constituto. Non aliam generandæ iridis rationem esse fingendam, plus satis comprobant experimenta mox recensita, & illud apud *SENECAM*; l. c. cap. 5.

Colla Cytheriæ splendent agitata columbæ.

Ne jam dicamus de pluvia artificiali *Kircheriana*, quæ soli exposita perfectam iridem representat. *Caten. m. l. 3. p. 2. c. 3.* Unde inter prodigia relatum *LIVIO*, quod arcus interdiu sereno cœlo, super ædem Saturni in foro Romano intentus, apparuit. lib. 41. §. 21. Verum de his contraria sentientes objiciunt: Si *Iris* naturam haberet parentem, secuturum inde, seculis antediluvianis eam extitisse. Atqui inconueniens videri, ut quod antea usitatum fuit & in rerum natura consuetum, signi alicujus rationem accipiat. Id vero sequi negant alii. Sic Author *libri de Mirabilib. S. Script.* qui inter opera *AUGUSTINI* vulgo refertur: *fuere jam olim, inquit, qui occasione iridis, quæ per solem semper & humectas serenasque nubes efficitur, concludunt, fuisse ipsam mundi nuper creati primam ætatem sine ullis turbulenti aëris immutationibus & pluviis.* Hi, ut idem docet, terram matutino & vespertino rore ac fontibus fuisse irrigatam existimant, quod in *Ægypto* fieri scimus. Idem sensit *ALCUINUS Quæst. in Genes. Interrog. 133.* Et *GLOSSA Interlin. ad Gen. 2: 5.* Pro eadem sententia contendit *BURNET. Tell. Theor. Sacra. l. 2. c. 5.* ea sua hypothese nitens, quod tellus primigenia alium à nostro, quæ semirutæ, tenorem, aliumque vultum habuerit, constructione sua regulari & uniformi, sine tempestatum vicissitudine, perpetuo quasi vere gaudens, circa mediterranea plane ἀνομβρος &c. gravitatis & molis centro, ut & *Eclipticæ* ac *Æquatoris* axe coincidentibus. Quicquid vero hujus sit, quæstionem, an terra antediluviana, quippe inpluvia, iridem videre non potuerit,

quia prolixioris est indaginis, nolim equidem impræsentiarum nos morari, instituto nostro ejus definitionem non necessario postulante. Et vero quid prohibet, ad usum signi ex instituto assumi, quæ naturalia præsertim rarioris exempli sunt: ita ut aliud sint natura, aliud usu, quem ex constitutione divina novum accipiunt. *Fuerat ante cladem illam iris, sed non ut signum; veluti si cogit iridem immobilem diu & neglectum, mox factum distinctionis alicujus signum, COEL. RHODIG. Lect. Antiq. L. XXII. c. 24.*

§. XIX.

Forma iridis arcum refert: causam aliis à nube concava, aliis à sole, aliis aliunde arcessentibus. Certum est, rubedinem apparere in guttis aquæ, ad quas ductæ lineæ cum axe visionis angulum faciunt 42. fere graduum: alios deinde colores videri sub angulo contractiore. Unde consequitur 1. colorum series necessario fore arquatas. Velut si corpora colorata, quocunque demum intervallo, super conis diversas bases, sed communem verticem habentibus, disposita spectes, inæqualium orbium arcus videbis. 2. Fieri per naturam non posse, ut duo pluresve spectatores eundem numero arcum videant. Cæterum iridem aut semicirculo minorem esse contingit, sole supra horizontem elato; aut æqualem, sole horizontem stringente. Qua in re, inquit GASSENDUS, vere *Aristoteles* sensit. At, si quis fuerit elevatior, ut in edito montis vertice, & nubem habuerit vel totam, vel quadam ex parte depressiorem per convallem, aut planitiem circum subjectam; posse tunc iridem videri majorem semicirculo, uti & revera, quicquid senserit ARISTOTELES, non semel est visa & ab aliis multis, & à nobis quoque. *Phys. Sect. III. lib. 2. c. 6.* Unde tamen nequicquam concludas cum SCALIGERO, eandem non esse iridis, oculi & solis centri lineam. *Exerc. 80.*

§. XX.

§. XX.

Situm quod attinet, iris, nisi sole adverso, non fit. Unde *VIRG. Aeneid. 4.*

*Ergo iris croceis per cœlum roscida pennis,
Mille trahens varios adverso sole colores,
Devolat, & supra caput adstitit. - - -*

Si qui iridem spectasse memorentur in eadem regione cum sole, imo & obversis soli cornibus: vel in situ horizonti parallelo, & cruribus aut à sole averfis, aut in eundem conversis: vel denique in situ obliquo, ex. gr. in meridie cum sol esset in occidente: illi Cel. GASSENDO non iridem, sed halonis aliquam portionem, vel circuli alterius, qui cum parheliis creari solet, vel unum duntaxat crus, ad germanum locum, in quo alterum futurum erat, non attendentes, vidisse creduntur, *loc. cit.* Iridis arcum præterea non accurate rotundum, itemque inversum apparere, est ex raro contingentibus: de quibus vide *GARTES. Meteor. c. VIII. §. 13.*

§. XXI.

De colorum numero variant Authores. Non plures ab *ARISTOTELE* discernuntur, quam tres, unde *τετταρες* ipsi dicta iris: quorum extimus puniceus, aliis rubeus; medius viridis, intimus purpureus, aliis cæruleus. Plures esse non diffitetur, sed quorum sit *ἀναισθητος ἡ μεταβολή*, insensibilis permutatio, *Meteor. l. 3. c. 4.* Aliis præcipuos eosque extremos tantum attendentibus, duo; aliis rursus ab extremis proxime enatos considerantibus, quatuor; aliis denique longe plures enumerantur. Sic irin ex colorum multiplicitate *πολυώνυμον ὕδαρ* multi nominis aquam dixisse videtur *HESIODUS*. Et *VIRG. l. c.*

Mille trahit varios adverso sole colores.

Et OVID. Metam. l. 11.

- - - *Induitur velamina mille colorum*

Iris & arquato cœlum curvamine signat.

Scilicet præcipui colores distinguendi à cæteris, qui secundarii & dilutiores. Illorum enim commissuræ, transitiones & desitiones discrimina faciunt fere inobservabilia; de quibus SENECA, cum citatis Poetæ, tum suis verbis, ita differit:

Sed nunc diverſi niteant cum mille colores,

Transitus ipſe tamen ſpectantia lumina fallit:

Uſque adeo quod tangit idem eſt, tamen ultima diſtant.

„Videmus in eo aliquid flammei, aliquid lutæi, aliquid cærulei, & alia in picturæ modum subtilibus lineis ducta, ut an diſſimiles colores ſint, ſcire non poſſis, niſi cum primis extrema contuleris. Nam commiſſura decipit, uſque adeo mira arte naturæ, quod à ſimillimis cœpit, in diſſimilia deſinit.“ Haſtenus SENECA. *Queſt. nat.* l. 1. c. 3. Illud porro de coloribus iridis animadverſione non indignum, quod momento quaſi naſcatur tota, & ruruſ evaneſcat. Repentina ejuſ facieſ, & repentinuſ interituſ. Haud ſecus ac imago omniſ in ſpeculo æque cito aboletur, quam componitur. Nihil enim aliud ad iſta efficienda vel removenda opuſ eſt, quam oſtendi & abduci. Iridiſ ſecundariæ (geminam enim haud raro videri, arcubus parallelis, nemo neſcit) coloreſ ſunt inverſi & dilutiores: quia proveniunt ex radiis poſt binas reſractioneſ & totidem reſlexioneſ ad oculum pervenientibuſ, eoque debilioribuſ.

§. XXII.

De præſagiis & effectibuſ arcuſ cœleſtiſ multi bene multa; verum incerta ſaltem, ſi non falſa & fabu-

fabulosa, tradunt. Iridem præsentis pluviae signum esse διαγνωστικόν, indubium est, quandoquidem non nisi in pluviae guttis generatur. Pluviae prænunciam esse antiquitas credidit, eo quod demissis in terram cornibus aquam è fontibus hauriret, secundum illud PROPERTII. l. 3.

Purpureus pluvias cur bibit arcus aquas?

Hinc jocus Plautinus de anu bibace, *Curcul. A. 1. sc. 2.*

- - - *Ecce autem bibit arcus; pluet*

credo hercle hodie.

SENECA illud VIRGILII Georg. l. I. v. 380. *Et bibit ingens - - - Arcus: de adventante imbre accipit, sed non easdem, inquit, undecunque apparuit, minas affert. A meridie ortus magnam vim aquarum vehet. Vinci enim non potuerunt valentissimo sole: tantum est illis virium. Si circa occasum refulsit, rorabit & leviter impluet. Si ab ortu circave surrexit, serena promittit. N. Q. l. 1. c. 6. Nautarum & agricolarum vulgus matutinam iridem pluvias, vespertinam portendere serenum credit. Sed hæc incerta esse, neque adeo universe quid afferi posse, plus satis testatum facit experientia. Et quod PLINIUS ait, arcus cum sunt duplices, pluvias nuntiant; a pluviis serenitatem non perinde certam. l. 18. c. 35. sæpenumero falsum comperitur: veriusque idem l. 2. c. 59. arcus vocamus extra miraculum frequentes & extra ostentum. Nam ne pluvios quidem, aut serenos dies, cum fide portendunt. Ingenii est, sine operæ pretio, incertæ rei certas attulisse rationes: quod Magnus SCALIGER sibi fecisse videtur Exerc. 80. Male igitur THOMAS Quodlib. 3. a 30. & ABULENS. hic q. 7. iridem naturale signum esse existimant diluvii non amplius futuri, eo quod ad tantam aquarum exundationem multas crassasque nubes cogi necesse sit; iridem vero in nube torida quidem & concava, sed tenui existere. Quæ quidem ratio nulla est. Qualis*

enim cunque fuerit nubes, modo in pluviā resoluta aduerso sole irradietur, iridem ostentabit. Fabulæ vero simile est, quod ARISTOTELES ad mellis generationem multum conferre velit τῶν ἀστέρων ἐπιτολαίς καὶ ὅταν καλᾶσκῇ ἡ ἴρις, siderum exortus, & ubi decubuerit iris. *Hist. anim.* l. 5. c. 22. Et illa PLINII; Tradunt in quocunque frutice curvetur arcus cælestis, eandem quæ sit aspalatho suauitatem odoris existere, sed in aspalatho inenarrabilem quandam. *Nat. Histor.* l. XII. c. 24. Et alibi: Terra, in quam arcus cælestis dejecerit capita sua, & cum à siccitate continua immaduit imbre, tunc emittit illum suum halitum diuinum ex sole conceptum, cui comparari suauitas nulla possit. l. XVII. c. 5. In quibus turpis est fallacia, quam vocant, non causæ ut causæ.

§. XXIII.

Ex hæcenus observatis, quæ capita analogiæ signum inter & rem significatam depromi possint, videndum restat. Neque enim, quæ de iride prædicat Scriptura, mystice tantum intelligenda arbitramur, cum AMBROSIO, de clementia Dei, quæ terre magis quam ferire amet. Quemadmodum, ut ait, non ipse arcus vulnerat, sed sagitta. Et ideo Dominus in nubibus arcum magis, quam sagittam ponit: i. e. non illud, quod vulneret, sed quod habeat terroris indicium, vulneris effectum habere non soleat. *lib. de Noë & arca*, c. 27. Nos igitur certa ab incertis, quoad ejus fieri poterit, distincturi, analogiam seqq. lemmatibus complectemur.

✿ Solis lux post diluvium Noëticum, dissipata, quam pluviosa cæli nubila induxerant, caligine replendescens, suisque impressionibus jucundum in aduersa nube spectaculum exprimens, repræsentatio quædam symbolica erat lucis gratiæ post legis umbras effulsuræ, variisque virtutum spectaculis in Apostolica & primitiva Ecclesia atque deinceps semetipsam probaturæ. Quo respexisse videtur Expl. Symb. S. Atha-

S. Athanasii : *In variis coloribus arcus vires virtutum millenarii numeri sanctorum significantur : in igneo colore castitas & continentia, in purpureo martyria martyrum, in hyacinthino doctrina majorum, in viridi autem virtutes bonorum operum, quæ per Filium Dei expirata radiando, ut radii à sole, procedunt.*

3 Quicquid suæ pulchritudinis habet iris, soli naturali, nubem in stillicidia resolventi, variisque coloribus imbuenti, debet : hoc enim apparente apparet illa ; evanescente seve subducente, evanescit illa. Sic resplendens è nubibus fulgore luminis, quo roseida illustratur obscuritas, grata quodammodo confessione solem, parentem suum, proficitur. Pariter quicquid decoris habet Ecclesia, soli justitiæ acceptum fert. Hoc enim illucente lucet illa, luce sapientiæ, puritatis, sanctitatis, lætitiæ : hoc faciem suam radiosam occultante, obscuratur illa. Hinc lucem suam, bonorum operum studio, spargere jubentur justi, lucis filii, ut veluti grata confessione parentem suæ lucis, solem justitiæ, profitentes glorificent : *non enim, ut AUG. dicit, de suo lucere se sciunt, sed de sole justitiæ, sicut illa nubes de sole visibili.* 1. 1, *contra adv. leg. & Propb.* Hunc solem justitiæ etiam iridem intuentibus esse considerandum, liquet, tum quia nisi sol justitiæ fuisset exorturus, Mal 4 : 3. sol naturalis jam pridem sine spe reditus occidisset : tum quia iris solii & capitis Messiae ornamentum est in symbolis Prophetis, Apoc. 4 : 3. & 10 : 1. conf. Ezech. 1 : 28. Ubi Prophetæ *aspectum splendoris, velut arcus, qui existit in nube die pluvio, dicit fuisse aspectum speciei gloriæ Jehovah.* Illam gloriam, Prophetæ visam, gloriam fuisse Filii Dei, ut incarnati Joh. 1 : 14. in quo justitiæ, iræ, gratiæ, misericordiæ atque bonitatis divinæ temperatura, mox videnda nobis, exhibetur, nulli dubitamus. Hic lucifugas se probant Judæi, quando omnem istam gloriam de influxu virtutis divinæ in causas secundas intel-

intelligendam volunt. *Non mirandum*, inquit ABARBANEL, ad locum Ezech. *qua ratione virtus divina mundum conservans in omnes ejus partes diversissimas pariter influat, ut tamen ipsa omnimode una maneat, uno influxu perpetuans & conservans intelligentias, orbes & res sublunares:* כי הוא כענן הקשת שיש בו ג' גיווני' או ד' וכמו שזכרה פילוסוף בספר האותות והם מתחדשים שם מהב' ניצוץ השמש בענן הלח וכפי עובי חלק הענן או דקותו כן יתרשם הגוון בו ויעשה השמש אכ בהיותו א' בהשפעתו גוונים מתחלפים *Ejus enim instar est in arcu caelesti, in quo tres vel quatuor colores: qui, ut meminit Philosophus in lib. de meteoris, generantur ex reverberatione radiorum solis in nube humecta; pro diversitate enim densitatis vel raritatis ejus alius atque alius exprimitur color: quo casu sol, licet unicus sit, influxu tamen suo diversissimos producit colores pro varietate subjectorum recipientium: ita aspectus splendoris circa Chasmal v. 27. ex quo prodit influentia, pro subjectorum varietate variat, quanquam non nisi una sit operatio.* Alii apud eundem ABARBAN. Deum ipsum, vel ut R. ABRAHAM. in fasciculo myrrhae ad Gen. 9. existimat, Schechinam fuisse נושא המקרים ההם *subjectum istorum accidentium*, nempe colorum, putant, eo quod Propheta iride visa gloriam Dei vidisse eaque propter in faciem procidisse dicatur. Hinc Rabbiorum diverbium המסתכל בקשת עיניו כחות לפי שנסתכל בשכינה ואין ראוי לעשות כן: *Qui intuetur arcum* (sine reverentia, existimans, se nil nisi colores, eosque veros, intueri) *oculi ejus caligant, quia intuetur Schechinam, gloriosam Dei praesentiam, quod fieri non oportet, sed faciendum quod fecit Moses, de quo scriptum; Et abscondit faciem suam, quia timuit &c. Exod. 3:6. Fasc. myrrh. loc. cit. Sic lucem in tenebris micantem tenebrae non assequuntur.*

; In figura situque iridis R. NACHMANIDES alique Magistri, quos nostrum nonnulli sequuntur, analogiam quaerunt, Iridem dicentes arcum esse sine telo

telo, eumque inversum, cornibus terram spectantibus, qualem depugnato praelio gestare solent milites: eoque aptissimum gratiæ & restitutæ pacis atque securitatis esse symbolum.

† Colores arcus, ignem, sanguinem, graminisque virorem repræsentantes, distincti quidem, sed per confinia confusi tamen & temperati, tantum non *δανυλοδεχίας* significant, per sanguinem Christi eam fieri iustitiæ & misericordiæ mixturam, ut utraque per fuscum sanguinem demonstrata Deus peccatori & formidabilis & amabilis reddatur: gratia tamen atque bonitate in divinis illis virtutibus, haud minus quam viriditate in arcu cœlesti, præcellente. Unde *iris aspectu similis Smaragdo*, Apoc. 4. 3. consimilibus coloribus, quibus quondam respondebant vestes sacræ, simile dubio procul mysterium depingebatur. De coloribus Iridis R. ABRAHAM. in Fasc. myrrh. *לבן הוא חסד לאברהם אדום הוא פחד יצחק ירוק הוא יעקב* *Color albus gratiam sive benefactendi studium Abrahami; ruber timorem Isaaci; viridis in medio colorum, Jacobum significat, de quo scriptum, habitans tentoria.* Recte sentit, si gratiam Abrahamo foedere addictam, & per timorem Isaaci intelligat eum, quem Isaacus timebat, juxta illud *Eesai. 8: 13, Jehova sit id quod metuat.*

† Divinæ *χρηστότης* ex uno fonte promanantis, & in electos, horumque causa in alios etiam homines &c. abundantis, divitiæ adumbrantur, eo quod licet singulis spectatoribus sua appareat iris, una tamen omnibus & eadem apparere videatur. Gratiæ vero *specialis & communis* differentiam frequenter geminatum iridis primariæ & secundariæ spectaculum indigit,

† Denique licet iris generetur in cœlo pluvioso, per naturam tamen fieri nequit, ut quando iris apparet,

ret, pluvia sit universalis, quia solem ex adverso lucere necesse est. Eo ipso aptissimum comperitur signum, quo adversus metum diluvii universalis securi reddimur. Quæ alii, sive veteres, sive moderni S. Literarum interpretes juxta sensum, quem vocant, *allegoricum, tropologicum & anagogicum*, de duabus in Christo naturis, de Ecclesiæ militantis conditione & indole, de interitu Mundi prioris per aquam, posterioris per ignem, de virtutibus sanctorum, fide, spe & charitate, &c. bene multa tradunt, quasi quæ colorum istorum cœlestium varietate nobis adumbrentur, tanquam minus obvia & è longinquo petita, libenter omittimus; paucis, qua ratione hætenus dicta ad fidem, pietatem & consolationem referri possint, ostensuri.

§. XXIV.

Primum mirare mecum divinæ Bonitatis divitias, quas non obstante hominum pravitate, libero gratuitoque pacto Noacho ejusque posteritati ad finem usque seculorum utendas fruendas addixit. Mirare Bonitatis divinæ amplitudinem, quæ licet speciali amore amplectatur electos fideles & justos, nihilominus etiam malis & injustis benefacit, & alia quæque hominum usui servientia conservat, Matth. 5:45. 1. Tim. 4:10. Psal. 36:7. Act. 14:17. Mirare Dei longanimitatem, qua non vult quosquam perire, sed omnes ad resipiscentiam concedere, 2. Petr. 3:9. Imo etiam vasa iræ ad interitum aptata fert, Rom. 9:22. Ita porro mirare, ut eam dignis laudibus concelebres, conspirantibus ore, corde, opere. Circumfer oculos quaqua velis, bonitatis & longanimitatis experimenta conferim se ingerent, ut identidem cum populo Dei ingeminare debeas *ὁμολογίαν*, quia in seculum est gratia ejus, Psalm. 136.

Deinde, quia sic benignus est atque longanimis Deus, non est cur desperet peccator, 1. Tim. 1:16.

Quin

Quis potius longanimitate, &c. Dei se ad resipiscendum invitari sentiens, vitæ hætenus actæ poenitentia tangatur, novamque vivendi rationem meditetur, atque sequatur Rom. 2: 4. 2. Petr. 3: 9. Scite BERNH. duo, inquit, *Sponsi ubera, duo in ipso sunt ingenitæ mansuetudinis argumenta, quod patienter expectat relinquentem & clementer recipit poenitentem. Gemina, inquam, dulcedo suavitatis exuberat in pectore Domini Jesu: Longanimitas videlicet in expectando, & in donando facilitas. Et audi, quia non sit hoc inventum meum; An divitias bonitatis ejus & patientiæ & longanimitatis contemnis?* Serm. 9. super Cantic. *Si velox ad pœnam fuisset Deus, Paulum Ecclesia non possedisset: propterea distulit blasphemantem Dei longanimitas, ut ostenderet poenitentem: lupum in pastorem mutavit Dei longanimitas: publicanum fecit Evangelistam, &c.* Chrysof. in 2. Cor. 5.

Divinæ insuper Longanimitatis atque Bonitatis exemplum diligenter nobis est imitandum, nulla hominum ingratitude vel malitia studium ejus impeditura. Quidni vero? Sic nos *Dei filios*, Matth. 5: 45. juxta propositum salutis vocatos & electos probabimus, Col. 3: 12. & quemadmodum *vocatione nostra dignum est ambulabimus*, Eph. 4: 1. 2. Istarum porro virtutum praxi nihil est *honestius*. Eo enim pacto Deo obsequimur, Rom. 12: 9 10. 20. 21. Deumque imitamur, Matth. 5: 48. & Christum, 1. Petr. 2: 23. & Sanctos, Num. 12: 3. Gen. 50: 19. &c. Nihil *aquius*, cum divinæ longanimitatis, &c. beneficia in te extent quotidiana & innumera, nunquid iniqua postulat Deus, si & te erga fratres, &c. longanimum atque benignum esse velit? Nihil *utilius*, semen enim beneficorum in benedictione est. Psal. 37: 26. Cum primis autem Evangelii Ministris virtutes istas commendatas oportet, 2. Tim. 2: 24. 25. & 4: 2.

S. XXV.

Circa Iridem, ceu fœderis symbolum obs. 1, Hinc qui-

quidem admirabilis indulgentiæ exemplum in Deo , qui ut firmam verbo suo fidem apud nos asserat, promissioni symbolum sacramentale annectit : inde vero mentis nostræ imbecillitatem & tarditatem, quam, ut indidem omnis auferatur hæsitatio, talibus administrulis sublevari atque fulciri vult.

2. Sacramentum à verbo non esse separandum, secus, quod esse dicitur, esse desitutum. Quid iris sine verbo, quo fœderis divini signum haberi jubetur, nisi repercussæ & refractæ lucis solaris variatio? sine verbo *aqua baptismi nihilo est melior quam qualibet alia, & panis cœnæ Dominicæ minoris etiam momenti & utilitatis, quam sit quivis mensarius.* MUSC. in Gen. IX.

3. Iridem non oculo solum corporis, sed etiam fide, oculo mentis, spectandam esse. Vult namque Deus, ut eo appareat tempore, quum incommodum aquarum ex imbribus timeri potest, verum ita, ut in aquosis nubibus omnium ob oculos exposita ipso aspectu veluti clamet ac dicat : non est cur diluvium aquarum ex nubibus istis venturum suspicemini. Ecce adsum læta cœli nuntia, certum fœderis divini signum, quod pactus est inter se & universam carnem, &c. Neque tamen, ut Jonathan olim, 1. Sam. 14 : 7. & David, 1. Sam. 17 : 26. in hostem ituri, circumcissionis Sacramento se solari poterant in adversis, ita *Muncerus*, seditiosus ille impostor, rusticos sibi militantes visa iride ad pugnam accendere debuit, temeritatis suæ mox pœnam, eamque non unam, daturus : *Ecce videtisne, quam habemus propitium Deum? aspici- te, quæso, signum ac testimonium illius erga nos perpetua benevolentia. Tollite oculos & arcum cœlestem mihi cernite : quum enim in vexillo nostro sit idem depictus arcus, clare significat Deus hoc simulacro, quod è sublimi nobis ostendat, adfuturum se nobis in pralio, tyrannis autem nostris interitum & excidium hoc ipso denunciat,* SLEID. Comment. lib. V. Pejoris exempli fuit hoc factiosi hominis auspici-
um,

um, quam illud Nicix, qui *stulta ex deliquio lunari superstitione retentus, pessundedit Rempublicam.*

4. Iridem intuentes, monumentum cum hac inscriptione *eis ἐπὶ ὁράων ἐντρέβης ἐστω*, videre nobis videamur: memores, diluvio scelerum quondam provocatum fuisse diluvium aquarum, *temperanter, juste & pie vivamus in hoc seculo.* Tit. 2: 12. *Hæc enim typi nobis fuerunt, ne concupisceremus mala.* 1. Cor. 10: 6.

5. Speciatim est heic, quo fidem exerceamus, cogitando: α. Deo esse foedus gratiæ cum peccatore, cui in & per Christum exequendo Naturæ œconomia subservit. β. Ea de causa Deum decenter uti longanimitate, &c. γ. Quia in terris habere vult Ecclesiam, in qua regnet Filius, cujus gloriam quærit, Joh. 8: 50. 54. conf. Joh. 5: 23. & 14: 13. δ. Ejus foederis sensim oblitos Noachi posteros plerosque in viis suis ambulasse, Deo interim longanimitatis & beneficentiæ suæ testimonia dante perpetua, Act. 14: 17. ε. Idem foedus, Deo specialiter providente, in Semi posteris religiose servatum, vel singulari vocatione clarius notificatum. ζ. Quid Christo Sponsori, verbo potentiæ & intercessionis omnia ferenti, Mundus cum universus, tum Electorum, debeat, &c. *O profundas divitias tum sapientiæ, tum cognitionis Dei; quam inscrutabilia sunt ejus judicia, & impervestigabiles viæ ejus! - - - Quoniam ex ipso & per ipsum & ad ipsum sunt omnia. Ipse gloria in secula. Amen.*

VIII.

Nova Literaria Helvetica.

1. **Johann Jacob Hottingers** / *Helvetische Kirchen-Geschichten* / vorstellende der Helvetiern ehemahliges Heidenthum, und durch die Gnade Gottes gefolgetes Christenthum; samt nothwendigen Anmerkungen von der Lehre, Gebräuchen und Regierung der Helvetischen Kirche, und denen darinn vorgefallenen Veränderungen: Aus bewährten, gedruckten und geschriebenen Documentis, unpartheyisch zusammen getragen; In richtiger Jahr-Ordnung bis auf gegenwärtige Zeiten ausgeführt, und in acht Bücher abgetheilet. Erster Theil, Zweyte Auslag. Zürich bey Heidegger und Comp. 1738. 4.
2. **Das herrliche und immerwährende Lob Gottes** / angestimmt in verschiedenen Predigten über den 103. 113. und 150. Psalm, von **Johann Baptist Ott** / Archidiacon und der Stifft zum Grossen Münster in Zürich. Zusamt einer Jubel-Predigt bey Anlaß des Zweyten Genffer-Jubilæums 1735. gehalten über Psalm 33 v. 20-22. Zürich, bey J. H. Büchel, 1738. 8. 10. Bogen.
3. **Joh. Georg Altmanns** / Prof. der Griech. Sprach und der Sitten-Lehr, der Zeit Rectoris Academici zu Bern, Zweyte Solennitäts-Rede / von dem Aufnehmen und Flor der Griechischen Republicken, gehalten den 5. Brachm. Bern, gedruckt in Hoch-Obrigkeitlicher Druckerey, 1738. 4. Bogen 4.
4. **Ejusdem** Der geschwinde Vorübergang der Gestalt dieser Welt, vorgestellt in einer Predigt über 1. Corinth. 7: 31. Bern, bey G. Saurar. 1738. 4. Bogen 4.
5. **Joh. Henrici Hottingeri**, S. Theol. D. & Prof. in Univ. Heidelb. *Typus Studiosi Theologiae, sive Methodus Studii Theologici, tradens ejus Scopum, Principium.*

- cipium, Summam, Partes & Media; in usum Institutionis Domesticæ. Basileæ, apud Joh. Rud. Im-Hoff. 1738. 8. pl. 16.
6. *Ejusdem Apologeticus pro Benigna Lege, Levit. XXI. v. 22.* quæ ex consensu omnium, tam Christianorum quam Judæorum, Sacerdotibus temeratis facultatem dat non solum comedendi de Donis Sanctis, sed & Sanctissimis; denuo scriptus contra contrariam musteam Opinionem & imprimis nuperam mordacem & criminofam Disputationem *Johannis ab Hamm*, Theol. & Lingg. apud Duisburgenses Professoris Publ. Francof. ad Moenum, Typis Joachimi von Lahnen. 1738. 8. pl. 4.
7. *Oratio Gratulatoria de Concordia Genevæ restituta*, dicta statis Acad. Genev. Solemnibus, d. 19. Maji, Anni 1738. à Jacobo Verneto, Ecclesiæ Pastore & Academiæ p. t. Rectore. Genevæ, Typis Pellissari & Soc. 1738. 4. phil. 2.
8. *Pauli Warfanyi, Ungari, Dissertatio Theol. de Certitudine Salutis Subjectiva*, occasione verborum Apost. Hebr. 6: 4. asserta. Præside *Joh. Jac. Lavatero, S. Theol. Prof.* Tiguri, Typis Gesnerianis 1738. 4. pl. 3.
9. *Defense de la Religion tant naturelle que revelée contre les infideles & les incredules*, par les habiles Gens d'Angleterre, & traduit de l'Anglois de Gilbert Burnet, Tom. I. Genève 1738. 8.
10. *Der unbekannte Schatz und verborgenes Kleinod, des Menschen Herz; Welches der König der heiligen Liebe seiner eigenen allerhöchsten Majestät zu Diensten und zum Gebrauch seiner Herrlichkeit absordert; damit es nicht durch Betrug der Sünden verzeudet, verderbet, verlohren, sondern in Gottes Hand und Schoos bezeugt, mithin in ewige Sicherheit gebracht, und dem höllischen Erbschmelmen für*

für ein und allemahl entzogen werde: Vorgeſtellt von Samuel Lucius, Prediger des Evangelii, wozu noch einige Anmerkungen gekommen. Schaffhaufen, gedruckt bey Emanuel Hurter / 1738. 8. 16. Bogen.

CONTENTA

Sectionis Undecima.

- I. *Jacobi KOCHERI* Observatio Critica de Emphasi Sermonis in terna interrogatione Christi ad Apostolum Petrum, *Job. XXI. 15 - 17.* p. 365.
- II. *Joh. Georgii ALTMANNI*, Prælectio Literaria pro Comœdia & Ludis Theatralibus. p. 394.
- III. *Petri Adolphi BOYSEN*, Dissertatio Philologico-Crit. de *Κύβητα Ανδραπύου*, in loc. *Eph. IV: 14.* p. 412.
- IV. *J. R. S.* Emendatio & Explanatio loci ex *Epistola Firmiliani* ad Cyprianum, nec non loci cujusdam ex *El. Josepho.* p. 430.
- V. *Emanuelis WOLLEB*; Disquisitio Historica de Causis proxime antecedentibus *Roma* Foundationem. p. 454.
- VI. *THEMATA* Prælectionum & Disputationum, Speciminis publici edendi gratia, pro *Cathedra Philosophica Lausannensi* consequenda, DD. Candidatis præscripta. p. 481.
- VII. *Joh. Rod. RODOLPHI*, Iridis Theoria Sacra, sive Dissertatio Theolog. de Fœdere Noachico, ejusque Sacramento, nempe Arcu Cœlesti, ex *Genes. IX. 8: 17.* p. 502.
- VIII. *Nova Literaria Helvetica.* p. 538.




TEMPE HELVETICA,

Dissertationes atque Observationes


THEOLOGICAS, PHILOLOGICAS,
CRITICAS, HISTORICAS,
EXHIBENS.

Tomi Tertii

Sectio Quarta.



TIGURI,
EX OFFICINA HEIDEGGERIANA.
M DCC XXXIX.



V I R O

*Plurimum Venerando atque
Clarissimo,*

**JOH. RODOLPHO
SALCHLI,**

S. S. Theologiæ , quæ in Catecheticis
occupatur , ut & Linguae Sanctæ

In Academia Bernensi

Professori Celeberrimo ,

*Collegæ Conjunctissimo,
Honoratissimo,*

Non multivaria tantum Eruditione , sed &
Humanitate , morum ingeniiue Comi-
tate inclyto ,

Sectionem Duodecimam,

Intemeratæ Amicitiae , Observantiae & Cultus
Obsidem, cum ardentissimo longæ & integræ
felicitatis Voto, sacram esse jubet

JOH. GEORGIUS ALTMANNUS.



I.

JOH. RODOLPHI
SALCHLI,

S. S. Theol. Cat. & Ling. Hebr.
in Acad. Bern. Prof.

DISSERTATIO

De

FOEDERE OPERUM,
Ex mente Doctorum Hebræorum.

Argumentum.

§. I. Scopus Dissertationis, Tractationis ordo. §. II.
Foedus intercessisse inter Deum & Adamum, pro-
batur ex Hos. 6: 7. Dictum explicatur & a falsis
interpretationibus purgatur. §. III. Genuina ex-
plicatio probatur ex Jobi 31: 33. quod a cavilla-
tionibus defenditur. Authoris. Expl. probatur
ex

ex Chaldæo. Usus Paraphrasium Chaldd. §. IV. Sequuntur testimonia Magistrorum quoad dictum Hoseæ. Observatur distinctio Hebræorum inter Adamum primum & eundem secundum, quæ obvenit in libro Sohar. Hujus summa. Rabbi Schimngnon in h. l. citatur. §. V. Sequitur R. Salom. Jizchaki & Kimchi. §. VI. Ex his concluditur, ab ipsis Hebræis stabiliri Foedus Dei cum Adamo. Hoc habuit conditiones fœderis, nimirum stipulationem. Emphasis vocis **אליהם** additur. §. VII. Stipulatur Deus obedientiam generalem sub symbolo specialis. Citatur Rab. Bechai Elucid. in legem. Hic putat sub præceptis Adamo datis contineri allegorice omnia præcepta, nec non septem præcepta Noachidarum. §. VIII. Sequitur Adstipulatio Adami. Quid hæc sit. Adamum adstipulatum fuisse probatur. Assensus Hebræorum id maxime probat. Citatur Mechilta, qualis liber sit. Ut & Jalkuth Schimngnoni, in quibus **ברית** & **תורה** idem volunt. §. IX. Adami adstipulatio ulterius probatur. Philo Jud. idem sentiens citatur. §. X. Ulterius probatur Foedus Operum, quod lapsus Adami dicitur **בגד** *perfidia*. Jarchius citatur. §. XI. Hebræi idem per hanc vocem intelligunt. Malach. 2: 14. citatur in hunc locum Kimchi. §. XII. LXX. Interpr. hunc sensum retinent Jerem. 3: 7. & seqq. Buxtorf. citatur & laudatur. §. XIII. Promissio & Restipulatio. Hæc non fuit ob subitam defectionem. Quæ illa fuerit, colligitur. §. XIV. Stipulatus est Jehovah. De ipsius

nominibus differitur ex S. S. & Doctōribus. §. XV. Ex his concluditur, promissam fuisse vitam æternam. §. XVI. Hoc probatur ex S. S. adducitur D. J. Aben Juchia. §. XVII. Quid hic Doctōr per *to חיי* & *חיי חיי* intelligat, cum cæteris. §. XVIII. Promissi obsignatio. In loco Gen. 3:22. sacer *μυκτηρισμός* statuitur, & secundum hunc ille explicatur. §. XIX. Quæst. quæ fuerit virtus arboris vitæ & ratio. §. XX. Habuisse vim physicam hominem conservandi, Hebræi dicunt quidam. Abarbanelis sententia affertur. §. XXI. Cl. Honerti P. affertur. §. XXII. Hæc sententia rejicitur adduntur rationes. §. XXIII. Quæst. An vim habuerit sanandi. Citatur Chaskuni. Qualis sit hic liber & ejus ratio, ejus Author additur, & hujus mens explicatur. §. XXIV. Asserti plures adduntur rationes ex Apoc. 22:2. §. XXV. Ex his deducitur, quid Arbor Vitæ obsignet & homini integro & lapsō. Citatur R. L. ben Gerson ad Prov. 9:3. Conceptus Judæorum de vita æterna sistitur. §. XXVI. Transitio ad alia. Judæi ex Fœdere Operum Justitiarum evasere. Legem arborem vitæ faciunt. Quod probatur ex eorum scriptis. §. XXVII. Eisdem credidisse asseritur, ab omni lege mercede munita dependere resurrectionem, & probatur. §. XXVIII. Quam firmiter crediderint vitam æternam, docetur. §. XXIX. Ex eo, quod Adamum circumcisum statuebant, probatur, eos credidisse Fœdus Dei cum Adamo. Quanti habuerint circumcisionem, & quem effectum ei tribu-

tribuant, docetur ex testimoniis. §. XXX. Ad quæstionem : quare in V. T. tam raro expressis verbis mentio fiat vitæ æternæ, ex Hebræis duplici responsione finitur Dissertatio.

* * * * *

§. I.



Otior est controversia de Fœdere Operum, inter Deum Summum & hominem primum, à Theologis genuinis defenso, à quibusdam vero Doctoribus rejecto, quam ut de illa multis præfari necessum habeam. Scrutando Philologica Hebraica, cum forte inciderem in talia, quæ mihi confœderationem hanc stabilire videbantur, haud inutile fore judicavi, si quædam hanc materiam illustrantia è Doctrina Judæorum conquererem, & ex iis Dissertationem concinnarem. Præeuntem faciam Scripturam, sequentur Magistri. Adsit Deus cœptis gratiâ suâ !

§. II.

Fœdus aliquod intercessisse inter Deum & Adamum, dubitare neminem, Hebraismum non ex proposito falsare tentantem, finit locus ille celebratissimus in Prophetia HOSEÆ cap. 6 : 7. qui ita se habet : *והמה פאדם עברו ברית שם בנרו בי : i. e. Et ipsi sicut Adam transgressi sunt fœdus, ibi prævaricati sunt in me.* Habemus hic FOEDUS. Fœderati sunt ab una parte יהוה v. 3. אלהים v. 6. ab altera vero parte אפרים & יהודה v. 4. Afferitur, quod Ephraim & Judah transgressi sint hoc fœdus, & prævaricati in Jehovah v. 7. Quomodo vero transgressi sint ? Dicitur פאדם quod omnino vertendum sicut Adam ; aliter enim si

transluleris, non satisfacies veritati Hebraicæ. Si cum rejicientibus hoc fœdus inter Deum & Adamum, illud כָּאֵדָם velles vertere: *Sicut homo*, inconvenientem plane proponeres locutionem: *Homines transgressi sunt fœdus sicut homines*. Transferres autem: *sicut fœdus hominis*, tum in originali non legeres כָּאֵדָם, sed כְּבְרִית אָדָם, uti Viri docti, genii Linguae Hebrææ gnari, solide observant. Nec absentia *Heb* emphatici versionem veram invalidam reddit; potius enim, secundum analogiam Linguae Hebrææ, tum vertendum esset *sicut homo*, si adesset *Heb* emphaticum; cujus absentia itaque sententiam nostram non parum firmat. Nomen enim proprium ordinarie respuit *Heb* emphaticum, ut ex Grammaticis notum.

§. III.

His, jam à Theologis magnis observatis, & sequentia cum ipsis jungimus. Interpretationem nostram: *sicut Adam*, clare probari ex loco JOBI 31:33. אִם-כִּסְתִּי כָאֵדָם מִשְׁעִי
Si obtexi defectiones meas sicut, non homo, ut quidem vellet sententiæ nostræ iniqui, siquidem hoc nullum sanum funderet sensum; sed, *sicut Adam*, qui nuditatem adeoque prævaricationem suam obtegere conatus est Genes. 3:7. מִן חֵפֶז כָּאֵדָם קִרְמִי מִרְרִי
adeoque ad Adamum, hominem primum, refert hoc Jobi Chaldæus, ex quo patet, & in Judæorum Catechesi illud ita intellectum fuisse; siquidem Paraphrasés Chaldaicæ, quamvis serius collectæ, tamen longe citius in usum Hebraica negligentium Judæorum confectæ, haud levem cognitionem doctrinæ fidei ipsorum, quam priscis temporibus tenere, nobis sup̄peditant,

§. IV.

Ad testimonia pergamus Magistrorum, qui hoc כָּאֵדָם Hof. 6:7. de Adamo, homine primo intellexerunt.

xere. Ubi in antecessum observabimus, quod distinctionem fecerint Doctores Hebræorum inter *Adamum primum & Adamum secundum* sive *ultimum* : qua distinctione utitur Apostolus 1. Cor. 15 : 45, 47. Ubi ipsi per oppositionem nominantur ὁ πρῶτος ἀνθρώπος Ἀδάμ & ὁ ἔσχατος item ὁ δεύτερος Ἀδάμ. Cui Apostolo etiam certo respectu *Primus Adam* fuit typus *Adami secundi* Rom. 5 : 14. Utrumque hunc Adamum invenimus in Libro SOHAR, qui, cujuscunque tandem antiquitatis sit, saltem veterem Catechesin Judæorum continet, è quo itaque varia ad illustrationem veræ doctrinæ depromi possunt : Dico, utrumque hunc Adamum, scilicet *primum & secundum*, habemus in famigeratissimo hocce Libro *Sohar*. Et quidem *Adamus primus* nominatur *Sohar Schemoth* fol. 106. col. 429. אדם קדמון. *Adam* vero *secundus* *Sohar Bereschith* fol. 26. col. 104. l. 4. אדם בתראה Hoc in antecessum observato ex Libro *Sohar*, ex eodem jam pro primo citamus, quod Rabbi Schimngnon illo in loco, ubi mentionem injicit *Adami primi*, præmittat locum Hos. 6 : 7. quod satis docet, doctorem illum dictum Hoseanum etiam ad Adamum & ejus transgressionem fœderis retulisse. Inspice locum citatum *Sohar Schemoth* fol. 106. col. 429. lin. 28. 29.

§. V.

Citatum Soharicum excipiat eruditissimus R. Salomon Jizchaki, etiam Raschi dictus & JARCHI, (qui seculo XII. floruisse censetur) in Commentario suo in hunc locum Hos. 6 : 7. ubi illud אדם explicat per אדם הראשון sicuti *Adamus primus*. Sequatur Cl. Hebræorum Grammaticus R. David KIMCHI (quem seculis XII. & XIII. vixisse credi potest.) Hic, quamvis aliam explicationem illius Hoseani adducat, tandem tamen addit : ויש מפרשים אדם אדם הראשון ויש מפרשים אדם אדם הראשון & sunt, qui explicant אדם sicut *Adam primus*. Nec non

non *R. Schelomoh ben Melech* Hispanus, seculi XVI. Scriptor, & *Kimchii* quam maxime descriptor, ad nostrum **כאדם הראשון** annotat : **פרוש כאדם הראשון** i. e. *Explicatio* : sicut *Adam primus*.

§. VI.

Habuit itaque *Adamus primus*, secundum ipsam mentem Doctorum Hebræorum, è quibus potissimum hac vice differendum, **FOEDUS cum DEO**. In omni foedere primo venit *stipulatio*. *Stipulatio Dei* in foedere cum Adamo consistit in præceptis & postulatis obedientiæ. Deus foederatus Adami inter alia etiam manifestatur per nomen **אלהים**, quod Hebræis, etiam Talmudistis, significat **דיין** *Judicem*. Talmud *Jomah* fol. 87. f. 1. *Cofri* Part. IV. ab init. p. 256. *R. BECHAI* (qui seculo XIII. floruit) in Leg. fol. 12. col. 2. **אלהים אלו הדיינים** i. e. *Elohim sunt Judices*. Et *Jarchi* in Exod. 20 : 1. **אין אלהים אלא דיין** i. e. *non est* (significat) **אלהים nisi Judex** (*judicem*) Dominus jus habet præscribendi legem, & obedientiam legi illi conformem postulandi; etiam judicandi de præstatione obedientiæ, obedienti præmium adjudicandi, inobedienti vero poenam irrogandi. Hic **אלהים** Dominus & Judex est Deus foederatus Adami, qui ab homine postulavit obedientiam, & ipsum adjuravit ad sui fidem & obsequium.

§. VII.

Hanc stipulationem *obedientiæ* generalem Moses indigitat præcepto speciali, symbolico illius *generalis*, de comedendo & non comedendo fructu Gen. 2 : 16 In quo *speciali* potestatem & Jus Dei homini Legem obedientiæ in omnibus præscribendi ipsi Hebræi agnoscebant. Operæ pretium erit adducere quæ habet *Rabbenu Bechai*. Elucid. in Legem p. 12. col. 2. **אין אדם זכות** citata, qui ad hæc Genes. 2. v. 16. **אלהים**

i. e. אלהים על האדם לאמר מכל עץ הגן אכול תאכל
Et praecepit Dominus Deus homini, dicendo, de omni ar-
bore horti omnino comedes: ita commentatur. על דרך
הפשט הוזהר אדם בכאן בשתי מצות מצות עשה ומצות לא
תעשה, מצות עשה מכל עץ הגן אכול תאכל, מצות לא
תעשה ומעץ הדעת טוב ורע לא תאכל ממנו, ועל דרך
הקדרשו נצטווה בכאן בשבע מצות והם שבע מצות שאמרו
עליהם ר"ל בכמה מקומות שבע מצות בני נח שנצטוו ואלו
הן, ע"ז, ברכת ה', דינין, שפיכות דמים, גלוי עריות,
גזל, אבר מן החי, ויצו זו ע"ז דכתיב כי הואיל הלך אחרי
צו, ה', זו ברכת ה' דכתיב ונוקב שם ה' מות יומת,
אלהים, אלו הדינין שנאמ' אלהים לא תקלל, על האדם,
זו שפיכות דמים שנאמ' שופך דם האדם וכו', לאמר,
אלו עריות שנאמר בספר ירמיה לאמר הן ושלח איש את
אשתו והלכה מאתו והיתה לאיש אחר, מכל עץ הגן אכל
תאכל, זה הגזל, כלומר מדבר פלוני ולא מאחר, ומעץ
הדעת טוב ורע לא תאכל ממנו, זה אבר מן החי, כלומר
מדבר פלוני לא תאכל מקצתו, הרי לך שבע מצות של
i. e. *Secundum sensum Literalem in-*
structus fuit hic Adam utriusque generis praeceptis, scilicet
affirmativis & negativis. Praeceptis affirmativis (in eo),
de omni arbore horti comedes: Negativis (vero in
eo,) Et de arbore scientiae boni & mali non come-
des. Secundum sensum vero allegoricum tradita sunt in hoc
septem praecepta, & haec sunt septem praecepta, quae Doctores
nostri felicitis memoriae variis in locis septem praecepta Noa-
chidarum vocant. Sunt autem mandata illa sequentia: (1.)
de Idololatria. (2.) De profanatione nominis Divini.
(3.) De Judicibus. (4.) De effusione sanguinis. (5.)
De revelatione nuditatis. (6.) De rapina. (7.) De
membro animalis vivi. ויצו (indigitat) *praeceptum (f.*
interdictum) de Idololatria. Sicut scriptum est. (Hof.
5: 11.) quoniam cepit ire post praeceptum, (scil. huma-
num, cultum quem Deus non praecepit.) ה' hac est
profanatio nominis Divini, sicut scriptum est: (Lev. 24:
16.)

16.) *Et qui blasphemaverit nomen Jehovah, moriendo morietur.* אלהים, *hi sunt Iudices, sicut dicitur* (Exod. 22 : 27.) *Judicibus non maledices.* על האדם, *hæc est effusio sanguinis, prout dicitur ;* (Genes. 9 : 6.) *Effundens sanguinem hominis &c.* לאמר, *est denudatio, sicut dicitur in Libro Jeremiah. (cap. 3 : 1.) Dicendo, ecce dimittet vir uxorem suam, & discedet ab eo & erit viri alius.* מכל עץ תאכל, *הגן אכל, est rapina, ac si diceretur : de re N, i. e. quadam definita (sc. debes edere) & non de alia, ומער, quædam definita (sc. debes edere) & non de alia, ומער, hoc est membrum de animali vivo, ac si diceretur : de rei cujusdam definitæ (i. e. animalis adhuc vivi) parte (membro resecto) non comedes. En tibi septem præcepta filiorum Noah hic innuta. Secundum mentem Hebræorum habemus in his omnia præcepta affirmativa & negativa, nec non famigerata illa Noachidarum, Adamo inculcata, facientia stipulationem fœderis inter Deum & primum hominem.*

§. VIII.

Stipulationem in fœdere excipit adstipulatio. In fœdere Dei cum Adamo habuimus stipulationem Dei, venit nunc consideranda adstipulatio Adami. Hæc, quamvis expressis verbis à Mose non sit declarata, tamen de illa non est dubitandum. Quando homo adstipulatur fœderi Divino, tum credit verbis Dei, etiam assensum præbet obediendo ejus præceptis. Ita Abrahamus credidit Deo, &c. Gen. 15 : 6. Ita quoque protoplastos, fidem adhibuisse præcepto Divino, & credidisse æquum esse, ut ipsi obedientia præstetur, hocque per ὁμολογίαν coram Deo testatos esse, dubitare nos non sinit illud, quod Eva regessit serpenti : Et de fructu arboris, quæ est in medio horti, dicit Deus, &c. Quia Deus dixit, & Eva verbis Dei credidit, obediendum esse rite judicavit. Hæc est adstipulatio, quæ consistit in assensu & fideli obedientia. Fœdus, quod Deus homini offert, est fœdus præcepti,

mo recens manibus sapientissimi opificis elaboratus, & ad imaginem ipsius, quæ consistit in sanctissimo studio veritatis, efformatus, non potuit non adstipulari. Vel an Adamus integer, Deum suum propter intellectum integrum intimius cognoscens, non agnovisset summum Dei jus, καὶ ἀβασιν & benignitatem Dei immensam? Annon itaque lux mentis ipsum deduxisset ad adstipulationem & obedientiam lubentissimam & sanctissimam? Hoc ipsum egregie agnovit PHILO, Judæus, Hebræis יְהוָה dictus, eo Græcum Philo exprimere satagentibus, Anno XL. à nato Christo Legatione ad Cajum Imperatorem defunctus. Non pigebit adscribere, quæ habet Libro de Mundi Opificio, Opp. m. p. 33. Ἄτε δὴ πολλὰ εὐέντος εἰς αὐτὸν τῷ θεῷ πνεύματος, πάντα καὶ λέγειν καὶ πράττειν ἐσπούδαζεν εἰς ἀρέσκειαν τῷ πατρὶ καὶ βασιλείῳ, ἐπόμενος αὐτῷ, κατ' ἔχνος ταῖς ὁδοῖς, ὥς λεωφόρος ἀνατέμνησιν ἀρεταί. Δι' ὧν μέναις ψυχαῖς θέμις προσέρχεσθαι, τέλος ἡγμέναις τὴν πρὸς τὸν γενήσαντα θεὸν ἑξομοίωσιν. i. e. qui (primus homo) plenus largissimo spiritu divino, omnia tum dicere tum facere studebat ad placitum Patris Regisque sui, sequens ejus vias eisdem vestigiis, qua virtutes viam publicam muniunt, per quas vias solis animabus fas est incedere, eum finem afsectantibus, ut tandem reddantur genitori Deo similes.

§. X.

Si ulteriorem velimus probationem, fœdus intercessisse inter Deum stipulantem & Adamum adstipulantem, ex eo derivari poterit, quod transgressio & lapsus Adami etiam vocetur כְּנַר perfidia, quando fœdus per non observationem conditionum irritum redditur. Redeundum nobis ad locum Hos. 6: 7. Ubi, postquam Deus de Ephraim & Judah conquestus fuisset: וְהָמָּה כְּאָדָם עָבְרוּ בְרִית Et ipsi sicut Adam transgressi sunt fœdus, addit: שָׁם כְּנַרְוּ בִי Ibi perfide egerunt contra me. Hic apud Prophetam עָבַר בְּרִית & כְּנַר sunt

sunt unum & idem, nempe *fædus irritam reddere*, sicut Adamus, qui in exemplum proponitur, *fædus suum cum Deo per transgressionem irritum reddidit*. Optime hic *Jarchius* : בארץ טובה שהושכתום בה שם כגרו : i. e. *In terra bona, in quam collocati sunt à me, ibi pravaricati sunt in me, sicuti Adam, quem introduxeram in hortum Eden, & transgressus est præceptum meum.*

§. XI.

Hebræi absque hæsitatione, per Scripturam ducti, כגר sumere pro *transgressionem fæderis*. Dictum luculentissimum est illud Malach. 2 : 14. ubi *uxor juventutis* vocatur אשת ברית *uxor fæderis*, & exprobratio additur : אתה כגרתה בה אשר אתה כגרתה בה contra quam perfide egisti. Notari merentur, quæ hic annotat R. D. Kimchi ad illud ואשת בריתך, nimirum : כי כרתה ברית בינך ובינה : i. e. *quia pepigisti fædus inter te & illam* ; dein subjungit : ואתה נושא עליה אשה אחרת נכרית זו היא בגידה גדולה וכו' i. e. *Et tu dixisti super ipsam uxorem aliam alienigenam, quæ est pravaricatio magna*. Hinc huic ipsi Kimchio in Libr. Rad. voc. כגר, כגר, מי שעובר על ברית חכרו & כגר, i. e. *Quicumque transgreditur fædus, quod habet cum socio suo, & mentitur ipsi, dum alter confidit*. Hic כגר explicatur per שקר, quod etiam adhibetur in causa transgressionis fæderis Psalm. 44 : 18. ubi lego : שקרנו ולא בכריתך Et non mentiti sumus in fædus tuum. Lexicon Hebr. cum rubrica מקרי דרקי lectio parvulorum, cujus Author vestigiis Kimchii insistit, & quod impressum An. 1488. fol. ad vocem כגר eadem phrasi dicit : משקר כברית i. e. *Qui mentitur in fædus, hoc est, עבר כברית transgreditur fædus.*

§. XII.

Ipsi jam *Interpretes Græci*, LXX. dicti, qui trecentis circiter annis ante nativitatem Christi versionem

nem suam adornasse censentur, *כִּנְיָהּ* pro transgressionem foederis sumserunt. Hinc Jerem. 3: 7, 8; 10, 11. illa *כִּנְיָהּ & כִּנְיָהּ* transtulerunt quarta vice ἡ αὐθιγ-
 βετος, *sedifraga*, scil. *Judah*. Unde patet, jam eo tem-
 pore *כִּנְיָהּ* apud omnes significasse *fractionem & trans-*
gressionem foederis. Et talis transgressio foederis, talis
כִּנְיָהּ fuit etiam peccatum Protoplastorum, à quo *כִּנְיָהּ*
peccato & perfidia, Cl. BUXTORFIUS in Lex. Hebr.
 & Chald. opere excellentissimo, derivat *כִּנְיָהּ vestimen-*
tam; forte, inquit Cl. Vir, quod sit primæ hominis contra
 Deum perfidia tegumentum & testimonium, cum antea ho-
 mo nudus fuerit.

§. XIII.

Habuiamus hucusque in Foedere Dei cum Adamo
Stipulationem & Adstipulationem; sequuntur *Promissio &*
Restipulatio. Foedus hoc tam cito irritum redditum
 abstulit omne jus ad *restipulationem & petitionem pro-*
missi præmii. Hinc Scriptor Sacer Moses de hoc præ-
 mio expresse non agit; imò in omnibus, quæ ad hoc
 Foedus Operum pertinent; admodum parcus est:
 haud dubie eadem ipsa de causa, quod Adam citius
 foedifragus factus sit. Quamvis autem non ex pro-
 posito de hoc præmio agat divinus Moses, tamen
 quale illud promissum fuerit, facile arguitur; Tum
 ex natura stipulantis & promittentis; Tum ex pro-
 misso, homini restituto facto; Tum & ex eo, per
 quod promissum obsignatum; scil. *Arbore vita*. Gen.
 2: 9. 3: 22.

§. XIV.

Ille, qui stipulatus est in hoc foedere, est יהוה
 אלהים. Gen. 3: 22. & passim in Sacra Scriptura, in
 recensione rerum ante & post lapsum gestarum, idem
 nominatur unicus *Jehovah Elohim*. Qui notanter
 etiam vocatur אלהים חיים *Deus Vivus*, Deut. 5: 23.
 1. Sam.

1. Sam. 17: 36. Jerem: 10: 10. 23: 36. חַי אֱלֹהִים Jos. 3: 10. חַי שׁוֹלֵם *Vivens in aeternum*, Dan. 12: 7. utpote qui est *permanens dierum*, Dan. 7: 9. apud quem est continuum הַיּוֹם *hodie*, Psalm. 2: 7. Quare vero vocetur *Deus vivens* אֱלֹהִים חַיִּים, rationem reddit *Kimchius* in Jer. 10: 10. quando in verba אֱלֹהִים הוּא הוּא חַיִּים האֱמֶתִי שֶׁאֵין חַיִּים תְּלוּיִן כְּאַחֵר כִּי חַיִּים: ita חַיִּים: i. e. *Hic est Deus Vivus; Hic est Verus Vivens, quia vita ejus non dependet ab alio, sed à se ipso. Omnium etiam Viventium extra ipsum vita est ab ipso. Nec tantum est אֱלֹהִים חַיִּים, sed & in Scriptura vocatur חַי הָעוֹלָם, vivens in aeternum*, Dan. 12: 7. ubi חַי הָעוֹלָם, *sapiens dictus R. ABEN ESRA* (qui Seculo XII. medio floruit,) explicat per נֶצַח *æternitatem*. Est itaque Deus æternus, vivens in æternum, qui stipulatus est & præmium promisit.

§. XV.

Quid aliud daret hic Vivens in æternum, quam præmium æternum? Nam cum felicitas Vitæ æternæ consistat in perenni fruitione Dei Vivi, Summi Boni, præmium hoc obedientis non poterit esse consummatum, si non sit æternum. Haud aliud itaque erit, quam *vita æternum beata*. Adeoque promissio Adamo facta in foedere operum alia esse non potuit, quam de *vita*, post absolutum obedientiæ curriculum, *in æternam felice*.

§. XVI.

Nec dubitandum, hanc fuisse promissionem foederis operum, cum haud diversa esse possit ab illa foederis gratiæ, siquidem Christus nobis recuperavit, quod in Adamo amisimus. Promissum autem foederis gratiæ esse vitam æternam, nemo negat, & Sacra Scriptura abunde testatur, Testatur Scriptura, mortem intrasse per Adamum primum, vitam vero per Adamum secundum, Dominum nostrum Jesum Christum,

stum, Rom. 5 : 17. Quæ vita vocatur ζωὴ αἰώνιος ἐν Χριστῷ Ἰησοῦ τῷ Κυρίῳ ἡμῶν, ab eodem Apostolo, Rom. 5 : 21. & 6 : 23. ζωὴ αἰώνιος est ea ipsa phrasis, qua utitur DANIEL in sua prophetia, Dan. 12 : 2. חַיִּי עוֹלָם, quod transtulere LXX. ζωὴν αἰώνιον, iisdem verbis, quibus Apostolus post ipsos usus est, forsan digitum intendens ad hunc locum Danieliticum. Lubet ad illustrationem hujus loci, & ut sciamus, quid per חַיִּי עוֹלָם intelligant Hebræi, adducere paraphrasin *Don Joseph ABEN JACHIA*, Doctoris Hebræi, qui Seculis XII. & XIII. vixisse perhibetur, & qui hunc vers 2. Cap. 12. Dan. ita παραφραζει: ואז יתחדש: מופת תחיית מתים כי רבים מישיני ארמת עפר יקצו אלה לחיי העולם והם הצדיקים ואלה לחרפות לדאון עולם והם הרשעים. וסבת תחייתם למען שהרשעים ערו בפומבי היות אמונתם שקר ואשר האמינו גם רדפו אחרי ההכל ויהבלו ויהיו חסרי חיים. Vertit Cl. L'EMPE-REUR: Tunc fiet miraculum Resurrectionis mortuorum; nam multi dormientium in terra pulverulenta expurgiscuntur, hi ad vitam æternam, qui sunt sancti, illi vero ad opprobria & detestationem æternam, qui sunt impii. Quorum resurrectionis causa est, ut impii fateantur palam, suam fidem esse falsam, & eos, qui ipsis fidem habuerint, persecutos fuisse vanitatem atque evanuisse; ipsique agnoscant, suos majores falsitatem possedisse. Egregie idem Doctor Hebræus Versum ultimum Prophetiæ Danielis illustrat hisce: ואתה רניאל לך לקץ חייך בעולם הזה: ואחר וכך במותך תניח במנוחת גן עדן: ולקץ הימים תעמוד ותחיה כתחיית המתים: ותזכה גורלך חטיב בעולם הבא: i. e. Tu autem Daniel perge ad vitæ tuæ terminum in hoc mundo; postea vero cum mortuus fueris, quiesces quiete horti Edenis; at in fine dierum consilies & viues in resurrectione mortuorum, & assequeris sortem tuam bonam in mundo futuro.

§. XVII.

Hic Jachiades. דַּן עוֹלָם absolute sumit pro æternitate;

nitate ; & ex collatione utriusque loci patet , quod עולם ה' ipsi tantum sit , ac עולם הזה *seculum futurum*. Quod *seculum futurum* Hebræis ut plurimum significat *vitam æternam* ; quod à Viris Clarissimis , in scriptis Hebræorum versatissimis , *RHENFERDIIS* & aliis , ex monumentis Hebraicis satis erutum , ut frustra-
neus esset labor , quædam repetere velle. Sufficit nobis indicasse , עולם ה' Hebræis esse *vitam æternam* ; & cum in statu restituto homini promissa fuerit *vita æterna* , quis anceps esset , hominem primum in statu instituto eandem promissionem habuisse ?

§. XVIII.

Pergendum nunc ad illud , per quod in fœdere operum primus homo de promisso præmio certior factus , scil. *Arborem Vitæ* ; de qua præcipue sermo est *Gen. 2: 9. & Gen. 3: 22*. In quo posteriori loco exerte asseritur , hominem comedentem ex *arbore vitæ* *vivit ætærum* esse לעולם. Ita vero sonant verba Dei : הן האדם הית באחד ממנו לדעת טוב ורע ועתה פן ישלח ידו ולקח גם מעץ החיים ואכל וחי לעולם : i. e. *Ecce Adam factus est sicut unus ex nobis ; ad cognoscendum bonum & malum ; Et nunc , ne extendat manum suam & carpas etiam de arbore vitæ , & comedat , & vivat in æternum*. Credamus , hæc Dei verba sacrum *μυστήριον* , ex iis manifestum nobis fiet , Adamum Deo assimilari voluisse quoad scientiam , nec non affectaturum fuisse assimilationem cum Deo quod ad vitam. Et cum vita Dei sit immutabilis ac æterna , vita vero Adami fuerit contingens & mutabilis , hominem ante tempus à Deo præfinitum in statum immutabilitatis transire , vitam perennem agere , adeoque Deo in tantum assimilari gestivisse. Deus sedens in cœlis ridet inane hoc conamen Adami ; dicit , hominem arcendum esse ab arbore vitæ , quo minus fruatur ante tempus præfixum & immerito felicitate , per *arborem vitæ* ipsi confirmata , scili-

et *vita immutabili & aeterna*, cujus fruitionem obtinisset per gustationem fructus arboris; *vitam aeternam* repræsentantis, consequenter *vixisset in aeternum*. וְעַלֹּם igitur hic aliud quid significare nequit quam *aeternitatem*. Etenim de Deo usurpatum non potest non innuere *aeternitatem*; eandem itaque significabit in causa de assimilatione vitæ hominis cum vita Dei.

§. XIX.

Innuimus, per *arborem vitæ* promissam de felicitate aeterna confirmatum fuisse. Quæritur nunc, an illa arbor habuerit vim physicam hominem aeternum conservandi in vita? an ipsum sanandi? an vero fuerit sacramentalis & significativa?

§. XX.

Quæstio est: *An ARBOR VITÆ habuerit vim PHYSICAM hominem aeternum in vita conservandi?* Ad hanc quæstionem affirmative respondent quidam Magistri Hebræorum. Sufficiet hoc docuisse ex Commentario in Legem *Don Jizhak ABARBANEL*. Celebrissimi illius Seculi XV. Exegetæ & Doctoris Hebræi, qui p. 23. col. 1. in hanc quæstionem disserit. Ab initio refert sententiam sapientum de statu integro Adami hisce: כָּבֹד יָדַעְתִּי דַּעַת חַיִּל שְׂאֵרָם הָרִאשׁוֹן i. e. *Haud me latet sententia sapientum nostrorum felicitis memoria, quod Adam primus, si non peccasset, non mortuus fuisset &c.* Dehinc quædam disputat, quæ prolixiora, quam ut adduci possint. Tandem sequentia lego: וְלֹכֵן כָּרִי לְהַצִּיל הַקֹּב"ה אֶת הָאָדָם מִן הָזִקְנָה וּמִן הַמּוֹת הַשְּׁבָעוֹת, גָּתָן לוֹ בְּתוֹךְ הַגֶּן אֶת עֵץ הַחַיִּים, כִּי הָיָה פְּרִי כָל כֵּךְ נֹאֶמֶת לְמוֹנֵי הָאָדָם, שֶׁכִּאֲבִילָתוֹ יִשָּׁב הַבָּשָׂר וְהַלִּיחוֹת בָּמוֹ אוֹתוֹ שְׁנֵיתָךְ מִמֶּנּוּ, מִכְּלִי חֲלוּף, וְלֹכֵן נִקְרָא עֵץ הַחַיִּים גַּם שֶׁהָיָה מוֹנֵעַ הַתֵּבַת הַגּוֹף, וְזֶה הָיָה מֵאֲרִיךְ: i. e. *Itaque ut eriperet Sanctus Benedictus hominem à senio & morte naturali, dedit ei in medio horti*

horti arborem vitæ, eo quod fructus ejus usque adeo conveniens esset temperamento humano; siquidem per esum ejus restitui potuisset caro & humiditas, similis plane illi quæ ab eo (homine) resoluta fuisset, absque mutatione. Propterea quoque vocatur *ARBOR VITÆ*, quod impediverit (i. e. facultatem impediendi habuerit) dissolutionem corporis, & per hoc prolongarit dies illosque continuerit.

§. XXI.

Habemus ex Doctoribus nostris, Hebræis *דוקטוֹרֵי הַבַּיִת*. Placet adscribere verba *Cl. HONERTI P.* ex Dissertatione Inaugurali de Adamo primo & secundo, p. 28. extantia & ita se habentia: Ego enim inter illos profiteor nomen meum, qui putant, fructum arboris vitæ vim physicam, morbos ac mortem ipsam ab corpore humano arcendi, habuisse. Quam sententiam malo iisdem verbis, quibus illam ex hac Cathedra (Lugduno-Batava) olim docuit Magnus *ABRAHAMUS HEYDANUS*, quem Praceptor meus, Clarissimus *WITTICHIUS*, κατ' ἐξοχὴν Theologum solebat vocare, quam meis exponere „ Quid, inquit, quod arbor vitæ, homini in cibum data & comesta, vim habuit illum perpetuo in vita conservandi. Et forte hoc illud est, quod dicitur: Nunc igitur videndum, ne extendens manum suam accipiat etiam de fructu arboris vitæ, ut comedat, victurus in seculum; Licet hoc aliter alii interpretentur.

§. XXII.

Sed pace Tantorum Virorum, quos animitus veneror, plane mihi persuadere nequeo, arborem vitæ ejusmodi vim physicam habuisse mortem arcendi ab homine. Reliquæ arbores Paradisi omnis generis, homini ad sustentationem vitæ creatæ, æque mortem ab eo arcere poterant, ac quidem arbor quædam specialis vivifica. Et si arbor vitæ habuisset vim physicam conservandi hominem in perpetua-

tem, vel unicus gustus fructus ejus hoc perfecisset, vel plures. Ad unicum nos ducere videtur locus Gen. 3 : 22. Unicus gustus fructus arboris scientiæ boni & mali attulit mortem ; quidni & unicus gustus fructus arboris vitæ perennitatem dedisset ? Quicumque igitur vel unica vice gustasset ex illa arbore, æternitatem acquisivisset, licet dehinc curriculum obedientiæ non absolvisset. Quod sane defendere nolle.

§. XXIII.

Si petas : *An arbor vitæ habuerit vim physicam sanandi ?* Lego quidem in *CHASKUNI*, (Hic liber est Commentarius Literalis & mysticus in Pentateuchum, ex variis collectus, ut supplementi loco esset in Commentarios *Jarchii*. Sæpius fuit impressus Sec. XVI. & XVII. habetque Authorem *R. Chiskua f. Manoh*.) quod arbori vitæ tribuatur *vis sanandi* ab Hebræo. Hoc docent, quæ extant p. 8. f. 2. col. 1. ad fin. & ita se habent : וא"ת וחלא כתוב לעיל כי ביום אכלך ממנו מות תמות וחנה עבר הוא על הצו ואכל ממנו ואך יוכל לחיות לעולם אלא ו"ל עץ החיים היה סם חיים : i. e. *Et si dixeris : Nonne scriptum est supra, eo die quo comederis ex ea (arbore scientiæ &c.) morte morieris. Et ecce transgressus (est) ipse (Adam) præceptum, & comedit ex ea (arbore,) & quomodo poterit vivere in æternum ? Sed dicendum est : Arbor vitæ fuit aroma vitæ & medicina comedenti ex arbore scientiæ &c. Sed quamvis hæc videantur arbori vitæ tribuere vim physicam sanandi, tamen cum hic Commentarius etiam sit mysticus, expositio quoque alia p. 2. ab initio mox subiungat & Deum ita loquentem faciat : וגורתי על עץ החיים שכל האוכל ממנו יחיה לעולם וכו' i. e. Et decrevi de arbore vitæ, ut omnis qui comederit ex ea, vivat in æternum &c. adeoque per esum fructus arboris illius obtinenda vita æterna, non naturali*

turali dispositioni arboris & physicae qualitati fructus ipsius tribuatur ; sed decreto alicui & edicto divino, per quod Deus vitam æternam & promissionem de illa per hanc arborem homini obsignaverit ; omnino credendum puto , Doctorem Hebræum vim illam sanandi non physicam , sed symbolicam putasse : quatenus Deus decreverit, ut homo fide in Deum vivum carpens fructum hujus arboris haberet in illa signum & sigillum sanationis à peccato & morte ; consequenter obsignationem vitæ æternæ. Et hanc fuisse mentem Magistri, nullus dubito.

§. XXIV.

Confirmor in meo asserto ex Sacra Apocalypsi Johannis, in qua Vates Sacer revelationes divinas per repræsentationes symbolicas, modo docendi Hebræorum mystico admodum convenientes, accepit. Vidit inter alia *arbores vitæ*, quarum folia destinata eis *Θεραπείαν τῶν ἐθνῶν*, ad sanationem gentium. Apoc. 22 : 2. Spiritum Christi hic digitum intendisse ad *Arborem Vitæ Paradisiacam*, nemo facile negaverit ; Sanationis vero virtutem harum arborum Apocalypticarum physicam fuisse vix erit, qui asseret. Cum enim Sacro Vati eventura à Spiritu Dei per emblemata manifestata fuerint, illis symbolis virtutem physicam tribuere velle, absonum foret. Respondentes itaque hæ arbores Apocalypticæ symbolicæ Paradisiacæ nostræ, vim hujus sanativam facient significativam. Verum quidem est, emblematica à naturalibus derivari ; sed, cum omnis arbor frugifera in Paradiso fructus, vitam hominis corporalem sustentantes, tulerit, uti jam observatum, adeoque aliquo modo naturaliter arbor vitæ fuerit : Illa κατ' ἐξοχὴν ita vocata *Arbor Vitæ* Gen. 2 : 9. 3 : 22. necessario aliquid sublimius significare, & cum vita temporali aliam adhuc, hac longe excellentiorem, obsignare debuit. Colla-

ta ergo illæ Apocalypticæ emblematicæ cum Paradisiaca, quid aliud promitterent, quam cum temporali vitam spiritualem, & post decursum hujus, beatam æternam, obtinendam in Filio Dei, fonte omnis vitæ sub utraque confoederatione, operum & gratiæ, diverso tamen respectu; quod ulterius deduci posset, ni jam à Theologis occupatum.

S. XXV.

Datis his, quemadmodum difficulter negari poterunt, *arbor vitæ* homini lapsō significat & obsignat sanationem & vivificationem spiritualem in Messiah, Principe vitæ; & cum spiritali beatam vitam æternam, certo post fata possidendam. Ante lapsum autem obsignavit eandem vitam æternam, in fonte vitæ Filio Dei, post exactum obedientiæ curriculum, reportandam. Hebræis omnino idea *arboris vitæ* suggestit eam de *vita æterna*. R. Levi ben Gersom (qui vixit Sec. XIII. & XIV.) ad illud Proverb. 9. vers. 30. *פרי צדיק עץ חיים וגו'* *fructus justī est arbor vitæ &c.* ita commentatur: *כי הצדיק יגיע אל החיים הנצחיים* i. e. *quia justus pertinet ad vitam æternam*. Aperte hic Magister *arborem vitæ* symbolum facit *vita æternæ*. Apprime etiam convenit illud, quod legitur in *Sohar Sche-moth* fol. 48. col. 191. ubi sub symbolo *Paradisi & arboris vitæ* depingitur *vita & felicitas æterna*. Ita vero habet locus: *אי דן דינה דשקרא שליט עליה מלאך המות ושחיש ליה ולבחר אוקיד ליה (בניהנב) ואי דן דינ אמת קב"ה יעל ליה לג"ע ואמעים ליה אילנא דחיי דכתיב עליה* i. e. *Si judicaverit (Judex) judicium falsitatis (falsum,) imperium habet in eum angelus mortis, & mactat (occidit) ipsum, & postea incendit ipsum (in Gehennah.) Et si judicaverit judicium veritatis (rectum,) introducit ipsum in hortum Eden, & gustare facit ipsum de arbore vitæ. Sicut scriptum est in hoc:*
Et

Et accipiat etiam de arbore vite, & comedat, & vivat in æternum. Hic iusto Judici promittitur *vita æterna* sub emblemate *gustus arboris vite*, uti Apoc. 2 : 7. quem gustum nullo modo corporalem credunt Hebræi Veteres, nec credere possunt, secundum hypothesin & conceptum, quem habent de *vita æterna*, qui nobis manifestatur in *Sohar Schemoth*, fol. jam citato 48. col. 190. ubi de **העולם הבא** *de seculo futuro*, id est *vita æterna*, definitur : **אין בו לא אכילה ולא שתיה ולא תשמיש המטה אלא צדיקים יושבים וטירותיהם בראשיהם** i. e. *Non est in illo (seculo futuro) neque cibis, neque potus, neque ministerium lecti : Sed iusti sedent, & corona ipsorum super capita ipsorum.*

§. XXVI.

Stabilivimus hucusque Fœdus Operum ex Hebræis. Habuimus stipulationem Dei ; Adstipulationem Adami ; Præmium promissum, vitam æternam. Plura adduci potuissent : Sed brevitatis & aliis & nobis grata. Pauca quædam forsan ad rem facientia subjungemus. Quoad præmium, significatum per arborem vitæ, credebant Hebræi, *studium Legis & observationem ejus mereri vitam æternam.* Hoc haud dubie hauserunt ex fœdere operum, in quod miseri hi Justitiani semper relapsi sunt. Et cum insimul crediderint, *arborem vitæ* significare & obsignare *vitam æternam*, eam arborem putabant etiam symbolum *Legis*, ex qua habeant *vitam æternam.* Probationis causa unum vel duo testimonia afferam. R. Levi Ben Gerson in Prov. 3 : 18. ubi quoque memoratur **עץ חיים** i. e. *Ecce Lex est arbor vitæ.* Hinc in *Talkut Schimngnoni* Part. 1. fol. 7. col. 1. n. 20. Paradiso suo inferiori tribuunt discipulos sapientum & studiosos *Legis*, sedentes sub arbore vitæ. Ita enim legimus : **ווש בנן ערן פ' ריכוא מיני אילנות בכל זמנתו הקטן שבהן משובח מכל עצי השמים.**
P p 5 ככל

בכל זמנ' יש בו ס' ריבוא של מלאכי השר' מזמרים בקול נעים ועץ החי' באמצע וגופו מכסה כל ג' ע' ויש בו ת' ק אלף שמעמים ואין דמותו של זה דומה לזה ואין ריחו' של זה דומה לשל זה וז' ענני כבוד למעלה המנו ומארבע רוחות מכין אותו וריחו הולך מסוף העולם ועד סופו ותהתיו תלמיד, i. e. *Sunt etiam in horto Eden octoginta myriades specierum arborum, in omnibus angulis ejus. Minima inter ipsas praestantior est omnibus arboribus aromaticis. In quovis angulo sunt etiam sexaginta myriades Angelorum ministerii* (*λειτεργικὰ πνεύματα* Hebr. 1: 14.) *qui suavi voce cantant. Et arbor vitae in medio, cujus corpus (rami umbriferi) obtegit totum hortum Edenis. Edit etiam quinquies centum mille fructus sapos, nec ullus alteri similis, uti nec exhalatio odorifera unius exhalationi alterius similis est. Et septem nubes gloriae super ipsam (arborem vitae) sunt; & a quatuor ventis percutiunt ipsam (i. e. agitur,) & exhalatio ejus it (sentitur) ab uno mundi termino ad alterum. Et sub ipsa sunt discipuli sapientum, qui explicant Legem. En arbori vitae junctos discipulos sapientum Legem explicantes, ad innuendum, Legem per arborem significari. Quid fructus sapos & exhalationes suaveolentes hujus arboris aliud sunt, quam suavitas vitae & felicitatis aeternae, qua fruuntur illi, qui Legi operam dedere, & vitam suam ad eam in hoc mundo composuere?*

§. XXVII.

Addam. Ex hoc principio, Legem per arborem vitae significatam dare vitam aeternam, impetrandam per eius studium & observationem, statuebant quoque Hebraei, omnes Leges promissis qualibuscunque munitas fuisse pro Resurrectione mortuorum & vita aeterna. Locus desumptus ex *Talmud Kidduschin* fol. 39. f. 2. qui & legitur *Talmud Chullin* fol. 142. assertum probabit, & ita se habet: **ר' תנאי רבי**
עקב

יעקב אומר אין לך כל מצוה ומצוה שכתובה בתור' שמתו
שכרה בצרה שאין תחיית המתו' תלויה בה בכבוד אב ואם
כתיב למ' ואריכון ימיו ולמען ייטב לך בשילוח הקן כתיב
למען ייטב לך והארכת ימים הרי שאם' לו אביו עלה לבירה
והבא לי נחלו' ועלה לביר' ושלה את האם ונטל (לקח)
את הבני' וכחזירתו נפל ומת היכן טובת ימיו של זה והיכן
אריכת ימיו של זה אלא למען ייטב לך לעולם שכולו טוב
i. e. *Ex traditione* : Rabbi Jacob dicit : Nullum omnino habes preceptum scriptum in Lege, cui merces sua addita, unde non dependeat Resurrectio mortuorum. In precepto de honorandis Patre & Matre scriptum est : (Deut. 5 : 16.) ut prolongentur dies Tui, & ut Tibi bene sit. In precepto de dimissione ex nido : (scil. ut mater pullorum dimittatur, Deut. 22 : 17.) scriptum est, ut bene tibi sit & prolongare facias dies. Ecce (fuit aliquando filius,) cui Pater dixit : Ascende in summum palatii, (ubi aves in ollis nidi-
ficant,) & affer mihi pullos, (MENASSEH BEN ISRAEL de Resurrect. mort. Libr. 1, c. X. §. 9. p. 69. vult pullos columbarum.) Et ascendit in summum palatii, & dimisit matrem, pullos autem abstulit. Cum vero in reditu esset, decedit, & (ex lapsu) mortuus est. Ubinam jam est felicitas dierum hujus (filii ?) Et ubinam est prolongatio dierum hujus (filii ? sc. in hoc seculo ;) Veruntamen (hoc ita est intelligendum,) ut tibi bene sit in seculo, quod totum bonum est, (i. e. æternum felix.) Et ut prolongentur dies tui in seculo, quod totum longum est, (i. e. infinite longum & æternum.)

§. XXVIII.

Observare licitum sit in transitu, quanta firmitate olim Hebræi crediderint vitam æternam, ut etiam promissa temporalia tantum (saltem apparenter) ad Resurrectionem & vitam æternam extenderint. Hinc & in apprecationibus, quas unus pro salute & vita temporali tantum alterius (secundum apparentiam) sua-

fundebat & concipiebat, nullo modo exclusam volebant *vitam aeternam*. Exemplo sit votum Abigailis pro salute Davidis, 1. Sam. 25 : 29. in quo inter alia prudens uxor Nabalis, mariti stulti, Davidi apprecatur : ודחתה נפש אדני צרורה בצרור החיים את יהוה אלהיך : i. e. *Et sit anima Domini mei ligata in fasciculo viventium coram Domino Deo tuo*. Ubi veteres Hebræi per *fasciculum viventium* intelligebant *vitam aeternam*. Unde Chaldaeus illud בננו חיי עלמא : *in fasciculo vite aeternae*. Cui assensum præbet R. Levi ben Gersom in hunc locum, quando ita : בצרור החיים i. e. *in fasciculo viventium, hoc est seculum futurum*. Longe nobiliora erant meditata Hebræorum ad talia Scripturæ loca, quam sunt plurimum Christianorum. Ne dicam de Socinianis & eorum satellitibus.

§. XXIX.

Si quis adhuc peteret probationem, Hebræos Foedus inter Deum & Adamum intercedens credidisse, ex iis locis repetere posset, in quibus primum hominem jamjam foedus *circumcisionis* habuisse, imo circumcisum creatum fuisse, tradunt. Unicum hac vice sufficere possit ex *Jalkuth Schinguoni* Part. 1. fol. 3. col. 1. אדם הראשון נברא מוחל וכו' i. e. *Adam primus creatus est circumcisus*. Quid Hebræi hoc asserto velint & divinabimus. Circumcisio Hebræis habetur foedus excellentissimum inter Deum & hominem. Hinc in Tract. Talmud. *Nedarim* fol. 31, fac. 2. multis laudatur, & toties reperitur גדולה מילה *Magna est Circumcisio*. Ratio imprimis notabilis additur ex ore R. *Ismaël* : ר' ישמעאל אומר גדולה מילה שנכרתו עליה ו'ג בריתות : i. e. *Rabbi Ismael dicit, magna est circumcisio, quia super ipsa pacta sunt tredecim fœdera*. Rationem tredecim fœderum reddit *Rabbeu Nissim* (Doct. Sec. XIII.) ad hunc

hunc loc. hisce : ששלש עשר בריתות נכרתו עליה שלש : i. e. *Illud , quod tredecim fœdera pacta sint super ipsa , (circumcissione , indigitat ,) quod tredecim fœdera scripta sint in Parascha de circumcissione.* Quid autem homini illa tredecim fœdera circumcissionis ? *R. Bechai* indieat *Eluc. in Leg. fol. 15. col. 1.* ubi tredecim illis jungit tria receptionis Legis, & subjungit : ועמהם אנו נצולים סחרבו של הקדוש i. e. *Et cum illis (fœderibus sive) per illa (fœdera) nos liberati sumus à gladio Sancti Benedicti.* Ergo circumcisio , secundum Hebræos , liberat à gladio , id est morte , & dat aditum ad arborem vitæ ; consequenter ad vitam æternam. Adam itaque, qua circumcisus consideratus ab Hebræis, habitus fuit Dei fœderatus, sigillum fœderis sui habens arborem vitæ, obsignantem implenti conditionem fœderalem, in perfecta obedientia consistentem, præmium propositum, vitam æternam. Hanc autem fuisse fidem Hebræorum etiam ex eo patet, quod Adamum lapsum considerent tanquam repræputiatum, qui præputium attraxerit. Ita enim legimus in *Sohar Gen. fol. 27. col. 105.* ד' יהודה שאל ד' ש הא דתנינן אדם הראשון מושך בערלתו הזה , מאי הוא א"ל דפריש ברית קרש מאחריה ודאי והאי מושך בערלתו הזה ושכך ברית קרש ודכך בערלה דאתפתה במלה דנחש i. e. *Rabbi Judah interrogavit Rabbi Simeonem ; Ecce traditio est : Adam primus fuit attrahens præputium : Quid hoc est ? Dicit (respondit) ipsi ; (hoc innuit ,) quod removerit fœdus Sancti (Dei) è loco suo aperte. Et ille attrahens præputium fuit ; (id est) Et reliquit fœdus Sancti (Dei ,) & adhesit præputio ; dum persuaderi sibi, id est ; seduci se passus est per verba serpentis.*

Et quod probe notatum velim , hæc repræputiatio tanquam fœderis violatio ab ipsis Hebræis refertur ad locum nostrum supra datum *Hos. 6: 7.* ita enim lego in *Talmud Sanhedrin fol. 38. fac. 2.* דבי ירוק אמר משיך

משך בערלתו היה כתיב הבא והמה כאדם עברו ברית וכו'
 i. e. Rabbi Isaac dicit : Attrahens fuit (Adam primus
 ex præced.) præputium , huc scriptum est : Et ipsi sicut
 Adam transgressi sunt fœdus. Hoc citatur in *Talkuth Schim-*
gnoni in Hof. 6 : 7. Part. II. fol. 76. col. 3. Ed. Frane-
 tamen cum aliqua differentia.

§. XXX.

Appendicis loco , ni Lectori molesti simus , ad-
 dere placet ex Hebræis binas responsiones ad qua-
 stionem : *Quare in V. T. tam raro expressis verbis men-*
tio fiat vitæ æternæ ? Respondet respectu Librorum
 Moſis R. BECHAI in Leg. fol. 225. col. 3. hisce :
 ודע כי רבי יהודה ושאלו למה לא נזכר ענין חיות המתים
 בתורה בפירוש ביון שהוא עקר גדול ופנה גדולה בתורה
 וכמה פרשיות התורה יאריך בהן הכתוב ויכפול אותן ואין
 בהן צורך כל כך ואם כן למה יקצר הכתוב בענין הזה
 ומסור עקר גדול לרמוז מעט , ותשובת הדבר הוא הענין
 שכתבתי לך פעמים כי דרך התורה לקצר בענינים
 הנעלמים וכל מה שהוא נעלם יותר וקצר בו הכתוב יותר
 i. e. Scito etiam , quod
 multi mirentur & quarant , quare non memoratus sit articu-
 lus de Resurrectione mortuorum in Lege , (& quidem) ex-
 plicite , cum tamen magnum sit fundamentum & capitalis
 (articulus) admodum magnus in Lege , & in multis posi-
 tionibus Legis Scriptura satis ampla sit , ac illas duplicet ,
 quamvis in illis non tanta necessitas (accuratio) requira-
 tur. Cum vero res ita se habeat , quare Scriptura brevis est
 in tali re , & tradit articulum fundamentalem magnum indi-
 cio parvo ? Responsio ad hoc est , quod tibi sapius scripsi ,
 quod mos sit Legi , ut brevis sit in rebus absconditis , (diffici-
 libus) & quo quid magis absconditum , in eo & Scriptura
 magis concisa , nec ejus mentionem facit , nisi per indicium ,
 & quidem brevissime. Respectu totius Scripturæ Ve-
 teris Testamenti respondebit , & cum ea responsio-
 ne

ne finiet notissimus ille Liber COSRI, in quo p. 187. ita lego : אמר הכוזרי לא נאשר לי מקום שאלה מפני : שאני רואה כל הענינים מתוקנים ומסודר ואשר הייתו תופשו עליכם והוא מיעוט מה שאני רואה בתפילותיכם מזכרון העולם הבא כבר השיבותני עליו : כי מי שהוא מתפלל לחדבק באור האלה' בחייו עד שהוא מתפלל לראותו בעיניו ותפלל על מדרגת הנבואה ואין קורבה לאדם אל האלהים גדולה ממנה כבר התפלל מבלי ספק על מה שהוא גדול מהעולם הבא ואם יגיע אליו יגיע אל העולם הבא : כי מי שרכקה נפשו כענין האלהי והיא טרודה במקרה חגוף ומכאוביו כל שכן שתדבק בו כשתת יחד בו ותעוזב אלה הכלים המלוכלכים : Vertit Cl. BUXTORFIUS: Cosri ait, Non habeo quod porro quæram, quia omnia video optime esse ordinata & disposita. Unum quod in vobis carpo est, quod tam paucam & parcam video vos mentionem facere seculi futuri (vitæ æternæ;) ad quod vero tu mihi quoque respondisti. Nam qui orat, ut in vita sua conjungatur cum Luce Divina, & quidem eo usque, ut oculis suis eam videat; qui etiam orat pro gradu Prophetico (assequendo,) quo nullus gradus est propior accedendi ad Deum, is dubio procul quoque orat pro eo quod maximum est, vitâ sc. æterna: & si ad illum (gradum Propheticum) pertingat, pertinget quoque ad vitam æternam. Nam is, cujus anima adhæret Rei Divinæ, dum adhuc occupata & onerata est accidentibus corporis, & doloribus ejus, multo magis illi adhærebit, quando illi soli vacabit, & derelicturus est organa & membra ista contaminata,

ח"ל

II.

JOH. RODOLPHI RODOLPH,

Ecclesiæ Bern. d. v. Antistitis, atque
 S. S. Theol. Prof. Primarii,

DISSERTATIO.

De

TEMPORE, DIE, SEP- TIMANA, MENSE ET ANNO;

Ex mente & distributione Veterum; ad varia
 S. Scripturæ loca *ex doctrina temporum*
 illustranda.

SECTIO PRIMA,

De TEMPORE in genere, DIE &
 SEPTIMANA.

Argumentum.

Doctrina Temporis in Theol. & Hist. Eccl. utilis.
Prooem. Temporis consideratio vel Historica est
 vel Technica. *Tempus* in genere quid sit. Estque
 vel Astronomicum, vel Civile. §. I. Mensura
 tem-

temporis optima est motus solis. §. II. Motus solis est *diurnus*, diem naturalem constituens, h. e. *νυχθημέρον*. Hebr. *יָרֵב בַּיּוֹם*. §. III. *Dies vero Artificialis* est mora solis supra Horizontem nostrum. Varro laudatur. Judæis dies naturalis supputatur ab occasu solis. Locus tamen Gen. 1:5. ab Autore aliter explicatur. Certum tamen est, Judæorum festa à vespera ad vesperam putari. Ad locum Matth. 12:40. tenendus Judæorum Canon: *Pars νυχθημέρος est sicut totum*. §. IV. Partes *νυχθημέρος* sunt vesper, nox, mane, meridies, inter duas vespers, vesper. Quid sit *inter duas vespers* Exod. 12:6. Diei artificialis partes sunt mane, meridies, & vespera. Ps. 55:18. Noctis tres sunt Vigiliæ. Jud. 7:19. Sed Romanis quatuor, scil. *ὧψέ, μεσονύκτιον, ἀλεκτοροφωνία, πρωί*. §. V. Diei in horas 24 divisio cujus sit Antiquitatis. Et de gradibus solaris Achazi 2. Reg. 20:9, 11. Solaris usus plus centum annis antiquior apud Hebræos, quam apud Græcos. §. VI. Diei distributio in sexagenas. §. VII. Judæis hora habet 1080. *helakim*. §. VIII. *Hora* æqualis est vel inæqualis. §. IX. De Horis Canonicis. §. X. *Hebdomas* est systema dierum septem. Ufus hebdomadis antiquissimus. §. XI. Hebræis septimus dies *feriatus* est, Christianis primus, Mohammedanis sextus. §. XII. Dies septimanæ planetis cognomines, ex quo fundamento? §. XIII. Israëlitis dies septimanæ primus prima sabbathorum, sequens secunda sabbathorum audit, & sic deinceps. §.

Tom. III.

Q. 9

XIV.

XIV. In Scriptura S. in usu est septimana dierum, & septimana annorum. §. XV. Multi multa de septenario. §. XVI.

Prooemium.

Doctrinam temporis, saltem Isagogicam, cum Philologia S. conjunctissimam, non immerito ad προπαιδείαν & apparatus Studii Theologici requirunt, qui tyronibus de recta ejus feliciter instituendi ratione præcipiunt. Necessitatem etiam fatebuntur haud inviti, quotquot olim futuri Sacrarum Literarum interpretes non in facillimis tantum & obviis consistere volunt, sed, qua sunt erectiori indole præditi, ad amplioris cognitionis profectum in Scripturis & Historia cum sacra, tum Ecclesiastica, quatenus possunt debentque, contendunt. Qua etiam de causa iis, qui privata nostra qualicunque opella in Philologia Hebr. hætenus utuntur, exercendis, hanc Dissertationem destinamus. Interea vero, ut nemini discipulorum latam volumus legem addiscendi, quæ omittere facilius, quam contemnere possit: Ita non moramur contemptores animos, qui vel suorum modo studiorum cupidi, quæ non ipsi tractant, temere & superciliose despiciunt; vel vita Vacuæ consecrata; *profusissimi in eo, cujus unius honesta avaritia est, per inertiam, desidiosamve occupationem,* non hæc nostra solum sacra, sed bonas quasque literas, damno nunquam satis poenitendo, negligunt.

I. TEMPUS in Genere.

§. I. *Temporis consideratio Historica est vel Technica.* Hæc illi Isagoges loco præmittenda. Constitui-
mus igitur primum agere de *Tempore* in genere, ejusque deinceps pro varietate partium varia supputandi ratio-

ratione. *TEMPUS* oritur ex comparatione durationis eorum, quæ existere contingit, cum duratione motuum illorum æquabilium, quos è terra in cælo observamus. Ut proinde tempus nihil præter modum cogitandi durationi generaliter sumtæ superaddat. Hunc unum, cumque facilem, conceptum si retineamus, non erit, cur de ulla naturam temporis investigandi difficultate queramur. Difficilem vero eam indagationem reddit, quod tempus ut absolutum quid in rebus ante rationem inesse fingitur, atque adeo, ubi inveniri nequit, inquitur. Inde temporis in *Metaphysicum*, *Physicum*, *Mathematicum*, *Astronomicum*, *Politicum*, nata distributio supervacanea est, tempore per se non variante, nisi quod calculi Astronomici minutia ad usum civilem non facile attemperantur. Unde tempus aliud *Astronomicum*, *Civile* aliud constituitur; quo de suo loco.

§. II. Comparari durationem hujus cum duratione illius velut mensura, ut tempus designetur, in vulgus notum est. Tantum moræ huic illive negotio expediendo destinant homines è trivio loquentes, quantum postulat, exempli causa, bis ter iteranda hæc vel illa precum formula. Scitum est illud *PLAUTINI* parafiti, sciothericorum inventori male precantis, quod ad definienda prandendi cœnæque tempora arte, quam ventre, uti mallet:
(*Fragm. Boeot.*)

Ut illum Dii perdant, primus qui horas repperit,

Quique adeo primus hic statuit solarium.

Qui mihi comminuit misero articulatum diem.

Nam me puero uterus hic erat solarium

Multo omnium istorum optimum & verissimum,

Ubi iste monebat esse: nisi cum nihil erat.

*Nunc etiam quod est, non est, nisi soli lubet.
Itaque adeo jam oppletum est oppidum solariis;
Major pars populi aridi reptant fame.*

Sic ex ventre sapiunt, qui pecudis vitam vivere amant. Mensuram durationi rerum casuumque definiendæ, universalem, familiarem & æquabilem, deposcunt vita hominum, negotiorumque vitæ necessitas. Atque talis est præcipue Solis & Lunæ motus, quo quidem in mundo aspectabili vix familiarius quicquam, universalius & æquabilius, Terræ incolis apparet. Ut adeo commodissime vicem mensuræ præberet queat. Eum etiam in usum Deus isthæc luminaria jussit esse in *expanso coli*, ut essent nimirum in *signa*, in *tempora*, in *dies & annos*. Gen. 1: 14. Possunt quidem & alia astra illi servire usui, tametsi modo non perinde facili: Unde annus magnus sidereus, Saturninus, Jovialis, Martialis, apud Astronomos. Sed Solis præcipuus est usus, quippe primus, obvius & facilis, atque ideo in rationibus aliorum motuum cœlestium adhibendus: exempli gratia; quando Saturni periodus dicitur dierum 10747. 18, 19, &c. hoc est annorum Ægyptiorum 29. dierum 162. Julianorum 29. d. 155. Sic superiorum Planetarum, Saturni & Jovis, per 4. trigonos, omnia Zodiaci signa complectentes, revolutio, octingentis fere annis absolvenda semel, pro temporum mensura quadam adhiberi potest, ut factum videmus à Cl. D. MÉGER-LINO, in *tab. Matb. Hist.* Modo ne, quæ cum octingenario quolibet coincidunt memorabilia rerum eventa, ut *raptus Enoch*, *diluvium*, *exitus Israelis ex Ægypto* &c. è cœli schemate & astrorum influxu suspendantur, quæ damnapilis *Astrologiæ judicariæ* superstitio est, Judæis *Præceptorum Negativ. domo 1. præc. 36.* interdicta. Hactenus ergo tempus notat durationem integræ solis revolutioni diurnæ sive periodicæ, vel
unius

unius integræ tot vel tot partibus aliquotis seu aliquantis, vel plurimum revolutionum *quædam*, respondentem. Ut qui quid diem durasse dicit, durationem uni solis revolutioni circa tellurem æquiparandam significet. Cæterum tempori subsunt, *quæ existere contingit*: Ut proinde duratio Dei, quippe immensa, non minus absurde tempus dici, quam tempus infinitum à redivivis Photinianis fingi queat. *Ὁξύμωρον* est, quando Scriptura S. æternitatem indicat per combinationem temporis cum re, quam tempus non fert; aut cum negatione ejus, quod temporis ratio flagitat. Sic Dan. 7: 9. *וְיָמֵי שְׁנָתָא*, *permanens diebus*, cujus dies non abeunt, ut nostri, sed manent. Psal. 102: 28. *Tu idem es, & anni tui non finiuntur*. Ita generatio Filii jam pridem viventis & uncti attribuitur *huic diei*. Psal. 2: 7. Nempe, cui potest omni tempore dici à Deo, *ego hodie genui te*, & quidem ita, ut nulli creaturæ simile quid dictum sit, ejus æterna ex Deo generatio est, h. e. sine initio & sine vitæ habet in se propter Deum, qui vitam habet in se. Joh. 5: 26. Hæc de tempore in genere dicta sufficiant.

II. DIES, ejusque distinctio & divisio.

§. III. Motus solis unicus est, quippe unam duratæ conversione sui lineam describentis: nihilominus distinctioris doctrinæ gratia ut duplex, *primus*, qui diurnus, & *secundus*, qui annuus est, considerari solet. De vero istius motus subiecto intempestiva hic esset quæstio. Prout autem Solis orbita in partes variæ denominationis dividi potest, sic varia etiam temporis dividendi ratio est. Atque hinc prima omniumque maxime observabilis, in Creationis historia primum etiam notata, temporis pars *Dies* est: mora scil. æqualis illi, quam trahit sol, dum motu primo semel revolvitur circa tellurem. Distinctio-

nis gratia vocatur *naturalis*. Ejus enim pars, quæ moræ solis supra Horizontem debetur, *diei artificialis*; residua, sole infra Horizontem morante, *noctis* nomine venire solet. Το συχθήμερον, quod est spatium viginti quatuor horarum, Daniel eleganter vocat ערב בקר q. d. ὁ ψηφισμός, initio diei civilis sumto Judaice ab eo tempore, quod proxime solis occasum sequitur. SCALIG. de Emend. Temp. lib. 1. Nec tamen inde satis est causæ, cur hanc diei naturalis usitatam appellationem Hebræis fuisse dicamus. Nec recte ABARBANEL, qui in *Magenê hajeschuah* fol. 56. 2. numerum Danielis cap. 8: 14. nec de septimanis; nec de mensibus intelligendum contendit, hinc להכרח יש לנו לפרש המספר הזה כהכרח ים לשני *neccessario de annis exponendum esse* concludit: non quidem de annis calamitatis ab Antiocho illatæ, verum illius, in qua jam versantur Judæi. Sed fingit ipse Danielelem dicere, quod non dicit. Nec enim habet, à vespera ad mane esse 2300. sed vespertas & matutina 2300. fore, tum justificatum iri Sanctum. Ponuntur adeo partes diei pro die, sed ænigmatica allusione, qua forte jugis sacrificii, quod mane & vesperi offerebatur, ablatio innuitur. Alioqui יום dici pro more, quod die & nocte constat, arguit Gen 1: 5. & vocis usus.

§. IV. Idem dies, quatenus certo partium (veluti 24. horarum) numero definitur, *naturalis* est. Quatenus aliud atque aliud initium habet, *civilis* dicitur SCALIGERO; aliis *civilem* & *artificialem* confundentibus. Initium autem Diei ab Horizonte velut lucis tenebrarumque termino arcessi, naturæ quam maxime congruum videtur: indidem etiam primitus arcessitum probat historia Creationis, atque hinc nata apud Judæos consuetudo. Secus tamen visum Astronomis in Sphæra obliqua, ob alterna dierum noctiumque incrementa & decrementa, in-
tercisa

tercisa quasi lucis & tenebrarum vicissitudine à circulo meridiano constantiori, atque adeo à meridie vel media nocte diem inchoantibus. Qui populi quem morem hac in parte sequantur, passim docent Authores. MACROBIUS inter alia ex Varrone refert: *Athenienses à solis occasu ad solem iterum occidentem, omne id medium tempus, unum diem esse dicere. Babylonios porro aliter; à sole enim exorto, ad exortum ejusdem incipientem, id spatium unius diei nomine vocare. Umbros vero unum & eundem diem esse dicere, à meridie ad sequentem meridiem. Populum autem Romanum dies singulos annumerare à media nocte ad mediam proximam &c. Saturnal. lib. 1. cap. 3.* Nobis certum est sectari præcipue quæ Philologiam S. propius spectant. Judæi diem auspicantur ab occasu solis, h. e. ab hora sexta pomeridiana; hinc si contingit novilunium ante 18. horam diei, h. e. punctum meridiei, luna dicitur prima eodem die, & figitur in eo neomenia mensis. Sin conjunctio luminarium incidat post 18. horam diei, eo casu neomenia transfertur in sequentem diem. Tres enim primas quartas diei adscribunt lunæ novæ, ultima quarta sola facit lunam veterem. Argumentum instituti sui petunt Magistri ex Gen. 1:5. ubi vespere matutino præmitti videtur: *Et factus est vesper & factum est mane, dies unus.* LXX. ἡμέρα μία. (ut non necesse sit *הפרשה לפי סדר לשון הפרשה* secundum usitatum deinceps v. 8. 13. &c. loquendi rationem cum R. SAL. pro *אחר* desiderare vocem *ראשון*, & illam pro hac positam fingere, ob rationem, quam ille sic futilem ex Bereschit Rabba affert.) Verum verba Gen. 1:5. hunc facilem admittunt sensum: *Et factus est vesper, abeunte luce è loco, in quo primitus extitit; Et factum est mane, redeunte ad eundem locum luce; dies unus: nempe cum noctis intervenientis discrimine.* Ut adeo initium diei sit mane, & tempus à mane ad mane appelletur dies unus, primusque dies finiatur in

umbris expectasse lucem, in qua festum agitaturus erat in veritate. Non igitur demum in Evangelio totius diei tempus à vespere inchoari, & consummari sanxit (divina Autoritas) vespere, ut opinatus est B. E. D. A., ne sua forte sententia fidem de triduo mortis Christi labefactare; vel ejus explicandi rationem intricare, videri posset. Dictum Christi Matth. 12: 40. non aliter, atque vulgo solent, nempe Synecdochice, initio diei Judaice sumto, accipimus; frustra sensum Christianorum vellicantibus Judæis, quando suffragante Scholarum consensu & dialecto gentis כְּכֹל הַיּוֹם pars vespere est sicut totum, ut ex utroque Talmude ostendit LIGHTFOOT, in Horis Hebr. ad l. c. Accedit, quod exemplum Jonæ, quo typo utitur Servator, hodieque Rabbini non dubitent adferre, etsi allegorice, tanquam typum resurrectionis mortuorum, & quidem post biduum futuræ, i. e. quæ tertio die secutura sit; allegantes eo sine vaticinium Hoseæ cap. 6: 2. vivificabit nos à duobus diebus, die tertio resuscitabit nos. R. MENASSE BEN ISRAEL. de Resurrect. mort. lib. 1. cap. 5.

§. V. Porro quia usus postulat, ut quandoque duratio integra solis revolutione minor sit æstimanda, nata est diei & noctis in varias partes distributio. In lege Hebr. sic divisâ succedunt tempora כֹּל הַיּוֹם; Vesper, Nox, Mane, Meridies, Inter-duas-vesperas, Vesper. Unde intelligitur locus Exod. 12: 6. Et mactabunt illum omnis cætus Israelis בֵּין הָעֶרְבִים, inter duas vespere. Quæ phrasis non notat idem, quod à vespere ad vespere, sed unius nominis instar tribuitur parti diei, quæ post meridiem superest ad vespere, & non aliud nomen habet, ut cæteræ alioquin partes diei naturalis. Sic interpretari licet phrasin l. c. non invitis LXX. quibus est ἀπὸ ἑσπέρης, adventante vespere, nec Chaldæis, ONKELO, qui כֹּל הַיּוֹם & JO-
NATH.

NATH. Ben Uz. qui *בֵּין שֶׁמֶשׁ וְשֶׁמֶשׁ* *inter soles*, reddit, phrasi Thalmudicis usitata : significando illud diei tempus, quod reliquum est inter solem clarum matutinum & meridianum qui abiit, ac matutinum qui veniet. Sic temporis à lege definito congruit tempus, quo Christus, *Agnus Dei portans peccata mundi*, exspiravit. Matth. 27: 46. Diem artificialem olim in tres partes divisum volunt Authores, *mane, meridiem & vespem*, ex Psalm. 55 : 18. Et deinceps in partes seu horas IV. hoc est, totidem *quadrantes*, quorum singuli trihorium complexi, etiam *horæ* dicerentur; primo diei quadrante ab hora prima (velut nostra sexta) ad tertiam inclus. se extendente, &c. argumento loci Matth. 20 : 1, 2, 3. &c. vide LEUSD. *Philolog. Hebr. Mixt. Dissert.* 33. §. 4. 6. Atque hac ratione conciliari Marc. 15 : 25. *Erat hora tertia, & crucifixerunt eum.* Et Joh. 19 : 14. *Erat autem parasceve paschatis; hora vero quasi sexta.* Quanquam hic variantem lectionem è nonnullis codicib. post BEZAM & CAMERARIUM notarint Oxonienses in nupera N. T. Gr. editione. Et Nonnus Panop. in poetica sua paraphrasi habeat:

Ἐκτη δ' ἦν ἐνέπρσι προσάββατον, ἔπλετο ἡώς.

Ἦν δὲ τιτανομένη τριτάτη θανατηφόρος ὥρη.

Quicquid vero sit de illa distinctione, ea recentior videtur, & horarum usum jam introductum supponit. Deinde horam, nostro modo æstimandam, dici solidum quadrantem, unde vero probatur? Horis Matth. 20 : 1, 2. &c. memoratis diem quadripartitum videmus, sed eadem nominibus numeralibus eo ordine, quem duodenarius requirit, exprimuntur. Tertia autem, sexta & nona, maxime observari consueverant: sexta quidem, quia meridiana; tertia & nona propter sacrificium matutinum & vespertinum, Noctem

Noctem antiquitus distribuerunt in tres vigilias, *Jud.* 7: 19. Gideon dicitur venisse ad extrema castrorum in principio vigiliae mediae. Ubi R. SAL. שכן דרך בני גייסות להעמיד שומרים אלו ישמרו שליש הלילה הראשון ואילו שליש השני וכו' *Sic militum in exercitu mos est disponere excubias, quas alii primo noctis triente, alii secundo, &c. agant.* Sic D. KIMCHI: היו חולקים משמרות הלילה *Distribuebant vigilias noctis tripartito.* R. ELIESER: קסבר שלש משמרות היו הלילה *existimat 3. esse vigilias noctis.* *Bab. Berachot cap. 1. fol. 3: 1. pag. tamen seq.* חנו רבנן וכו' *docuerunt Magistri, 4. esse vigilias noctis, &c.* Non est, cur in istis diffidiis componendis operam perdamus. Pompeji & Romanorum tempore apud Judæos quatuor vigiliae nocti tribuebantur: Unde *Marc. 13: 35.* notantur *ὥς, μυστικόν, ἀλεκτοροφωνία, πρῶν.* videantur etiam *Matth. 14: 25. Marc. 6: 48.*

§. VI. Dici in horas 24. divisio priscis non fuit in usu. Unde SCALIGER: Nomen hoc שעה, quo hodie horam designant, ne notum quidem illis erat; Atque apud Daniele alius significat. Et alibi: Omnino etiam horarum appellatio nova est, utpote à Græcis in nationes Orientales derivata. *Lib. 1. & 7. de Emend. Temp.* Certe quidem vocabulum שעה significatu horæ usurpatum non legitur in Scriptura S. ante Danielis tempora, etsi haud dubie Chaldæis jam usu receptum fuerit. Sed sunt, qui locum *Dan. 4: 16. vel 19. quasi hora una,* interpretantur, modico tempore: quod שעה Chaldæis qualemunque temporis partem significet. ut GROTIUS ad locum. Observat etiam ELIAS LEV. in suo *Lexico Thisbi:* הרבה מלשון עת ורגע מתורגמן שעה, saepe vocabulum נע tempus, & רגע momentum, in Targum vertuntur שעה. Exempla vide apud Targumistas ad *Exod. 33: 5. 2. Reg. 5: 26. &c.* Objicis forte, quod de

de gradibus Achazi legitur 2. Reg. 10 : 11. Reduxit umbram illam i sdem gradibus, quibus descenderat in solario Achazi decem gradibus. Celeb. SPANHEM. Introduct. ad Chronolog. S. de hisce hæc pauca : Antiquior longe Horarum observatio apud Hebraeos, quin & Babylonios, Egyptios, (puta, quam apud Latinos, &c.) sive diei in horas duodecim distributio. Nec docent modo loca N. T. Matth. 20 ; 3. Joh. 11 : 9. Act. 2 : 15. Sed & Achazi tempore solaris index, & umbra in horologio per gradus vel lineas aut casuras distinctæ, Esaj. 38 : 8. 2. Reg. 20 : 9. agnoscit tamen idem, incertum esse, an gradus isti מעלות hora fuerint. JUNIUS in notis Bibl. Gradus מעלות, inquit, evincit denarii numeri duplicatio, qua Deus uti prophetam voluit, quum Regi Hiskijæ optionem daret. Consentit PISCATOR, in glossis Bibl. Horum sententia, siquidem eodem die ex optione data alterutrum futurum ponatur, inde firmari potest, quod Hierosolymorum Latitudine Boreali à Geographis assumpta 31. Gr. 55. min. dies ibi longissimus præterpropter 14. brevissimus 10. constat horis : Ex sententia ABEN ESRÆ, cui רחב מצרים פחות משלש ימים ורחב מעלות Egypti latitudo infra 30. gr. Hierosolymorum vero 33. ad Num. 13 : 17. dies longissimus summum habebit 14. horas cum quadrante. Quo neutro casu fieri poterat, ut 10. gradibus, h. e. horis progredieretur, vel retrocederet umbra, etsi miraculum ipso meridie, & in solstitio æstivo factum credatur. Sunt & alia ejusdem textus 2. Reg. 20 : 9, 10. quæ difficiliuscula videntur. Ut 1. quod in Hebr. præteritum est וָיָבִיץ i v i t, processit, mox sequente futuro יָשׁוּב revertetur. Unde JARCHI קָרָא קְצָר elliptica verba putat, sic legenda & supplenda, jam descendit umbra, &c. visne, in loco, quem attigit, hæreat mora 10. graduum ? &c. quasi miraculum vel mora umbræ, vel retrocessio ejus, futurum fuerit. Sed

Sed insolens est ellipsis hæc , & לנשח sic idem erit quod נשח stare. 2. Esaj. 38 : 7, 8. Propheta sua verba recitans signum reducendæ umbræ promittit , nulla optione data ; & quod hic est הלה , ibi videtur esse ירד descendit. 3. Difficile cogitatu est , quomodo umbra 10. gradibus , haud dubie non sine prodigio , quippe in signum fidei de promissa convalescentia firmandæ , prolapsura , facile quid & leve futurum præsumserit Hiskias , atque ideo umbram retroagi maluerit. Hinc ut se extricet R. LEVI Ben GERSON, umbræ declinationem non soli , contra locum Esajæ , sed nubibus subtercurrentibus , & solis radiationem à loco suo avertentibus , deputandam fingit. Hisce ex difficultatibus facile nos expediremus , si textum Hebr. quod ramen non pertendo , sic interpretari liceret : *Hoc tibi signum erit , &c. ivit (processit) jam umbra 10. gradibus , quum (וְכֵן , quum , similiter usurpatur Num. 16 : 30.) revertetur decem gradibus. Dixit Hiskias , facile fuit umbra , declinare 10. gradibus ; non (itidem facile) ut vertatur umbra retro 10. gr. Ut hac ratione Hiskias miraculi in umbræ reductione futuri fidem ex opposito dissimili , quod ordinario naturæ cursui consentaneum est , fortius asserat. Et si vero huic versioni fiderem , horis quidem nostro sensu intelligendis locum fore , non tamen necessario inde concludi posse viderem. Nec etiam ad id , ut יצא horam veteribus usitatam fuisse neges , ἡλιοτρόπια , quibus dies per lineas & intervalla umbrarum distinguebatur , posterorum inventum dicere , cum SCALIGERO necesse habes ; quippe non necessario horarum nostrarum Author statuendus est idem , qui heliotropii inventor fuit. Hora vocem esse πολύσημον , vulgo constat , & tandem quamlibet diei partem significasse videtur. Et sunt , qui Veterum solaria 22. lineis constituisse produnt , quas σημεία , σειχέια , σκιάς , recentiores demum horas , dixere. Sciothericorum inven-*

inventor primus celebratur *Anaximander*, de quo **DIOG. LAERT.** lib. 2. εὗρε καὶ γινώμονα πρῶτος, καὶ ἔθηκεν ἐπὶ τῶν σκιοθῆρων ἐν Λακεδαιμόνι, --- τροπὰς τε καὶ ἰσημερίας σημαίνοντα. *Invenit etiam gnomonem primus, statuitque Lacedamone in loco captandæ umbræ idoneo, --- solstitia & æquinoctia notantem.* *Anaximander*, ut ex *Apollodoro Atheniensi* idem refert, secundo anno Olymp. LVIII. annum egit ætatis sexages. quartum, paulo post mortuus. Is annus est Iphiti 230. Per. Jul. 4167. Atqui *Hiskia Regis* annus 14. quo legati *Merodachi fil. Baladan* sciscitatum venerant de prodigio retrogradi solis, 2. *Reg.* 18: 13. 2. *Chron.* 32: 31. confertur cum anno 2. Olymp. XVI. Iphiti 62. P. J. 3999. Atque adeo solarii usus apud *Hebræos* plus centum annis antiquior, quam apud *Græcos*. *Sciotheron* quidem *Mosi* ab *Apione* adscriptum legimus apud **JOSEPH.** lib. 2. contra *Apionem*. Ἀντί δὲ ὀφελῶν ἔστησε κίονας, (inquit, de *Mose* loquens) ὃς ὅτις ἦν ἐκτύπωμα σκᾶφης, σκία δ' ἀνδρὸς ἐπ' αὐτὴν διακειμένη, ὡς ὅτι ἐν αἰθέρι τῶτον αἰετὸν δρόμον ἡλίου συμπεριπολεῖ. *Scaphen* sive hemisphærium intelligit, quod *Aristarcho Mathematico* inventori tribuitur, qui idem etiam Olymp. 124. a. 4. *Samiis* periodum lunarem ad formam *Calippicam* præscripsisse fertur. Sed verba *Apionis* ut intricata & mendosa videntur, sic fabulam sapiunt. Unde **JOSEPHUS**: τοιαύτη μὲν τις θαύμασὴ τῆ γραμματικῆς φράσεως, τὸ δὲ ψεῦσμα λόγων ἔδεόμενον, &c. Mittimus, quæ alia de origine & antiquitate horarum nostrarum quæri possunt, quippe incerta & parum usus futura. Quod *Chaldæus* semel illud במעלות 2. *Reg.* 20. reddit שעה אבן בצורת in figura lapidis horarum, i. e. in horologio solari; ut & illud שעות של אבן מסמר sciotherici, *Misch. Edajot, cap. 3. §. 8.* ex sequiorum temporum praxi est.

§. VII. Astronomis propria est divisio diei in sexage-

תנ"י כשעלה יששכר ברקיע קבע תת"ף : חלקים לשעה תכ"ח חצי שעה שס"שליש עד רביעית ר"ח המשיית ק"ף ששית קל"ה שמינית קד תשיעית קה עשירית : *Traditio est*, (in Baraietha, extraneis, extra Hierosolyma scriptis R. Sam. Jarchinaah) *quod cum Isaschar se in firmamentum extulisset, 1080. particulas horæ definiverit : 540. horæ semis- sis est : 360. triens : 270. quadrans : 216. una quinta : 180. una sexta : 135. una octava : 120. una nona : 108. una decima : 90. una duodecima : 72. una quintadecima : 54. una vigesima.* Traditioni auctoritatem quærunť ex 1. Chron. 12 : 32. Ubi inter filios Isaschar dicuntur יודעי בינה לעתים, *Intelligentes prudenter distinguendi tempora.* D. KIMCHI : פירשו שידעיים לעת : *Magistri nostri exponunt, quod sci- verint intercalare annos & figere neomenias.* Ea autem de causa sapientes hanc mensuram (nempe 1080, hel.) non maiorem, nec minorem, metito amplexos vo- lunt, quod nullus sit numerus, qui illo plures admit- tat diviores, uti ex traditione modo cit. patet. Ho- rum porro helakim in sexagesimas vulgo usitatas, & vicissim sexagesimarum in illa convertendarum ratio facilis hæc est. Ducantur particulæ Judæicæ datæ in 60. factum dividatur per 1080. prodibunt scrupula prima : facta divisione residuum, si quod sit, denuo ducatur in 60. & dividatur, ut hætenus, prodibunt scrupula secunda, & sic deinceps. Ex. gr. Annus Lu- naris communis secundum Judæos colligit dies 354. hor. 8. hel. 876. quæ ducta in 60. & divisa per 1080. dant 48. cum residuo 720 : quod denuo in 60. du- ctum & per 1080. divisum dabit 40. Sic quantitas anni Lunaris communis erit d. 354. h. 8. 48, 40. Ita differentia Enneadecaeteridis Julianæ & Lunaris, quæ deprehenditur in æquatione anni solaris & lunaris juxta

juxta calculum R. Samuelis est 1. hor. 485. helakim, id est, 1. 26, 56, 40. Vice versa restituantur he akim, sexagenis ad infimam speciem deductis, summa per 1080. multiplicata, & producto per divisorem infimæ speciei cognominem diviso, puta per 3600 si sexagenæ secundæ, per 216000. si tertiæ fuerint, &c. Sic horæ & particulæ Judaicæ rediguntur ad diurna, ductis 1080 in 24. factum dabit divisorem; deinceps horæ in particulas resolutæ & cum adhærentibus particulis in summam collectæ per 60. quoties fuerit opus, multiplicentur, & productum per divisorem modo inventum dividatur Ex. gr. SCALIGER statuit Anni Gelalæi, vel Sultan. Pers. quantitatem d. 365. h. 5. hel. 880. h. e. 365:14, 32, 13, 20. Hæc ratio dividendi horam, Judæis quidem pro indagandis Neomeniis & Tkuphis illa Astronomorum vulgata facilior est, quia in calculo literis Alphabeti Hebr. utentes *multiplicare, nisi repetitis additionibus, & dividere, nisi ingenioso quodam discursu, nesciunt*, inquit MUNSTERUS *Calend. Hebr. p. 5.* unde quo pauciores segmentorum species calculus habet, eo facilius procedit. Longe tamen & hac & illa expeditior calculi ratio est per partes decimales, quibus uti feruntur Chatajæ Astronomi, diem civilem in 10000. particulas secantes, singulis scrupula horaria 0, 8, 38, 24. æquantibus, ut patet ducenti 24. in 60. & factum dividendi per 10000. residuo, quoties necesse fuerit, denuo per 60. multiplicato, &c. Quæ ratio etiamsi vulgo apud Astronomos & Chronologos hætenus non obtineat, nihilominus ut facillima Chronologiæ studioso commendari meretur. Compendiosa sexagenas in decimales, & vicissim, reducendi præcepta videantur apud OUGHTREDUM *Clavi Mathematic. cap. 6.*

S. IX. Porro hora *æqualis* est vel *inequalis*. Illa est vigesima quarta pars diei naturalis, & *ισμμεγνὸς* atque *æquinoctialis* dicitur, de qua supra. *Inæqualis* est duodecima pars diei artificialis vel noctis, quacunque anni tempestate; vocatur *καιρικὴ*, *temporaria* & *Judaica*, quippe Judæis, & aliis olim nationibus, si traditioni fides est, usitata. vid. A B A R B. ad *Esaj.* 38: 8. Horæ autem inæquales dicuntur non ratione ejusdem, sed diversorum dierum & noctium, quarum horæ revera inæquales existunt, longiorum longiores, breviorum breviores, pro solis accessu vel recessu. Quæ in sermone Christi Matth. 20: 3, 5, 6. commemorantur horæ Judaicæ, nempe *tertia*, *sexta*, *nona*, *undecima*, non possunt accurate reduci ad nostræ numerationis horas, die anni non annotato; proinde hora Judaica *tertia* potest fuisse nona nostræ, etiam octava, vel decima &c. puta, prout vel circa solstitium æstivum vel hibernum, vel circa æquinoctia dies ille sumitur; quanquam æstus diurni mentione facta v. 12. verisimiliter dies circa solstitium æstivum actus intelligatur. Quod si de die anni constet, data hora Judaica, quota ea sit juxta nostram numerandi rationem facile invenitur, si cognitis cum longitudine diei dati in horis nostris æqualibus, tum hora ortus solis ex Globo vel Ephemeridibus, fiat secundum regulam proportionum, ut 12. ad datæ horæ Judaicæ numerum; Ita inventa longitudo totius diei ad alium numerum, qui dabit quæsitum: Cui si adjiciatur hora ortus, habebimus horam à media nocte juxta nostram numerationem. Si numerus harum horarum duodenario major fuerit, abjectis 12. residuum monstrabit horam à meridie putandam.

S. X. Aliud etiam est horarum genus in usu Ecclesiastico, quæ dictæ inter Christianos *HORÆ CANONICÆ*, seu tempora precibus destinata. Origine ab Hebræis ducta, quibus horæ precum, quæ eti-

am *horæ templi*, tres fuere. *Prima* hora precum est *tertia* Judaica : *Secunda* est hora sexta : & *tertia* est hora nona. Præcos vestigia vel exempla vide Dan. 6 : 11. ubi זמנין תלתא R. Sal. & Saadia Gaon exponunt : mane & sub vesperam vel noctu, & tempore *Minchæ* i. e. oblationis, quæ vel statim à meridie fiebat, *Mincha magna* dicta, vel ab hora nona, *mincha parva* vocata Judæis. vid. BUXTORF. in *Lexic. Hebraic. & Synag. Judaic. cap. 10. Act. 3 : 1.* ἐπὶ τὴν ὥραν τῆς προσευχῆς τὴν ἐννάτην, hoc est, imminente hora. Dicitur hæc hora precum, quia ea hora offerebatur sacrificium jube vespertinum inter duas vespervas. Huc etiam referunt Act. 10 : 9. Templo destructo atque sacrificiorum usu sublato Pharisaica Sanctimonia preces iisdem horis fundendas substituisse non contenta, novas quasdam, מוספין, quasi *auctaria* & *supererogationes* dicas, adinvenit, quibus eam temporis partem, quæ matutinum inter & meridiem intercurrit, diebus festis tanquam ex superabundanti & opere supererogatorio, stulta meriti opinione tumentes, etiamnum impendunt Judæi. Sic in *Seder Tephillot*, sylloge precum, inter alia legis מוסף לראש חודש *auctarium Sabbathi*, מוסף ליום כפור *auctarium Neomenia*, מוסף ליום diei expiationis &c. Accessit תפלת נעילה *precatio obserationis*, quam die jejunii precatione vespertina suo modo defuncti sole occiduo, portis cæli ei quasi obseratis, recitant. Hinc vero præpostera imitatione natæ *horæ canonica* Pontificiorum, quatuor diurnæ, *prima*, *tertia*, *sexta*, *nona* : Et totidem nocturnæ, quibus officium suum, cujus partes, *Psalmi*, *Cantica*, *Hymni*, *Lectiones*, *Responsoria*, *Antiphonæ*, *Litania*, *Capitula*, *Collectæ*, *Symbolum* & *Confessio*, peragunt. In quibus multiplex superstitio, vana proprii meriti præsumptio, cæca erga præfules Ecclesiæ obedientia, &, ut compendio dicam, irrisio

Dei, merito à nostris reprehenditur, nequicquam in contrarium contendente **BELLARMINO**, qui de *horis canonicis* prolixè, ut mos est, *lib. 1. de bonis operib. in partic. cap. 10. & seq.*

III. SEPTIMANA.

§. XI. Porro cum tempore identidem labente dici, tanquam partis non adeo magnæ, continua repetitio non ingrata modo, sed & molesta videretur futura, majores temporis partes constituendæ, sicque dies in *εβδομάταις* & *ομάδας* colligendi fuere, unde Periodi temporum natæ, *hebdomas, mensis, annus*. **HEBDOMAS** est systema dierum septem civilium ab ipso Deo distinctum; quando, quosque in usus, consulantur Theologi. Ejus in Chronologia usus insignis est, septenario numero motuum cœlestium rationibus sapienter accommodato, uti hujus aliquid videre est apud **MACROB.** in *Somn. Scip. lib. 1. cap. 6.* Ut vel hoc solo argumento patefeat, quod quærenti, cur Deus septenis diebus in *ομάδας* collectis septimum quemque feriatum esse jusserit, non satis sit respondisse, aliquem saltem seligendum fuisse diem, qui periodum ordiretur vel finiret, & si secus fecisset, idem quærendi occasionem fuisse futuram. Observatio *septimana* apud Chaldaeos, Arabes, aliosque Orientis populos dubio procul antiquissima est; Imo nusquam non receptum septimi diei periodice recurrentis usum prædicare audet **JOSEPHUS**: *Nulla omnino urbs est vel Græcorum, vel Barbarorum, neque ulla gens, ἔνθα μὴ τὸ τῆς ἑβδομάδος, ἢ ἀργῶμεν ἡμεῖς, τὸ ἔθος, & διαπεφοίτηκεν &c. lib. 2. contra Apion.* Idem ex *Philone, Clemente Alexandr. Luciano*, nominibus dierum apud *Celticas Gentes, Philostrato, Dione Cassio*, contendit **GROTIUS** in *annotatis ad lib. 1. de Verit. Relig. Christ.* & post ipsum **HUETIUS** *Demonst. Evang. prop. IV. cap. 11.* De Græcis & Romanis id negant alii: quorum

rum illi suas *cydoadas*, hi *nundinas* quasi novendinas, nono quoque die redeunt, periodo dierum non litera G, ut nunc fit, sed H terminata, habuerint. De quibus inter alios vide polyhistora IHOSEPI-
NIANUM de Orig. Festorum, cap. 5. Ad fidem Jo-
sephi dictis liberandam, & auctores cetera gravissimos
hac in parte conciliandos forsitan hoc notasse sufficit;
quod ritus Judaici minimum vestigia haud obscura,
etsi non ipsam ubique praxin observare sit id; quod
ostendunt, quæ cum ex Authoribus modo laudatis,
tum ex Homero, Hesiodo & aliis, eum in finem alle-
gari solent. Quando vero Authores Septimanarum
observationem ante Theodosii tempora in Rom. Im-
perio receptam negant, imo Calendarium Rom. non
nisi Dionysii Exigui tempore, sub Justiniano, in eas
distingui coepisse docent, vid. Cl. SPANH. Introd. de
usu vulgo obtinente, & in civilibus etiam, intelligen-
dum est. Alioqui Christianos in Rom. quoque Im-
perio hebdomadam periodos inde ab ævo Aposto-
lorum usque in sacris obeundis servasse multa argu-
unt: Ut quod tempus solemne & commune Conven-
tuum Sacrorum ipsis fuit feria 1. dies Dominica. In
variis Orientis saltem partibus convenisse dicuntur
etiam feria 7. ad imitationem Apostolorum, Judæos
ea die instruendum, Act. 13. 16. 17. 20. capp. Con-
venire etiam feria 4. qua proditus Christus, & 6. seu
in parasceve, qua cruci affixus: qui iidem dies erant
Stationum seu *orationum* & *semi-jeiunii*, quod TERTUL-
LIANUS vocat, nempe ad horam usque nonam à
solis ortu, i. e. tertiam pomerid. Constantinus M.
Christum fide amplexus, observationem & sanctifi-
cationem primæ feriæ lege divulgata firmavit, addi-
ta ratione, quod ea die Christus e mortuis resurrexif-
set, SOZOM. Hist. Eccl. Trip. cap. 8.

§. XII. Alius insuper apud alios septimanæ dies
sacer est, & diversa dierum nomenclatura. Hebræis

septimus feriatus est : Christianis primus ; ἡ μία vel πρώτη τῶν σαββάτων, & ἡ κυριακή, *Dominica*, in N. T. ἡμέρα ἀναστάσιμος *dies resurrectionis*, (sicut & πάχα ἀναστάσιμον *Dominica resurrectionis*, contradistincte ad πάχα σαυρώσιμον, quod German. *Karsfreitag* :) item ἡμέρα φωτός *dies lucis* dictus authorib. Ecclesiasticis ; ob causas vulgo notas. Muhammedanis dies Veneris sacer habetur, cum ex antiqua superstitione, qua Arabes Venerem, *Chobar* dictam, venerabantur ; tum quia fuga Impostoris illius Muhammedis in eam diem incidit, quæ hinc מנחה שבת dicta, ut SCALIG. lib. 2. de Emend. Temp. Et si Scriptores rerum Orient. fugam illam ex Mecca urbe in feriam quintam rejiciant, eamque velint esse characterem annorum Arabic. & initium Epochæ *Hegira*, ut ALFRAGANUS Arabs, Elem. Chron. & Astronom. Cap. 1. sexta tamen illis sacra est, propter primam lunæ phasin tunc visam, unde gentes istæ suas incunt neomenias. Nomenclatura deinde dierum, quam à planeris habent, antiquissima est, nec demum tempore Ptolemæi, qui sub Antonino Pio claruit, *dies hebdomadæ per nomina planetarum distincti fuere*, ut censet HOSP. de Orig. Fest. cap. 5. Ut vel inde patet, quod 1. *Thoth Nabonassari*, i. e. prima dies primi mensis Ægyptiorum priscorum cœpit feria 4. ieu die Mercurii, consentientibus Chronologis : *Thoth* vero Ægyptiis dici Mercurium docet CICERO, *Quintus*, inquit, quem colunt *Pheneata*, qui *Argum* dicitur interemisse, ob eamque causam Ægypto præfuisse, atque Ægyptiis leges & litteras tradidisse. Hunc Ægyptii *Thoyth* appellant : eodemque nomine anni primus mensis apud eos vocatur. lib. 3. de Nat. Deorum. Idem probatur Oraculo & versibus Orphei, opus citat SCALIGER in prolegom. ad Emend. Temp.

§. XIII. Cur autem dies planetarum cognomines non sequantur ordinem & situm eorundem, diem Saturni non excipiente die Jovis, sed Solis, &c. ob-
serva-

servata harmonia διὰ τετραγών, nempe Gc: cf, &c. non eadem causa redditur vel fingitur ob omnibus. Vulgare commentum est, singulos Planetas vicissim per horas regnare, unde *horæ planetariæ* dictæ, ut spatio 24. horarum septem planetæ regnandi vices ter repetant, residuis 3. horis supernumerariis, quæ faciunt, ut principio diei cujusque sequentis regnet planeta, ab illo, qui pridie prima regnaverat hora, quartus. Verum SCALIGER antiquiorem credens feriarum appellationem à planetis, quam ut ab horis, quæ singulæ suum sibi planetam vindicant, nominatæ sint, aliam appellationis causam proponit, quam schemate heptagoni circulo inscripti & in septem triangula isoscele resoluti, planetis suo ordine naturali ad singulos peripheriæ angulos appictis, delineat, ita ut si à dextra baseos incipias numerare, pergens ad verticem & inde regrediens ad sinistram baseos, planetas eodem ordine, quo in feriarum appellatione, digestos invenias, nempe non per seriem suam, sed per intervalla laterum, quæ veræ sint oppositiones. *Hanc veram harum appellationum rationem esse, dictat incomparabilis & stupendæ peritiæ Vir; vellem & probasset.* Aliam affert BEDA, quæ tanto verisimilior, quo plus superstitionis præfert, quam vide *lib. de nat. rer. cap. 8.* Nec enim dubium, quin superstitioni Gentilium nomenclatura isthæc ortum debeat, quam, ut multa veteris Idolomanie alia, nullo damno ignoramus. Judæi ab ultimo suo, eoque universali, exilio, ut nulla fere non commenta Philosophiæ & Astrologiæ Græcorum in Theologiam suam Cabbalisticam adoptant, licet absurde ab Hebræis priscis ad Græcos furtim translata fingant; ita & hic sanctæ simplicitatis Veterum vestigia deserunt, dum planetas cum totidem Zodiaci signis & Angelis in septem hebdomadæ dies erogant. Commentum Hebraica lingua sine versione refert MUN-

STERUS ad calcem Calendarii Hebr. quod latine
 versum sic habet: *Dies primus* שְׁמוֹלוֹ אֲרִירָה *cujus signum*
 (Zodiac.) est Leo, *Angelus Raphael*, וְמִשְׁרָתוֹ חֲמָה
minister Sol: aurum. Dies secundus; cuius signum סִרְטָן *Cancer*,
Angelus Gabriel, מִנִּיִּשְׁתֵּר לְבָנָה *Luna: argentum.*
Dies tertius; cuius signum מִלְּרָה וְעֶקְרָב *Aries & Scorpius*,
Angelus Samael, מִנִּיִּשְׁתֵּר מַרְס *Mars. Dies quartus; cu-*
jus signum וּבִתּוּלָה וְחָוִים *Gemini & Virgo*, *Angelus Mi-*
cael, מִנִּיִּשְׁתֵּר כּוֹכַב *Mercurius. Dies quintus; cuius signum*
קֶסֶת וְדָג *Arcuarius & Pisces*, *Angelus Tzadkiel*, מִנִּיִּשְׁתֵּר
 צֶדֶק *Jupiter. Dies sextus; cuius signum* שׁוֹר וְמִזָּנִים
Taurus & Libra, *Angelus Anael*, מִנִּיִּשְׁתֵּר נֹגֶה *Venus: as.*
Dies Sabbathi, cuius signum גִּי יִדְלִי *Capricornus & Aqua-*
rius, *Angelus Kaphriel*, מִנִּיִּשְׁתֵּר שַׁבְּתָאִי *Saturnus.* Nomina
 quorundam metallorum adjiciuntur, ex figmentis
 Alcumistarum, qui ista planetarum nomina iis indi-
 dere. Hæc iunt inter גִּלְיִם stercora domus Israelis,
 tempore commiserationis abjicienda. Nec omni
 prorsus superstitione caret, quod SCHILLERUS
 in *Cælo stellato Christiano*, abolita ista Gentili dierum
 nomenclatura, quam & nos etiamnum ore ferimus,
 primo die, ut recte, *Dominico* appellato, pro die Lu-
 næ, *Spiritus S.* pro die Martis, *Beatorum omnium*; pro
 die Mercurii, *Ecclesiæ Catholicæ*; pro die Jovis, *Cenæ*
 & *Corporis Domini*; pro die Veneris, *Crucis ac Passio-*
nis Christi; pro die Saturni, *Virginis Mariæ*, audiri
 vellet.

§. XIV. Israelitis olim singuli Hebdomadæ dies
 à Sabbatho denominabantur: Ut *מִלֵּא שַׁבָּתוֹן*, *prima*
Sabbathorum, Matth. 28: 1. Luc. 24: 1. Joh. 20: 1. Et
 Phariseus ille, *jejuno*, inquit, *דִּשְׁ שַׁבָּתַי* bis per sep-
 timanam, Luc. 18: 12. Sic in Bab. Maccoth. cap. 1. fol.
 5. 1. Dixit Rabba, *venerunt duo, testes, dicentes; Soræ*,
tempore matutino בְּשַׁבָּת בְּחֹרָה *primo Sabbathi* פְּלוֹנִי N. N.
homi-

homicidium commisit. Venerunt duo, dicentes: בפנינו נחר בשרנו vesperi primo Sabbathi nobiscum fuistis Nahardea, &c. Ita deinceps בשרנו בתרי בשרנו sed secundo Sabbathi occidit o deiva &c. Universæ istæ feriarum appellationes concurrunt in TARGUM Esther. cap. 2: 9. Ubi septem puellæ Estheræ ministerio addictæ, suis quæque nominibus expressæ, functiones suas per שבועות septem hebdomadæ dies, tuo cuique die assignato, obivisse memorantur. שבת igitur in hisce loquendi formulis idem significat quod שבוע septimana. Ferias dixerunt Latini Christiani, authore (ut B E D A vult l. f. g.) Sylvestro Papa, à diebus hebdomadi Paschalis, à qua veteris anni Ecclesiastici initium ducebatur. Quia enim illius dies omnes, ut olim apud Judæos, erant feriari; imo aliquamdiu utraque septimana, quæ pascha præcessit, Hebdomada magna dicta, & quæ secuta, Septimana in Albis vocata, sollemnis & festiva fuit, inde obtinuit, ut reliquarum hebdomadum dies etiam feriæ vocarentur, præcipuo quodam principis septimanæ paschalis auspicio & omine.

S. XV. Duplex porro SEPTIMANA in usu Scripturæ S. est, Ordinaria seu communis, quæ etiam diaria dicitur, septem dierum, de qua hætenus: Extraordinaria, quæ annalis septem annorum, sumto die pro anno, ut Ezech. 4: 6. de qua in lege Jubilæi Lev. 25: 8. & in Prophetia Dan. 9: 24. interpretibus etiam Judæis. Ibi enim JOSEPH ABEN JECHIA Comment in Dan. שבועים שמיטות reddit: שבועים שמיטות, 70. anni intermissionis, שהם ארבע מאות ותשעים שנה, qui conficiunt 490. annos שמיטה est omisso, Deut. 15: 1. 2. 9. septimo quovis anno terra omittebatur & mutuum; שמיטה, quod omittere, ferri, abire, labi sinere, significat, unde intelligitur locus 2. Sam. 6: 6. Hinc usitata appellatio שנת השמיטה anni Sabbathici, apud

Chronologos. vid. *CLAVIS. Ifag. Chronolog. cap. 26.*
 Consentit *ABARBANEL* in *Maijenc Hajeschuah* fol.
 62. 2. השבועים האלה הם מן השנים העלים לתצ" שנה. 2. 62.
 והם כלי ספק מחורבן בית א' עד חורבן בית שני;
septimana illa sunt annorum, colligentes 490. annos, haud dubie
à vastatione domus (templi) primæ ad vastationem domus
secunda putandos: fuerunt enim 70. anni exilii Babylonicæ,
& 420. annis duravit domus secunda, &c. וכן פירשום חז"ל
 בסדר עולם: *sic etiam exposuerunt eas sapientes nostri b. m.*
in Chronico Mundi. Annus autem comparatur diei.
 Quemadmodum dies alter fit sole ad nos redeunte,
 ita quando sol tale tempus redorditur, positus in eo-
 dem Zodiaci loco, novus quasi dies est, qui dicitur
 עת חיה *tempus redivivum vel reviviscens, Gen. 18: 10.*
 14. Ubi כרת חיה Lutherus infelicititer vertit: *So ich*
lebe; quali verbo uti ne quidem in creatum angelum,
 nedum in Filium Dei, tunc locutum, congruit.
 Simplicissime & bene Piscator; *Wann es wider um di-*
se Zeit seyn wird. Expressissime vero Arabs; *מי מחל*
in tempore huic simili ex opposito,
i. e. sequenti anno. Quod *ex περιόδῳ* pro more mone-
 mus, ut necessitatem probandi & examinandi versio-
 nes Scripturæ S. ad acquirendam, quoad ejus fieri
 potest, *πληροφορίαν*, videant, qui alioqui sive subsidiis
 humanis passim obviis & parabilibus secure confisi,
 sive, quod pejus est, ex contemptu profano, vel igna-
 via, Philologiæ S. studia neglectui habent.

§. XVI. Mittimus, quæ multi multa de *septena-*
rio prodidere ἀδηλα, frigida, putida; vel superstitio-
 so Scripturæ S. in qua numeri hujus non rara mentio
 vel allusio est; abusu male collecta; qualia videri
 possunt v. g. de septenario transgressionum, poena-
 rum in hoc mundo, mansionum in gehenna &c.
 apud

apud *Men. B. Isr. in Nischmat. chaim part. I. cap. 12.* vel à Gentilibus plusquam dubiis & male cohærentibus conjecturis conficta : qualia sunt, quæ de Septenarii sterilitate, qui hinc virgo & Minerva Pythagoreis dictus, commenti sunt. De annis item *Climætericis*, septimo quovis & nono, quos periculosos habent, periculosissimos vero, quos septenarius seipsum vel novenarium multiplicans producit. Sic nescio quam efficaciam in statu habituque hominis immutando ætati per septenos annos distributæ vendicant inter alia *Gnomæ Solonis*, inter fragmenta *Poet. Græc. ex Philone & Clem. Alex. restitutæ.* Plurima de septenario vera, dubia, falsa, ridicula, ex *M. Varone* referunt *A. GELL. Noct. Att. lib. 3. cap. 10. MACROB. lib. 1. cap. 6. in Somn. Scip.* Memorabilis vero hic cumprimis est *annus mysticus HEINLINI*, ex Hebdomade creationis tanquam radice exstructus, dierum 343. qui cubus est septenarii : *Chronolog. Myst. §. 1.* Inventum, quod in speciem tanto felicius videri possit, quo faciliora difficultates Chronologicas, tantum non insuperabiles hætenus visas, expediendi media promittit. De quo plura, ubi de mense & anno.



* * * * *

SECTIO SECUNDA,

De

MENSE ET ANNO.

Argumentum.

Tempus aliud Astronomicum, aliud Civile, aliud Ecclesiasticum. §. I. *Mensis* est vel Astronomicus, vel Civilis. Astronomicus est vel Solaris. §. II. Vel Lunar. Estque vel periodicus, vel Synodicus, vel Illuminationis. §. III. Menses Hebræorum antiqui tricenos colligunt dies ex Gen. 7. Sed in lege Mosaica Menses ad Lunæ motum exiguntur. Quid כסח Prov. 7 : 20. & Psal. 81 : 4. §. IV. An veteres Hebræi Menses à Lunæ occultatione, vel à phasi deduxerint? Coccejus refutatur. §. V. Annon & mensium solarium usus apud Hebræos, in negotiis regiis, ex 1. Chron. 27. §. VI. Mensis Lunar. est vel cavi, vel plenus, vel intercalaris. §. VII. Posterioribus Judæis menses sunt alternis pleni & cavi. §. VIII. Apud Hebræos menses Lunares cum anno solari adstrictos esse oportuit, ne festa vagarentur. §. IX. Pascha mensis Abib clavis totius anni. §. X. *Annus* est vel Astronomicus, vel Civilis. Astronomicus est vel Solaris, vel Lunar. Annus Solaris est, cui ordinando Solis revolutio inservit. §. XI. De Hebræorum

תקופות

ἡμερῶν five anni quadrantibus. §. XII. Annus Lunaris est vel communis 12. Lunationum, vel embolimæus. §. XIII. Civilis, quo quævis gens in negotiis civilibus utitur. Præcipui sunt Ægyptius, anno Tropico minor, & Julianus, Tropico major. §. XIV. *Julianus* est vel medius & æqualis, vel verus & inæqualis. Isque vel communis dierum 365. vel bisextilis d. 366. §. XV. Ejus initium in mediam ferme hyemem incidit. §. XVI. Lunaris civilis est vel solutus, 12. mensibus synodicis constans, quo Arabes & Turcæ utuntur. Ulug Beigus citatur. Nomina mensium Arabicorum. §. XVII. Methodus reducendi annos *Hegiræ* datos in Julianos. §. XVIII. Lunaris Ligatus ad Leges cursus solaris contemperatur. Inde varii cycli enati, Dieteris, Tetraeteris, Octaeteris, Enneadecaeteris; Perîodus Calippica est annorum 76. five Enneadecaeteris quadruplicata. §. XIX. Annus priscorum Hebræorum neque Solaris, neque Lunaris fuit, sed dependens ab arbitrio synedrii. §. XX.

I. DE MENSE.

§. I.

TEmpus aliud *Astronomicum*, Civile aliud, faciunt Authores, quod nos suo loco ἐν πρῶτῳ subnotare, meminimus. Illud est, quod ad regulam motuum cœlestium, quam fieri quidem potest, accuratissime expenditur. Hoc vero, quod quæque sibi gens è rudi popularique motuum cœlestium observatione ad usum vitæ civilis constituit. HEINLI-NUS in *Synopsi Mathem.* addit *Tempus Ecclesiasticum.*

cujus in publico Cultus divini exercitio, suis temporibus *ἐν τὰς* dividendo, usus est. Verum distinctionis fundamento eodem retento, non communi generi, sed facta subdivisione, alteri *speciei* partem istam novissimam subjectam oportuit. Temporis porro utriusque ratio in dierum *ἐμασιν*, quales sunt *Mensis* & *Annus*, spectatur: quorum theoriam, ut ordo fert Instituti nostri Isagogici, impræsentiarum pertractare animus est.

§. II. *MENSIS* dicitur *ὅσμηνα* dierum 27. h. 7. &c. vel d. 29. h. 12. &c. vel d. 30. vel 31. pro diversa sive calculi Astronomici, sive instituti popularis ratione. De mensium distinctione præcepta bene multa videsis apud *ALSTEDIUM Uranometr. Part. III. cap. 5.* Præcipui in re Chronologica usus est *Mensis Astronomicus & Civilis*. Ille est, quem solis vel lunæ motus definit; Unde non integros modo dies, sed dierum particulas variæ denominationis adhærentes habet. *Civilis* est, quo gens pro suo quaque instituto utitur; Inde & *Usualis* dicitur, diebusque semper integris absolvitur, quippe *παχυμερῶς* ad solis & lunæ decursum conformatus. Astronomicus Solaris alius, alius Lunar is est. Solaris, quo Sol ab Occidente in Orientem promovendo unum signiferi *δωδεκαμήσιον* emetitur motu equali, atque adeo intervallum d. 30. h. 10. 29. 4. tamen si motu inæquali & apparente in uno Zodiaci signo longiorem trahat moram, quam in altero. Hinc Menses ipsi, *DIONYSIO Mathematico* Authore, duodecim signis cognomines sint: *Krion, Tauron, Didymon, Karkinon, Leonton, Parthenon; Zygon, Scorpion, Toxon, Egon, Hydron, Ichryon.* Iidem civiles fuerunt apud *Ægyptios*, quippe æquabiles tricenorum dierum singuli, adjiciendis in fine anni 5. *ἐπαγομένους*. Solares civiles etiam sunt menses nostrates Juliani, de quibus dicere amplius nihil attinet.

§. III.

§. III. *Mensis Lunaris triplex est ; Periodicus, Synodicus & Illuminationis.* *Periodicus* est intervallum temporis, quo Luna sub Ecliptica ad idem punctum, unde digressa fuit, revertitur. *ABEN ESRA* super *Exod. 12: 2.* ירענו כי מהלך הלבנה בגלגלה בנקודה הידועה כנגד גלגל המזלות עד שובה אל הנקודה בעצמה הם כו
Cum vulgo Astronomorum *Lunæ revolutionem ad idem orbitæ suæ punctum spatio 27 $\frac{1}{4}$ præter propter dierum metitur.* Id ipsum vero *κατὰ τὸ ἀκριβές* indagasse, vix ulli in Chronologicis usui est. *Synodicus* est, quo Luna à sole digressa, completis omnibus apparitionum suarum vicissitudinibus, ad eundem revolvitur. Atque adeo est intervallum temporis, quo duo novilunia sive Synodi continuæ determinantur. Priori proinde hoc major hic mensis est, quo plus temporis ad solem, aliquatenus interea progressum, cursu suo assequendum impendit. Hujus in artificiosa & civili temporum digestionem usus potissimus est. Ejus de quantitate Hebræorum traditio est in *Sepher Ebronot* pag. 2. אין חירושה של לבנה
Innovatio lune non fit infra 29. dies, 12. hor. 793. belakim ; quorum, ut *Seçt. I. §. 8.* exposuimus, 1080. conficiunt horam. In sexagenis igitur ועתה הסר
d. 29. h. 12. 44. 3. 20. Pergit Author cit. מהשכונך זה כח לפי שהן הולכין בשביעת נמצאת יתרון לכל
anfer proin ab hacce summa tua 28. dies, quos septenarius dividendo absomit, restabit excessus mensis cujusque supra septenarium, 1. d. 12. b. 793. bel. qui character est mensis synodici, usui construendarum tabularum pro æquandis annis sol. & lun. reservandus : quales tabulas idem liber pag. 3. &c. exhibet. **BULLIALDUS** ex observatione duarum Eclipsium anno Nabonass. 366. Thoth die 26. h. 16. 58. & anno

anno Christi 1635. Mart. d. 3. h. 9. 18. 5. interval-
 lum utramque inter' oppositionem notavit dierum
 736404. h. 9. 1. 29. qui menses conflant 24937. unde
 diviso dierum numero per menses colligit veram
 mensis Synodici quantitatem d. 29. h. 12. 44. 3. 9. 37.
 9. 59. 15. 15. *Astronomia Philolaica Lib. III. cap. VI.*
 Quod ut intelligatur, attendendum, 366^m. annum
 Nabonass. respondere 380^{mo}. anno ante Christum na-
 tum: & æram Christi vulgarem biennio augendam
 ex præceptis Scaligeri. Denique in ipsa divisione ca-
 vendum, ne horæ & particulæ diebus adhærentes suo
 loco, quoties multiplicatio per 60. repetenda venit,
 negligantur. Judaica igitur determinatio temporis
 menstrui excedit medium lunæ motum scrup. 00. 00.
 10. 22. 50. 00. 44. 45. Unde annis 1500. fere tardiora
 exhibet novilunia per unam horam. Mensis denique
Illuminationis dicitur spatium temporis à prima luna rena-
 scentis phasi ad ultimam ejusdem senescentis phasin decurrens;
 quod quidem, luna heliace nunc citius nunc tardius
 oriente, variat, in calculo tamen æquinoctii verni
 & novilunii paschalis veterum Judæorum inveniendi,
 tuto satis ad tempus novilunii assumuntur 1. dies 3.
 h. 30. tanto quippe intervallo luna commode post
 conjunctionem apparere incipit, sole jam infra hori-
 zontem demerso. Id quod ea maxime de causa ob-
 servatum oportet, quia à phasi suas Hebræi aliique
 Orientales ducebant neomenias.

§. IV. Quæri solet, quales fuerint *Menses* anni He-
 bræorum antiqui? *Usuales* quidem, qui in Scripturis
 numerantur, tricenos colligunt dies. Gen. 7: 24. &
 8: 3. dies 150. à decimo septimo mensis secundi
 Gen. 7: 11. ad decimum septimum mensis septimi
 conficiunt quinque menses. Sic Apoc. 11: 2. 3. &

13: 5.

13:5. menses quadraginta duo sunt dies 1260. Tricenarius autem prope accedit ad mensuram temporis, quod inter duo novilunia intercedit. Lege de sanctificandis noviluniis &c. data, necesse fuit accuratius mentes ad cursum lunæ exigi. *Lunares* autem fuisse, saltem in sacris, inde ab exitu Israelitarum usque, vulgo concedunt, neque nobis est dubium. *Fecit* namque Deus ירח *lunam* (unde ירח *mensis*) in *stata tempora*. Psal. 104: 19. ubi מועדים sunt *dies festi* ex lunæ motu ad conventus agendos indicti, quo significatu idem nomen Gen. 1: 14. distinguitur ab ארת *quod signa*. notat *naturalia*, quorum causæ sunt astra. Hinc Eccl. 43: 7. *Etiam à luna signum diei festi* --- *mensis de nomine illius*. Et Num. 10: 9. 10. *Clangetis tubis* --- *in statis temporibus sive solennitatibus vestris & in principis mensium vestrorum*. Conf. Psal. 81: 4. *Clangite in novilunio buccina, in interlunio, die festi nostri*. ubi חרש ab innovatione luminis dictum novilunium, quod Syrus ריש ירח *initium mensium*. LXX. νεομηνίαν. Rabbinum תחלת החדש הלכנר *initium innovationis lunæ*, interpretantur. Dubitatur, quid idem loci significet vox כסה quæ per א scripta occurrit Prov. 7: 20. ubi MASA *SORA* ה *חר כת' ה* bis extat eadem notione, semel per ה scripta. R. SAL. exponit: לזמן המועד הקבוע *ad tempus præstitutum*. R. LEVI, ברה *in principio anni*, tunc enim Deus quasi על כסה *folio insidet judicans orbem terrarum per justitiam*. scil. alludi putat vocem כסה *thronus*. Atqui fixum tempus loco Proverb. 7. non quadrat: nec enim amasium invitantis adulteræ est, maritum dicere fixo quodam tempore, quod forte voto brevius esse posset, rediturum, quin verius affirmare, emanfurum velut ad numeniam, per mensem: neque enim de certitudine reversuri, sed mora emanfuri agitur. Rectius ex paralelo חרש verti videtur

detur *interlunium*. ABEN ESR. ומעם בכסה שהלכנה ab occultatione lunæ notationem vocis כסה arcessit. Nec aliter TALMUDICI, quantum nullo fundamento de principio ineuntis anni exaudiunt, quærentes: איזו חג שהחדש מתכסה בו הוי? *quodnam est festum, quo luna occultatur? Responde; festum novi anni. Rosch haschana fol. 16. 1.* Idem intendit TARGUM Ps. 81: 4. Clangite בִּירְחָא רַתְשֵׁי in mense Tisri buccina, in mense רַתְכְּסִי qui occultatur. Eodem sensu Græci ἐν τῇ καὶ νέαν, Latini Janam veterem novellam, dixisse videntur, interlunii die & novilunii coincidente.

§. V. Indidem vero id forte consequi dices, Hebræos non à phasi suas duxisse neomenias. Resp. Ut versionem vocis כסה, optimam utique, vindicet Celeberr. COCCEJUS, *Studii, inquit, erat in veteri cultu, non expectare lunæ phasin, sed statim cum lunæ occultatione festum celebrare.* Comment. in l. c. Atqui, quod pace tanti Viri dicam, id cum avita Judæorum, aliarumque Gentium Orientalium, consuetudine componi posse non videtur. Sic etiam regula ritum in cultu publico divinitus præscriptum obeundi plus satis fuisset incerta. Quomodo enim tuto affirmares, lunam nunc silentem esse vel occultari, nescius interim, an alius quisquam, ex quo nondum sciscitatus es, lunam viderit nec ne? Contra si ad phasin attendas, tutius fuerit vel uni homini fidem habere, qui rem ipsam viderit, quam mille myriadibus testium, qui se nihil vidisse affirmarent. Sequioris ætatis superstitionis est, meritorum opinione tumens, לחוסף לקרש מחול על הקרש addere de profano ad sanctum. Unde JUNIUS ex προσημυγία Judith. 8: 6. librum à Judæo aliquo, superstitionum amatore, concinnatum colligit. Videmus enim hodie Judæos, ne diebus festis vitium afferant, pridie
toto

toto tempore pomeridiano feriari : tanquam si Deus hoc nomine in ære ipsorum futurus esset. Nos quidem pro confesso sumimus, quod Phariseis pariter & Karæis receptum est, Neomenias ex Φάσεως observatione indicati solitas antiquitus, tametsi de calculi una cum Φάσεως admittendi ratione & autoritate, de phasium decernendarum Authoribus & loco, de intercalandi tempore, & id genus aliis, non usquequaque conveniat iisdem. Hic autem processum, quem senatus in figendis mensium initiis tenuit, tantisper descripsisse ad expediendam difficultatem mox nobis objectam usui erit. Judices præviso per calculum sperandæ Φάσεως die, mane contrahebantur certo in loco, ubi testes (delectos viros ad captandam lunæ phasin in loca edita missos) expectabant antiquitus toto die : Postea נשתהו העדים מלבוא התקינו שלא cunctantibus venire testibus, decreverunt, eos non opperiri nisi ad tempus usque offerendi donarii. משחרב בית המקדש התקין רבן יוחנן בן זכאי שיהו מקבלין מחרב בית המקדש עד המנחה : Rursus vero ex quo destructum est templum, instituto Johannis filii Zachari visum fuit expectare & audire testimonium de nova luna toto die. Rosch Hasschana cap. 4. Mischn. 4. Hi testes reversi examinabantur, qui primi venerant bini, intromittebantur seorsim, primus interrogabatur : ביצר ראית את הלבנה : quomodo conspexisti lunam, ante, an post solem ? versus septentrionem, an meridiem ? quanta ejus altitudo, declinatio, latitudo ? &c. Ibid. cap. 2. Mischn. 6. Examini superviebat tabula R. GAMALIELIS, per quam non intelligendam esse Ψηφοφορίαν. σεληνιακῶν συγῶδων, ut SCALIGER vult, de periodo Jud. Alex. lib. 2. Emend. Temp. quasi ad eam demum confugerint, quando nubila aut imbres visionem lunæ oculis inviderent, patet vel obiter legenti verba Rosch Hasschana, cap. 2. Mischn. 8. דמות צורות

צורות לבנות היו לו לרבנ" בטכלא ובכתל ובעלייתו שבחו
Habebat מראה את ההריוטות ואומר חכזה ראת או כורה:
R. Gam. figuras phasium lunarium depictas in mensa & pa-
riete cenaculi sui, quas exhibere solebat Idiotis, quærens:
hæcne figura an illa vidisti lunam? Comperta apparitio-
nis veritate ריש בית ראש praeses judicii pronunciabat, suc-
clamante populo universo, מקדש מקדש sanctificata est, san-
ctificata est. Ibid. Misch. 7. Quomodo autem neome-
niæ fixæ in vulgus publicabantur? בראשונה היו משיאו
Olim משואות משקלקלו הכותים התקינו שיהו שלוחן יוצאין:
quidem faces accenderunt, sed postquam morem abusu corru-
pissent Cuthæi, decreverunt dimittere nuncios undiquaque,
qui eas significarent. Ibid. Misch. 2. In seq. exponitur,
quomodo faces oblongis קלונסאות perticis cedrinis
præfixas tantisper in summo monte quassierint, donec
in secundo monte, velut φετυδαρωσι idem fieret. Post-
hac vero, ut dictum, nuncii dimittebantur in omnes
partes, qui neomenias publicarent, idque senis men-
sibus, על ניסן מפני הפסח in Nisan, propter pascha. על
על אלול מפני Abb, propter jejunium, אב מפני התענית
על תשרי מפני תקנת Elul, propter anni caput. ראש השנה
על בסלו מפני Tisri, propter festorum ordinationem. המועדות
ועל אדר מפני חפורים, Chisleu, propter Encenia, חנוכה
Adar, propter festum sortium. וכשהיה בית המקדש קיים
Et dum stetit templum, מפני פסח קטן
etiam dimittebantur in Ijar, propter Pascha parvum. Rosch
Hässh. cap. 1. Misch. 3. Hæc prisce moris vestigia sunt,
quanquam forte, quod fieri solet, inventis eorum,
qui κατά τὸ δόξαν αὐτοῖς ἐπαίδευσαν, interpolata. Istuc
porro notandum, quod si lunam nascentem videre,
aut tempestates, aut familiaria regionum nubila, aut
aliæ quævis causæ, impedirent, initium mensis de-
terminatum fuerit 30. diebus post præcedentis neo-
menia tempus. לא הספיקו לומר מקדש עד שהשיכה הרי

זה מעובר Si testibus examinatis ante tenebras non potuerunt pronunciare *Mehuddasch*, mensis superior plenus efficiebatur. *Rosch hassch. cap. 3. M. 1.* Si die trigesimo visa fuerit luna, mensis præteritus cavus, sin trigesimo primo demum, mensis præteritus plenus pronuntiatus fuit. *Gloss. Talm. ad Rosch. hassch. cap. 1. M. 3.* Cavo proinde & plenos menses non ex certa quadam in se redeuntis suiue semper similis cycli ratione, sed prout phasis vel oculis observata, vel calculo prævisa, aut modus denique anni præsentis, docere poterat, constituebant; quo de amplius suo loco. Quo casu, ut mensis, qui præterierat, fieret plenus 30. dierum, & sanctificaretur dies à nèomenia præcedente trigesimus primus, phasi opus non fuisse, contendunt Karæi adversus Phariseos; qui eandem quidem hætenus intercalandi rationem tenent, sed sanctificationis solennitatem, quando phasis desiderabatur, adhibitam fuisse negant. Unde sequitur, quod luna etiamnum quasi silente novilunium illud in trigesimum primum diem incidens haud incommode כסה *interlunium* dici potuerit. Quo animadverso difficultas super versione *Psal. 81: 4.* nobis mota evanescit, quanquam & figura ἐν δια δύοῖν admissa dilueret eandem.

§. VI. Objicis: 2. *Chron. 27: 1. &c.* Legiones ordinariæ Regi ministrantes pro numero 12. mensium distributæ leguntur: Ergo menses fuere solares, quorum duodecim annum conficiunt. Secus enim, lunares si fuissent, propter excessum anni solaris supra lunarem tertius fere quisque annus, quippe embolimus, 13. mensibus constitisset, saltem septeni intra ἐννεαδεκαετηρίδα quamlibet tales habentur à Judæis. Resp. Si usum civilem ab Ecclesiastico hoc in negotio distinguere luberet cum Magno SCALIGERO, mense usuali tricenorum dierum & anno æquabili Ægyptiorum assumpto, illico res foret expedita. Ἐπαγομεναι, inquit Author laudatus, *Hebræorum* תקופת השנה

השנה erant perpetuo in autumnno, neque ultra 30. dies epotham anni antevertebant, ac post 120. tantum annos mensis intercalabatur: ut merito historia prodiderit, duodecim tantum praefectos è numero mensium anni à Davide & Salomone creatos: quod annus Hebraicus in 120. annis nullum embolismum mensem haberet. Emend. Temp. lib. 3. de anno prisc. Hebr. Abrahamæo. Vellem equidem, virum longe literatissimum hæc sua probasse. Horæ illæ sex supernumerariæ, quas quartus quisque annus Julianus ad diem intercalarem colligit, 120. annis in mensem æquabilem excrescunt, quæ haud dubie causa est, ob quam in id demum tempus embolismum rejiciat. Undenam vero docebit, eandem habuisse priscos Hebræos anni quantitatem, tum, eousque horaria additamenta fuisse reservata? &c. Nobis quod obicitur, tanti non videtur, ut ea propter veritatem semel demonstratam deserendam arbitremur. Mensis embolimus, ut externum quid & commodatum spectari debet. Hinc adeo in Calendario Jud. plerosque dies festos Adar prioris in Adar posteriorem transferri videmus, quando annus est intercalaris: ejus simile quid factum fuisse in ista militum distributione, necesse est. Cætera, si argumentum valeret, etiam annos Chaldæorum, tempore DIODORI SICULI, perpetuo duodenos numerasse menses, parili ratione probares. Is enim Lib. 2. Bibliotheca Hist. in hanc rem sic scribit: Τῶν Θεῶν δὲ κυρίως εἶναι Φασὶ δώδεκα τὸν ἀριθμὸν, ὧν ἐκάσῳ μῆνα καὶ τῶν δώδεκα λεγομένων ζωδίων ἐν προνόμῳσι. Certum interim, fatente etiam Magno SCALIGERO, Chaldæos usos fuisse anno lunari fixo ope Periodi-Calippicæ 76. annorum, five cycli decemnovennalis quadruplicati.

§. VII. Mensis proinde lunaris alius חסר *cavus*: alius מלא *plenus*, vel מעובר *intercalaris* dicitur. Ille 29. hic 30. dierum est. Scilicet sub exitum cujusque men-

mensis diligenter advertebatur, utrum in vespera, quæ mensis elabentis diem vigesimum nonum secuta trigesimum inchoabat, luna radiis solaribus evoluta conspiceretur, atque adeo finito interlunio ראיה phasis lunaris extaret. Ubi phasis observata esset, neomenia, ut mos erat, solenni acclamatione sanctificata, cavum faciebant mensē ex diebus 29. jam elapsis, à phasi illa proximum mensem auspicati. Quod si phasis eo tempore esset nulla, tunc adjecto die sequente, h. e. trigesimo, plenus fiebat mensis, seu 30. dierum, adeo quidem, ut neomenia civilis insequens in vespera diei trigesimi primi collocaretur, nulla Φάσεως ratione habita. Ubi tamen etiam phasi solito frequentius desiderata arbitrio suo utebantur qui calculo præerant, nunc cavos nunc plenos, eosque continuos vel alternos statuendo, ne anni præsentis ratio turbaretur. Quo casu etiam phasi desiderata cavos inferere potuerunt, quando ex calculo astronomico dignoscerent, phasin, ni aeris caligine intercepta fuisset, haberi potuisse. Nihilominus, si traditioni fides est, mensium plenorum numerus ita coërcebatur vel rursus laxabatur, ut nec pauciores quam quatuor, nec plures quam octo interferi ullo in anno communi regulariter decernerent. Unde regula: אין פוחתים מארבע חדשים המעוברים בשנה ולא: נראה יתר על כן non minuunt numerum intercalandorum infra quatuor, nec visum adaugere eundem supra octo, in anno scil. communi. Talm. Tract. Erachin. cap. 2. misch. 2.

§. VIII. Posterioris vero ævi institutum est, ut & doctrina cyclica, quod nunc apud Judæos fere menses sint alternis pleni & cavi. Unde non rejiciendum videtur, quod Hebræorum doctissimus MAJEMONIDES habet, in Kiddusch Chodesch, cap. 8: §. 1. Quamdiu Synedrium fuit in terra Israël, ab eo, pro necessitate aliquando, alias juxta apparitionem lune capita

mensium & annorum fixa atque constituta fuisse, at ex quo tempore id abolitum est, Judæos certam quandam rationem, accommodatam luminarium motui medio, certisque regulis adstrictam sequi. Et hoc est decantatum illud סוד הטיבור הלכה למשה מסיני quod Judæi traditionem Mosis è monte Sinai esse nequicquam jactant; Alioqui correctionem ejus tentasse summa fuisset temeritas in R. Adda, de quo inferius.

Ordo mensium Hebr. hic est:

תשרי Tisri.	30.	אביב vel ניסן Nisan, vel Abibh.	30.
מרחשון Marchesvan, v. }	29.	איר vel יאר Jiar vel Ziv.	29.
כסלו Casleu.		סיון Sivan.	30.
טבת Thebeth	29.	תמוז Tamuz.	29.
שבט Schebath.	30.	אב Abh.	30.
אדר Adar.	29.	אלול Elul.	29.

Observ. 1. In hac ratione Tisri semper plenus est, Thebeth semper cavus; deinceps alternis pleni & cavi. Marchesvan & Casleu nunc ambo pleni, quando scil. annus sive communis sive embolimus est abundans, communis quidem supra 354. dies, embolimus vero supra 384. quo casu dicitur שנה שלימה שחרשיה annus cujus menses perfecti. Nunc ambo cavi sunt, ob rationem priori oppositam. Hinc annus dicitur שחרשיה חסרון cujus menses deficiunt. Nunc ille cavus, hic plenus, quando annus est mediocris, diciturque is, שחרשיה כסדרן cujus menses suo ordine digesti sunt. Annum communem Magistri significant vocabulis symbolicis חכש נרה & ח notant annum communem deficientem habere 3. dies supra 350. כ & ד notant annum communem ordinarium habere 4. dies supra 350. &c. Idem servandum in symbolo חכש הון de anno embolimo ח deficiens relin-

relinquit 7 5. dies, ubi dividitur per septem, &c. Ergo deficiens 383. æquabilis 384. abundans 385. dies colligit. Rationem huius instituti qui doceri velit, adeat inter alios *MUNSTERUM*, *Calend. Hebr. p. 130. &c.*

Observ. 2. Aliud est initium ordinis mensium, aliud initium anni. Nisan est primus mensium, sed septimus anni; cuius initium arcessitur à Tisri, ut constat per *Exod. 23 : 16. & Cap. 34 : 22. Lev. 25 : 9. Exod. 12 : 2.* Quemadmodum Ianuarius primus mensis est anni Juliani, sed in ordine mensium undecimus; primus enim mensium est Martius.

Observ. 3. Cui vero, vel quibus mensibus Julianis Iudaicorum quisque respondeat, accurate definiri nequit, ni prius æquinoctium vernale & novilunium paschale in dato anno fixa fuerint; de quo suo loco. Παχυλῶς Nisan Martio & Aprili, Jiar Aprili & Majo, & sic consequenter respondere dicitur; Ratione obvia, quia illi lunares, hi solares sunt. Interea de ratione componendi menses Jud. hodiernos cum Julianis videantur *MUNSTERUS in Calend. Hebr. SCALIG. Can. Isag. lib. 1. cap. 5. P. LANSBERG. Chronol. Sacr. lib. 1. cap. 7. &c.*

Observ. 4. De nominibus mensium Hebr. notat ABEN ESRA ad *Exod. 12 : 2.* כל שמות החדשים אינם לשון קרש כי אם לשון כשרים על כן לא תמצא במקרא כתוב אחד מהם ולא בכל המקרא רק בנבואת Chaldaica, זכריה ודניאל ועזרה ומגלת אסתר שהיו בגולה; non Hebraica esse, ideoque non nisi apud Zachariam, Danielem, Esram & in volumine Estheræ, qui fuerunt in Exilio, usitata reperiri. Occurrunt tamen nomina mensium Bul; Etanim & Ziv in lib. 1. Regum. SCALIGER menses olim non nominibus, sed numerorum notis significatos, Bul vero, Etanim & Ziv Sidonio-

rum & Tyriorum, non tantum Hebræorum fuisse suspicatur. De quo tamen, inquit, nihil certi constituere possumus. de Emend. Temp. lib. 3.

§ IX. Menses illos Hebr. lunares cum anno solari adstrictos oportuisse, inde apparet, quia solennitates ac festa, veluti Pascha, Pentecoste, Scenopegia, &c. iustis anni naturalis temporibus, in quæ præcepto divino erogata & fixa erant, rite celebrari non potuissent, si Hebræi mensibus lunaribus usi, nullam anni solaris rationem habuissent. Ob notissimum enim 11. fere dierum excessum anni solaris supra lunarem festa illa suis mota sedibus statim retrocessissent. Unde verum illud Rabbiorum: לולי הוספת

החדש הזה הפסח בא פעמים בימי החמה ופעמים בימי החמה נסי *Nisi adjeceris mensem istum* (Adar secundum in anno embolimæo,) Pascha nunc in æstatem, nunc in hyemem incideret. Atqui sane idem mensis cum eadem anni tempestate conveniebat semper. Deut. 6 : 13. Festum Tabernaculorum celebrato septem diebus, quam collegeris ex area tua, & ex torculari tuo. Id vero convenit cum die decimo quinto mensis septimi, per Lev. 23 : 34. Ergo septimus mensis in principium Autumni incidebat. Quod cum ita sit, primus mensis necessario erat primus, חרש האביב mensis novarum vel maturefcentium frugum, dictus, Exod. 13 : 4. & alibi, quarum frugum manipulus quoque ex præcepto Dei offerendus erat, & coram Domino agitandus postridie Sabbathi circa illud tempus, nempe in Paschate. Lev. 23 : 10. 11. Quando igitur Pascha debuit fieri die decimo quarto primi mensis verni, conficitur, decimum quartum primi mensis incidisse vel in vel proxime post Æquinoctium. Finge enim, vel uno solum die Æquinoctium prævertisse, ergo maxima pars primi mensis verni erat hyberna novas fruges negatura. Hic etiam Judæi tempus illud festivum Pascha,

ex

ex receptissima Majorum traditione non auspican-
dum statuerunt, nisi constaret, *Æquinoctium* ver-
num, quod illis *Tekupha Nisan* dicitur, vel ante im-
molationis diem, vel summum postridie eventurum.
Quod ni certo futurum præscirent, annum elaben-
tem communem inserto mense, Adar secundo, qui
Nisan imminens, sed sursum protrusi, vicem occu-
paret, intercalabant, ut Paschati commodum esset
tempus, quod æquinoctium vel sequeretur, vel non
aliter atque dictum est præverteret, atque adeo lo-
cus daretur præcepto: *Observato mensem Abib, ut cele-*
bres Pascha Jehovæ Deo tuo. Deut. 16: 1. Cæterum lu-
nares menses Hebræorum cum anno solari adstrictos,
satis diserte etiam docent Magistrorum Doctissimi.
MAIMONIDES, citante Scaligero, הרש השנה - - -

הם חרשי הלבנה: ושנים אשר אנו מחשבין הם שני החמה:
Menses anni sunt lunares, anni vero quos nos computamus,
sunt solares. Can. Isag. lib. 3. p. m. 22. ABEN ESR. &c.
Men- חרשינו הם ללבנה ושנותינו ישובו בסוף לשנות החמה:
ses nostri sunt lunares: Et anni nostri tandem reducuntur ad
solares, hinc tradiderunt Sapientes nostri b. m. domum judicii
perpetuo septenos menses in מחזור quovis cyclo (decem-no-
vennali) fecisse intercalares, quæ traditio Mosis est à Sinai:
Etsi mensium initia fixerint על פי ראיית secundum phasin lu-
na. Commentar. super Lev. 20. 9.

§. X. Pascha primum (secundum enim mense
א״ר celebrandum, ex primi tempore pendebat:) rite
collocatum clavis erat præcipua & index anni totius
disponendi, unde reliqua deinceps festa suos habe-
bant locos idoneos. Quanquam enim Judæi, ut est
in additamento *Talm. ad Rosch. Hassch. 10.* תקופת מונן
quadrantes anni (æquinoctia & solstitia) numera-
re soleant à Tisri, tamen מולד noviluniorum initium arces-
sunt à Nisan. *ibid.* Inquirendo paschali anno quocun-
que ante Christum natum dato, convenienter ad ha-
ctenus dicta, sequens servire potest methodus:

1. Annus inquirendi paschatis detur, vel assignetur in Periodo Juliana.
2. Inveniatur beneficio tabularum Astronomica-
rum verum *Æquinoctium* vernum anni dati.
3. Hoc facto, quærat^r novilunium verum, quod
non præcedat *Æquinoctium* inventum pluribus
quam 16. diebus, ob rationem de qua §. 9.
4. Tempori novilunii reperti adjiciantur 1. dies, 3.
horæ, 30. scrupula prima, ob rationem, de qua
§. 3. Si summa cadat post occasum solis, & luna
per calculum deprehendatur supra horizontem
Hierosolymitanum elevata, refractione & paral-
laxi non neglectis, habetur quæsitum initium
primi mensis: Sin minus, id incidet in noctem
proxime sequentem.
5. Invento principio primi mensis, facile erit repe-
rire initia reliquorum anni mensium: adhibita
cautione præcedente, ut & hacce, qua mone-
mur tempus numerare ad Meridianum Hiero-
solymitanum.

II. DE ANNO.

§. XI. Maximum *ὅσσην* dierum **ANNUS** est; isque vel *Astronomicus*, qui etiam *naturalis*, vel *civilis*. *Astronomicus* est, qui ad motum corporum cœle-
stium ita putatur, ut nec horarum nec scrupulorum
appendices negligantur. Hic annus, quia circuitus
est ejus Periodi, cujus cognominis ipse est, pro nu-
mero siderum errantium multiplex constituitur; ta-
lis est annus *Saturninus*, *Jovialis*, *Martialis*, &c. Ve-
rum enim vero præcipuus hic Solis & Lunæ usus est,
quippe obvi^us & facilis: Unde tralatitia Anni Astro-
nomici in *solarem* & *lunarem* distinctio. *Solaris* est, cui
ordinando solis revolutio inservit. Quando autem
revolutionis initium à stella quadam fixa, velut ab
ortu Caniculæ, ut olim *Ægyptiis*; vel *Vergiliarum*,
ut

ut Achæis ; vel à prima stella Arietis, ut vulgo ; accessitur , annus solaris *Syderens* appellatur , Juliano major 9. 26. juxta rationes Tychonis. Rursum initio cursus solaris ab uno è punctis tropicis , æquinoctialibus vel solstitialibus ducto , annus solaris *tropicus* seu *vertens* dicitur , qui temporis est spatium , intra quod sol ab æquinoctio vel solstitio digressus , omnemque Zodiaci longitudinem emensus ad idem cœli punctum revertitur. Cæterum æquinoctia haud minus atque solstitia *τηροαι* appellari testantur loca ex Sexto Empirico & aliis citata *PETAVIO* , *Ration. Temp. Part. 2. lib. 1. cap. 1.* De anni tropici quantitate non usquequaque convenit inter artifices.

§. XII. Judæi ex quo annis lunaribus per embolismos ad solares beneficio doctrinæ Cyclicæ reducendis, & mensibus alternatim plenis cavisque uti cœperunt, anni solaris modum ex quatuor ejus quadrantibus, quos תקופות Græci *κῑτῑδῑ*, dicunt, determinare solent. Hinc illud Talmudicum ; אין תקופה אחת לשנה אלא תשעים ואחד יום ושבע שעות ומחצה ; *quadrans à quadrante non distat nisi d. 91. h. 7½. Massék. Erubhin fol. 56. 2.* Ubi Glossator : ימי התקופה כך הם : צא יום ה' שעות ומחצה שהן רביע של שנה ורביע ; *dies quadrantis cujusque sunt 91. cum horis septem & semisse , quæ est pars quarta summa 365½. dierum.* Hunc autem anni modum sequuntur vulgatæ rationes R. SAMUELIS in conciliatione anni solaris & lunaris per cyclum decemnovennalem. Verum quia Enneadecaeteris lunæ minor est una Enneadecaeteride solis hora 1. particulis 485. quod discrimen progressu temporis inobservatum rationes noviluniorum haud parum turbare potest, Rabbi ADDA, Vir seculo suo Judæorum Doctissimus, ex Hipparchi arte, alium anni modum definivit, quo adhibito justior Enneadecaeteridis utriusque exæquatio fieret ; quo de tantisper magnum

gnum audiamus SCALIGERUM : *Differentia utriusque Enneadecaeteridis hor. 1. 485. nona decima portio differentiae scrup. 82. momenta Enneadecaeterica 7. vel quod idem est $\frac{2}{78}$, quæ detracta de quantitate anni Juliani relinquunt modum anni προσηλιώσεως εννεαδεκαετηρικῆς dierum 365. hor. 5. scrupulorum Chald. 997. momentorum 48. quæ sunt sexagesimæ horariæ 55. 23. 20. $\frac{7}{19}$. Quæ ut oculis oggerantur, de 1. hora fiant 1080. helakim, quibus adjiciantur 485. summam 1565. dividat numerus cycli 19. quotus erit $82\frac{7}{19}$. vel, quod periodus Calippica postulat, quadruplicando, $\frac{2}{78}$. Id ut de quantitate anni Juliani auferas, horarum supernumerariarum sextam reducito ad helakim, ut de 365. d. 6. horis fiant 365. d. 5, h. 1080. hel. à quibus ubi detraxeris 82. restabunt 998. Ut porro etiam momenta 28. subtrahas, pro 998. hel. substituito 997. hel. 76. mom. unde deductis 28. relinquentur 48. Vel si pro momento placuerit assumi 19 hinc detractis 7. restabunt 12. Unde intelligis EPISCOPIMUM, quando, ad hanc æqualitatem omnimode faciendam, inquit, observandum est, anno solari datos esse & dandos 365. dies, 5. hor. 997. minuta & 12. secundas Institut. Theol. lib. 3. sect. 2. cap. 7. Hæc quidem Calendario Judæorum novitio intelligendo conducunt; attamen pro æquinoctiis dato quovis anno Veterum indagandis tutius fuerit quantitatem anni mediam assumi inter illam Alphon- si 365. 5. 49. 16. & istam Tychonis 365. 5. 48. 45. quod in decimalibus factu facillimum est & expeditum: quandoquidem & Hipparchici anni quantitas justo major, ut suo loco probatum dabimus.*

§. XIII. *Annus lunaris* est, quem lunæ revolutiones metiuntur. Distingui solet in *communem* & *embolimæum*: Sed hic civilis usus est, & ea propter in locum suum reservandus. *Lunaris* autem communis dictus est *συνημερος* duodecim lunationum. De ejus quantitate sonat

nat traditio Judæorum, quam exhibet liber *Ebronot.*
fol. 2. r. קביעות ממנו חושבין שאנו שנת הלכנה **ⲙⲁⲛⲁ**
 'הוא י"ב חרשים וכו' *Illud nobis certum, annum lunarem, ex*
quo vices temporum figere solemus, 12. esse mensium. Resume
duodecies 29. d. 12. h. 793. hel. quæ conficiunt mensem, iis-
que in summam conflatis reperies spatium anni lunaris 354.
d. 8. h. 876. hel. Refice à calculo tuo 350. quos septenarius
dividendo absimit, relinquentur tibi 4- d. 8. h. 876. hel.
 פשוטה **ⲙⲁⲛⲁ** *quæ sunt residuum (Character*
Chronologis) anni communis, cui in שנה מעוברת anno
embolimæo adjicies 1. d. 12. h. 793. hel. (Characterem
Mensis) & invenies aggregatum 5. d. 21. h. 589. hel.
 מעוברת **ⲙⲁⲛⲁ** *qui est excessus*
13. mensium, qui conflant annum intercalarem. Excessus
iste in usum construendarum tabularum æquationis
seponitur. Anni igitur lunaris Judaici modus in se-
xagenis est 354. 8. 48. 40. Si ex præceptis Bullialdi su-
pra §. 3. Mensem Synodicum in duodenarium ducas,
erit anni lunaris quantitas 354. 8. 43. 37. 55. 29. 59. 51. 03.
Et epactæ ex anni Juliani supra lunarem excessu 10. 21.
11. 22. 04. 34. 00. 08. 57. Ex Judaico calculo 10. 21.
11, 20.

§. XIV. Annus ex revolutionibus sive solis, sive
 lunæ, æstimatus, *civilis* ille est, quo Gentes pro suo
 quæque instituto in negotiis civilibus & Ecclesiasti-
 cis expediendis utuntur, luminarium motu his ma-
 gis, minus illis, attente ad calculum revocato. Op-
 timus ergo est, qui ab Astronomico proxime abest.
Civiles solares usu præcipui sunt, alter quidem, tropico
 minor, *Ægyptius*: Alter, eodem major, *Julianus*;
 quorum *ⲉⲓⲙⲓⲁⲓⲁⲛ* aliquam instituti nostri ratio efflagi-
 tat. *Annus Ægyptius* duodecim menses tricenorum
 dierum colligit, addendis in fine Mesori, mensis no-
 vissimi,

vissimi, quinque diebus *ἐπαγομέναις* : unde annus integer dierum 365. sine ullo bisextili. Ad solarem igitur accedit, appendice horarum neglecta, *aquabilis* inde dictus. Quo ipso fit, ut quarto quoque anno vertente primus anni dies, *Thot* appellatus, uno die prævertat auspicia anni Juliani, isque dies totum annum retrogrado ordine pervagatus non nisi annis 1461. pristinam ad Epocham redeat. Exempli causa : anno præsentis *Æræ* Christ. 1688. initium ducat annus *Ægyptius* à Calendis Januariis : anno 1692. ordietur pridie Calendarum Januar. i. e. 31. Decembr. & sic deinceps, donec elapsis 1460. annis denuo à Calendis Jan. ineat. Hacce anni forma *Ægyptii* ad cladem usque Antonii & Cleopatrar, proinde ad annum ante Christum circiter 29. utebantur ; postea vero sub jugum Roman. missi victoris legem accipere jubebantur. Eodem anni genere celebratissima est Epocha Nabonassaris, quam à Chaldaeis traditam usu fecere suam *Ægyptii*. Datum vero annum *Ægyptium* *æræ* Nabon. ad annum periodi Jul. revocandi methodum brevem, vide apud *PETAV. Rat. Temp. Part. 2. lib. 1. cap. 12. can. 3.*

§. XV. Annus solaris *Julianus* vel *medius* & *aqualis*, vel *verus* & *inaqualis* est. Ille constat diebus $365\frac{1}{4}$ five sex horis : qualis usu communi receptus non est. *Verus* & *inaqualis* vel *communis* est 365. dierum ; Vel *bisextilis* 366. dierum : tales sunt omnes anni Christi quaternario dividui, juxta tritum illud :

*Tunc Bisextus erit, partes per quatuor æquas
Annos partiri cum poteris Domini.*

Horæ igitur 6. differuntur, dum collectæ diem conflent, qui quarto cuique anno accedens *bisextilis* vocatur, quia de isto ante VI. Calend. Martias inserto, *bis sexto Calend. Mart.* dixere, biduum pro uno die numeran-

merantes. Quo sensu CELSUS l. 98. *Cum bisextum ff. de verborum signif. Cum bisextum Calendis est, nihil refert, utrum priore an posteriore die quis natus sit : deinceps sextus Calendas ejus natalis dies est. Nam id biduum pro uno die habetur, JULIANUS cognominatur, quia C. Julius Cæsar annum hunc opera Sosigenis Mathematici in civilem modum & menses descripsit, inque usum Romani orbis communem transtulit, quo de nervosa, ut solet, brevitate FLORUS : Itaque non ingratis, inquit, civibus omnes unum in principem congesti honores ; circa templa imagines, in theatro distincta radiis corona, suggestus in curia, fastigium in domo, mensis in cælo ; ad hoc Pater ipse patriæ perpetuusque Dictator, &c. Lib. 4. cap. 2. Hac anni forma perinde atque perpetuo canone & accurata temporum norma utuntur Chronologi, nec immerito : Est enim (fatente ipso PETAVIO, acerrimo illo Gregorianæ factionis vindice,) illius descriptio cum ad usum expedita, tum rerum naturæ consentanea ; siquidem solis conversionem quam fieri potest proxime consequitur, & ad commendandam temporum memoriam est aptissima. Quo fit, ut Chronicorum & Annalium Scriptores eam anni formam adhibeant non iis modo rebus explicandis, quæ posteriores illius institutione sunt, sed antiquioribus etiam, & ab ipso adeo orbis initio : quamvis aliam anni formam, imo aliam apud alias nationes existerent. Ration. Temp. part. 2. lib. 1. cap. 1.*

§. XVI. Anni Jul. initium in mediam ferme hyemem incidit, eo quod solstitium hybernium, atque novilunium, quod neglectum fuisse verisimile non est, olim cum hic annus constitueretur, haud procul à Calendis Januar. capite anni nostri, abfuit : quod tamen postea anni quantitate justo majore assumpta aliquot diebus anticipavit. Qua ipsa etiam ex causa natus est annus *Juliano-Gregorianus*. Cujus ea est ratio ; quandoquidem Julianus Tropicum superat scrupulis horariis 11. ut adeo annis propemodum

dum 131. integro die tropici anni caput Julianum antevertat, factum inde, ut æquinoctium vernum, quod seculo Nicæno, hoc est, post annum Christi 300. intra diem 20. & 21. Martii contigerat, elapsis annis fere 1300. deprehenderetur incidere in dies Martii 10. & 11. isti enim cardines propter bisextilem ultro citroque quasi fluctuant & biduum occupant. Quare anno Christi 1582. *Gregorius XIII. P. R.* diebus 10. dispunctis, sicque pro numerando V. Octobris numerato die XV. æquinoctium ad pristinam sedem, nempe 21. Martii, cui decreto Concilii Nicæni affixum fuerat, retrahi, & ne retenta eadem etiamnum anni Jul. quantitate lapsu seculorum denuo sede sua moveretur, caveri iussit, proviso, ut singulis annorum centuriis vertentibus dies bisextilis unus intermitteretur, quarta duntaxat excepta centuria, quæ bisextilem pro more retinet, adeoque quadringentis annis non nisi tres bisextiles perimerentur, quandoquidem non intra centenos quosque, sed post 131. demum annos dies circiter unus accrescit anno Jul. quo tropicum excedit. Unde 393. annorum spatium triduum exoritur, quod facilitatis gratia per centurias dispensatur. Hac de causa qui stylo Gregoriano utuntur, 10. diebus nos * antecedunt, anno Epochæ Christianæ 1700. undecim, anno 1800. duodecim &c. diebus nos antecessuri.

§. XVII. Annus Civilis Lunaris vel *Solutus* est vel *Ligatus*. *Solutus*, qui & *simplex* dicitur, cum anno solari non implicatur, sed legibus cursus solaris solutus ex 12. mensibus Synodicis conflatur, qui in anno communi alternis pleni & cavi 354. in anno emboli-

* An. 1688. quo hæc scripta fuit Dissertatio, Protestantes adhuc Calendario *Juliano* usos, Novum vero, seu *Leopoldinum*, quod cum *Gregoriano* fere coincidit, ineunte præsentē Seculo plerosque recepisse, constat. J. J. H.

bolimæo accessione diei intercalaris 355. dies colligunt. Tali anno utuntur Arabes, Turcæ, & alii Orientales, ea intercalationis ratione. ALFRAGANUS anno Arabico 354. d. cum $\frac{1}{7}$ & $\frac{1}{6}$ diei tribuit, *Element. Chron. & Astron. cap. 1.* hoc est, ut Hebræus ejus Interpres habet 354. 8. 864. hel. Consequenter mensis Arabicus constabit 29. 12. 792. hel. sive 44. sexagenis primis, quæ annorum 30. spatio undecim dies conficiunt. Hinc *Turcis* aliisque usitata periodus 30. annorum, in qua undecim anni *ὑπερήμεροι* abundantes 355. reliqui novendecim communes 354. dierum sunt. Illos autem abundantes quia SCALIGER ejusque affectæ & alii, aliter atque Orientales ipsi, enumerant, juvabit hic audiri VLUGBEIGUM, qui duobus abhinc retro seculis & quod excurrit, Princeps Indiæ citra extraque Gangem floruit. Is, interprete *Joh. Gravio*, gentis suæ morem hac in parte sic explicat, *Dissert. de cognitione Epochæ Hegyræ cap. 1.* Initium hujus Epochæ (Hegyræ) est principium Moharram illius anni, in quo Propheta noster Mohammedes Mostafa, cui benedictio & pax sit, à Mecca ad Medinam migrabat: & illud secundum medium calculum est feria quinta, sed secundum phasim lune, dies Veneris. Nos autem feriam quintam accipimus. Mohammedani menses hujus Epochæ à phasi novilunii ad phasim sequentis novilunii numerant; atque hoc intervallum nunquam triginta dies excedet, neque minus erit novem & viginti: ita ut quatuor menses alternatim consequentes triginta dierum sint, & tres viginti novem, sine ullo utrinque excessu. E duodecim mensibus annum constituunt. Anni itaque & menses, secundum eorum usum, sunt lunares veri. Astronomis Moharram triginta est dierum, & Sephar undetriginta: & similiter mensium unus triginta dierum, & alius undetriginta, usque ad finem anni. Singulis autem annis tricenis mensem duhheggiah undecies conslituunt triginta dierum. Atque hoc fit anno 2. 5. 7. 10. 13. 15. 18. 21. 24. 26. & 29. Hi unde-

cim sunt embolimæi & vocibus ביהו ינהא ארוט comprehen-
duntur. Voces istas memoriales, cum desint chara-
cteres Arabici, numeris sic exprimimus, & substitu-
tis aliis à dextra versus sinistram procedendo expli-
camus:

9. 6. 4. 1. 8. 5. 3. 10. 7. 5. 2.
 id est, 29. 26. 24. 21. 18. 15. 13. 10. 7. 5. 2.

Alii ramen Orientales, monente eodem Authore, lo-
 co decimi quinti constituunt decimum sextum em-
 bolimæum, quod etiam Peravio, Ricciolio, aliisque
 sequi tutius & expeditius visum. Diviso igitur nume-
 ro alicujus anni Hegyræ per tricenarium si restet su-
 pra dictorum undecim aliquis, annum illum embo-
 limæum tuto pronunciare licet. Sunt autem menses
 Arab. seq.

| | | dies
expansi. | dies
collecti. |
|----|-----------------------------------|------------------|-------------------|
| 1 | Moharram | 30 | 30 |
| 2 | Sephar | 29 | 59 |
| 3 | Rabia prior | 30 | 89 |
| 4 | Rabia poster. | 29 | 118 |
| 5 | Gjumada prior | 30 | 148 |
| 6 | Gjumada post. | 29 | 177 |
| 7 | Ragiab | 30 | 207 |
| 8 | Schaban | 29 | 236 |
| 9 | Ramadam | 30 | 266 |
| 10 | Shavval | 29 | 295 |
| 11 | Dulkaada | 30 | 325 |
| 12 | Dulheggia | 29 | 354 |
| | Dulheggia
in anno
Embolimæo | 30 | 355 |

§. XVIII. Non intempestivum fuerit heic proponi methodum reducendi annos Hegyræ datos in Julianos, quam & vulgata illa per tabulas Chronolog. supputandi ratione expeditiorem, & illa populari, quam Celeb. *SPANHEMIUS* *Introduct.* ad *Chronol.* s. p. 89. commendat, accuratiorem, sed è dictis facile intelligendam, mecum olim communicavit Cl. *TANAQ. FABER* *fil.* Mathematicum cultor solertissimus, quem merito suo inter Amicos maximi facio. Præcepta methodi hæc sunt, quæ etiam in gratiam Studiosorum rei Chronolog. brevissime explico.

1. Anni Hegyræ completi ducantur in dies $354\frac{1}{3}$, seponendo tantisper producto, quod, si præter dies integros habuerit fractionem majorem, quam $\frac{1}{3}$, unitate augeatur. Ratio præcepti est obvia ex eo, quod supra de 44. sexagenis inter 30. annos ad 11. dies excrecentibus dictum. Quod dici semissem excedit, pro integro die venit.

2. Menses completi multiplicentur per 29. dies 12. hor. id est $29\frac{1}{2}$. producto iterum seponendo, quod, si præter dies integros occurrat $\frac{1}{2}$. neglecta fractione augeatur unitate.

3. Producta hæc in unam conjiciantur summam, adjectis diebus mensis labentis, si qui sint, & radice dierum 227016. ut habeas inventum tertium, nempe dies æræ Christi/Dionysianæ. Hoc præceptum ut intelligatur, notandum: Epocham Hegyræ incidere in annum Christi 621. Jul. 16. feriam 6. qui conficiunt dies 227016. multiplicatis 621. annis completis per $365\frac{1}{4}$. & additis diebus anni labentis 196.

4. Inventum hocce tertium, dividatur per 1461. quæ est quantitas 4. annorum Julian. scilicet trium communium & unius bisextilis. Quotus multiplicetur per 4. ut habeatur inventum quartum. Ratio præ-

cepti est, quia quartus quisque annus Julianus est bisextilis dierum 366. Proinde si inventum tertium divideretur per quantitatem unius tantum anni Jul. communis vel bisextilis, quotus iusto minor vel major foret, ut patet attendenti. Idem tamen quotus per 4 multiplicandus est, quia absque bisextili, inventum tertium per 365. quantitatem unius anni Jul. dividendum esset. Hisce peractis, ubi facta divisione restabunt dies plures quam 355. aut 730. aut denique 1095. deductis à residuo diebus 365. aut 730. aut 1095. inventum quartum augeatur unitate, vel ternario: Sicque prodibunt anni Æræ Christi vulgaris respondentes annis Hegyræ datis.

5. Ut denique etiam feria indagetur, invento tertio addantur dies 6. abjectis inde omnibus septenariis, relinquetur feria: quod si nihil restabit, feria erit septima. Ut exemplo aliquo regulas hasce illustremus, & successus judicem adhibeamus ipsum CALVISIUM, periculum methodi nostræ faciemus in exemplo, quod ipsemet suo more per tabulas expedit. Is igitur *Isagog. Chronol.* cap. XIII. hæc habet; *Leonclavius Vir Doctissimus refert, in Diplomate Imperatoris Turcici, quo continebatur prorogatio pacis cum Rodolpho II. Imperat. hæc verba addita fuisse:*

„ Datum die primo mensis Januar. anni Domini Jesu,
 „ supra quem sit grātia & auxilium divinum 1584. An-
 „ no transmigrationis magni Prophetæ nostri, supra quem
 „ sit gratia salusque divina, 991. die 27. Sacræ lunæ
 „ Dbilbitsche. Elapsi igitur sunt anni Arabici 990.
 „ menses 11. dies 27. proinde

Per præceptum primum ductis 990. annis in

354 $\frac{11}{30}$ dies, habebitur---primum inventum---350823.

Per præceptum secundum ductis 11. mensibus

in 29 $\frac{1}{2}$. dies, vel per tabulam mensium

Ara-

Arabicorum habetur --- *secundum inventum* --- 325.

Per *præceptum tertium* addantur simul hæc
duo inventa cum ---- *dieb. mensis labentis* ---- 27.
& *radice dierum* 227016.

Summa dabit ----- *tertium inventum* ----- 578191.

Per *præceptum quartum* Inventum hoc tertium
dividatur per 1461. erit *Quotus* ---- 395 + 1096. qui
per 4. multiplicatus, & diebus 1096. in tres annos
reductis, ternario auctus, dabit annos Jul. *Æræ*
Christi completos 1583. diem anni labentis 1.
Denique-----

Per *præceptum quintum* addantur Invento tertio dies
6. ut fiant 578197. quibus divisus per 7. relin-
quentur 4. pro feria. Quæsitum igitur erit, An-
nus Christi *Æræ* Dionys. 1584. 1. Januar. feria 4.
Idem factum per tabulas inventum videsis apud
Calvisium in loco cit.

Sic annus lunaris solutus, cum desultorius sit, caput
habens vagum, id affert incommodi, quod totum
Juliani anni contextum pervagatur ita quidem, ut ter-
nis quibusque annis mensis quilibet proxime antece-
dentis tempestatem subeat, & elapsis 16. circiter an-
nis, qui æstivi fuerant menses, fiant brumales, & vi-
ce versa.

§. XIX. Annus lunaris *ligatus* dicitur, qui ad leges
cursus solaris ita contemperatur, ut communi aliquo
veluti orbe, quem cyclum ac periodum vocant, in-
clusus cum solari anno in gratiam redeat. Ea con-
ciliandi ratio à multis antiquitus tentata varios pepe-
rit cyclos, velut *Dieteridis*, *Tetraeteridis*, *Oſtaeteridis*:
quasi biennio vel ejus duplo vel quadruplo, solis ac
lunæ rationes paria facerent. Successit *Enneadecaete-*
ris, novendecim annorum cyclus, Authore METO-
NE, Atheniensi Astron. qui omnium exactissimus

habitus ; quasi eo annorum numero vertente utriusque sideris ab eodem cœli puncto ad idem fieret reversio. Verum cum & hic cyclus vitium facereprehenderetur, ei remedium quæsit CALIPPUS, Cyzicenus Mathematicus, unde nata *Periodus Calippica* 76. annorum, sive cyclus 19. quater replicatus : Quo absoluto putavit nihil reliquum fieri de scrupulis lunæ cum rationibus solis &c. SCALIG, *Emend. Temp. lib. 2.* Sed & hic invenit, quod corrigeret, HIPPARCHUS, Rhodius Astron. De quibus, ubi de characteribus temporis. Anno autem lunari ligato utuntur Judæi sequioris ævi, admissio cyclo decemnovenali : Quo de instituto ex arte R. Samuelis Jarchinai prolixè differentem vide MUNSTERUM in *Calend. Hebr. Tract. de Invent. Neomen. & æquin. pag. 62. &c.* Summa huc redit ; Intra 19. annos septem faciunt intercalares, 13. quosque mensium, addendo לאדר *Mensi Adar*, ואדר *alterum Adar*, secundum præceptum R. Gamal. שלש שלש שנים שלש שלש שנים *tres, tres, duo : tres, tres, tres, duo.* hoc est, Intercalares tredecim mensium sunt *annus tertius*, & huic additis tribus *sextus*, & additis duobus *octavus* &c. quod significant vocibus ג'ז' אדר ז'ט' Id est, 3. 6. 8. 11. 14. 17. 19. Itaque, si 12. annos communes totidem mensium, & 7. embolimæos 13. mensium constituent, annum solarem & lunarem intra cyclum hunc decemnovenalem conciliari utcunque volunt : quod qua ἀκριβεία succedat, hinc brevi patescit. Septem menses, qui totidem annis communibus addi solent, supplere deberent defectum anni lunaris infra solarem, qui defectus calculo Judæorum est 10. 21. 204. hel. Atqui hoc non præstant exacte, ut ad oculum patet ducenti excessum anni solaris 10. 21. 204. in 19. ut fiant 206. 18. 636. hel. Item quantitatem mensis 29. 12. 793. in 7. quia septies fit integri mensis intercalatio, ut fiant 206. 17. 151. quæ summa à priori subtracta relinquit

linquit 1. 485. id est, unam horam & 485. helakim. Quapropter novilunia juxta hunc computum post annos Julianos XIX. recurrere quidem possunt eodem die, sed non eadem hora, verum sesquihorio præterproptet citius accident, quam ante XIX. annos, quæ προήγησις σεληνιακή dicitur. Hæc etiam causa fuit R. Addæ emendandi rationem temporum, ut supra significamus §. 12. Qua de re inter alia non nihil vide apud SCALIG. *Can. Isagog. lib. 3. Comment. in cap. 6. SELDEN. de anno civili Vet. Jud. cap. 17.* Specimen conciliationis juxta emendationem R. Addæ videtis apud EPISCOPIUM loco supra citato, quod hic exhiberi prolixitas vetat, neque vero ea prolixitate opus est, si velimus uti methodo mox adhibita, attendendo, quod excessus anni solatis supra lunarem juxta calculum R. Addæ sit 10. 21. 121. 12. qui ductus in 19. facit 206. 17. 151. quod ipsum etiam est productum quantitatis mensis synod. per. 7. Hinc adeo istam annos sol. & lun. exæquandi rationem tam exactam affirmare audent Judæi, ut in quo puncto cyclus iste decemnovennalis incipit, videlicet in principio lunæ Tisri, sol & luna absoluto cyclo in eodem signo & gradu usque & usque, cursum redorsuri, deprehendantur: quod quidem verum esset, si determinatio anni justa foret.

§. XX. Celebris apud Chronologos est quaestio de anno priscorum Hebræorum. Alii solarem fuisse, ex lunaribus quidem mensibus sed tricenariis & appendice 5. dierum conflatum, contendunt. Addit CHRISTMANNUS: *Hebræos à mundi conditu per annos 3449. usque ad Aeram Alexandri usos fuisse annis æquabilibus Ægyptiorum, id est, duodenis æquabilibus mensibus cum 5. appendicibus dierum: ut annus Hebraicus in 120. annis nullum embolimum menscm haberet. Comment. ad cap. 1. Alphrag. de Calend. Heb.* Alii Lunæsolarem ex Lunæ mensibus constantem, sed cum solari anno concilia-

tum five per epactas dierum 11. five per intercalares menses ex epactis duum triumve annorum consurgentes arbitrantur. Authores utriusque sententiæ oppido multos citatos videre est apud RICCIOLIUM *Chronolog. Ref. lib. 1. cap. 10.* CELSIUS Mathematicus Upsal. conjicit, *Hebræos post Exodum duplicem annum habuisse, Politicum solare, & Ecclesiasticum lunarem, at per embolimaos illi connexum; qui tandem post eversam Monarchiam Persicam, cum Pontifices Maximi omnem potestatem ad se raprent, illum absorbuit, ac solus remansit.* MEG ERL. *Comment. Chronol. in Tab. Mathem. Hist. cap. 5.* Sunt denique, qui annum Hebræorum priscorum unicum fuisse tantum, qui hodie est, nempe lunarem pertendunt, quos eo nomine vehementer vapulare videas SCALIGERO, *Emend. Temp. lib. 3. de anno prisc. Hebr.* Nobis, ut de nomine controversiam movere cuiquam volupe non est, ita certum videtur, non modo mensium lunarium, sed etiam anni solaris rationem fuisse habitam à Mosis tempore: Id quidem plus satis comprobant quæ §. 9. edisseruimus. Enimvero quando Deus mensem Abib primum in ordine mensium anni, veluti natalem Israel, quo in libertatem fuit assertus, haberi iussit, *Exod. 12: 2.* sancitis etiam neomeniarum sacris, anni rationem, quippe notam vulgo supponens, non edocuit, quam tamen vel ante Mosén certo compertam, vel post Mosén definitam oportebat, siquidem annum vellet haberi lunarem. Neque etiam ἔτυμον nominis שנה quod *annum*, quasi temporis renovationem vel iterationem, significat, in annum lunarem competit. Cui verius quam anno solari congruit dici בעת חיה *secundum tempus vivum*, id est, redivivum, quod sol cursus sui periodo absoluta redorditur? *Gen. 18: 10. 14.* Recte ABEN ESRA & R. SAL. בעת הזאת בשנה אחת או לשנה הבאה *simili tempore anni sequentis.* Numquid vero solam lunam in statuta tempora & annos conditam

ditam credidere Moses & Patres ? Gen. 1 : 14. Quærenti vero, quænam igitur forma fuerit anni præscorum Hebræorum inde à Mosis tempore ? Resp. Procul libidine altercandi de vocabulis, consequenter ad ea quæ de mensibus Hebræorum docemus, sic nobis statuendum videtur, quod annus iste neque solaris tantum, neque lunaris solutus, neque lunasolaris computi regulis adstrictus, sed talis fuerit, qualem Synedrio vel iis qui è coetu ejusdem delegata potestate temporis definiendi negotio præfuere, disponere atque edicere visum fuit, postquam causas faciendæ aut omittendæ intercalationis, qualis esse poterant serotina frugum, agnorum, hœdorumque maturitas, itinerum incommoda è pontibus diffractis, aquarum exundatione &c. circumspicte considerassent. Hactenus igitur annus solaris & mensis lunaris usu ita temperari solebant, ut de qualitate anni civilis, communisne an intercalaris futurus esset, ante Synedrii decretum nemini constaret. Atque hic mos figendi tempora ex Synedrii arbitrio, non nisi cum Autoritate ejusdem, in terra sancta expiravit. Quo casu prævisò Hillel Synedrii Princeps cyclum decem-novennalem ex doctrina Astron. & Chronologica R. Sam. Jarchinæi & R. Addæ condidit. Testimonia Rabbiorum huicce traditioni fidem firmanitia vide apud *SELDENUM* de anno civ. Vet. Jud. cap. 17.



* * * * *

III.

SAMUELIS KOENIGII,

Prof. Bern. Extraord.

DEFENSIO FIDEI NICÆNÆ

De vera & æterna Filii Dei Deitate,

Ex PROV. 8: 22- 31.

Cum adjectis quibusdam OBSERVATIONIBUS *ad loca quedam alia* LIBRI PROVERBIORUM SALOMONIS.*Argumentum.*

- §. I. Symboli Nicæni verba de hac materia laudantur. §. II. Conditum id fuit contra Arrianos, quibus locus Prov. 8: 22. ὁ Κύριος ἔκτισέ με, ad speciem favebat. §. III. παρ acquisivit generando. §. IV. Alibi tamen, acquisivit creando. §. V. Syrus & Arabs à textu Græco seducti. §. VI. παρ Amon tam nutritium, quam opificem notat. §. VII. Christus μονογενής dicitur, non πρωτογενής. §. VIII. Christus ceu æterna Sapientia cum patribus amice collusit. §. IX. Est is sapientia nostra. §. X. Meletemata de hac sapientia amanda, in sinu fovenda. §. XI. Sequuntur *Observationes miscellaneæ* ex sequentibus Proverbiorum

rum Caputibus. Cap. 9: 12. Assumentum, quod LXX. Syr. & Ar. habent, in Textu Hebræo & Chaldæo non extat, adeoque merito suspectum; idem de v. 13. §. XII. Cap. 10: 3. *חַוָּה* *havva*, opes, it. improbitas. v. 8. *לִבַּט* quid notet Syris, Arabibus & Æthiopibus. v. 9. *יָרַע* ex Ar. *יָרַע* reliquit, sivit, missum fecit. v. 31. Hebr. *יָרַע* i. q. Chald. & Syr. *יָרַע* germinavit. §. XII. Cap. 11: 2. quid sit *צְנוּעִים* sc. humiles, verecundi, modesti. v. 31. *אֶף כִּי* quanto magis, & quanto minus. §. XIV. Cap. 12: 19. *וְעָר* veteres versiones omnes reddunt qf. *וְעָר* *testis*. ad v. 25. & 27. notula. §. XV. ut & ad Cap. 13: 18. & 25. §. XVI. Cap. 17: 27. *וְקָר* in Textu præferendum *וְקָר* Masorethico. §. XVII. Cap. 18: 1. quid sit *נִפְרָד* & *הַתְּנִלָּה* v. 11. *מַשְׁכִּית* *imaginatio*. §. XVIII. Cap. 19: 22. *חֶסֶד* *gratia Dei*. §. XIX. Cap. 20: 30. quid *חֶסֶד* & *חֶסֶד* ex *Jes. 55: 5*. §. XX. Cap. 21: 7. *יָגֹר* raptabit, abripiet eos. ex Ar. *יָגֹר*. §. XXI. Cap. 22: 22, 23. *קָבַע* Hebræis diripuit, despoliavit, sed Chald. & Syr. fixit, cruci affixit, utraque notio laudatur. v. 27. *קָבַע* i. q. *קָבַע* sponpondit data dextra. §. XXII. Cap. 24: 6. *חֲבָלֹת* consilia politica, rectoria.

§. I.

Patres Concilii Nicæni primi, celebrati A. C. 324. & 325. sic suam de **ÆTERNO DEI FILIO** mentem fidemque expresserunt:

Credimus in unum Deum, Patrem omnipotentem, factorem cæli & terræ, omniumque quæ videntur & quæ non videntur.

Et

Et in unum Dominum Jesum Christum, unigenitum Dei Filium, qui ex Patre natus est ante omnia secula. Lumen de Lumine, Deum verum de Deo vero, genitum non factum, & consubstantialem Patri, per quem facta sunt omnia, &c.

§. II.

Eximio huic fidei Symbolo condendo ansam præbuisse **ARRIUM** ejusque affectas, ex scriptis Athanasii & Socratis notius est, quam ut dici debeat. Nimirum Arrianis Jesus Christus erat prima & excellentissima Dei creatura, facta ante cæteras res creatas, & per quam cætera facta sunt. Arrianis, quoad speciem saltem, præsidio fuit locus **PROV. 8: 22.** uti scil. **LXX.** eum reddiderunt: *Κύριος ἐκτίσέ με ἀρχὴν ὁδῶν αὐτοῦ*, Multum negotii faceſſebat hic locus patribus Græcis, veritatem Hebraicam ignorantibus. Quare exercitii, fideique nostræ confirmandæ gratia, penſitemus hunc locum coram Deo, implorato prius ejus auxilio.

§. III. Sic vero habet Textus Hebræus: **יהוה קנה קנני ראשית דרכו קדם מפעליו מאז** : *probe tenendus est.* Audi **BUXTORFIUM** in *Lex. Hebr.* **קנה** *Comparavit, emit, acquisivit, acquisitum possedit.* **SANTES PAGNINUS**: **קנה** *acquirere, possidere, emere.* Omnium vero optime **AVENARIUS** in *Lex. Hebr.* **קנה** *acquisivit generando, emendo, educando, vel quacunque alia ratione fieri potest.* Hinc *γεννάω* gigno; *γονεύς, γεννητής* genitor, *it.* Latinum genero, gigno &c. cujus quamplurima afferunt hi Autores loca, saltem confirmantia significationem emendi & acquirendi, sed & notare acquirere quid generando, ex uno & altero scripturæ sacræ loco manifestum est. Ex gr. Eva Cainum gignens dicit: **קנתי איש את יהוה** **LXX.** *ἐκτησάμην ἄνδρα πρῶτον διὰ τὸ θεῶν.* Vulg. *Possedi hominem per Deum.* Onkelos Chaldæus: **קנתי וגברא מן** **קדם** h. e. *acquisivi virum à Domino.* Recte hætenus quoad significationem verbi **קנה**. Cætera vero minus bene

bene se habent. Optime vero totum versum reddunt Theologi Wirtenbergenses, ex LUCA OSIANDRO, & cum eo: *Acquisivi virum Dominum*. Acquisivi vero gignendo vel pariendo? Sed & illustris locus est Deut. 32: 6. הלא הוא אביך קנך *Nonne ipse est Pater tuus, qui te acquisivit sibi generando?* Confirmatur hæc interpretatio ex versu 18. *Obliviscerisne rupis quæ te ילד genuit, & in oblivionem das Deum genitorem tuum, מחללך.* Atque sic, procul omni dubio, capiendum est verbum קנך in loco proverbiorum, quem præ manibus habemus.

§. IV.

Dicet forte Arrianismi hyperaspistes, verbum קנך etiam notare posse, *acquisivit, creando*. Sic Deus O. M. vocatur קנך שמים וארץ Gen. 14: 19. LXX. ὃς ἐκτίσας τὸν ἄρανὸν καὶ τὴν γῆν. Resp. Esto, nec abnuo. Sed de creatione cœli & terræ nunquam usurpatur vox *generandi* vel *pariendi*, nisi forte improprie. Nec cœlum & terra dicitur filius Dei, ex Deo conceptus & genitus, id quod in hoc loco de sapientia, ὑποστατικῶς accepta, dicitur. Neque enim hic de attributo sapientiæ divinæ sermo est, sed procul dubio de ipso Filio, qui in N. T. & σοφία & λόγος Θεῷ appellatur. Matth. 11: 19. Joh. 1: 1. Huic, inquam, soli conveniunt prædicata, hoc loco occurrentia: *A seculo un-
cta sum. Ante colles genita sum. Fui apud Deum nutri-
cius, &c.*

§. V.

Atque hinc infero, textum Græcum τῶν ο' hic loci merito censuram incurrere, & obelo configendam esse. Ea est, quæ & SYRUM interpretem seduxit, qui habet: מריא ברני *Dominus creavit, vel, con-*
didit me. Ut & ARABEM, qui habet: اَلرَّبُّ خَلَقَنِي *eodem sensu cum Syro.* Rectius AQUILA, cu-
jus fragmenta DRUSIUS collegit: ὁ κύριος ἐκτίσας
με,

με, Dominus possedit, vel habuit me. Videtur tamen, tam Syrum quam Arabem, hanc suam cespitationem quasi reparare velle, utendo de hac Sapientia terminis ἐνεργεσάτοισι. Ex. gr. Syrus illud חוללתי v. 24. reddit אתילדת *genita snm.* Versu vero 25. idem חוללתי reddit per אתבטנת *concepta snm.* חולל enim est *parturit, peperit.* Jes. 51 : 2. Job. 39 : 1. porro v. 29. & initio v. 30. Cum statuit fundamenta terræ, עמה מתקנא הוית *cum eo composatrix, dispositrix, eram.* Arabs vero כנת ענרה באמת *eram apud ipsum dispositrix, vel ordinatrix.*

§. VI.

Sic scilicet illi reddunt Hebræum: ואהיה אצלו אמן *vox enim אמן reddi potest per nutricium, qui in sinu fovetur, educatur, ab אמן enutrivit. Part. אמן enutriens. Est. 2 : 7. Num. 11 : 12. אמנת nutrix. Ruth. 4 : 16. Alludit huc sanctus Johannes, Evang. 1 : 18. ὁ μονογενὴς υἱός, ὁ ὢν εἰς τὸν κόλπον τοῦ πατρὸς. Unigenitus Filius, qui est in sinu Patris. Pater enim Filium ex se genitum in sinu fert, tenerrimoque complectitur amore, ceu ἐπικόλπιδιον βρέφος. Hinc & addit : eramque deliciæ ejus omni die. v. 30. Neque tamen absonum est dicere, אמן idem significare quod אמן Artifex, artis nutricius, vel arti innutritus, adeoque artifex excellens. Cant. 7 : 1. Hoc certe sensu Syrus & Arabs vocem hanc cepisse videntur. Ergo Jesus Christus est ille Dei filius ante secula genitus, non factus, ולידא ולא עבדא uti habet versio Syriaca Symboli Nicæni, & per quem omnia facta sunt, quod Patres Nicæni addunt ex Joh. 1 : 3. Col. 1 : 16. Hebr. 1 : 2.*

§. VII.

Emphasis vocis Gr. Μονογενὴς idem confirmat. Si enim Filius Dei esset *prima creatura*, per quam cæteræ factæ essent, non posset dici μονογενὴς, sed πρωτογενὴς. Denique absurdum & blasphemum est, creaturam cætera

cætera creasse, & creaturam esse Autorem & opificem nostrum, & in negotio gratiæ Servatorem nostrum, cui fidem, laudes & obsequium debemus. Hoc enim verus Deus sibi soli vindicat. Jes. 45 : 22-25. Dicamus ergo confidenter cum Patribus Nicænis, esse J. C. *Lumen de Lumine, verum Deum de Deo vero* &c. Abeant ergo Arriani & Sociniani, Christum non-Deum colentes, atque sic crimen *κλισματολογίας* manifeste incurrentes, contra Rom. 1 : 25.

S. VIII.

Quod denique SAPIENTIA addit : *Ludebam coram eo omni tempore, ludebam in orbe terra ejus* &c. Respicit ad amicas visitationes atque apparitiones, Patribus tam ante, quam post diluvium factas. Cujus manifestissima sunt in narratione Mosaica vestigia. Ex gr. Gen. 22 : 11. Angelus Jehovæ allocutus dicitur Abrahamum Filium jugulare volentem & v. 15. additur : *Inclamavitque Angelus Jehovæ Abrahamum secunda vice calitus : per me juravi, inquit Jehova, &c.* Quis est ille ANGELUS JEHOVÆ, cum Abrahamo tam familiariter agens, & per se ipsum jurans, seque ipsum *Jehova* appellans ? procul dubio est verus Deus de Deo vero, missusque à vero ceu ejus nuntius. In historia Jacobi Gen. 31. & 32. indicia hujus veritatis haud minus manifesta apparent. Sacris vero vatibus haud insolitum est introducere Jehovam loquentem, sed missum à Jehova. Jes. 48 : 16. Zach. 2 : 12-15. Hæc non agnoscere, est in luce meridiana cæcutire velle. Malimus ergo ex cap nostro agnoscere hypostaticam Patris Sapientiam, ex Patre genitam, adeoque ei homousion, cum antiquis illis patribus tam amice colluisse. Ejus enim *ὄψωψ* sive *deliciae* & *delectationes sunt cum filiis hominum.* Quæ ejus tenerrima *φιλανθρωπία* eum tandem permovit, ut frater noster fieret, humana indutus carne. Unde recte S. Johan-

nes: καὶ ὁ λόγος σὰρξ ἐγενέτο, καὶ ἐσκήνωσεν ἐν ἡμῖν, &c.
Joh. 1: 14.

§. IX.

Hic ergo J. C. non solum est æterna Patris *sapientia*, per quam & in qua omnia condidit, sed & *nostra sapientia*. 1. Cor. 1: 30. Non solum Jehova justus in se, sed *Jehova justitia nostra*. Jer. 23: 6. &c. Atque hactenus omnes, qui ὁρῶντες de Christo Jesu δόξας tuentur, consentientes habemus, innumerabilibus Novi Testamenti testimonijs idem confirmantibus.

§. X.

Sed quæso te, Lector Christiane! Num & tu Jesum Christum possides, ceu *Sapientiam tuam*? Scias enim velim, quod Pater, qui hancce sapientiam ante opera, quin ante molimina, h. e. decreta sua, possedit atque in sinu fovit, nobis jam eam possidendam dedit. Sic enim Deus dilexit mundum, ut Filium suum unigenitum daret. Joh. 3: 16. *Filius datus est nobis*. Jes. 9: 6. Estne Christus doctor & ductor tuus unicus? Juxta Matth. 23: 8. *Unus est vester doctor & ductor Christus*. Agnoscimusne colimusque Jesum Christum, ceu veram & unicam sapientiam? Num sapientia hujus seculi vilescit in oculis nostris? Quare δοκιμαζεται ὁ ἄνθρωπος ἑαυτόν. 1. Cor. 11: 28. Verbis forte tueris æternam Christi deitatem, quin pro ea, tanquam pro aris & focus pugnas. Sed num amas eum reapse? Visne ejus esse πατήρ nutricius, uti ipse est nutricius Patris? Quid respondet ipsa tua conscientia excussa? Quid testantur opera tua? Christus est humilis corde, tu forte superbus. Christus spernit gloriam hujus seculi. Tu forte Mancipium es vanæ gloriolæ. Christus thesauros hujus mundi spernit, quin regnum aspernatur. At forte tu Evangelium prædicas nonnisi lucelli gratia. Christus est Sanctus Dei, tu forte ne laborulam quidem repugnando cordi impendisti.

Clamas

Clamas pleno guttore, Jesum Christum esse æternum Dei λόγον, & sapientiam hypostaticam, per quam omnia condita sint. Sed quælo te, num ea Patris sapientia aliquid etiam *in te* effecit? Sensistine unquam omnipotentem ejus gratiam, quæ novos cœlos, novamque terram in Fidelium pectoribus condit, h. e. animum cœlestia sapientem, vitamque bonis operibus uberem? Forte quod ore de Christo testaris, opera tua destruunt, & propter te nomen Christi blasphematur.

Contendis, jactasque, Jesum Christum esse æternum Dei Filium, Filium dilectum, quo Pater acquiescit atque delectatur unice. Sed num & tu eo delectaris? Num in amplexum ejus ruis? Forte sinus peccatoris tui excussus testabitur, te amoris mundi miserum esse mancipium, illecebris carnis & concupiscentiarum cœu totidem laqueis irretitum & constriatum. Si Christo deliciaris, etiam in cruce Christi deliciaberis. Tu vero forte eam cœu pestem fugisti hactenus. Jactas auctoritatem Christi, sed præcepta ejus servare, pudet te pigetque.

Verbosus es in Mysterio SS. Triadis asserendo, & contra adversarios vindicando. Sed annon tuus intus oggannit animus, nolle te Christum imperitare tibi? Tantum abest, ut quæras cum ipso uniri, ut ipse unum est cum Patre; ut jugum ejus audacter excutias. Clamas, Christum esse sapientiam Patris ante omnia secula *unctam*. Ejus vero unctionem tu nunquam perensisti. Multa blateras de spiritu Christi, tu vero secundum carnem vivens, Christo es opprobrio, & auditoribus offendiculo. Asseveras, Christum vivere per & propter Patrem. Sed num & tu vivis per & propter Christum? Estne is vita tua? &c.

De hisce vellem, ut unusquisque excuteret se ipsum. Certum enim est, facile esse, orthodoxiam de-

fendere, dum foetidissimis Diaboli stercorebus animum, cheu! oppletum gerimus.

Faxit igitur divina bonitas, ut, sicuti Christus est *via, veritas & vita*, sic & nos huic viæ insistamus, hanc veritatem & vitam in intimo nostrum residentem teneamus & sancta conversatione exprimamus. Hæc enim optima est Deitatem Christi tuendi ratio, opere scil. ipso demonstrare, nos per ipsum *divina participes factos esse naturæ*. 2. Petr. 1 : 4. Hoc ideo moneo, quia admodum vereor, ne Arrianismus & Socinianismus ex orco revocatus, denuo Ecclesiam inundet.

§. XI.

Hiscæ præmissis subnectamus *Observationes miscellaneas* ad Capita sequentia.

Ad Cap. 9. PROV.

v. 12. *Si sapiens fueris, tibi sapiēs. At si illusor fueris, tu solus id feres.*

Hunc versum LXX. SYR. & AR. periphrasi illustrent, & auctario adaugent. scil. *Fili mi, si sapiens es, animæ tuæ sapiens es, & amicis tuis: sin autem fueris malus, tu solus hauries ipsa tua mala. Qui incedit, (confidens est) in mendaciis, pascit ventos, & abigit (persequitur) volucres cæli, deseruit enim viam vineæ suæ, & oblitus est (aberravit) semitæ ministerii sui, ut currat per desertum iniquosum, & ab ea via, quæ trita est, vagatur per locum sitibundum; Et is quidem colliget nihil.* Assumentum hoc in Textu Hebræo fuisse, minime crediderim; ad marginem forte codicis sui non nemo hæc scripserat, unde in versionem τῶν LXX. irrepsere, quæque SYRUS & ARABS inde hausserunt. Idem & alibi factum. Nihil ergo hoc præjudicat integritati textus Hebræi, quem CHALDÆUS citra hoc assumentum expressit.

V. 13. *Mulier stultitia, tumultuaria, stoliditatis, & non novit quicquam. LXX. Mulier insipiens & audax, indiga buccellæ fit, & non novit pudorem. ARABS sequitur* τὸ ο. *redditque: Mulier stulta, procax, incidet in penuriam opum, & non novit pudorem. SYRUS brevius: Mulier expers mentis (judicii,) adulatrix. Illud פתית, quod stoliditatem vel simplicitatem notat, per adulatrix expressit משרלניא שרל enim Syris est blandiri, adulari. Hebr. פתה vero notat pellicere, decipere, blandiendo persuadere. Quod Syrus frequenter per שרל reddit. Vide Jud. 14: 15. Hof. 2: 14. al. 16. &c. VULG. Mulier stulta & clamosa, plenaque illecebris, Sed CHALDÆUS iterum Textum Hebræum pressius sequitur, redditque: Mulier stulta & vaga, insipiens, & nescit bonum.*

V. 18. *Et non novit, quod manes (defuncti) ibi, in profundis sepulchri invitati ejus. Hic LXX. SYR. & AR. iterum cum affumento comparent, sed quod CHALDÆUS, fidus Textus Hebræi pedissequus, ignorat. Unde in Textu Hebræo non fuisse, persuasum habeo, sed ex margine in Textum Græcum irrepsisse, indeque ad Syrum & Arabem manasse. Sed & VULG. cum auctario, breviori tamen, comparet: Qui enim applicabitur illi, descendet ad inferos; nam qui abscesserit ab ea, salvabitur.*

§. XII.

Cap. 10.

V. 3. *(והות רשעים יחדו) LXX. ζωνὴ δὲ αἰσθητῶν αὐτῶν. Quod & ARABS sequitur. Sed CHALD. & SYR. Opes impiorum subvertet. Sic illis הוה est קניא opes, possessio. Sed alibi הוה arumna pravitas. Ut c. 11: 6. ילכדו & in pravitate perfidi capientur. Chald. וברשעיה & in improbitate sua cadet impius. Syr. ובעולה & in iniquitate sua corrui iniquus. Hinc, jux-*

ta BUXTORFIUM post ABENESRAM & JARCHIUM, הוחת *prava moliri*. Ps. 62 : 4. quod alii ex Arabico הָת derivant, *promta volubiliq̃ue lingua fuit in aliquem*.

v. 8. וְאִיל שְׁפָתַי יִלְכֹּט LXX. ὁ δὲ ἄσπερος χεῖλεσι σκολιᾶζων ὑποσκελισθήσεται. Sic ipsis יִלְכֹּט est *supplantabitur*. SYRUS : Cujus stulta sunt labia מִתְחַח *capitur*, decipitur. Sic & CHALD. מִתְחַח eod. sensu. Rad. לִכַּט Syris *concitavit bellum*. Hinc Sirac. 26 : 32. קִרְנָא מִלִּכְבִּיטִיָּא cornu concitans bellum, excitatrix belli, vel, ad bellum. ARAB. לִכַּט *prostravit in terram*. Sed ÆTHIOP. *impegit, cespitavit*. Omnes hæ significationes locum hic habere queunt, ut יִלְכֹּט sit, *impliabitur bello concitato, prosternetur, cæspitabit, &c.* Sed AQUILA, δαρήσεται, SYM. βασανισθήσεται, TH. Φυγήσεται, *foedabitur*. DRUS.

v. 9. *Ambulans in integritate, h. e. integer vitæ scelerisque purus. Ambulabit securus, vel confidenter. h. e. non eget Mauri jaculis, nec arcu, nec venenatis graviora sagittis, Fusce, pharetra.* HORAT. item, *Conscia mens recti famæ mendacia ridet.* Idem. nam *arx fortis est integro, via Domini.* in hoc capite versu 29. *Sed qui pervertit vias suas, וְיָדָע innotescet.* Sic PHÆDRUS l. 1. fab. 10. *Quicumque turpi fraude semel innotuit, etiamsi verum dicit, amittit fidem.* Sed quid si ad Arabismum recurramus? ARAB. וְיָדָע *reliquit, sivit, missum fecit*. Part. וְיָדָע *relinquens, missum faciens*. Hoc sensu וְיָדָע ex Niphal, significabit, *relinquetur, deferetur*. Sic certe capitur c. 14 : 33. *In corde prudentis requiescet sapientia, sed in intimo stultorum deferetur.* Observavit hoc ante me LUD. de DIEU. Interpretes tamen LXX. CHALD. SYR. AR. VULG. *cognoscetur, deprehendetur, qualitas ejus, &c.*

§. XIII.

Cap. II.

Uu4

Chri-

Christus ac te : אָנָה דְּכַנֵּךְ quod humilis sm. Matth. 11 : 29. ARABS itidem : מְתוּאָצֵּעִים humiles. Chaldæis & Rabbinis צָנִיץ vel צָנוּץ humilis, verecundus, modestus. צְנִיעוּת humilitas, verecundia. opp. זָרוּן superbia. Discamus illam à Christo, & dediscamus hanc.

v. 31. : הֵן צָדִיק בָּאָרֶץ יִשְׁלַח אֶת יָדָיו וְיִשְׁעוֹ וְיִחַסּוּ אֵת הַיָּשָׁרִים Hunc versum sic reddo : *Ecce justo rependitur in terra, sc. afflictio & castigatio, quanto magis improbo & peccatori? sc. retribuetur afflictio.* Nota, כִּי אֵם præcedente sententia affirmante significat *quanto magis*, ut h. l. & c. 15 : 11. & c. 19 : 7. Sed præcedente sententia negante, *quanto minus.* Vide exemplum 1. Reg. 8 : 27. *Cæli & cæli calorum te non capiunt, כִּי אֵם quanto minus ades hæc quam extruxi?* conf. Prov. 17 : 7. & c. 19 : 10. LXX. (quos SYRUS, ARABS, & VULG. sequuntur) magis ad sensum quam verba respicientes, reddunt : *ἔτι ὁ μὲν δίκαιος μολὶς σώζεται, ὁ ἀσεβὴς καὶ ἀμαρτωλὸς πᾶς φανεύται* ; Mutuatus est hæc S. Petrus, 1. Petr. 4 : 18. conf. 2. Theff. 1 : 6, 7.

§. XIV.

Cap. 12.

v. 19. (וְעַד-אֲרִגְיָעָא) Verba hæc subobscura sunt. *וְ* in וַיּ quia pathach habet, significat, & *usque donec.* Sed sic nullum video sensum. CHALDÆUS illud וַיּ reddit per סְהַרָא testis, & עַד אֲרִגְיָעָא reddit : סְהַרָא testis festinus, præceptus, ut & LXX. μάχης ταχύς. SYRUS, ut Chaldæus : סְהַרָא מְסַרְחָא testis præceptus, temerarius. ARABS : أَلْعَنِي أَلْعَنِي eod. sensu. VULG testis repentinus. Consensus antiquissimarum versionum, ipsiusque Chaldæi, pondus mihi videtur habere. Alioqui nostri : *Labium veritatis firmum erit in perpetuum ; sed lingua mendacii, nonnisi ad momentum, vel, donec momentum quievero.* Seligas, Lector, quod maxime arriserit.

v. 25. Ad hunc versum vide notas LUD. de DIEU. ut & ad v. 27. quem tamen ego malim sic interpretari : *Non affabit manus remissa feram suam, & quod substantiam* (h. e. opes & facultates) *hominis spectat, pretiosa est facultas hominis industrii.* Repetendo scil. voces הון-אדם.

§. XV.

Cap. 13.

v. 18. (ריש וקלון פורע מוסר) *VULG. Egestas & ignominia ei qui deserit disciplinam. CHALD. Pauper & qui ignominiosus est, deserit disciplinam. SYR. Paupertas & ignominia cessare faciunt disciplinam.* conf. c. 15: 32. Sed LXX. quos & ARABS sequitur, in alium vertunt sensum, scil. *πενίαν καὶ ἀτιμίαν ἀφαιρείται παιδεία. Paupertatem & ignominiam aufert disciplina.* Uterque sensus satis bonus est. Eligat Lector, quod maxime placuerit.

v. 27. LXX. hunc versum cum auctario vel assumento exhibent, scil. *Eleemosynis & fide purgantur peccata, timore autem Domini declinat omnis à malo.* Eos sequuntur VULG. & AR. sed CHALD. & SYR. hæc non agnoscunt, uti nec quæ ad v. 28. addunt.

§. XVI.

Cap. 17.

v. 27. *Cohibens verba sua, pollet scientia :* וקר רוח איש : (חבונות) *MASORETHÆ hic pro וקר legi volunt pretiosus.* Sed versiones pleræque retinuerunt & legere וקר רוח & *frigidus spiritu.* Germ. Kaltsinnig. oppos. ad animum æstuantem, æstum animi verbis effundentem. Sic. LXX. μακροθύμος ἀνὴρ. CHALD. ודננרא רוחה & *qui humilis est spiritu.* SYR. אלרגל אלמתמהל & *qui longanimis est.* ARABS. cod. sensu. VULGATUS tamen : & *pretiosi spiritus vir.* Utraque lectio proba esse queat.

§. XVII.

Cap. 18.

v. 1. *Desiderium* (sc. suum) *querit separatus*, & *omni rei* (vel causæ) *se immiscet*. Per *separatum* intelligo, qui amicos & fratres deserit, sibi soli placens, sectæ vel politicæ vel Ecclesiasticæ autor esse volens, ἀποδιστρίζων ἑαυτὸν. Jud. v. 19. Qui talis est, ψυχικός est, ibid. spirituque sapientiæ destitutus. Is igitur 1. desertis regulis sapientiæ, & posthabito Dei verbo, querit לְתַאֲוָה *ad desiderium*, i. e. quocunque suo desiderio rapitur. 2. Rebus ad se non pertinentibus temere se immiscet. ARABS secutus LXX. pro more: *Vir cupiens se separare ab amicis querit occasiones*, & *in omni tempore erit vituperabilis*. CHALD. *Desiderium querit* מְהִיָּה *Vagus*, & *in omni consilio* מְצַרְהָא *desolatur*. Huc accedit & VULG. qui reddit: *Occasiones querit*, qui *vult recedere ab amico: omni tempore erit exprobrabilis*. Iis igitur נִפְרָד est, qui vult recedere ab amico, vel deserere amicos, fratres, oves Christi, &c. Chaldaeo is dicitur מְהִיָּה *Vagus*, instabilis, ventis huc illuc agitatus. De quo videri poterit Lexicon meum Syriacum, ubi Deo favente lucem adspexerit. Verbum vero התגלע Rabbini exponunt per התערב *immisceri*, *immiscere se*. Sic & capitur manifeste c. 20: 3. *Gloria est viro, cessare (abstinere) à lite, sed omnis stultus implicabitur*. LXX. συμπλέκεσθαι. Sed LXX, VULG, & AR. hic per *exprobrabilem*, *vituperabilem*, ἐπὶ νεκροῖς εἶναι esse. CHALDÆUS vero per מְצַרְהָא *desolatur*. scil. implicando se negotiis alienis confunditur. Sic Chaldaum accepisse puto. Observavi, verbum hoc התגלע non occurrere, nisi cum רִיב & תושיה *lis, causa*. Vide Prov. 17: 14. c. 18: 1. c. 20: 3. Chald. מְלִכְנָא *consilium*. Ergo notio *implicandi* & *immiscendi se*, non male quadrat. Audiamus de hac voce AVENARIUM in Lexico: גלע *involuit se aliis negotiis*, *immiscuit se alie-*

nis rebus & curis. Cognationem habet cum גלל volvit, & קלע circumrotavit, ut si quis circumrotando tandem se ingerit. Contrarium est verbo געל averfatus est, abhorruit à quopiam. Hæc Avenarii observatio credibile mihi facit, interpretes eos, qui illud התגלע per ἐπὸς τοῦ εἰ-
ναι, vituperabilem, desolatum, &c. reddunt, id revera reddidisse qf. התגלע.

v. 11. Abundantia divitis urbs fortitudinis ejus, & sicut murus elevatus במשכתו) posterius membrum sic reddunt interpretes. VULG. & quasi murus validus circumdans eum. LXX. ἡ δὲ δόξα αὐτῆς μέγα ἐπισυναΐζει. CHALD. & quasi murus elevabitur habitaculum ejus. SYR. & intra murum fortissimum habitaculum ejus. AR. & magnificentia earum (sc. divitiarum) glorificat illum summopere. Hæc omnia non attingunt emphasin vocis משכית במשכתו est imago, effigies, sive extus in pariete depicta, sive intus in cerebro & animo efformata. Verti igitur queat imaginatio. Sic משכית לבב sunt imaginationes cordis. Ps. 73 : 7. Recte ergo PISCATOR: Und wie eine hohe Mauer in seinen Gedanken; oder, in seiner Einbildung; uti BELGÆ habent. q. d. Salomon: Equidem abundantia divitis urbs munita, & murus elevatus & inexpugnabilis ipsi videtur esse, in stolidi suæ imaginatione. Unde felicitate sua superbit & gloriatur. Sed לפני שבר ינבה לב איש, ante fracturam & ruinam animus hominis superbire incipit. v. 12. Superbiam pressio pede insequitur ruina & calamitas, c. 16: 18. ut discat & videat, quam infirmo præsidio nixum fuerit cor ejus, & quod ipsius משכית ipsum pessime deceperit. Aurea igitur Salomonis sententia, quam v. 10. habet, quam altissime animis nostris infixæ hæreat: Turris fortissima est nomen Jehovæ; in eam curret justus, atque sublimabitur.

§. XVIII.

Cap. 19.

v. 22. תאמת ארם חסדו) LXX. CHALD. SYR. & A R. hunc versum sic exponunt : *Desiderium hominis est ejus gratia*, vel *misericordia*, h. e. eleemosyna, ea reddit eum desiderabilem. Sed quia sub fin. v. 21. dictum est : *Consilium Jehovæ id stabit*. Existimo חסדו significare *gratia ejus*, h. e. gratia, charitas & misericordia Domini ; Ea, inquam, desiderium hominis esse debet. Hanc qui obtinet, etsi pauper sit, præstat tamen *diviti mendaci*, h. e. solido gratiæ bono destituto.

§. XIX.

Cap. 20.

v. 30. חבירות פצע תמריק ברע) VULG. optime : *Livor vulneris absterget mala ; & plaga in secretioribus ventris*. Recte תמריק *absterget*, ut sit fut. Hiph. MASORÆ legit תמרוק *abstersio*. חבירות vero sunt μώλωπες, ὀπίπια. Dubito, an mens Salomonis sit, vitia servorum plagis inflictis vibicibusque, h. e. flagellis impa-
ctis, emendari, maxime cum addatur : *& plaga in secretioribus ventris*. Quare mihi in mentem venit locus Jesaia c. 53 : 5. וּבַחֲבֵרֹתָיו נִרְפָּא לָנוּ & *vibice ejus sanatio fit nobis*. conf. 1. Petr. 2 : 24. Ad sanationem vero nostram plurimum contulere passionēs secretæ animæ Christi, de quibus hic Salomon : *& plaga in secretioribus ventris*. Ecce verum תמרוק *abstersorium malorum* nostrorum, quod Paulus tam magnifice deprædicat Rom. c. 6. Col. c. 2. & S. Petrus 1. Petr. c. 2. & c. 3. Certe severitate Legis & plagarum ex rigore Legis transgressoribus inflictarum mala, h. e. peccata & vitia hominum non absterguntur. Semper enim recurrit quod v. 9. h. e. dicitur : *Quis dicet, emundavi cor meum, purus sum à peccato meo ? Sed Deus fide in Christum, ejusque vulnera & vibices, purificat corda Gentium*. Act. 15 : 9.

§. XX.

§. XX.

Cap. 21.

v. 7. **שׂר רשעים יגורם** Aquila, notante DRUSIO, hoc vertit: *προνομή αἰσίων καλῶσπᾶσι αὐτοῖς. Vastitas impiorum detrahēt eos detrahēt, h. e. deorsum trahet, quin & abripiet. Certe גַּר apud ARABES est trahere, raptare. CHALD. יַעֲלִיךָ tollet eos. VULG. Rapina impiorum detrahent eos. Recte. BUXTORFIUS, disseccabit eos. Quod minus placet.*

§. XXI.

Cap. 22.

v. 22, 23. *Ne diripias tenuem, quia tenuis est, & ne conteras afflictum in porta, quia Dominus litigabit litem eorum,* **וְקַבֵּץ אֶת קַבְעִיהֶם נַפֶּשׁ**) verbum קַבֵּץ hic venite debet notione diripiendi, expilandi, sive vi sive fraude, ut respondeat verbo **גָּזַל** quod v. 22. est. Alioqui CHALD. & SYR. verbum קַבֵּץ notat *fixit, affixit, ἐπέκει, Hebr. 8:2. quin & cruci affixit. Col. 2:14. Hinc & AQUILA hoc loco: καὶ καθηλώσει τὰς καθηλώσας αὐτὸν, & configet eos, qui confixerunt eum. Sed extat locus Malachiæ c. 3:8. ubi vox קַבֵּץ venit notione diripiendi. הִיקַבֵּץ num diripiet homo Deum, quod vos diripitis me? Dixistis: In quo diripuimus te? Ubi verbum קַבֵּץ ter occurrit, notione, ni fallor, despoliandi, diripiendi. LXX. tamen *πλεονεῖ, πλεονίξετε, supplantabit, supplantatis. qs. leg. עָקַב. vide Gen. 27:36. ubi ἐπὶ πλεονεῖον habent. Ergo verbum קַבֵּץ est diripuit, despoliavit, vel vi vel fraude, adeoque supplantavit. Sic קַבֵּץ & קָבַץ satis affinia sunt significatione, uti & conveniunt literis. Sensus ergo est, ne despolies pauperem & afflictum, neque vi evertas, ne fraude supplantas, nam & ipse Dominus, ceu justus iudex, jure talionis usus, te despoliabit, evertet, supplantabit; quin si cruci affixeris eum, uti Judæi Christum, ipse Dominus καθηλώ-**

σει τῆς καθ' ἑαυτὴν αὐτὸν. Quod num Judæis acciderit, vide JOS. de Bell. Jud. CHALD. & SYR. h. l. *Ulciscitur injuriam animæ eorum illatam*. Reddendo sc. par pari.

v. 27. **אל תהי בתקצי כף בערבים משאות** *Ne sis inter percutientes volam, inter fidejubentes debita*. Veteribus datio dextræ, vel manus in manum insertio, promissionis vel fidejussionis tessera erit. Hinc & Gr. ἐγγυάω, *spondeo, data dextra, porrecta manu*, qf. manum ἐν γύω h. e. in manum alterius inserens. Qui mos etiamnum apud nostrates obtinet. Sic ערב est *spondere miscendo manus, manum manui inferendo*. c. 6: 1. c. 17: 18. Sic Græcis δίκην ἐγγυᾶσαι καὶ ἀναδέχεσθαι, i. q. ἐγγυήν ὁμολογεῖν, *vadimonium promittere*. ἐγγυαλίζω *in manus trado, infero*, ἐγγυος *sponsor*. Hebr. 7: 22. Multa de hisce congeffit **WAEYENUS** in *Variis Sacris*.

§. XXII.

Cap. 24.

v. 6. **תחבלות תעשה לך מלחמה** *sunt consilia rectoria politica, à prudentibus Consiliariis suppeditata, vel à prudente Rege capta*. Vide c. 1: 5. & c. 20: 18. derivo à חבל *gubernator nauticus, nauticlerus*. Ezech. 27: 8, 29. Jon. 1: 6. *Rempubicam cum navi comparari, discēs vel ex HORATIO: O Navis, referent te in mare novi fluctus*. Quod ergo in navi est gubernator, id in Republica est Rector. *Experientia & prudentia opus est ad bene regendam navem, nocte intempesta, & mari sævientē*. Sic & ad bella feliciter gerenda, & finienda, prudentia haud exigua requiritur, quam dabunt preces ad Deum fusæ, confirmabitque rerum usus & experientia. LXX. Μετὰ κυβερνήσεως γίνεται πόλεμος.

* * * * *

IV.

JOH. GEORGII

ALTMANNI, P. P.

DISSERTATIO

PHILOLOGICO-EXEGETICA,

DE

CREATURA GEMENTE,

In Rom. VIII. v. 19 - 23.

V. 19. Ἡ γὰρ ἀποκαταδοκία τῆς κτίσεως τὴν ἀποκάλυψιν
τῶν υἱῶν τοῦ Θεοῦ ἀπεκδέχεται.

V. 20. Τῇ γὰρ μαλαιότητι ἡ κτίσις ὑπετάγη, ἔχ. ἐκῶσα,
ἀλλὰ διὰ τὸν ὑποτάσσεται.

V. 21. Ἐπ' ἐλπίδι, ὅτι καὶ αὕτη ἡ κτίσις ἐλευθερωθήσεται
ἀπὸ τῆς δελείας τῆς φθορᾶς εἰς τὴν ἐλευθερίαν τῆς δό-
ξης τῶν τέκνων τοῦ Θεοῦ.

V. 22. Οἶδμεν γὰρ, ὅτι πᾶσα ἡ κτίσις συσπνάζει καὶ συ-
νωδῖναι ἄχρι τοῦ νῦν.

V. 23. Οὐ μόνον δέ, ἀλλὰ καὶ αὐτοὶ τὴν ἀπαρχὴν τοῦ πνέ-
ματος ἔχοντες, καὶ ἡμεῖς αὐτοὶ ἐν ἑαυτοῖς σπνάζομεν,
υἰοθεσίαν ἀπεκδεχόμενοι, τὴν ἀπολύτρωσιν τοῦ σώματος
ἡμῶν.

v. 19. Nam sollicita observatio creaturæ exspectat
revelationem filiorum Dei.

v. 20.

- v. 20. Nam vanitati creatura subjecta est, non sua sponte, sed propter eum, qui subiecit.
- v. 21. In spe, quod & ipsa liberanda sit ex servitute corruptionis in libertatem gloriæ filiorum Dei.
- v. 22. Scimus autem, quod omnis creatura ingemiscat & parturiat usque nunc.
- v. 23. Non tantum autem, sed & ipsi, primitias spiritus habentes, & nos in nobismet ipsis gemimus, adoptionem expectantes, redemptionem corporis nostri.

Argumentum.

§. I. Dissertationis occasio describitur. Auctores primarii, qui in hanc rem scripserunt, enarrantur. Dissertationis summa exhibetur. §. II. Communissima sententia exponitur & brevibus examinatur. §. III. Variæ doctorem atque diversæ sententiæ in hunc locum proponuntur. §. IV. Probatur, Caput Septimum & Octavum hujus Epistolæ spectare Judæos. Fuisse Romæ Judæos post Tiberii & Claudii contra eos Edictum, probatur. §. V. Nexus verborum exponendorum ex Capite Septimo arcessitur, atque asseritur, illud totum spectare ad Judæos. §. VI. Nexus Capituli Octavi usque ad versum decimum nonum investigatur, atque hæc omnia itidem ad Judæos referuntur. §. VII. Versus decimus nonus proprius expenditur; *Observatio sollicita* quid sit, describitur atque explicatur. §. VIII. *Sollicita observatio* hæc solis potest tribui & adscribi Judæis, quod

quod variis argumentis probatur. Objectioni quorundam, prosopopoeiam in hoc loco asserentium, obviam itur. Quæ fuerit expectatio Messiae apud gentem Judaicam, declaratur. Judæi vocantur Filii Dei. §. IX. Versus 20. exponitur *μαλακίας*, de qua Paulus, est Lex Ceremonialis, quod plurimis rationibus evincitur; Quis sit sensus verborum, quod *hæc creatura non sua sponte se subjecerit*, exponitur. Finis hujus subjectionis docetur. §. X. Versus 21. explicatur. Israelitæ erant in spe liberationis à jugo ceremoniarum, quæ debebat adferri tempore Messiae. Quid sit *δεσποτα φθορας*, illustratur, illamque nihil aliud esse, quam servitutem ceremonialem, quæ debebat abrogari, probatur. §. XI. Versus 22. explanatur. Creaturam Gementem esse Judæos solos, Messiam & promissam cum eo liberationem expectantes, asseritur. Objectiones contra hanc sententiam occurrentes solvuntur. §. XII. Gemitus & ad pariendum conatus consideratur atque explicatur. §. XIII. Quid Paulus intelligat per *primitias spiritus*, ex Philologia exhibetur. Hæc verba iterum ad solos Judæos pertinere asseritur. Doctorum in hanc rem verba adducuntur. Dissertationi finis imponitur.

§. I.

Occasionem scribendæ huic Dissertationi fecit haud ita pridem Vir plurimum Venerandus atque Clarissimus, JACOBUS ZEHENDER, Eloquiorum divinatorum in Templo Cathedrali

drali Bernensi interpres facundissimus ; qui cum pro sua eruditione quasdam in hoc loco Paulino difficultates indicasset & explanasset, accuratiori meditationi hæc verba, quæ à multis inter Pauli *δυσωγτα* recensentur, subjicere constitui. Illam autem, post sollicitam investigationem, meam feci sententiam, quæ, nisi omnia me fallunt, magnis dehinc nodis implicita non videbitur, dummodo lector amicus in expendenda nova hac sententia sibi otium tribuere velit, ut novam hanc assertionem per omnes suas partes coherentem inspicere & considerare dignetur. Meum jam in hoc loco non est, vel Veterum vel Recentiorum Philologorum sententias prolixè enarrare, & illas longiori examini subjicere ; Fecerunt id Viri doctissimi, *GOTTHARDUS HEIDEGGERUS* in *Recreationib. Sacr. parte 2. p. 155. & seq.* in quatuor Prælectionibus de hoc themate habitis. *WOLFIUS* in *Curis Philologicis & Criticis ad b. l. atque GEORG. LUDOV. RHODIUS* in peculiari Dissertatione, in *Miscellan. Duisburgensib. à Cl. GERDESIO editis, Tom. 2. p. 451. &c* Illas autem brevibus tantum enarrasse sufficiet. Quam firmo autem stent fundamento, bonus atque æquus harum rerum iudex ex plana nostræ sententiæ expositione judicabit. Præsentibus autem atque certis argumentis nos probaturos confidimus, per hanc **CREATURAM GEMENTEM** non hoc universum, non orbem gentilem, sed *solos Judæos* esse intelligendos. Ut autem eo facilius quilibet hanc nostram sententiam in totum hunc locum, in quo Paulus de hac *creatura gemente* inde à versu 18. usque ad 24. agit, intelligat, necessarium esse existimavimus, horum verborum **PARAPHRASIN**, ex systemate nostro in hunc locum, heic præmittere ; ex qua, tanquam ex brevi tabella, quilibet videat, qua mente quaque ratione hæc explicanda & intelligenda sint. *Nam ex sollicita observatione signorum temporis*

poris creaturæ, h. e. *Judaorum*, facile colligimus, illos expectare revelationem filiorum Dei, h. e. *Judaorum*, qui in scriptis V. Testamenti hoc nomine gaudent. Nam quia creatura *Judaica Vanitati*, h. e. Legi ceremoniali, quæ vana est atque transitoria, subjecta est, propter Christum, qui per Mo- sen illam Legi subjecit, spes illi hoc modo facta est, quod illa lex ceremonialis non perpetuo duratura esset, sed quod populus *Judaicus* ex hac legis ceremonialis servitute (quæ corruptioni est obnoxia quia abolenda,) transiturus esset in libertatem filiorum Dei; Novimus autem, quod omnis creatura, h. e. omnis vel universus populus *Judaicus*, ingemiscat, exoptans adventum Messia, & parturiat, hoc est, afflictiones in adventu Messia à prophetis prædictas, tanquam dolores partus Messia perferat ad hoc usque tempus, quo jam præstitus est Salvator mundi. Ingemiscit autem non tantum tota hæc *Judaorum* natio, ad Christum nondum conversa, sed & nos discipuli Christi, qui jam primitias spiritus accepimus, nos ingemiscimus, non ea mente qua *Judæi* increduli, Messiam expectantes, sed nos desideramus adoptionem, & redemptionem corporis nostri.

§. II.

Ut autem eo melius candidus Lector, vel varias Doctorum in hunc locum sententias & explicationes, vel nostram ex opposito possit dijudicare, dicendum: communem & plurimis hætenus receptam fuisse sententiam illorum, qui statuunt, per *Creaturam gemebundam* intelligendam esse rerum omnium, etiam brutarum, compagem, quæ anhelet liberationem à servitute corruptionis, quam nunc patitur; atque in hanc sententiam abit, cum quibusdam Patribus, COCCEJUS & alii Viri Docti plurimi. Sunt vero plurima, quæ hanc sententiam nobis non admittendam esse suadent. Ne jam dicam, prosopopoeiam esse tantam, ut etiam modum figuræ Rhetoricæ vere superet, quæ brutis animantibus, atque rebus inanimatis, desiderium, angustiam, voces, gestus, gemitus

gemitus, dolores partus, servitutem, liberationem, gloriam, &c. adscribit. Hinc omnino recte de hac explicatione dicit Rev. *GEORG. LUD. RHODIUS* in *Dissert. ad h. l. p. 461.* quod hæc positio peccet in hypothesis, qua nititur, & in scopo sermonis Apostoli; quod optime observatum.

§. III.

Aliam tuendam sibi sumsit sententiam *TRILERUS* in *Examine quorundam locorum N. Test p. 55.* qui per *ἀγγέλων* intelligit angelos; Sed hæc opinio certe talis videtur, ut prolixa refutatione opus non habeat. Ab angelis ad homines, speciatim vero gentiles, hætenus nondum conversos, intelligendos descendit celebris *LOCKIUS*, quem presso pede sequitur *JONCOURTIUS*, cujus sententiam prolixius exposuerunt Auctores *Athor. Erud. Lips. ad ann. 1716. p. 447.* Cur autem hanc sententiam non possimus nostram facere, impedit præsertim versus 19. in quo Apostolus dicit, *quod creatura anxie expectet revelationem filiorum Dei.* Quis autem mihi significabit, quomodo gentilibus, revelatione omni destitutis, tribui possit sollicita observatio & desiderium adoptionis in numerum filiorum Dei. A gentibus non conversis ad conversas procedit *CLERICUS*, in suo ad notas *Hammond. ad h. l. additam.* Huic vero sententiæ repugnat nexus omnis dictorum Apostoli in capite septimo & octavo, ut postea prolixius, cum ad nostram sententiam probandam ventum erit, demonstrabimus. Fortioribus autem argumentis nixam explicationem exhibuit *LAMPIUS*; in *Commentario ad Ps. 45. p. 567.* qui sensu latiori hæc omnia accipienda contendit his verbis: „ Quidam ad instantem Ecclesiæ „ inter gentes, præcipue in Imperio Romano, stabi- „ litionem, alii ad universalem Judæorum & Genti- „ um in fine mundi conversionem, alii ad consum- „ matio-

„ mationem mundi universalem post resurrectionem
 „ mortuorum, ab Apostolo collimari putant. Ego
 „ vero censeo, Paulum hæc omnia simul intendere
 „ potuisse, & vere intendisse; & mox postea p. 569.
 „ Potius ideo creaturam mysticam hic intelligimus,
 „ sub cujus universitate Ecclesia, tam militans quam
 „ triumphans, comprehendi potest, unam panegyri-
 „ in œconomia N. Testam. conficiens. Impedit au-
 „ tem, quo minus sententiæ Viri Magni accedamus, la-
 „ ta nimis sententiæ expansio in omnis creaturas, etiam
 „ illas, quæ æterna fruuntur gloria, & de quibus cer-
 „ te dici non potest, quod adhuc sint vanitati obno-
 „ xia; Notandum etiam, quod Apostolus aperte di-
 „ cat, illam creaturam esse gementem, *quæ congemiscit*
 „ *& parturit*, una cum illa quæ *primitias spiritus accepe-*
 „ *rit*; Hoc autem non quadrare in illos beatos cœli in-
 „ cōlas, quilibet facile animadvertit. Alia autem ar-
 „ gumenta, quæ contra hanc sententiam objici possent,
 „ videbimus, cum in stabilienda nostra sententia oc-
 „ cupati erimus. Non tandem omittenda sententia
 „ *LIGHTFOOTI* in *Hor. Hebr. ad h. l.* qui per hanc
 „ creaturam gementem *omnes gentiles vel mundum omnem*
 „ *ethnicum* subaudit, hoc potissimum motus argumen-
 „ to, quod Evangelium fuerit prædicandum *πᾶσι τῇ κτί-*
 „ *σει*, Marc. 16: 15. & Coloss. 1: 23. atque Judæi or-
 „ bem gentilem vocarint *כל הבריות*. Hanc etiam sen-
 „ tentiam latius sibi explanandam sumsit Rev. & Doctiss.
 „ *RHODIUS* in *Miscell. Duisburg. Tom. 2. p. 465.* Quæ
 „ vero in hac assertione obveniant difficultates, jam
 „ verbo diximus, in brevi ad sententiam *Lockii & Cleri-*
 „ *ci* epicrisi. Magno quidem labore & molimine id
 „ egit supra laudatus *Rhodius*, ut hanc stabiliret explica-
 „ tionem; sed pace Viri Docti, rationes illæ & doctæ
 „ & ingenii acumine allatæ, tantæ mihi hætenus esse
 „ non videntur, ut in illius castra discedere possim.
 „ Cum hac etiam conciliari potest illustratio *JOH.*

GOTHOFR. LAKEMACHERI in Bibl. Brem. Class. VII. p. 619. statuens, quod quidem sperni non possit explanatio illorum, qui statuunt mundum gentilem intelligi debere; hac addita observatione, quod probabile sit, Paulum in his respexisse ad opinionem Judæorum, in adventu Messiae innovationem & restitutionem mundi asserentium. Ad hanc vero novam dilucidandi rationem optime respondet Rev. atque Doctiss. *WOLFIUS in Chr. Philolog.* ad h. l. quod non sit credibile, Paulum in veritate certa & indubitata ad falsam Judæorum opinionem respexisse, per quam gens illa variis præjudiciis imbuta, in falsa de adventu Messiae sententia fuisset corroborata.

§. IV.

Enarravimus jam tanta, quanta fieri potuit, brevitate, Eruditorum in hunc locum Paulinum sententias. Ad nostram jam probandam & confirmandam nos convertimus. Lectori vero certa & perspicua nostra fiet explanatio, cum Nexum verborum Apostoli loquentis recte investigaverimus; ex hoc enim omnis nostra fluet, tanquam è scaturigine deducta, explicatio. Antequam autem ad nexum sermonis Apostolici accedamus, pauca præmittenda videntur, ad ea confirmanda, quæ in sequentibus exponenda erunt. Cum enim in eo simus, ut probeamus, totum Caput Septimum & Octavum in se continere orationem Pauli ad Judæos; paucis demonstrandum est, tempore Apostoli plurimos Romæ fuisse Judæos. Hoc enim licet certum & manifestum sit, ut plurimi id largiuntur interpretes; nihilominus tamen non sine splendida argumenti specie obijci potest, pugnare contra fidem historicam, Romæ tum temporis Judæos fuisse, cum primo sub Tiberio, teste *JOSEPHO, Antiq. Lib. XVIII. c. 3. p. m. 879. edit. Haverc.* & mox postea sub Claudio, teste *LUCA, Actor.*

Astor. 18 : 2. & S U E T O N. in Claudio, cap. 25. fuerint eiectioni & expulsi. Ad hanc objectionem non sufficit respondisse cum quibusdam : aut non omnes Judæos Roma fuisse eiectioni : aut plurimos statim ex locis peregrinis iterum Romam devenisse ; sed dicendum est, quod inde à tempore Cæsaris ingens Judæorum turba Romæ habitaverit. Erant autem isti Judæi Romæ habitantes disparis fortunæ, quidam enim Jus Civitatis Romæ obtinuerant, alii autem hoc beneficio non gaudebant, sed in tanto hominum confluxu quocunque modo, vel nefariis artibus magicis, vel mercatura, victum quærebant. Plurimos vero Judæos Jus Civitatis Romanæ habuisse, nobis manifestum atque certissimum est ex Edictis, Senatus Consultis, & publicis monumentis, à JOSEPHO in hanc rem allatis, *Antiq. Lib. XIV. cap. 9. p. m. 699. & seq.* Extat etiam apud P E R S I U M locus satis apertus, ex quo colligimus, quanta solemnitate Judæi Romæ habitantes natales Herodis celebraverint, *Sat. 5. v. 180.*

*Herodis venere dies, unctaque fenestra,
Dispositæ pinguem nebulam vomuere lucernæ,
Portantes violas, rubrumque amplexa catinum
Cauda natat thynni, tumet alba fidelia vino,
Labra moves tacitus, recutitaque Sabbata palles.*

Ex his Judæis vero Romæ commorantibus illi haud dubie urbe fuere eiectioni, qui non tantum Jure Civitatis carebant, sed etiam plebs flagitiosa, turpis & inutilis, habebantur ; In urbe ergo illis tantum locus concessus, qui & Civitatis jure, & honestioris vitæ fama gaudebant. Ad hos, sedem laremque Romæ habentes, Paulum potissimum respexisse, in iis locis in hac sua epistola, quæ ad solos referri possunt Judæos, certum est. Hæc breviuscule præmittenda videbantur, cum non sufficiat dixisse, Romæ fuisse Ju-

dzos, nulla tamen addita ratione, quomodo ibi post geminam ejectionem potuerint commorari.

§. V.

Est ergo certum, magnam fuisse Romæ Judæorum copiam, ad quos Paulus sæpius in hac epistola, tanquam fratres suos, legis Mosaicæ peritos provocat. Ad *Nexum* jam accedimus, cum in illo futuræ nostræ explanationis fundamentum consistat, quo liquide deducto & demonstrato, reliqua plana videntur omnia. Hunc autem petimus inde ab initio Capituli Septimi, in quo Paulus hanc suam concatenatam orationem, quæ usque ad finem Capituli Octavi perdurat, orditur; imo etiam in sequente Capite Nonno plurima, ex mente quorundam Theologorum, ad solos Judæos spectant. Primum autem & invictum argumentum, sermonem in *capite septimo* spectare ad Judæos Romæ habitantes, haud dubie ex eo peti debet, quod statim versu primo dicit: *γινώσκουσιν γὰρ νομὸν λαλῶν*, loquor autem legem cognoscentibus. Proposuerat equidem Apostolus in capitibus præcedentibus quatuor argumenta, ad veritatem justitiæ fidei asserendam, sed illa non tam directe ex œconomia legali videntur desumpta, ut hæc, quæ jam profert capite septimo & octavo; licet ego Cl. BRAUNIO contradicere nolim, qui asserit, quod jam capite secundo, tertio, quarto, imo quinto & sexto, plurima sint, quæ ad Judæos solos pertineant. *Select. Sacr. Lib. 1. c. 2.* Scopus vero Apostoli est statim ab exordio capituli septimi, docere fratres suos Judæos, quod non amplius sint sub dominio legis, sed quod per abrogationem legis facti sint alterius domini, nempe Christi, atque planissima comparatione hoc demonstrat: *An ignoratis fratres, inquit, legem tantisper dominari homini quamdiu illa vixerit; nam semina maritata viventi viro devincta est per legem, quamdiu is vixerit, si vero mortuus fue-*

fuerit, liberata est à lege viri. Hominem ergo considerat cum lege in triplici statu, vel conditione triplici. Primo, ut conjugem marito amatam, in statu integritatis, in quo Adam erat constitutus, cum sanctus prodiiisset ex manu Creatoris, & in quo ab hoc marito omnem felicitatem expectare & accipere potuisset. Secundo, ut adulteram, quæ nihilominus manet sub potestate mariti, cujus voluntati & imperio ita est subiecta, ut omnem poenam & mortem ab illo debeat expectare; & talis est homo post lapsum, qui legem dicentem audit, *maledictus qui non fecerit verba legis*, Deut. 27: 26. atque sub hac jam relatione populus Judaicus proponitur à propheta Esaj. 50: 1. *Sic fatur Jehovah, ubi est libellus divortii matris vestræ, quo eam dimisi? ecce propter iniquitates vestras venditi estis, & propter transgressionem dimissa est mater vestra.* Tertio tandem, ut mulierem ab imperio & potestate huius mariti liberam & jam alteri junctam, cum hic maritus, scil. lex, jam sit mortua, 2. Cor. 11: 2. hæc autem mulier jam sit facta sponsa Christi illam redimentis ab execratione legis. Nemo jam est, quantum confido, qui non videat, quod hac demonstratione Apostolus Judæis usum legis in temporibus N. Testamenti, contradistincte ad jugum V. Testamenti, voluerit depingere. His jam positis, clarissimo argumento infert Apostolus, Judæos non amplius esse sub lege, sed sub gratia, in qua iustitia Christi se habet ad sanctificationem huius sponsæ, ut causa juris ad istam gratiam nobis imputandam cum dono fidei. Ab hac demonstratione pergit Paulus, comparando effectus legis sine gratia, versu 7. usque ad 12. effectus vero legis per gratiam, à versu 12. usque 24. quæ omnia vero prolixè docet & probat **COCCEJUS** in suo Commentar. ad h. l. atque **MOMMA** in Not. analyticis ad Epist. ad Rom. p. 481. & seq. **SAL. van TIL** in Opere Analyt. Tom. 2. p. 528. ad quos etiam lectorem

remittimus, cum brevitatis studium prolixioribus esse jam non permittat.

§. VI.

Declaravit in præcedentibus, capite præsertim septimo Apostolus, legem esse abolitam, justificationem è fide per Christum adductam, atque jus ad vitam nobis acquisitum atque donatum; & exinde jam fidelium de his certitudinem ad futuræ hæreditatis possessionem infert, cujus fructus & testimonium sit *πληροφορία*, bonæ & tranquillæ conscientiæ gloriatio; Hanc autem certitudinem, ut ex præcedentibus longa rationum serie ex oppositione legis mortuæ & legis spiritus deduxerat, ita nunc subsequentibus adhuc argumentis fratres suos, hujus justitiæ fidei, & liberationis ab omni condemnatione legis certos reddit, ex adoptione, ex fine creaturarum ad gloriam filiorum Dei anhelantium, & ex primitiis Spiritus S. per istam gratiam se manifestantibus. Quæ omnia prolixè probare possemus, si ulla in his remaneret difficultas. Cum autem ex unanimi Theologorum consensu hæc omnia sibi cohæreant, atque concatenatam orationem nobis ob oculos ponant, hoc labore prolixiori supersedemus. Fecit autem id prolixè & pro sua eruditione *J. HENR. HEIDEGGERUS* in suo *Comentar. ad Epist. ad Rom. p. 57. & seq.* Nullum ergo potest remanere dubium, finem atque conclusionem totius ratiocinii de usu & relatione legis sub œconomia Vet. & Nov. Testamenti ad illos etiam spectare, ad quos suum sermonem direxerat Paulus, nimirum ad Judæos. Primum ergo argumentum, quo Paulus præcedentem assertionem & demonstrationem de Justitia fidei, & inde pendente futura gloriificatione probat, desumptum est ex eo, quia adoptamur in filios Dei; Atque satis constat, quod adoptio sit effectus justificationis, cum qua conjungitur libertas Christiana,

na, tanquam necessarium consequens adoptionis, quia qui in numerum filiorum atque hæredum est cooptatus, filiali libertate Deo servit. Hæc autem ut communis est omnibus electis & justificatis, nihilominus tamen præcipue credentibus Israelitis primario adscribitur, & quidem in ipsa hac Epistola cap. 9:4. cum Paulus ad eosdem hos suos fratres scribit, *quod illorum sit adoptio, & gloria, & testamenta, & legislatio, & cultus, & promissiones.* Ratio haud dubie inde petenda, quia Deus Israellem volebat primo invitari ad bona fœderis gratiæ, *cum esset filius primogenitus*, Exod. 4:22. Inde in hac relatione Israelitæ magnis præ gentibus gaudebant prærogativis. Licet autem, ut dictum, adoptio pertineat ad omnes fideles & justificatos ex omnibus gentibus, inde à mundi natalibus usque ad finem ejus collectos & colligendos; nihilominus tamen in hoc loco Paulus specialiter loquitur de adoptione Israelitarum, quod liquidissime ex eo videmus, quia opponit versu 15. *spiritum servitutis & timoris, spiritui adoptionis*; Erat autem hic spiritus servitutis & timoris sub œconomia Vet. Testamenti, cum Israelitæ essent sub pædagogia legis, sub jugo ceremoniarum, sub potestate elementorum mundi, in statu servorum severiori domino subjectorum Gal. 4:1. sub tutoribus atque curatoribus, qui Judæos arctius cultui Levitico & observationibus legalibus adstringebant sub pœna mortis. Ergo Apostolus in hoc primo argumento, ad probandam justitiam fidei & liberationis ab omni condemnatione, iterum alloquitur Judæos, opponens, ut semper in his duobus capitibus, 7. scil. & 8. statum servilem in Vet. Testamento, & statum adoptionis & libertatis in diebus gloriosis Nov. Testamenti; & ex hac oppositione lucidissime patet, sermonem esse Apostolo de adoptione Judæorum credentium. Quod etiam roborat vocula *παλιν*, respectiva ad tempora V. T. præcedentia.

tia. Ex perpetua ergo collatione œconomiz temporis Veteris Testamenti, & libertatis Novi Testamenti, quam Paulus in hoc toto capite octavo usque ad versum 19. instituit, colligi potest, etiam sequentia ex eadem hac connexionione esse intelligenda & explananda; ut jam in sequentibus clarius adhuc videbimus.

§. VII.

Propius nunc tandem ad rem nostram accedimus. Postquam ex nexu demonstratum fuit, quam directe omnia præcedentia hætenus ad Judæos debeant applicari, exinde concludimus, quod etiam ea, quæ de creatura gemente videnda erunt, de Judæis debeant intelligi; si probare possimus, omnia illa verba PAULI inde a versu 19. usque ad 23. in Judæos ita quadrare, ut de nulla alia re æque commode possint intelligi. Verba Doctoris Gentium in commate 19. hæc sunt: Ἡ γὰρ ἀποκαταδοκία τῆς κτίσεως τὴν ἀποκαλύψιν τῶν υἱῶν τοῦ Θεοῦ ἀπεκδέχεται, quæ ita vertenda sunt: Nam sollicita observatio creaturæ expectat revelationem filiorum Dei. Vocem ἀποκαταδοκίας interpretes omnes hætenus vertunt per sollicitam expectationem, atque hunc etiam significatum obrinet apud Lexicographos. Interim non minus significat sollicitam rei alicujus Observationem. Videmus hoc est JOSEPHO de bello Jud. Lib. III. c. 7. p. 240. edit. Haverc. ἀποκαταδοκεῖ δὲ τὴν ὁρμὴν τῶν βελῶν, sollicite observat impetum telorum. Probat etiam ex Polybio RAPHELIUS in Annot. Philolog. ad N. T. quod ἀποκαταδοκία denotet Observationem alicujus adventus. Componitur autem ex præpositione ἀπο, ex κατὰ vel κατῇ, caput, & δοκᾶν vel δοκεῖν, quod observare, videre, expectare, &c. significat, quia homines aliquid observantes crecto capite illud observant, ut hæc latius DIETERICUS in Antiq. Bibl. p. 131. SCHWARZIUS in Commentar. Ling. Græcæ p. 160. & alii exponunt. Germanice, secundum vim Græcæ

Græcæ vocis, hæc ita vertenda essent: und darum erwartet die Creatur mit aufgerichtetem Haupt die Offenbarung der Kindern Gottes. Quid autem aliud esse potest hæc ἀποκατάδοια, quam sollicita signorum adventum Messię præcedentium, ut & Messię promissi, & secundum oracula prophetarum venientis Observatio. Nota erant Judæis signa temporis, in quo manifestandus erat in carne Messias; Indeque Judæi in scriptis V. Test. nobis proponuntur, ut in specula advenientem diem & salutem expectantes constituti; & hinc non fideles tantum, vera fide eum amplectentes, ad exemplum Simeonis in templo Luc. 2: 25. sed communiter Judæi omnes, illum enixe observabant & expectabant, quia futuram ab illo redemptionem ex servitute sibi promittebant. Probat hoc Cl. SCHOETGENIUS in Hor. Hebr. p. 263. quem exscribere nolumus, ut & VITRINGA Observat. Sacr. Lib. V. cap. 6. p. m. 89. Hinc beneficia, quæ in adventu Messię sibi promittebant, magistri Judæorum vocabant, הַתְּשׁוּעָה הַבָּאוֹלָה הַקְּדִמָּה redemptionem futuram, & הַתְּשׁוּעָה הַקְּדִמָּה salutem futuram. Ut ergo sensus clarus & apertus emergat, dicendum, quod per ἀποκατάδοιαν intelligenda sit observatio & accurata contemplatio omnium illarum rerum memorabilium, quæ eventuræ essent proxime ante adventum Messię, quæ Judæis certa erant instantis nativitatis Salvatoris mundi testimonia. Hæc omnino ita explicanda, ut omnis apparens tolli possit obscuritas; nam ex hac observatione certi erant Judæi in expectatione Messię jamjam advenientis. Si vero ἀποκατάδοιαν vertamus per expectationem, obscuritas oboritur; quis enim liquidus sensus in hac versione, sollicita expectatio creaturæ expectat revelationem filiorum Dei? Ita hæc verba ex Græco textu transtulit versio vulgata; an autem huic versioni lucidus sensus insit, an claritas & perspicuitas spiritui sancto ubique familiaris in illo inveniat, judi-

judicabunt omnes, quibus vel mica sanæ mentis concessa est. Notat etiam ad loc. citatum ex Luca *LIGHTFOOTUS* in *Hor. Hebr. p. m. 492.* quod Judæi omnes Messiam expectaverint, atque inde etiam nihil frequentius fuerit, quam jurare per desiderium suum videndi hanc consolationem. Sed hæc ita nota & apud Philologos obvia, ut probatione longa neutiquam opus habere mihi videantur. Ex his autem bonus lector jam facile colliget, quod hæc expectatio, siue sedula observatio, in nullam rem æque commode quadret, ac in Judæos. Sententiam illam communissimam, atque Viris Doctis etiam receptam, de expectatione in res omnes transferenda, nolo attingere, illa enim, mihi certe, refutatione neutiquam opus habet. Qui autem immanem, stupendam & horrendam illam prosopoeiam statuere volunt, atque rebus inanimatis suspiria tribuere; faciant, non impedio. Facile equidem sentio, Viros Doctos mihi objecturos: tales fere prosopoeias in scriptis V. Testamenti, apud Prophetas præcipue, occurrere; tales habemus Psal. 93: 3. 96: 11. Esaj. 1: 2. 49: 13. 55: 1. Jer. 4: 28. Joel. 1: 18. & quæ forsan alia exstant prosopopoeiarum in sacris literis exempla. Sed ad hæc facile respondemus, quod illa loca ex sensu scripturæ propheticæ sint explicanda, & in quibus sub nomine, cœli, terræ, pecudis agri, fluviorum, montium; aliud quid, quam inanima hæc elementa intelligenda; ut hæc ex regulis Theologiæ Typicæ & Emblematicæ satis sunt nota & cognita. De hoc vero certi sumus, quod in his Pauli verbis talis statuenda foret prosopopoeia, quæ admitti plane nequit; cum non tantum suspiria & desiderium huic creaturæ gementi tribuatur, sed & observatio revelationis filiorum Dei, imo, quod plus est, spes libertatis filiorum Dei. Quis autem dixerit, quod hæc ad aliam creaturam, quam rationalem, simulque in mysteriis salutis

salutis eruditam, referri possint? Sed liceat mihi Viros Doctos, hanc expectationem ad gentiles etiam transferentes, rogare, undenam illa *solicita observatio* gentilium, & unde illis spes & observatio adveniat liberationis filiorum Dei, qui de Deo, foedere gratiæ, de Messia venturo, ignominiosam mortem subituro, Ecclesiam per omnes terræ partes erecturo, nihil exaudiverant? Cujus erat expectare, quam illorum, quibus & facta & cognita erat promissio? qui sentiebant jugum humeris suis impositum, & anhelabant illam à magistris suis jactatam salutem & redemptionem. Tribuitur vero hæc *solicita observatio* τῇ κτίσει, *creatura*. Vox hæc diverso admodum sensu occurrit tum apud LXX. tum etiam in scriptis Novi Testamenti; & hinc recipere debet hic illam explicationem, quæ huic loco aptissime convenit; significat enim & res creatas omnes, sæpius mundum, hominem, naturam animi, & mentis affectiones, magistratus civiles, &c. Cum autem κτίσις significet sæpiissime homines nondum ad statum fidelium & gratiæ translatos, Marc. 16: 15. Col. 1: 23. non video, quid impediat, quo minus etiam Judæi nondum hæcenus ad Christum conversi hoc nomine veniant. Sed longo verborum apparatu opus non est; Probat hanc nostram assertionem verbis clarissimis & lucidissimis Apostolus Jacobus, ad Judæos ἐν τῇ διασπορᾷ scribens, cap. 1: 18. Βεληθεὶς ἀπεκύησεν ἡμᾶς λόγῳ ἀληθείας, εἰς το εἶναι ἡμᾶς ἀπαρχὴν τινὰ τῶν αὐτῶ κτισμάτων. *Is qui voluit, genuit nos sermone veritatis, ut essemus primitiæ ejus creaturarum.* Quilibet vel leviter attendens, videt, quod hic locus ita pro nobis militet, ut nulla plane objectioni ratio sit relicta; Judæos vocat Jacobus & κτίσμα, vel κτίσιν, quod idem est & ab eodem themate descendit, atque primitias, ut Paulus in loco quem præ manibus habemus versu 23. Hinc rectissime BLACKWALLUS Anglus, qui quantum novi solus est, qui eandem

dem mecum fovet sententiam, in *Critica Sacra* p. 314. *Ha dua φρασεις, habere ἀπαρχὴν πνεύματος, & esse ἀπαρχὴν τινὰ τῶν τῆ Θεοῦ κλισμῶν, meo quidem iudicio, ejusdem sunt potestatis; hominem vero nondum salutariter emendatum, si- ve Judæus siue Græcus sit, τῆς κλισίως voce designari, hinc imprimis concludo, quod καὶνὴ κλισίς, emendatus dicitur homo, Gal. 6: 15. Et hæc quidem sufficere possunt ad probandum, quod hæc sollicita observatio creaturæ nemini tribui possit, quam Judæis.*

§. VIII.

Cuinam tribuendus sit sollicitus prospectus, jam vidimus. Ad sequentia nunc recto pede pergendum, in quibus rationem declarat Paulus, qui sit scopus & ratio observationis hujus; est autem *revelatio filiorum Dei*. Hæc vero observatio & desiderium secundum illam, quam dedimus, explicationem, includit omnia illa magnifica Dei, Patribus V. Testamenti facta promissa, quæ felicem statum temporum N. Testamenti spectant, contradistincte ad servitutem Vet. œconomiae. Noverant Judæi, se esse filios Abrahami secundum carnem, jactabant se, sibi factas cum exclusione gentium promissiones, se solos habere jus accedendi ad Deum, nihilominus tamen non omnem hætenus tanti beneficii sensum habebant; imo potius aperte dicit Deus apud Prophetam Jeremiam, *quod eos neglexerit*, quæ verba repetit Paulus Hebr. 8: 9. καὶ γὰρ ἡμελῆσα αὐτῶν; Factum hoc quidem in tota œconomia Vet. Testamenti, cum Deus Judæos duriori dominio subjecit, specialius vero eos puniendo per gentes vicinas, vel alias poenas iis imponendo. Atque inde Judæi omnes liberationem expectabant. Hinc etiam prædicabant de Messia, eum futurum summum Sacerdotem, imo Filium Dei, qui nos gratos possit facere Deo, ut hæc prolixè enarrat *PHILO JUDÆUS, de vita Moysis, Lib. 3. & ex aliis insuper*
Judæo-

Judæorum scriptis id exponit *BRAUNIUS* in *Commentar. ad Hebr. p. 422.* Qui erant fideles Judæi, quorum cor Spiritus Sanctus illuminavit, illi anhelabant ardenti desiderio videndi hunc Messiam, qui gloriam eorum universo mundo declararet, atque hoc modo & suam gloriam & majestatem, & filiorum suorum splendorem & felicitatem in altissimam lucem collocaret. Quoties autem Deus in scriptis V. T. Israelitas *filios suos* vocarit, hoc loco repetere neutiquam necessarium duco, vide *Exod. 4 : 22. Deut. 14 : 1. Esaj. 63 : 16.*

§. IX.

Pergendum nunc ad versum 20. qui ita se habet: *Τη γὰρ μαλαίωσι, ἢ κλίσιν ὑπετάγη, ἔχ' ἑκαστα, ἀλλὰ δια τοῦ ὑποτάξαντά.* Quam apte iterum hæc Pauli verba cum systemate nostro conveniant, etiam videbimus. Quæ est illa *μαλαίωσις*, cui creatura, de qua est quæstio, Judæi scil. est subjecta? Mihi hæc *μαλαίωσις* est totum jugum Ceremoniale, quod Judæis fuit impositum, propter eum qui subjecit, hoc est propter Filium Dei, quem adumbrabat, exhibebat, præfigurabat; Ideo certe lex erat Pædagogus ad Christum, ut eodem hoc jugo ad fidem in Messiam deducerentur. Quod si vidissent Judæi, etiam hoc onere per fidem suam maxima parte fuissent sublevati. Ne autem temerarius videar, legem ceremonialem *μαλαίωσις* vocando, facile, quantum confido, poterimus probare, sub hoc nomine choragium illud rituum Leviticorum esse intelligendum. *Ματαίον* Græci vocant, non rem tantummodo vanam atque inanem, sed communiter rem, quæ magnam utilitatem non præstat; probavit hoc ad hunc locum *CLERICUS* in *additam. ad Hammondum ex Luciano*, quæ jam describere nolumus, videatur ipse. Hunc etiam sensum hæc vox obtinet apud *SEXT. EMPIRIC. PYRRHON. Hypotypos. Lib. 2. c. 16. p. m. 113. edit. Fabric.* *Ἐὰν ἐν ὑπομνησά-*

μεν, ὅτι πρὸς ἕτερον τῶν χρησιμεύσας, περιτρεφόμεν ὀ-
μαι πᾶσαν τὴν γεγενημένην περὶ αὐτῶν παρὰ τοῖς Δογματι-
κοῖς μαλακοπονίαν. *Si igitur docuerimus, ad neutrum horum*
utiles esse, evertemus, meo quidem iudicio, omnem circa
has vanum Dogmaticorum laborem. Plura testimonia no-
lo adponere, nec certe opus. Ita secundum nostram
datam interpretationem, hæc ceremoniarum ματαιο-
της eadem plane est cum illa inutilitate, de qua Pau-
lus Hebr. 7 : 18. de cultu Levitico loquens dicit : Ἀθε-
τησίς μὲν γὰρ γίνεται προαγωγῆς ἐντολῆς, διὰ τὸ αὐτῆς ἀσθε-
νὲς καὶ ἀνωφελες, *Abolitio enim facta est prioris mandati,*
propter ejus infirmitatem & inutilitatem. Quam legem
ergo Paulus ad Hebræos scribens vocat *inutilem*, hanc
eandem ad Judæos Romanos scribens vocat *vanam*;
quia hominem justificare non potest, & per quam
nec Judæus, nec Græcus, licet eam rigide observa-
ret, vitam consequi posset; ut inde à Propheta Eze-
chiele hæc lex dicitur *Statuta non bona*, cap. 20 : 25. &
ab Apostolo *στοιχεῖα τοῦ κόσμου elementa mundi*. Gal. 4 : 3.
Col. 2 : 8. Quid jam majorem secum fert claritatem
& probationis vim? Quod Paulus vocat in hoc lo-
co, quem præ manibus habemus, *vanum*, illud appel-
lat in alio loco *infirmitas & inutile*. Huic legi cere-
moniali Israelitæ erat subiecti, nec tamen per illam
salus illis ulla erat expectanda; quid ergo justius,
quam hanc legem cum vanitate comparari? Reliqua
hujus versus manum tendunt iis quæ diximus. Legi
& jugo ceremoniarum creatura omnis Judaica fuit
subiecta, sed non sponte, sed coacti fuere ad hoc ju-
gum maximum portandum; Deus enim illis hoc im-
posuit, ut hoc satis constet, nec explicatione vel pro-
batione indiget. Quis scopus fuerit Dei hanc cere-
moniarum innumeram copiam imponendi, jam atti-
gimus. Finis Dei erat ex una parte, ut populum ad
idololatriam proclivem puniret, ex altera, ut coti-
die Judæos per has umbras figurasque ad futurum
Messiam

Messiam deduceret. Si vero per hanc vanitatem vellemus intelligere illam fragilem, pereuntem atque vanidam, non legis ceremonialis, sed rerum humanarum, formam & aspectum, quorsum quæso delaberemur? An de Deo potest dici, quod ipse creaturas vanitati subjecerit? An non ipse homo per lapsum ad vanitatem se præcipitem dedit? Quis dixerit, quod creatura non sua sponte, ἢ ἐκ ἑαυτῆς, non voluntarie, sed propter eum, qui subjecit illam, vanitati, hoc est conditioni fluxæ atque fugaci, fuerit subiecta.

§. X.

Pergimus ad considerata verba commatis 21. Ἐπ' ἐλπίδι, ὅτι καὶ αὐτὴ ἡ κτίσις ἐλευθερωθήσεται ἀπὸ τῆς δουλείας τῆς φθοράς, εἰς τὴν ἐλευθερίαν τῆς δόξης τῶν τεκνῶν τοῦ Θεοῦ. *In spe, quod & ipsa creatura liberanda sit à servitute corruptionis ad libertatem gloriæ filiorum Dei.* In hoc versu huic creaturæ adscribitur *servitus corruptionis*, quæ opponitur libertati gloriæ filiorum Dei. Docet vero in his Paulus, quod illa ματαιότης, de qua in versu præcedenti, non sit vel perpetuæ vel longioris durationis, sed quod vanum hoc Leviticum iugum datum fuerit cum *spe liberationis à servitute corruptionis.* In his δουλεία τῆς φθοράς, idem est, quod in versu præcedenti ματαιότης, ut mox videbimus. Subiecti fuerunt Israelitæ Vet. Testamenti iugo ceremonialium, non ut perpetuo hæc durarent, sed ut ab his mundi elementis liberarentur. Atque omnis ille ceremonialium apparatus docebat Judæos, hæc diutius durare non posse, quam usque ad adventum Messia, in quo hæc omnia suum habitura forent implementum. Hinc patres dicuntur προηλπικότες, *antesperantes*, Ephes. 1:12. ut hoc etiam de Judæis explicat Celeberr. ROELLIUS in *Commentar. Epist. ad Ephes. p. 995.* cum dicit: *Judæi speraverunt ante Christi adventum in mundum, quando gentes & hospites testamentorum promissionis spem nondum*

habebant, Ephes. 2: 12. *Christus erat spes Israelis, ejus adventum & redemptionem per ipsum secundum promissiones patribus factas duodecim tribus enixe sperabant, & expectabant, Actor. 28: 20. & 26: 6. 7. & ideo status illorum merito dicitur status spei.* Atque iterum notandum, quod hanc spem soli Judæi habuerint, cum soli sub veteri œconomia essent *שְׁרָפָה* gens sancta, peculium, Exod. 19: 5. Deut. 7: 6. soli erant filii Dei, Exod. 4: 22. Deut. 14: 1. Esaj. 63: 16. Ratio est, quod Deus his Israelis filiis solis dederit mandata & statuta, non autem reliquis gentibus. Psal. 147: 20. Habebat autem pro objecto suo hæc Israelitarum spes *Libertatem à servitute corruptionis.* Fideles sub V. Testamento liberi non erant, sed erant sub servitute; Hinc in hoc versu utriusque œconomix status & describitur & opponitur, libertas scil. servituti. Hæc autem haud dubie consistebat in cottidiana coactione scribendi chirographum per sacrificia contra se ipsos, in subjectione servili, quæ parebant patribus carnis & innumeris præceptis ceremonialibus, ita ut non servi tantum, sed & *vincti & captivi fuerint*, Esaj. 61: 1. *constituti in fovea, in qua non est aqua*, Zach. 9: 11. Dicitur vero hæc servitus *δουλεία της φθορας servitus adstricta rebus infirmis.* Ita certe *φθορα* adscribitur præceptis ceremonialibus, plane ut hic Col. 2: 22. Postquam enim ibi Apostolus locutus fuisset de elementis mundi atque dogmatibus ceremonialibus, addit: *ἅ ἐστι πάντα ἐν φθορᾷ*, quæ omnia sunt infirma, nullam consolationem vel pacem conscientix adferentia. Ergo *δουλεία της φθορας* est status servilis occupatus circa res, non magnum commodum, nec perennem felicitatem nobis adferentes. Talis erat conditio Judæorum, in cultu Levitico externo occupatorum, quique corruptioni & infirmitati, post Christum abolendus, erat subiectus. Oppositum servitutis, infirmitatis, sive corruptionis, est *libertas gloria*, de qua jam prolixius nolumus differere.

rere. Nemo est qui nesciat, libertatem esse palmarium bonum Novi Testamenti : hinc etiam in omnibus systematibus prolixius hæc solent tractari, ad quæ etiam lectorem remittimus. *LAMPIUS* per hanc libertatem gloriæ intelligit maximum gradum perfectionis fidelium, hanc subjungens rationem, quia fideles non possint gaudere maxima libertate, quamdiu aliquid adest, quo detinentur ad omnia ea exequenda, quæ ad summum Deo honorem reddendum pertinent. *Exercit. in Psal. 45. p. 582.*

§. XI.

Devenimus nunc ad ea verba, quæ hætenus tantum noctis & caliginis plurimis interpretibus habuisse videntur, cum Apostolus versu 22. ita scribit : Ὅτι δὲ
μεν γὰρ, ὅτι πᾶσα ἡ κτίσις συγενάσκει, καὶ συνωδίνει ἅξει νυν.
Novimus, quod tota creatura congemescat, & una parturiant usque nunc. Ex iis, quæ jam dicta sunt, quilibet hæc verba facile intelligit. Diximus jam supra, nos per *creaturam*, cujus frequens in hac pericopa mentio, intelligere Judæos solos. Huic creaturæ tribuitur primum *sollicita* Messiæ & felicioris œconomix *expectatio* versu 19. huic creaturæ etiam tribuitur *vanitatis subiectio*, versu 20. Ipsi adscribitur *spes liberationis* versu 21. & nunc tandem *gemitus & dolores parturientium*; Ergo eadem est *creatura*, cui hæc adscribuntur, nec contra se invicem ullatenus pugnant, sed hæc omnia sunt iustissimo ordine subordinata. *Congemescit* hæc creatura, ex ratione versu vigesimo & vigesimo primo jam allata, quia est vanitati, iugo duro & acerbo, servituti ad nihil proficienti, subiecta. Quæ jam variæ & fere infinitæ sint de hac creatura sententiæ, jam ab initio Dissertationis diximus. Ego vero jam bonum lectorem testem compello, & assertionis nostræ arbitrum, an non ex iis, quæ jam occupata sunt, lucidissimis argumentis & rationibus fluat, Paulum in hoc

loco intellexisse fratres suos Judæos, tanto desiderio Messiam petentes, flagitantes, exorantes & expectantes. Neminem autem, quantum novi, hætenus legi, qui solos Judæos ad hanc creaturam suspirantem & anhelantem referat, quam solum *ANTON. BLACKWALLUM* in *Crit. Sacr. N. T.* pag. 314.

Anglum, quem nuper Latina civitate donavit Christoph. Wollius. Itaque, inquit, *ὅτι ἀντιδεχόμενος ἡ κλῆσις ἐστὶ γένος Ἰουδαίου, ἐαυτῇ fide Servatori nondum devota & consecrata.*

Quædam etiam, licet pauca, argumenta attulit Vir Doctus, quibus hanc suam firmaret sententiam, plura haud dubie & fortiora additurus, si rem totam, qualem haud dubie concepit, longis rationibus voluisset fulcire. Sed hoc loco respondendum ad argumentum fortissimum, & quod plurimis vere Achillæum videbatur, & illis præsertim, qui το πᾶν, rerum universitatem, nobis pro creatura gembunda obtrudunt, dicentes, quod *omnis creatura ingemiscat.* Ergo, si omnis ingemiscit, dicunt, non soli Judæi. Facile reponimus, quod hæc eadem illa sit creatura, de qua jam sæpius Paulus fuerat loquutus. Tota

ergo Judæorum natio collectivè sumta vocatur *πᾶσα κλῆσις*, scil. omnis Judæorum populus; facile enim sine mora videmus, quod Apostolus non omnes creaturas, nec omnes gentes intelligit, quia statim in versu sequenti hanc universitatem restringit, dicens, *non solum autem illa, sed & ipsi, qui primitias spiritus habemus, ingemiscimus.*

Ergo Paulus sub nomine *creatura gementis* non intelligit creaturas novas, qui primitias Spiritus Sancti jam acceperant, & ideo etiam sub nomine *πᾶσις κλῆσις* nulla quærenda creaturarum rationalium universalitas. Hæc mihi adeo clara videntur, ut nulla difficultas locum admittere possit. Norunt etiam interpretes omnes, quod vocula *πᾶσα* non semper in scriptis N. Fœderis ita universaliter sit accipienda, ut non sæpius potius magnum hominum

pumē-

numerum, quam omnes indiscriminatim homines significet, cujus rei exempla Theologi plurima producant. Cum ergo dicitur, quod omnis *creatura ingemiscat & parturiat*, de toto Judæorum, Messiam cum promissa liberatione expectantium, populo intelligendum est. Aperte enim distinguitur à *παρακλησει*, illa quæ jam primitias Spiritus Sancti acceperat. Ergo *παρακλησις* est natio Judaica, nondum illuminata. Nec certe gentes, minus adhuc creaturæ reliquæ, sive animatæ sive inanimatæ, promissiones de futuro hoc Liberatore & Servatore ignorantes, ingemiscere possunt; nam verum illud tritissimum, *ignoti nulla cupido*; tribuitur vero non *gemitus* tantum, sed & ad *pariendum conatus*.

§. XII.

De hac vero creatura, quam supra descripsimus, dicit primo Paulus, *συστενάζει*, una *congemiscit*, tantum ergo valet quod *συστενάζει*. En quam apte & egregie hoc iterum universæ genti conveniat Judaicæ, quæ non quasi ore & pectore suspirat, omnis vel tota illa gens *gemit*, pressa iugo legis, pressa illo tempore, quo Apostolus hæc scribebat. Sceptro Romano, gens libera in alienam & peregrinam redacta potestatem, gentilium & idololatrarum horrens capistrum; Una ergo tota illa natio gemebat, optans, anhelans, calidis precibus expetens, illum Goelem promissum, à quo sibi terrestria potius & mundana comoda, quam spiritualia promittebat. Noverant Judæi, tempus adventus Messiae per signa à Prophetis descripta advenisse, inde quid optatius, quid gratius, evenire potuisset, quam magni liberatoris adventus? Merito ideo illum gemitu, suspiriis, precibus, imo & lacrymis provocabant & accersebant. Pergimus ad *dolores partus*, in quibus exponendis hætenus interpretes artem suam & industriam frustra collocasse videntur;

Inveniunt equidem figuras Rhetoricas, secundum quas hæc exponunt, sed, quam convenienter, nondum video. Magnus scripturæ interpret *LAMPIUS* in *Commentar ad Psal. 45. p. 583.* pro suo ingenio, & ad hunc locum systemate, dolores partus tribuit Ecclesiæ Vet. Testamenti ad Ecclesiam ex gentibus per jugum ceremoniale & varias tribulationes producendam, & quasi pariendam. Hæc equidem & non alia de his partus doloribus dici potuerunt, secundum systema, quod sibi Vir Clarissimus pro explicando hoc loco fecerat. Ut autem nobis clarum fiat, quid Paulus intelligat per hunc pariendi *creatura gemebunda conatum*, dicendum primo est, dolorem partus nemini haud dubie tribui posse, quam mulieri gravidæ; aliter qui faceret, is apud sanos omnes insigniter insaniret. Cum autem Messiam, ut jam sæpius dictum, anxie admodum expectarent; Atque illis facta fuisset promissio, cum exiturum ex medio illorum, illum tuturum filium Davidis, fratrem eorum, Ecclesia Judaica in hoc loco considerari debet generaliter tanquam mater, ex qua Messias secundum carnem exiturus esset; Lucem autem, secundum prophetarum oracula, erat visurus eo tempore, quo res Judæorum futuræ essent in statu afflicto & anxio, *ablato Sceptro*, Gen. 49: 10. cum secundum vaticinium Isaaci *fractum fuit jugum fratris Esavi*, quod à Jacobo, hoc est, à Judæis, Idumæis fuerat impositum, Gen. 27: 40. regnante Herode Magno, qui Romæ nomen Regis fuerat consequutus, atque hoc modo unus ex posteris Esavi regnavit in Judæos; Cum *judices Israelis virga fuere percussi in maxillam*, Mich. 5: 1. hoc est, urbs Hierosolyma per Pompejum in Romanorum fuit tradita imperium, cum *cælum & terra fuit commota*, Hagg 2: 6. hoc est, varia Dei judicia in Judæos, antequam domus secunda gloria Messiae impleretur, effusa, annonæ caritas, pluviae defe-

defectus, pestilentiae, hostium arma, interni motus, per totam Palæstinam comparerent. Omnia hæc erant dolores partus, antequam nasci potuit magnus ille serpentis antiqui debellator. Testes habemus ipsos Judæos, qui dicunt, quod Messias nasci non possit, nisi post præcedaneas gravissimas calamitates, ut hæc exponit magnus Scripturæ interpres *VITRINGA* Observat. Sacr. Lib. V. cap. 6. p. m. 89. his verbis: *Judæorum communis est persuasio, salutem sibi promissam circa extrema mundi tempora representandam non esse, nisi post præcedaneas afflictiones & calamitates gravissimas, quas illי משיחא dolores Messiae vocant.* Plura de his *MEUSCHENIUS* in Nov. Testam. ex Talmude illustrato, p. 1181. Et hæc sunt, quæ mihi de his *ωδιναίς* ex scopo Pauli dicenda videntur. Hos dolores tribuit huic creaturæ *ἀρχὴ τῆς νῦν*, usque nunc, sive usque ad illud tempus, quod Apostolus hæc scribebat. Sensus est, quod licet comparuerit & natus fuerit Messias, Judæi tamen nihilominus eum non agnoscant, non videant, sed adhuc expectent & optent, & quod adhuc sentiant illam anxietatem, quæ evenire debebat tempore adventus Messiae.

§. XIII.

Ille quæ sequuntur in versu 23. qui ultimus est, qui nobis considerandus venit, egregie adhuc nostram fulciant & muniunt sententiam, cum ait: *Οὐ μόνον δὲ ἐκεῖνα, ἀλλὰ καὶ αὐτοὶ τὴν ἀπαρχὴν τῆς πνεύματος ἔχοντες, καὶ ἡμεῖς αὐτοὶ ἐν ἑαυτοῖς σενάζομεν, υἱοθεσίαν ἀπεκδεχομενοὶ τὴν ἀπολυτῶσιν τῆς σαρκὸς ἡμῶν.* Non solum autem illa, sed & ipsi, qui primitias spiritus habemus, & nos ipsi in nobismet ipsis gemimus, adoptionem expectantes redemptionem corporis nostri. Ex hoc versu facile colligimus, quod illi haud dubie peccant, qui ex præcedenti versu universalitatem omnium creaturarum inferre tentant. Opponitur vero creatura ingemiscens creatura

ræ, quæ primitias spiritus accepit. Docet autem Paulus fratres suos Judæos, se eundem cum illis fidem, spem, consolationem & requiem, concipere & expectare. Omnis spes reposita erat in futuro illo promisso liberatore; Judæi hunc futurum expectabant, Paulus hunc præstitum amplectitur, ideo ulteriores fructus atque beneficia ab eo expectat, redemptionem scil. corporis sui; Adoptionis ergo non jus modo, sed & fructus & complementum, per redemptionis meritum & efficaciam, quæ omnia modo perfectissimo in altera demum vita consummanda erunt, Paulum vero ad solos loqui Judæos, iterum nos hoc convincit argumentum, quia voce utitur ex sacris Judæorum desumpta, atque gentilibus plerisque, conversis & non conversis, ignota. Judæos enim fratres suos, hæcenus ad Christum conversos, vocat ἀπαρχας, respiciens haud dubie ad תרומות *primitias*, quas Judæi offerebant, Nehem. 13: 5. & quæ datæ fuere Sacerdotibus in templo ministrantibus. Notandum tamen, quod Judæi distinctionem omnino fecerint inter *primitiva*, & *primitias*, illa בכורים, has autem תרומות vocabant. Distinctionē satis obscuram & confusam Philologi fere omnes adferunt, ex qua, quid discriminis ponendum sit, non facile liquet, hinc etiam quidam primitiva & primitias unum & idem faciunt, vel potius confundunt. Differentia autem hæc ponenda, quod *primitiva*, sive בכורים, conveniant cum illis oblationibus sacris, quas Græci vocant πρώτογεννημάτα, Exod. 23: 19 Deut. 26: 2. erantque munera sacra, quæ de frugibus integris in templum adferebantur, scil. de uvis, ficibus, malogra-natis, olivis & dactylis. Spectabant ergo primitiva primos fructus, quales afferebant eo modo, quo crescebant. Alia autem ratio *primitiarum*, quas Græci vocant ἀφαιρέματα & ἀπαρχας των γεννημάτων, has non eo modo, quo ex terra erant enatæ fruges, sed
 ad

ad esum & usum paratas dabant ; qua ratione potissimum à כֹּרִים distinguntur , atque ex mente Judæorum quinquagesima pars frugum debebat offerri, quam oblationem sub communi nomine תְּרוּמַת טָבֵחַ comprehendebant. Prolixius de his *SPENCERUS* de Legibus Lib. 3. cap. 9. p. 74. edit. Tubing. nec non *JOH. CONRADUS HOTTINGERUS* in erudito opere de Decimis Hebr. p. 118. Quomodo vero fideles ex Judæis nomine primitiarum venire possint, jam nobis explicavit supra laudatus *ANTON. BLACKWALLUS* Critic. Sacr. p. 313. Non incommode, inquit, Judæi iis jamjam temporibus ad Christum recens conversi, in quo Paulus tum fuit numero, ἀπαρχὰς πνεύματος primitias spiritus habere dicuntur ; cum causam appellationis hanc esse puto , quoniam hi reliquos fratres ac cives, quotquot Salvatori nondum sese devoverant, tempore antecedeabant, atque adeo prius quam illi, eximiis Novi Testamenti privilegiis perfruebantur, ἀπαρχὴ enim est תְּרוּמָה, id quod ante decimas Deo sacrabatur, unde dici capit de omnibus iis, qui alios tempore antecedunt. Vide Rom. 11 : 16, 1. Cor. 15 : 20. 23. & 16 : 15. Jac. 1 : 18. Consimiliter exponit *GLASSIUS* in Philolog. Sacr. Lib. V. cap. 13. p. m. 1892. Credentes dicuntur habere primitias spiritus, quemadmodum Israelitæ ex primitiarum oblatione spem concipiebant reliquarum frugum, suo tempore, Deo benedicente, accipiendarum, ita credentes ex donis Spiritus Sancti concipiunt spem plenitudinis gaudiorum cælestium & messis illius gloriose ; Quidam de solis Apostolis intelligunt, qui primitias, hoc est, primos fructus Spiritus Sancti acceperunt, ceu in quos primo effusus est Spiritus Sanctus miraculose, Act. 2. Sed prior explicatio simplicior, & scopo Apostoli conformior est. Hæc Virorum Doctorum in hunc locum commentatio nobis ad illustrationem potest sufficere. Perplacet *GLASSII* sententia, qui ἀπαρχὰς τῆς πνεύματος refert ad omnem illam primitivæ Ecclesiæ, Hierosolymitanæ præsertim, ex Judæis potissimum collectæ fidem &

& Evangelicæ doctrinæ illustrationem. Consimilia ex variis Scripturæ interpretibus etiam ad hunc locum collegit Rev. atque Clariss *JOH. CHRISTOPHORUS WOLFIUS* in *Curis Philologicis & Crit. ad b. l.* quem jam exscribere nolumus, cum in omnium sit manibus. Prolixe autem atque erudite, ut solet, primitiarum Judaicarum ad primitias sacras applicationem & tractationem nobis exhibuit *LAMPIUS* in *Fœdere Gratiæ. Tom. III. Sect. 2. p. 1172.* ad quem, tanquam uberrimum fontem, lectorem remittimus. Reliqua vero hujus versus verba magnam difficultatem non habent, ea tamen latius illustravit *QCCG EJSUS* in *suo Commentar. in Rom. ad b. l.*

Habes jam in his, mi lector, brevibus atque simplicissimis verbis, (grandis enim atque calamistrata aliis relinquo;) depictam in hunc locum vexatum nostram meditationem; sua se illa, quantum confido, naturali simplicitate commendabit. Si autem cuidam in his errasse videar, ut talem amplexus sententiam, quæ non ab omnibus difficultatibus sit libera, ille me certe magno alligabit beneficio, si meliora & certiora mihi detexerit. Bonum vero lectorem obnixè rogamus, ut judicare velit, an non admissa hac explanatione omnia inter se cohæreant, ut facile ex nexu & concatenatione difficultates omnes solvi possint. Si autem quædam remaneant, quantum confidimus, tantæ non erunt, ut non plures & longe majores in omnibus hætenus expositis explicationibus inveniantur. Facile fuisset dilatare prolixius argumenta, hanc nostram assertionem firmanitia, sed noster scopus hic non erat. Pauca attento lectori sufficient, plurima ad aliam hæc explanandi viam deflecenti satis non erunt; in hoc ergo merito conquiesco Catone.

T A N T U M.

V. GOTT-

V.

GOTTHARDI HEI-
DEGGERI,
TIGURINI,
PETRUS LAPsus.*

Argumentum.

§. I. Cum Cingulo Aaronis comparantur Opera Sanctificationis. Cur Deus Petri Lapsum permisit? §. II. Prædictio ejus. Scopus Satanæ Petrum tentantis. §. III. Lapsus triplex cum præcipuis circumstantiis describitur. §. IV. Petrus lapsus non penitus fidem amisit. Perseverantia Fide-

* Quum paginæ aliquot complendæ restarent, non alienum ab hujus Collectionis scopo visum, si (cum Cel. Editoris & Benev. Lectoris venia;) ab interitu vindicaremus Dissertatiunculam Viri, dum viveret, Ingenii acumine & fertilitate, atque Eruditionis multiplicis apparatu, innumeros alios plurimum superantis; uti vel ex hoc primitiarum Specimine cognosci potest, quod Anno 1687. sub Moderamine JOH. CASPARI WOLPHII, S. Theol. Prof. & t. t. Scholarchæ, in publicæ συζητήσεως argumentum fuit propositum. Natus autem erat Deodorus Gentangulus (quemadmodum Ven. SAMUEL WERENFELSIUS, Theologus Basil. longe Celebrissimus, Authorisque olim Amicus non vulgaris, No-

Fidelium adstruitur & vindicatur. Perronius & Bellarminus taxantur. §. V. Observantur nonnulla de Gallicinio; Marcus cum ceteris Evangelistis conciliatur. §. VI. Accedente Christi aspectu Petrus conversus, poenitentiamque seriam lacrymis amaris & trina confessione testatus. §. VII. Usus Practici indigitantur. §. VIII. Romanus Pontifex Petri est Successor nonnisi in Abnegatione Christi.

* * * * *

PETRUS Christum abnegans.

§. I.

DE Aaronis cingulo, aspero signis & sculptura ornatuque protuberante, Exod. 39: 5. dicitur מִמֶּנּוּ הָיָה כְּמַעֲשָׂהוּ; hoc est, ut versio nostra vernacula reddit: *Veluti ex ipso procresebat.* Opera sanctificationis in sacris cingulo comparari infrequens non est. Vide 1. Petr. 1: 13. Luc. 12: 35. Quod cingulum tam affabre factum applicatumque est, ut dici de ipso possit מִמֶּנּוּ הָיָה כְּמַעֲשָׂהוּ; *Ex ipso, scil. homine, illud tanquam opus ejus.* Attamen ὡς ἐκ ἑαυτοῦ, ait Apostolus. Verum ut Bezaleel ibi faber est, ita hic artifex Dei dignus,

men Ejus latine vertit. *V. Werenf. Opusc. p. 660.*) Tiguri d. 4. Aug. 1666. in numerum V D. M. receptus 1687. & postquam, tum apud Rheguscos tum Rorbati in Agro Tigurino, per plures annos Ecclesiae Pastorem egisset, factus tandem A. 1705. Inspector Collegii Alumnorum; in quo munere obiit d. 24. Martii. A. 1711. à Hæmorrhoidibus frequentibus & Hydrope confectus, cum nondum 45. annos expleisset, Vir vita longiore, si quisquam, dignissimus. Scriptorum ejus in lucem editorum Catalogum, mantissæ loco, Dissertationi subjiciemus. J. J. H.

tus, Spiritus sanctitatis. Dici posset, quod alio aliquibi sensu Petro Servator : *ἄλλος σὲ ζώσει, alius te cinget.* Sed clare Matth. 16. cum confessionem suam edidisset, dixit : *Caro & sanguis tibi hoc non revelavit, &c.* Quod ne non idem Apostolus, nimis aliquando sibi fidens, sibi ac in Persona sua, velut è nobili Theatro, idem, ac τὸ ὑπερέβαλλον simul divinæ gratiæ μέγεθος, quo Jehova, ipso illo maxime tempore, quo regni Cœlorum & N. Testamenti κύρωσις præ manibus erat, Θεὸς πάσης χάριτος quam luculentissimè evadere voluit, repræsentaret, statuit πολυποίκηλος hujus sapientia, gravissimum ejus lapsum permittere. Quo de paucis acturo aspiret Deus !

§. II.

Labori faber, video, deest, non fabro labor. Ordiendum tamen. Diserte Petro hunc lapsum Servator prædixit, Matth. 26 : 34. Luc. 22 : 24. Marc. 14 : 30. Joh. 13 : 38. Nec alio referenda est συνίσις illa, quam ἐξητήσατο Satan, precibus quasi obtinuit ; prout & alibi tentationem Jobi, & Matth. 8 : 31. 32. porcos intrandi copiam. Unde perspicitur, quod mali fons ab uno Satana hic sit arcessendus, licet Servator, rector & medicator mentium, ex alta providentiæ specula ante hoc prospiceret. Certum itaque erat Satanæ, aut Christum ut ψευδοπροφήτην traducere, quo pacto per discipuli latus in Magistrum ipsum impressionem moliebatur, aut si hoc non succederet, Petrum, cujus egregia confessio tussim ipsi proritavit, egregie διασελεῖν.

§. III.

Ad votum processit fraus. Tempus erat, animam quo in mortem effundere Goël volebat noster, & evadere מכה אלהים, percussus Deus, sive Dei, cum magna facilitate, ad offendendum in eo. Ut in Capharnæ Palatium rapitur, omnes fere discipuli ejus, ceu

ceu grex pastore orbatus, *in tenebras ipsi facti sunt*, seu disparuerunt, ut Psal. 88 : 19. prædictum erat. Petrus ἀπο μακρόθεν servat vestigia, mixto curiositati, quæ avebat videre finem Domini, pudore, quo μεγαληγοριῶν suarum memor, fugere cum cæteris adhuc sibi interdixit; ut jam meticulositatem segniter celet, eminus sequitur, cuius nimis πρόθυμον πνεῦμα ire in præsentem mortem pollicebatur, nisi κομπασῆς fuit, Apostolus ejusmodi γαργαλισμοῖς non carens. Torquet vestigia ad ignem, ut jam deferbuisse, imo congelaciassse, zelum ejus colligas. Non dimittens ejusmodi occasionem veterator, mulierculam in eum expedit, quæ inter sequaces Christi ipsum esse causatur. Mox plane nostro jactatori animus sidit; Negat. Quæ fronte, Petre? Vel an *catena crepuit*, lora insonuerunt, gladius fulsit, aut *mors prope admota magnifica verba excussit*? Nihil horum. Ad mulierculæ garritum Christum abnegat, idque *coram omnibus*, veritus vero neminem; Saltem enim Evangelistam hoc addere, *ne injuria videretur Principem Apostolorum accusare*, MALDONATUS dicens, helleboro opus habet. Sed videri poterat Petrus abnegasse Christum ὡς in *præcipitantia sua*, nisi ad eundem denuo impegisset lapidem; Ut mox *eadem*, & alia quoque, & alius non nemo adoriuntur, negat iterum Petrus, nec negat solum, sed negat μετ' ὄψεω. Vix hora interjecta, Malchi, cui animoso ictu auriculam præcidit Petrus, cognatus accedit, arietat, expugnat; occipit καταναθεματίζειν Petrus καὶ ὁμνύειν. Sicque Christum abnegavit, mox abnegavit & juravit, inde abnegavit, juravit & diris se devovit. Ecce illam confidentiam: *moriar Tecum!*

§. IV.

Quod vero quis deletam penitus ex eo fidem, radicatusque revulsam existimet, non est. *Oravit pro ipso Dominus, ne deficiat fides ejus.* Hinc illæ lacrymæ, quæ

queis perjurum postea os abluit. Graviter *conculsum* fuisse *fidei robur*, nemo quidem infiteatur; facinus enim designavit non ex veloci incogitantia, sed contra conscientiam, cui vastum vulnus impexit. Nec putandum est, ita hæc efficaci unius carnis fraude esse prolectata, ut non subinde

Fessus quidem, haud dejectus & pessundatus,

Pudor rebellaverit, —————

& contra steterit Spiritus, ac tandem desperata victoria arena cesserit; carniq; dominium commiserit; invitus autem. Nam, ut nunquam fideles, cum vel liberrime Spiritus habenas tractat in ipsis, à carnis *καταδύσεις* sunt liberi, ita nec unquam adeo tropæa carnis explicantur, quin subinde Spiritus, se nondum pessundatum, & cui *spoliato arma*, & victoriæ, accedente divina gratia, non dubia spes supersit, suis signis se pròdit. Hinc Spiritum Sanctum fidemque Petro non *excussam* patet. Neque enim Spiritus Dei ita ambulatorius, ut discedat quidem, demum & redeat unde discesserit, mox, si res ferat, denuo erupturus, forteque, si forte hominis resipiscentia mereatur, rediturus iterum. Ita infernalis *Peripateticus* consuevit, ut videre est Matth. 12: 43, 44, 45. Igitur fidelium Perseverantiæ præjudicium Petrus adhuc nullum exhibet, ceu in quibus omnibus non est *κατάκριμα*, seu *עון מללים*, iniquitas, ob quam iudex condemnet, Rom. 8: 1. Job. 31: 28. Quid multis? sunt *כרר ציון* sicut mons Zion, Psal. 125: 1. Circuite autem Zion, cingite eam, numerate turres ejus, considerate propugnaculum ejus, videte ut sint celsa palatia ejus, &c. Psalm. 48: 13. & ne quid ceu instructissimo fortalitio desit, *Δύναμις Θεῷ*, potentia Dei *Φυλακὴν*, seu

————— galeatum ponit ubique

Præsidium. —————

Quibus omnibus non *Princeps hujus Mundi*, non *Rex*
Tom. III. *Z z* *ter-*

terrorum, pares copias, pares insultus, paria stratagemata & μεθοδείας, pares arietes, helepoles, licet omnia magna & terrifica, opponat. Ut sileam, quod justus quivis Spiritui sancto יסוד עולם, *fundamentum æternum*, σερεὸς θεμέλιος τῷ Θεῷ, firmo certus sigillo, (quod nequicquam PERRONIUS Cardinalis, Deo appensum, non ipsi *fideli*, dicitavit; candide quidem, ceu, si dicere fas sit, juxta conscientiam, illud in se non deprehendentis, stimulos locutus; nisi frivolum foret, ex se de cæteris arbitrari;) appellatur, nec *piorum*, sapientissimi effato, radix unquam *moveatur*; quanquam videlicet arbor cætera, qua ventis patet, nullo non turbine, folia decutiente, & hyeme mortis simillimam speciem inducente, velut arefcere, imo quandoque *evicta* vi, trahere jugis *avulsa* ruinam videatur; in Deo tamen quoad radicem abscondita nunquam eruitur, succo orbatur nunquam, & nunquam ינתק מכחו *eradicatur spes ejus*; quin ceu grandilocapia arbor vexatione *constringitur* & radices *certius* figit, & cum exaruisse existimes, מים יפריח, *attrahæto humore germinat, exhibetque fructus decerpandos, ut plantæ solent.* Ut mirari subeat, cur Romanenses, cunctis fidelibus, Petro excepto, cui *indelebilem fidem* facile gratificantur, adeo sint difficiles. Scilicet, Papæ suo ut placeant, & modo placeant, ipsis *quidlibet* fingendi *semper* fuit aqua potestas. Quod autem BELLARMINUS in Petro *amplius* aliquid, quam perseverantiæ donum agnoscat, ab eodem est diagrammate. Petrus, ut perseveraret, aut quod perseveravit, aliquid *amplius* quam perseverantiæ donum habuit: quis hoc capiat? Petrus habuit, fidelis quivis habuit Deum, qui *conservat animas sanctorum suorum*, qui in suos effundit רב, μέγεθος, *amplitudinem bonitatis*, ἀντιλήπτορα Christum, qui ne fides deficiat orat, συναντιλήπτορα Spiritum, qui arrhabo est & deprecatur pro suis σεναγμοῖς ἀλαλήτοις; φεραὶν ἐν δυνάμει Θεῷ.

Θεῶν, *semen semper manens*, σφραγίδα *ut fundamentum Dei*; quæ, & alia ejusmodi, nisi sunt amplissima נִכְבְּרוֹת, δεδοξασμένα, sufficientissimaque, quid fides *amplius est*? מה לעשות עוד, *Quid faciendum amplius Jehovæ?*

§. V.

Est autem notabile, quod, quo tempore Petrus ter Christum abnegavit, Gallinaceus, qui forte in aula erat, nocturno suo cantu inter tot strepitus defunctus, terna quasi confessione Creatorem suum prosecutus, atque adeo, juxta Dei providentiam, imo constitutionem, lapso tantopere Petro, velut opportuno memoraculo, *surdum conscientia verber & trilitiam secundum Deum incutere debuerit*. Prædixit nempe Servator, fore, ut priusquam ter Gallinicum audiatur, ter Petrus, quod adeo detestatus erat, designet. Scilicet, seu quia, juxta *Democritum* apud *CICERONEM*, *depulso de pectore & in omne corpus diviso ac modificato cibo, cantus edunt quiete satiati; qui quidem (ut ait ENNIUS) silentio noctis favent faucibus, rursus cantu plausuque premunt alas, seu si alia potius sublit causa, servant galli statuta tempora cantus nocturni*. Præprimis vero *instantis signa canens dat Gallus Eoi*; unde non defuerunt, qui hinc horologiorum nocturnorum defectui compendium reperierunt. Præteriri etiam non potest, istam phrasin, priusquam galli cantent, reperiri apud profanos passim Authores. Ita *Comici* alicubi dicit *PERIPLECTOMENUS*: *Verum priusquam galli cantent, quæ (uxor) me somno suscitet*. Ita *SATYRICUS*:

*Quod tamen ad cantum galli facit ille secundi;
Proximus ante diem canpo sciet.*

Ita *ARISTOPHANES*: Ὅτι τὸ δεύτερον ἀλεκτρυὼν ἐφθέγγετο, &c.

Nodus est non dissimulandus. M A R C. cap.

14 : 30. habetur : *Priusquam bis cantet gallus , ter me abnegabis.* Et post primam abnegationem jam cecinisse dicit v. 68. At reliqui Evangelistæ simpliciter habent: *Antequam gallus cantet* , quem post tertiam demum abnegationem cecinisse memorant. Dicunt quidam cum THEOPHYLACTO, intelligi à Christo integrum gallicinium suis constans vicibus, quod non ante absolutum sit, quam & trina abnegatio. At vero, cum notum sit, cantum matutinum, qui sit circiter horam tertiam, omnium esse clarissimum, maximeque statum, distingui potest gallicinium in *secundarium* , quod diversimode per totam noctem auditur, & *primarium* , de quo dixi, quod & κατ' ἑξαχμῖ ita appellari solitum est, ut facile patet ex Marc. 13 : 35. Quæ distinctio facile applicari potest.

§. VI.

Præter hoc gallicinium, Petrum, admissio lapsu, mox facie gratiæ Servator conversus aspexit, conversumque statim dedit; novum haud equidem habitum infundendo, sed pristinum loco motum restituendo. Hinc dicitur mox *recordatus* verbi Domini: *Abnegabis.* En! jam oblitus erat; Tractanda & memori figenda pectore tanta res erat: Sed tamen recordatur. Præterea עיני דיוה oculi aspicientis ipsum Domini elicuerunt ex oculis Petri פלגי מים, *rivos aquarum*, ex aula enim se proripuit δακρυόεν. Non dixit: וואו ἀποκίνοισται, *conclamatum, desperatum est*; non abivit ויחנק, καὶ ἀπνέχεται, *strangulatus est*, ut Judas; Sed salutaris contritio & pœnitudo post Deum, qua sibi videbatur effusus velut aqua, excussit oculis tristitiæ guttulas, quibus perfidum os lustravit; flevit enim πικρῶς, *amare*, totus erat in vultu dolor, & quiritationibus misti singultus, salientibus oculis, *expulso invisa die*, ad terram dejectis. לשלום מר לך מר, *in pacem tibi amara hæc amaritudo, Petre*, ברע פנים ייטב לך

cum tristatur facies, emendatur cor. Non, quod lacrymis proprie peccatum piaverit; istud enim, quam modo adiit, Christi mors retroacta efficacia efficere debuit; sed quod id demonstraverit. Et quia Deus *עשה את זה למען זה* *res ex adverso sibi respondere facit*, post resurrectionem, trinam quoque ex eo, eamque pientissimam, confessionem elicuit, qua se is Servatorem flagrantissimo, ceu vero ipse, ut omnia, sciat, amore complecti, prætereaque, tentante licet Domino: *Plusne quam cæteri?* conf. Matth. 26: 27. omnem arrogantiam, cæterorumque contemptum, dedidicisse liquidum fecit; Ut vel hinc agnoscas, cur Deus suorum lapsus permittat, nimirum ut ostendat, nihil non *malum sibi bonum esse*, dum eo *competenter utendo alicujus boni elicit effectum*; merito ita & sapienter BOETHIO judicante.

S. VII.

PETRUM intuendo, AUGUSTINI verba, admoneri nos oportet, ne homo quidquam de humanis viribus fidat. Nam quid aliud pertinuit ad Doctorem Salvatoremque nostrum, nisi ut nobis nequaquam de se quenquam præsumere debere, in ipso primo Apostolorum demonstraret exemplo? Atque adeo probe agnoscere, *כִּי לֹא בָכָה יִגְבֵּר אִישׁ*, quod nullus vir in viribus suis fortis est. Non igitur *ἀλλοφρονεῖν*, altum sapere, sed timere & considerare nosmet ipsos, ne & nos tentemur, sicque cum timore & tremore operari, seu conficere, salutem nostram; eoque magis Deum misericordiarum porrectis in excelsa precibus venerari, ut ipse annuat nos *καταλείπειν, σηκίῃ, δεινῶσαι, δαμελιῶσαι*; & si in peccatum labamur, manum nostram sustentet, ne collabamur, sed ejus gratia, seriatque mox conversione

Remeemus illuc, unde non decuit prius

Abire: ———

Denique non *ἐνίξασθαι, ὡς ἐννυ συμβαίνοντος*, si & ho-

diernis temporibus piorum permulti propter hostilem cum Petro *focum*, hoc est rogos & feralia pegmata, Christum abnegant. Fatendum, *immane esse scelus, sed occupatum*, & paradigma positum αἰνισμῶν Dei infinite adhuc majorum.

§. VIII.

Et non est, cur Romanus Pontifex, PETRI, si Diis placet, in universali dictatura, SUCCESSOR, comparisonem cum eodem Christum abnegante subterfugiat; eo certe minus, quo dissimilior in cæteris; quin & in hoc, quod, cum Augustino, imo Salvatore teste, Petrum *non fides in corde, sed confessio in ore deficeret*, illum illa potius semper defecerit, hac quantenus remanente; existat. Sed videamus. Quod enim dicit: *כל יגשי לא ימצאו לי עון אשר חטא*, omnes qui fatigantur in me, non invenient iniquitatem in me, que sit peccatum; hoc est, eandem habere se, quam Christus infallibilitatem, fide vix implicita credatur. Ille igitur, initio quidem ἀπὸ μακρόθεν Christum sequutus, ubi prope fumum vidit, ad id curas appulit, ut egregie calefieri, & efficere ut assiduo luceat igne focus, potius posset, quicquid interim de Christo fieret. Hinc negare eum necesse fuit. Factum id sensim, & colubrina cum astutia, malitia vero eo majori, quod sub colorato Christianæ Religionis mantelo latere voluit. Se Caput Ecclesiæ, Episcopum Oecumenicum, non purum hominem (sit ergo impurus) facere, vocare Patrem & Doctorem omnium fidelium, Sponsum Ecclesiæ, in omnia Christi officia se intrudere, ABNEGARE est CHRISTUM. Secus sentientes anathematibus & diris siderare, Christum est ejurare. Quod si inter Romanos Pontifices, qui Monothelitæ, qui Euty-chiani, Arriani; qui spurcissima, omni impudentia fattente, monstra, apotactici, & apostatici; qui aperte athei, ut fabulis annumerarent, quicquid de Christo alii confessi

fessi erant ; qui venefici , qui egregii Cacodæmonis parippi fuerunt ; in proscenium produci debeant, totidem comparerent facerrimi Apostatæ & Jovem lapidem jurantes, *se non nosse Christum.*

Ut vulgo insigni jam de nebulone feratur :

Tam malus est nequam , Christique inimicus
& osor ,

Ut fieri possit papa. —————

Quid multis ? nostris temporibus , quo glaucomate omnes percutere vult , appingendo sibi agni cornua, en ut segniter Draconicos sibilos, ungulasque celet ! *Confidenter dicimus*, ita noti illi Fratres, non postremi *Babylonicarum mercium clitellarii*, *si articuli fidei ex sola Scriptura sint probandi testimoniis necessariis, articuli etiam necessarij sub ratione necessitatis ; Reformatos in æternum non probaturos Divinitatem Salvatoris nostri Jesu, sub ratione articuli fidei & necessarij, sive terminis expressis Scripturæ, sive conclusione ex Scripturis deducta.* Confidenter quis reposuerit : Si hæc est mens Papæ, & vero est, jam negat *JESUM esse CHRISTUM* ; quod enim negat demonstrari à Spiritu Sancto in scripturis, negat verum esse. Et quo pertinet, quod ita sævit, atrocissime omnium quidem his temporibus, * in eos qui Christum in sinceritate confitentur ? Sed facile hinc patet, & ultro fatemur, quod Petro ex infirmitate lapsa laureolam præripuerit ; quippe de qua Pilato potius & Cajaphæ & nullo non carnifici, imo Satanæ controversiam facit ; eo magis quod, pro gratioso vultu, quo Petrum Servator aspexit, huic cornea fibra sit ; ut dicat : *אֵינִי רֹאֶה לְנִצָּחַן* *avertit faciem suam, nunquam videbit.*

* An. 1686. seqq. quibus Persecutio Gallica quam maxime recrudit, & in immanes furores erupit. V. Mr. CLAUDE, les Plaintes des Protestans, cruellement opprimez dans le Roiaume de France, p. 42 - 66. Conf. HEIDEGGERI nostri Acerr. Philol. p. 811 - 816. J. J. H.

* * * * *

MANTISSA.

*Catalogus reliquorum Scriptarum*GOTTHARDI HEI-
DEGGERI,

Quæ in lucem prodierunt.

1. Apollo Auricomus ; oder Schuß , Rede der Schönen Haare , vor den beschriebnen Vätern gethan , mit hastiger Feder aufgesungen , und dem curiosen Leser zu Nuß und Lust aufgetragen , durch Winckelriedt. Zu Irgendshausen 1692. 12. Bogen 7.
2. Neu = geflochtene Zucht = Ruthe ; mit welcher Pater Fr. Rodolphus von Schweiß , gewesener Guardian der Capucineren zu Nâfels , von wegen seiner den Evangelischen Glarneren ganz unfürsichtig und wider Gelübde gegebenen 15. guten Râthen , zu wolverdienter Poenitz , und andern Kloster = Brüdern zu heilsamer Wahrnug , gemäß der Apostolischen Constitutionen mortificiert wird , durch Fr. Hilarium Stauppizium , S. Inquisitionis Famulum. 1696. 8. Bogen 7½.
3. Mythoscopia Romantica , oder Discurs von den so benannten Romans ; das ist , erdichteten Liebes = Helden = und Hirten = Gedichten ; von dero Ursprung , Einrisse , Verschiedenheit , Nuß = oder Schäd =

Schädlichkeit; samt Beantwortung aller Einwürfsen, und vielen besondern Historischen und andern anmüthigen Remarques. Zürich, bey David Gessner, 1698. 8. Bogen 18. *Vindicias hujus libri contra Censuram Eckhardi & cujusdam Anonymi vid. in Cl. Authoris Acerra, p. 520. Apophoret. p. 91. & kleinere Schrifften / p. 10-27.*

4. *Prytaneum Sacrum*; oder gründliche Verhandlung der zwischen den Reformierten und Pöbstlichen schwebender Haupt-Streit-Frag, betreffend den Richter in spänigen Glaubens-Sachen: begreiffet zugleich eine vielfältige Verthädigung der heiligen Schrift, wider allerhand Schmähtworte, damit die Römische Mönch, sonderlich neulich Capuciner Rodolff von Schweiz, in seinem an die Evangelischen Eydgnoßen ohnveranlasset abgelassenen giftigen Tractat, selbige aus dem Richters-Thron lupffen wollen; samt einer Vorred, darinn, aus Anlaß jeziger Zeit dem Teutschen Leser Bericht gegeben wird von denen Pöbstlichen Jubel-Jahren, 1700. 8. Bogen 20.

5. *Apophoreta Moralia*; sive *Desid. ERASMI de Civilitate Libellus elimatus cum Commentariolo*; cui adjuncti sunt *Trochisci Socratici*, sive selectæ veterum & modernorum quorundam Argutiarum Ethico-Policarum. Tig. typis Gelsn. 1707. 12. pl. 14.

6. *Die Leyr Tyri*, d. i. Altfräncische Vossen, mit welchen P. Rudolff Basser in seiner vor wenig Monaten ausgegebenen schmähsüchtigen Wahrheits-Sonne, die Heil. Schrift, wahre Religion, und eigne Löbl. Römisch-Catholische Obrigkeiten ins Roth zu dancen, hingegen das Mönchische Babylon auf-

zubauen oder aufzuzaubern trachtet : Verdienst-
mäßig zerschmettert und abgefertiget von J. C. A.
Anno 1707. 8. Bogen 22.

7. *Homilia Sanctiss. D. N. CLEMENTIS XI. Pont. Max. habita nuper Natalitiis, Anno 1707. & in eam Variæ Lectiones, Conjectura & Scholia, per R. P. F. NICOLAUM TORNESIUM. Coloniae apud Petrum Marteau. 8. pl. 5.*

8. *Acerra Philologica Nova, Repurgata, Aucta, das ist: Sieben- Hundert merckwürdige Historien und Discursen; Theils aus denen vorigen Editionen der so genannten Acerra Philol. und ihren Zusätzen auf gelesen, verbessert, mit vielen Anmerkungen bereichert; Theils aber von neuem (an statt zuruck gelassner sehr vieler unphilologischer Schmierereyen,) aus den besten Scribenten hinzugefüget; und also eingerichtet, daß solche den Liebhabern der Gelehrsamkeit, des Alterthums, der Mythologie, der Geschichte, der Sittenlehr, und mancherley Discurs- Materien, so wohl ergözlich, als erbaulich seyn können: Nebend- Stunden G. Seideggers, Inspect. Colleg. Abbat. Zürich, in der Gefnerischen Druckerrey 1708. 8. Bogen 63. recusa ibidem 1735. Vid. Helvetische Bibliothec. St. 2. p. 280. 281.*

9. *Delicio Holzhalbiano heu! erepto Cupressus & Grat. Monum. statutum. Tig. 1709. 4. pl. 1.*

10. *L. L. Manuductor Practicus; seu Vocabularium, tribus partibus Voces Latinas usitatissimas, una cum phrasibus & proverbiiis quamplurimis ita exhibens & tractans, ut simul & variæ constructionis probatissima Exempla, & Sacrae, moralis, politicae, &c. Sapientiae suavissima saluberrimaque completatur Semina: Jussu & Consil. Superior. in usum Scholasticæ Pubis, imo omnium, qui studia latina jucunde recolere volent, adornatum. Tiguri, ex Typographeo Bodmeriano, 1709. 8. pl. 27.*

II. Mer-

11. Mercurius Historicus, oder Kurtze monatliche Erzählung, was sich durch das ganze 1710. Jahr in Europa und andern Welt-Theilen in Kriegs- und Friedens-Sachen, auch in der Natur und Freyen Künsten neues zugegetragen; mit nützlichen und ergetzlichen Anmerkungen aus der Historie, Politic, Erd-Beschreibung, und anderen Künsten und Wissenschaften durchspicket; sammt einer Zugab der vornehmsten monatlich ans Licht kommender Büchchen, und gehörigen Register. Die 4. ersten Monat, 1710. 12. Bogen 14.
12. *Recreationes Sacrae. Pars prior, complectens Ideam Christianam Honestatis, repetitam ex Ephes. 4. & 5. Capp. Tiguri, impensis Joh. Finsleri, Bibliop. 1711. 8. pl. 23.*
Pars posterior, complectens: Orationem publ. de Naziræis V. T. Prælectiones publ. V. de Raptu & Scolope Pauli. Prælect. IV. de Creatura Gemente & Paralogisten explosum, seu animadversiones in Syllogismum quendam Pontificium noviter recoctum. &c. Tiguri, impensis Johannis Finsleri, Bibliop. Typis Schaufelberg & Christoph. Hardmejeri. 1711. 8. pl. 17.
13. **Gotthard Heideggers**, Kleinere Teutsche Schrifften. Nemlich: Schugrede der rothen Haare. (Apollo Auricomus.) Rabschrift des Tabacks, (an Zen. Theodor Zwinger, M. D. und Prof. in Basel, qui *Theatro suo Botanico* inseruit, pag. 991 - 995.) Oden und Überschriften. Salernitanische Schule. (extractum in D. Zwingers *sicherem und geschwindem Arzet*. Edit. 1703. & seq.) Nebst einer Lustschrift von den Vortheilen des Jungfrauen-Standes, mit critischen Vorreden und Nachrichten. Zürich, 1732. Druckts Marx Rordorff, (in Officina Orelliana.) 8. Bogen 22.

VI.

Nova Literaria Helvet.

1. Historische und Chronologische Nachricht, von dem richtigen Maaß des Jahres, nach welchem die Zeiten der Welt gerechnet werden; Samt der in der Kirchen von Zeit zu Zeit entstandenen Feyr- und Fest-Tagen; Von Johann Jacob Zehender, Diener des Heil. Evangelii, und Pfarrer. In dem Grossen Münster zu Bern. Gedruckt zu Bern, bey Emanuel Hortin. 1738. 8. Bogen 30.
Liber hic pari eruditione & claritate scriptus, ratione simplicissima ad cognitionem chronologiæ sacræ lectorem deducit, atque plurima difficilia S. Scripturæ loca ita explanat, ut ejusdem lectionem Doctissimus Auctor non minus jucundam quam utilem reddat.
2. Disquisitiones II. De eo quod certum & incertum est in historiis antiquioribus; quarum primam Præside V. Cl. JAC. CHRISTOPHORO BECKIO, Histor. Prof. P. in Academia Basileensi defendit Joh. Balthasar Philibertus, Basil. Magist. Candid. die 2. Maii 1738. Alteram vero Joh. Rodolphus Hummel, Basil. Magist. Candid. die 20. Maii 1738. pl. 4.
3. Dissertatio Juridica Inauguralis de Recusatione librorum furtiva, zu teutsch, dem unerlaubten Bücher-Nachdruck; quam pro capeffendis summis in utroque Jure Honoribus mense Octobri 1738. defendit JOH. RODOLPHUS THURNEISEN, Basileensis. pl. 5.
4. Disquisitio Philosophica, de statu hominum originario; Quam Præside EMANUELE WOLLEBIO, J. U. D. Defendit Joh. Jac. Ulricus, Basil. Mag. Cand. Basileæ die 23. Maii 1738. pl. 2.
5. Cogitationes Subitariae de Poenis, jure naturali licitis vel illicitis, quas Præside V. Cl. JOH. RODOLPHO ISELIO, J. U. D. publice defendit die 16. Maii 1738. Joh. Deucher, Basil. Auctor. pl. 4.

6. Thesium Philosophicarum Collectio III. Quam Præside V. Cl. JOH. BALTH. BURKARDO, Philos. Prof. P. defendit Johannes Stebelinus, Mag. Cand. Basileæ die 30. Maii 1738. pl. 1.
7. Disquisitio Philosophica de Jure Victoriz, quam Præside V. Cl. ANDREA WEISSIO, Jur. Nat. & Gent. Prof. P. defend. Joh. Jac. Merianus, & Joh. Henr. Burcardus. Mag. Cand. Basileæ die 2. Junii 1738. pl. 3.
8. Dissertatio inauguralis Physico - Medica de Rifu, quam pro gradu doctoris consequendo, publico examini submittebat FRIDERICUS LUPICHIUS, Helveto-Bernas. Habita Basil. die 7. Oct. 1738. pl. 4.
9. Laudatio Funebris consecrandæ Memoriz Viri incomparabilis, plurimum Venerandi, ac singularis Eruditionis Laude Celebratissimi JACOBI CHRISTOPHORI ISELII, SS. Theol. Doct. Contror. & Locor Commun. Profess. Academiæ Basileensis. à Bibliotheca, Regiz Gall. Inscription. & Elegant. Literarum Acad. Socii Honorarii, ad d. XV. Kal. Octob. M DCC XXXVIII. pro Splendidissima Illustrium Virorum Concione recitata à JOH. RUDOLPHO ISELIO, J. U. D. Facult. Jurid. Bas. Assessore, Sereniss. Domus Bada-Durlac. à Consil. Aul. Reg. Berol. Scient. Acad. Socio. Typis Joh. Henrici Deckeri, Acad. Typograph. Fol. pl. 20.
10. Joh. Georg Altmanns, Heilige Reden über wichtige Wahrheiten der Lehre unsers Heylands, gehalten in dem Grossen Münster zu Bern. Erster Theil, Zürich bey Heidegger u. Comp. 1739. 8. Bog. 21.
11. DAVIDIS LAVATERI, Philos. Prof. Ord. Theses Philosophicæ. Defend. Diethelmo Meissio. Tig. ex Offic. Heidegg. 1738. 4. pl. 1.
12. JOH. JAC. ZIMMERMANNI, S. Theol. Prof. Disquisitionis Historicæ & Theologicæ de Visionibus, quæ primis quatuor post Christi & Apostolorum excessum Seculis, Christianis quibusdam contigisse dicuntur, Pars Posterior. Respondente Joh. Rod. Huldrico, V. D. M. Assum. Johanne Fæbio, S. Theol. Stud. Tiguri, ex Officina Gesneriana. 1738. 4. pl. 10.
13. Gottselige Gemüthes Beschäftigung vor, bey, und nach Salzung des Seil. Nachmahls des Herrn; aus dem 23. Psal. durch Johannes d'Outrein, Diener des Heil. Evangeliums zu Amsterd. Runnebro aus dem Nieder-Teutschen ins Hoch-Teutsche übersetzt, Samt einem Anhang einiger Fest- und Nachmahls-Gebäthern. St. Gallen, in Verlag Bartholome Unhorns, 1738. 8. Bogen 35.
14. Johann Jacob Ulrichs, Treu- gewesenener Dieners am Wort Gottes

- Gottes in dem Waisenhaus zu Zürich, Prof. Ethices und Juris Nat. Die letzten Reden des am Creutz sterbenden Herzogen des Lebens; In verschiedenen Predigten verfasst, und auf Verlangen dem Druck überlassen. Zürich bey Heidegger und Comp. 1738 Med 8.
15. Des Lehrns = begierigen und Andächtigen Landmanns getreuer Wegweiser; Zur Beförderung der Ehre Gottes, und gemeinen des Landes Nutzen ans Licht gestellt von Joh. Casp. Nägeli, Pfr. im Fischenthal, Zürich bey Heidegger u. Comp. 1738. 8. Bog. 26.
16. Jacob Lauffers, Prof. Eloq. & Histor. genaue und umständliche Beschreibung Selvetischer Geschichte, aus den bewährtesten Verfassern der alten und neuen Historien, und darzu dienenden Urkunden zusammen getragen. Achzehnder Theil, (An. 1653 - 1657.) bis zum Ende des Rapperschweiler = Krieges. Zürich, verlegt Conrad Drell und Comp. 1738. 8. Bogen 23. Sub hujus Temi finem Narrationis filum, quod Cl. Laufferi præcocia Fata abruperant, non nihil continuare cœpit Cel. Tempe nostræ Editor J. G. A.
17. Beiträge zu Jacob Lauffers Geschichten der Schweizer. 4. Voll. 8. Zürich, bey Conrad Drell und Comp. 1739.
18. Das erläuterte Zeugnuß der Wahrheit, ic. Durch Daniel Wille. Frankfurt und Leipzig 1738. 8. Bogen 26.
19. Christlicher Zeitvertreib; oder kurze und gründliche Anleitung, wie ein jeder Handwercks- und Baursmann, Dienst und Tagelöhner, in der Forcht und Gegenwart Gottes arbeiten solle, um sich desselben Beystands, Schutz und Segens nach Seel und Leib zu trösten. Zum viertenmahl aufgelegt, mit einer Vermehrung von Betrachtungen u. Seuffzern über die Wohlthaten Jesu. Zürich, bey Joseph Lindiners seligen Wittwe. 1738. 12. Bogen 6.
20. Grundriß der Lehre der Wahrheit, die da ist nach der Gottseligkeit; In kurzer Erklärung des kleinern Züricherischen Catechismi; Zusammen getragen von einigen für die Erbauung der Jugend sorgfältigen Freunden Stein. 1738. 12. Bogen 14.
21. Musicalisches Halleluja; oder schöne und geistreiche Gesänge, mit neuen und anmuthigen Melodien bekleidet, ic. in Druck übergeben von Joh. Caspar Bachofen, V. D. M. & Cant. Schol. Abbatiss. Dritte, vermehrte und privilegierte Auslag. Zürich, bey Joh. Heinrich Bürdli 1739. Median 8. Bogen 45.
22. Urim und Thumim, ic. oder Religions = Gesprächen, Achter Theil. 8. Vid. sup. p. 358.
23. Glaubens = Waag, nach der Richtschnur des Heil. Wortes Gottes gerichtet; mit welcher die wahre Evangelische Religion gegen der Widerwärtig, Pabstlichen gehalten, zugleich aber auch erwiesen wird, was massen das Gewicht der ewig, göttlichen Wahrheit bey der Evangelischen, und

- und nicht bey der jetzig, päpstlichen Kirchen bestche, (samteiner Zugab und Anhang.) Zürich, bey Joh. Heinrich Bürkli 1738. 8. Bogen 13.
- 24 Die Herrliche Wunder, welche Gott in der vor hundert Jahren an der Gemeinde Haag in der Herrschafft Sar geschehenen sel. Refor- mation gethan, daß er sie aus der Finsternuß zu dem Licht des Evange- liums bruffen. In zweyen den 11. und 18. Augstm. 1737. gehaltenen Betrachtungen, vorgestellt von Caspar Thomann, Pfr. beyder Ge- meinden Sales u. Haag. Zürich, bey Heinrich Bürkli, 1738. 8. Bog. 6.

VII.

ELENCHUS DISSERTA-
TIONUM, &c.
TOMI TERTII.

Seßio I.

- I. *Ludovici Burgeti* Dissertatio de vero atque genuino Juris Naturalis Studii Usu. pag. 9.
- II. *Historia Vitæ, Operum & Obitus, Viri Cl. Jacobi Christoph. Isse- lii*, SS. Theol. Doct. & Prof. in Academia Basil. p. 42.
- III. *Joh. Conradi Fueslini* Commentatio Philologico - Critica in Rom. 5: 13. p. 61.
- IV. *Joh. Georgii Altmanni* novas Observationum Græcarum ad quæ- dam loca Novi Fœderis. p. 76.
- V. *Ludovici Cocheti* Responsio ad *Simplicii Verini* Animadversiones Crit. in Dissertationem de Systematibus Orthodoxorum, Remon- strantium ac Socinianorum, Tempe Helvet Tom. II. p. 311-330. contentas. Additæ sunt ejusdem *Simplicii Verini* Notæ ad hanc Responsionem. p. 96.
- VI. *Joh. Rodolphi Crameri*, Theologi Tigur. Celeberrimi, Vitæ Fa- torumque brevis Narratio. p. 152.
- VII. *Nova Literaria Helvetica*. p. 158.

Seßio II.

- I. *Marci Morloti* Disputatio Theol. de Idololatria Gentili. p. 169.
- II. *Joh. Caspari Brunneri*, dum viveret, Archidiac. & Canon. Tigur. Venerandi, Oratio Paneg. de Spiritu non extinguendo, ad locum 1. Thes. 5: 19. p. 191.
Adjuncta est Historia Vitæ Ejus à *Joh. Casp. Huldrico*. p. 225.
- III. *Ludovici Tronchini* Oratio Inauguralis de Requisitis Doctoris Evangelici, in 2. Tim. 2: 23-25. Cui adjuncta Descriptio Vitæ & Obitus

Obitus atque Operum Viri Cl. *Joh. Alphonsi Turretini*, Theologi Genevensis Celeberr. p. 232.

IV. *Jacobi Bruckeri* Dissertatio Epistolaris de Stoicis, subdolis Christianorum imitatoribus. p. 270.

V. *Jac. Christoph. Beckii* Specimen Observat. Historicarum. p. 296.

VI. *Sam. Koenigii* Meditationes de Mysterio Vaticanorum, Jesaja & Michæ cit. Matth. Cap. 1. & 2. de Nativitate Christi. p. 310.

VII. *Joh. Frid. Stapferi* Dissertatio de Longanimitate Christi erga Ecclesiam Judaicam interitui proximam, ad illustrationem loci Matth. 12: 10. p. 325.

VIII. Nova Liter. Helv. p. 356.

Sectio III.

I. *Jacobi Kocheri* Observatio Critica de Emphasi Sermonis in Terræ Interrogatione Christi ad Apost. Petrum, Joh. 21: 15-17. p. 360.

II. *Joh. Georgii Altmanni* Prælectio Literaria pro Comoedia & Tragicis Theatralibus. p. 394.

III. *Petri Adolphi Boyßen* Dissertatio Philologico-Critica de *Kußens* *Ανδραγαθία*, in locum Ephes. 4: 14. p. 412.

IV. *J. R. S.* Emendatio & Explanatio loci ex Epistola Firmiliani ad Cyprianum, nec non loci cujusdam ex Fl. Josepho. p. 430.

V. *Emanuelis Wolleb* Disquisitio Historica de Causis proxime antecedentibus Romæ Foundationem. p. 454.

VI. Themata Prælectionum & Disputationum, Speciminis Publici edendi gratia, pro Cathedra Philosophica Lausannensi consequenda, DD. Candidatis præscripta. p. 481.

VII. *Joh. Rodolphi Rodolph*, Iridis Theoria Sacra, sive Dissertatio Theolog. de Fœdere Noachico, ejusque Sacramento, nempe Arcu Cœlesti, ex Genes. 9: 8-17. p. 502.

VIII. Nova Literaria Helvet. p. 538.

Sectio IV.

I. *Joh. Rodolphi Salchli*, Dissertatio de Fœdere Operum ex mente Judæorum. p. 544.

II. *Joh. Rod. Rodolph*, Dissertatio Philologico-Isagogica ad Chronologicam S. & Ecclesiast. Sect. I. De Tempore in genere, Die & Septimana. p. 572. Sect. II. De Mense & Anno. p. 600.

III. *Samuelis Koenigii* Defensio Fidei Nicenæ, de vera & æterna Filii Dei Deitate, ex Prov. 8: 22-31. cum adjectis quibusdam Observationibus ad loca quædam alia Libri Prov. Salomonis. p. 632.

IV. *Joh. Georgii Altmanni* Dissertatio de Creatura Gemente, ad Roman. 8: 19. &c. p. 651.


V. *Gotthardi Heideggeri* Petrus Lapsus; cum Catalogo Scriptorum ejus. p. 681.

VI. Nova Literaria Helvetica. p. 696.

VII. Elenchus Dissertationum, &c. Tomi III. p. 699.

MAG 2020/123





1930

